






Presented to
The Library
of the
University of Toronto
by

The Estate of the late
G. Percival Best, Esq.





Digitized by the Internet Archive
in 2011 with funding from
University of Toronto



Plutarch. Vitæ parallelæ (lives)

LES
VIES DES HOMMES
ILLVSTRES, GRECS ET
Romains, comparees l'une
avec l'autre par Plutarque
de Chæronce,

Translatees premierement de Grec en François par maître Jaques Amyot lors Abbé de Bellozane, & depuis en ceste troisieme edition reueuës & corrigees en infinitis passages par le mesme Translateur, maintenant Abbé de saint Corneille de Compiègne, Conseiller du Roy, & grand Aumosnier de France, à l'aide de plusieurs exemplaires uieux escripts à la main, & aussi du iugement de quelques personnages excellents en sçavoir.

III. VOLUME.

Aristides.	Pyrrus.
Marcus Cato.	Caius Marius.
Philopœmen.	Lyfander.
T. Q. Flaminius.	Sylla.

A PARIS,
Par Vascosan Imprimeur du Roy.
M. D. LXVII.
AVEC PRIVILEGE.

LES
VIES DES HOMMES
ILLUSTRES, GRECS ET
ROMAINS, comparées l'une
avec l'autre par Plutarque
de Chéron.

Traduites par M. de la Roche
du Perron, de l'Académie
française, & corrigées en
plusieurs endroits, par
M. de la Roche, de l'Académie
française, & de la Société
royale de France, à Paris,
chez M. de la Roche, au
Palais national, ci-devant
des Arts, ci-devant de la
Librairie, ci-devant de la
Maison de la Reine, ci-devant
de la Bibliothèque du Roi.

LGr
P737v
Fa.3

606362
21.4.55



A PARIS,
chez M. de la Roche, au
Palais national, ci-devant
des Arts, ci-devant de la
Librairie, ci-devant de la
Maison de la Reine, ci-devant
de la Bibliothèque du Roi.
M. D. LXXVII.
AVEC PRIVILEGE.



ARISTIDES.

ARISTIDES filz de Lyfismachus, estoit pour certain de la lignee Antiochide, du bourg d'Alopece: mais quāt à ses biens & à ses facultez, on en a escrit en diuerfes manieres, pource que les uns disent qu'il uescut toute sa uie en trefestroitte pauureté, & qu'il laissa deux filles, lesquelles apres la mort de leur pere demourerent long temps sans estre mariees à cause de leur pauureté: & combien que la plus part des anciennes histoires s'accorde à cela, neantmoins Demetrius Phalereus en un liure qu'il a intitulé Socrates, escrit au contraire, qu'il scauoit une possession au bourg de Phaleree, que lon appelloit encore la terre & possession d'Aristides, en laquelle son corps est enterré. Et oultre cela, pour monstrier qu'il auoit bien dequoy, & que sa maison estoit opulente & riche, il en allegue de telz indices: Premièrement qu'il fut un an

Preuost annuel de la uille d'Athenes, que lon appelloit Archon Eponymos, pource que l'annee prenoit sa denomination du nom de celuy qui l'estoit par chacun an, & dit qu'il l'obteint par le sort des febues selon l'ancien usage des Atheniens, & selon la maniere qu'ilz auoyent de proceder à l'electiō dudit office, en laquelle election n'estoyent admis à tirer au sort des febues, que ceulx qui estoyent de la plus haulte taxe en l'estimation de leurs biens, lesquelz on appelloit à Athenes Pentacosiomedimnes, c'est à dire, qui auoyent de reuenu la ualeur de cinq cents minots de bled & au dessus. Secondement il allegue, qu'il fut relegué ou banny du ban qui s'appelle Ostracisme, duquel on n'auoit point accoustumé de bannir les pauvres, ains seulement les nobles & les riches, ausquelz le menu peuple portoit enuie, à cause de leur grandeur. Tiercement & pour son dernier argument, qu'il a laissé & donné au temple de Bacchus des uases à trois pieds, que souloyent ordinairement offrir les entrepreneurs qui auoyent emporté le pris es ieux de Comedies, Tragedies, ou autres telz esbatemens, dont ilz auoyent fait les frais, & sont encore lesdicts uases, que lon dit auoir esté dōnez par Aristides, en estre, » sur lesquelz on lit une telle inscription : La li- » gnee Antiochide emporta le pris, Aristides fut » le desfrayeur des ieux, & Arcestratus le poëte » qui feit iouer ses Comedies. Ce dernier argu-

ment, combien que ce soit celuy, auquel il semble auoir plus d'apparence, est neantmoins le plus foible & le plus debile: car Epaminondas, lequel, comme chacun sçait, nasquit, fut nourry & uescut tousiours en grande pauureté, & Platon aussi le philosophe, accepterent la charge de faire les frais de ieux qui n'estoyent pas de petite despenſe, ayât l'un desfrayé à Thebes les ioueurs de flustes, & l'autre à Athenes la danse des enfans qui balloyent en rond, à quoy faire Dion le Syracusain fournissoit argent à Platon, & Pelopidas à Epaminondas. Car il n'est pas dit, que les hommes de uertu doyent auoir une guerre mortelle, par maniere de dire, cōtre les presens que leur pourroyēt faire leurs amis, & qu'ilz ne puissent en quelque sorte que ce soit iamais accepter ny prēdre rien d'eulx: bien doyuent ilz estimer ord & sale d'en prendre par auarice pour s'enrichir, ou pour espargner & mettre en reserue: mais quand il est question de quelque entremise honorable, & de quelque magnificence publique, dont il ne reuient rien particulierement à leur profit, ilz ne doyuent point reietter ny refuser les offres que leur font leurs amis. Et quant aux uases qu'il dit auoir esté offerts & donnez au temple de Bacchus, Panætius monstre euidemmēt, que Demetrius a esté abuzé par la semblance du nom, pource que depuis le temps des guerres Medoises iusques au commencement de la guerre Pelopo-

nesiaque, il ne se treuve es registres des def-
frayeurs des ieux publiques, que deux uain-
cueurs ayans ce nom de Aristides, desquelz ny
l'un ny l'autre n'est le filz de Lyfimachus, dont
nous escriuons à present : car l'un est notam-
ment inscript filz de Xenophilus, & l'autre a
esté long temps apres celuy dont nous parlons,
ainsi que lon peult manifestement cognoistre
par l'escripture & orthographe qui est selon les
regles de grammaire, dont on a uzé en la Gre-
ce depuis Euclides : & aussi le peult on cognoi-
stre par le nom du poëte Arcestratus qui y est
adioinct : car il n'y a personne qui face men-
tion d'un poëte de ce nom la en tout le temps
des guerres Medoises: mais au temps de la guer-
re Peloponesiaque, plusieurs le mettent pour
autheur & compositeur des hymnes & canti-
ques qui se chantoient es danses publiques.
Toutefois quant à ces oppositions que fait Pa-
nætius, il faudroit un peu plus auant & plus di-
ligemment y penser: mais quant au ban de l'O-
stracisme, il est certain que tous ceulx qui e-
stoyent de beaucoup eminents par dessus les
autres, fust ou en gloire & bonne renommee,
ou en noblesse, ou en eloquence, y estoyent
subiects, attendu que Damon mesme, prece-
pteur de Pericles, en fut banny, seulemēt pour-
ce qu'il sembla au commun peuple qu'il estoit
trop sage. Qui plus est, Idomeneus escrit que
Aristides fut Preuost annuel, nō par le sort des

febues, ains par les uoix des Atheniens qui le uoulurent eslire : & fil le fut depuis la iournee de Plataës, ainsi comme Demetrius l'escriit, il est uray-semblable que lon luy feit cest honneur pour son excellente uertu, & ses grands merites & seruices, que les autres souloyent obtenir pour leurs richesses. Mais ce Demetrius ne s'efforce pas d'exempter Aristides seulement de pauvreté, ains en ueult aussi guarentir Socrates, comme si c'estoit un grand uice & un grand reproche : car il escriit qu'il auoit non seulement une maison à luy, mais dauantage ^a soixâte & dix mines d'argent, que Criton luy faisoit profiter, & luy en payoit usure. Pour donques retourner à l'histoire d'Aristides, il fut familier amy de Clisthenes, celuy qui restablit le gouuernement de la chose publique à Athenes, apres que les trente tyrans en eurent esté dechassez, & eut en singuliere recommandation Lycurgus Lacedæmonien par dessus tous autres, qui iusques à son temps s'estoyent entre-mis d'ordonner ou administrer le gouuernement d'une chose publique, ce qui fut cause qu'il aima tousiours & fauoriza l'estat de l'Aristocratie, c'est à dire, de la noblesse, ou un petit nombre des plus gens de bien ont entre mains l'autorité souueraine : mais il eut pour contre-pois Themistocles filz de Neocles, qui fauorisa tousiours l'estat populaire. Si disent aucuns que des le temps de leur premiere enfance estans

a Enuicō
sept cents
escus.

nourriz & instituez ensemble, ilz estoient tousiours en toutes leurs actiōs & en tous leurs propos contraires l'un à l'autre, soit qu'ilz se iouassent, ou qu'ilz feissent à bon esciant, & que des lors on commença à descouvrir le naturel de l'un & de l'autre par celle cōtrariété de uolunté, pource que l'un estoit prompt, soudain, hazardeux, fin, & qui legerement entreprenoit toutes choses: & l'autre au cōtraire estoit froid, reposé, constant & arresté, qui pour rien n'eust deuoyé du droit sentier de la iustice, & n'eust usé de mensonge, d'affetterie, ny de tromperie, non pas en ieu seulement. Toutefois Ariston natif de Chio escrit, que leur inimitié commença d'amourettes premièrement, & que par traict de temps elle uint depuis à si grand accroissement, pource, dit il, que l'un & l'autre deuint amoureux d'un ieune garson nommé Stesileus, qui estoit de l'isle de Ceos, le plus beau & le mieulx formé de tous ceulx qui estoient de son aage: & ne leur passa pas ceste affection legerement, ny ne laisserent pas la ialouzie qu'ilz en conceurent l'un contre l'autre, aussi tost comme la fleur de la beaulté du garson fut passée, ains comme filz se fussent seulement esfayez en ceste poursuite de leur amour, ilz s'atlerent depuis ietter ensemble au gouuernement de la chose publique, pour faire à bon esciant ainsi picquez & irritez, comme ilz estoient, de ialouzie l'un contre l'autre. Or quant à Themi-

stocles, il se meit incontinent à gagner & prat-
 iquer amis, par le moyen desquelz il acquit en
 peu de temps authorité non petite, & si prou-
 ueur d'un fort rempar à la seureté de sa person-
 ne: aussi respondit il un iour à quelcun qui luy
 disoit, qu'il estoit bien digne de gouverner la
 uille d'Athènes, & qu'il le feroit bien, prouueu
 qu'il se monstast également un & commun à
 tous: Ia Dieu ne plaïse, dit-il, que ie sois iamais
 assis en siege de Gouverneur, ou mes amis ne
 treuuent non plus de port & de faueur que les
 estrangers, qui ne me feront rien. Mais Aristi-
 des au contraire cheminant, par maniere de di-
 re, tout seul, ne se uoulut iamais bander ny faire
 ligue avec personne en l'administration de la
 chose publique, pour autant que premiere-
 ment il ne uouloit faire tort à personne à l'ap-
 petit de ceulx dont il se seroit allié, ny aussi
 les fascher en leur refusant quelque chose dont
 ilz le pourroyent requerer: & dauantage pour
 autant qu'il en uoyoit plusieurs prendre la har-
 dieſſe de faire des choses contre tout droit &
 toute raison, à cause qu'ilz se sentoient forts
 d'amis, ayant opinion que l'homme de bien
 & bon citoyen ne se doit asseurer ny fortifi-
 fier d'autre rempar, que de faire, de conseiller
 & de dire toutes choses bonnes & honestes. Ce-
 neâtmoins uoyant que Themistocles remuoit
 temerairement beaucoup de choses, & qu'il luy
 estoit contraire à toutes ses entreprises, & luy

rompoit tous ses desseings, il estoit aussi luy-mesme cōtraint de resister aucune fois à ce qu'il mettoit en auant, & se formaliser contre luy, quelque fois pour luy rēdre la pareille, & quelque fois aussi pour rabbatre un peu son autorité & son credit, qui alloit tousiours augmentant pour la faueur que le peuple luy faisoit, estimant qu'il ualoit mieulx en luy contredisant, empescher aucune fois quelque chose qui eust esté au profit de la chose publique, qu'en le laissant en uenir au dessus, souffrir son credit & sa puissance deuenir trop excessiue en toutes choses. Brief il aduint une fois entre autres, que Themistocles ayant mis en auāt une prattique qui estoit bien utile & profitable à la chose publique, Aristides luy resista de telle sorte, qu'il l'obteint & gagna contre luy: si ne se peut contenir qu'il ne dist au partir de l'assemblée, en laquelle l'entreprise de Themistocles auoit esté reiettee, qu'il estoit impossible que les affaires de la chose publique d'Athenes se portassent iamais bien, si on ne les iettoit tous deux, Themistocles & luy, dedans le Barathre, qui estoit un abyssine, ou lon precipitoit les malfaitteurs condamnez à la mort. Vne autre fois il auoit mis en auant & proposé au peuple un aduis, contre lequel il y eut plusieurs oppositions & contradictions faites, mais nō obstant il l'emportoit: & ainsi que le magistrat qui presidoit en celle assemblée de cōseil, uouloit demander au peuple,

quelle estoit sa uoulunté là dessus pour le faire passer, Aristides recognoissât par les raisons qui auoyent esté alleguees & deduittes contre son aduis, que ce qu'il mettoit en auant estoit dommageable au public, se deporta sur le champ de le uoloir faire autoriser par les uoix du peuple. Il faisoit aussi souuentefois mettre ses conseils en auant par personnes interposees, de peur que Themistocles, pour la pique particuliere qu'il auoit encontre luy, ne s'opposast à un bien public. Mais on trouuoit sa grauité & sa constance grandement louable & admirable es diuers accidents, qui aduiennent à ceulx qui s'entremettent du gouuernement des affaires publiques : car iamais pour honneur qu'on luy feist, il ne s'esleua, ny pour rebut ou refus qu'il souffrist aussi, ne s'abaisa, ny ne se troubla, ayât opiniõ q'un bon citoyen se doit tousiours egalemement tenir prest, & offrir corps & esprit à seruir la chose publique, sans en esperer ou attendre aucun loyer mercenaire ny d'argent, ny d'honneur & de gloire. Et pourtât un iour que lon prononceoit au Theatre certains uers de l'une des Tragedies d'Æschylus, faits en la louange de l'ancien deuin Amphiaraus, dõt la substance estoit telle:

- 33 Il ne ueult point sembler iuste, mais l'estre,
- 33 Aimant uertu en penſee profonde,
- 33 Dont nous uoyons ordinairement naistre
- 33 Sages conseils, ou tout honneur abonde.

tout le monde ietta incontinent les yeux sur Aristides, comme sur celuy à qui ueritablemēt, plus qu'à nul autre, appartenoit la louange d'une si grande uertu : car il n'estoit pas seulement ainsi ferme & roide pour resister à faueur & à grace seulement, mais aussi à ire & à haine semblablement: pource que là ou il estoit question de iustice, amitié ne luy eust sceu rien faire faire pour ses amis, ny inimitié cōtre ses ennemis. Auquel propos on racompte, que quelquefois il auoit mis en iustice un sien ennemy, & le poursuyuoit en iugemēt, & que apres qu'il eut deduit toute son accusatiō, les iuges furēt si irritez à l'encōtre du criminel, q̄ sans l'ouir autrement, ilz le uouloyent condāner: mais Aristides se leuant de son siege, s'en alla ietter aux pieds des iuges avec le criminel, en les suppliant qu'il eust audiēce, pour se pouuoir iustifier & defendre ainsi que les loix le commandent. Et une autre fois qu'il estoit iuge entre deux particuliers qui plaidoyent deuant luy, il y eut l'un
des deux qui se prit à dire : Ma partie aduer-
se t'a fait beaucoup de tort & de fascherie à toy
mesme, Aristides. Il luy^rrespondit promptement, Mon amy, dis seulement fil t'en a fait à
toy: car ie suis icy pour te faire droit, & non pas
à moy. Dauantage estant eleu tresorier general
de tout le reuenu de la seigneurie d'Athenes, il
monstra que tous ceulx qui auoyent manié les
finances de la chose publique, non seulement

de son temps , mais encore au parauant, auoyét grandemēt pillé & desrobbé le public , mesmement Themistocles, lequel estoit bien homme aduisé & de grand sens , mais il n'auoit pas les mains seures ny nettes: & pourtant quād Aristides uoulut rendre ses comptes , Themistocles & plusieurs autres par luy suscitez , se banderent à l'encontre de luy , & le chargerent d'auoir mal uersé & desrobbé en son office , & de faict en feirēt telle poursuite, qu'il en fut condamné par leur menee, ainsi que recite Idome-neus . Toutefois les plus gros & plus gens de bien de la uille, uoyans le tort qu'on luy faisoit, prirent sa cause en main, & feirent que non seulement l'amēde en laquelle il auoit esté cōdamné luy fut remise par le peuple , ains luy fut de rechef baillee la mesme charge pour l'annee ensuyuant : en laquelle il fait semblant de se repentir de s'estre gouuerné cōme il auoit fait en la precedente annee, se monstrant plus traittable à ceulx qui auoyent à faire à luy , & ne prenant pas les choses de si pres, ny ne les examināt pas si rigoureusement qu'il auoit fait au parauant: au moyen dequoy ceulx qui desrobboyēt la chose publique le louoyēt merueilleusemēt, & briguoyent eulx mesmes pour le faire encore continuer en cest office. Mais quand ce uint au iour de l'election, que les Atheniens le uoloyent encore elire, luy mesme les en reprit & tensa, en leur disant: Quand i'ay fidelemēt &

» bien administré la charge que uous m'auiez cõ-
» mise, i'en ay receu de uous oultrage, honte &
» uillannie, & maintenant que i'ay fait semblant
» de ne uoir point beaucoup de larcins & de pil-
» leries que lon commet en uoz finances, uous
» me tenez pour homme de bien & bon citoyen:
» mais ie uous dis & uous declare, que i'ay plus
» de hôte de l'hõneur que uous me faictes main-
» tenant, que ie n'eus de l'amende, en laquelle
» uous me condamnastes l'annee passée: & suis
» marry qu'il faut que ie uous die, qu'enuers uous
» il est plus louable de gratifier aux meschans,
» qu'il n'est pas de garder le bié public. En dedui-
» fant ces remonstrances, & descourant les lar-
» cins ordinaires que commettoient les officiers
» de la uille, il ferma la bouche aux larrons, qui si
» haultemēt le louoyent, & alloient tesmoignant
» au peuple qu'il estoit tant homme de bien: &
» au contraire, rapporta une iuste & ueritable
» louange des gens de bien & d'honneur. Au de-
» mourant, estant Dathis lieutenant du Roy de
» Perse, Darius, uenu aborder avec toute sa flot-
» te, & prendre terre au quartier de Marathon
» dedās le païs d'Attique soubz couleur, comme
» il disoit, de se uouloir seulement uenger des A-
» theniens qui luy auoyent bruslé la uille de Sar-
» dis, mais à la uerité en intention de subiuguer
» & conquerir toute la Grece, & courant & pil-
» lant tout le plat païs: les Atheniens eleurēt dix
» Capitaines pour la conduitte de ceste guerre,

entre lesquelz Miltiades estoit bien celuy qui auoit plus de dignité & d'autorité : mais Aristides le suyuoit de bien pres en reputation & en credit, d'autant mesmement qu'il seruit de beaucoup à la uictoire, quand il s'accorda à l'opinion de Miltiades, au conseil ou il fut conclud, que lon donneroit la bataille aux Barbares, & aussi quād il ceda uoluntairement l'autorité de commander souuerainement en l'armee à Miltiades, pource que chasque Capitaine à son tour auoit un iour, auquel il commandoit à toute l'armee, & quand le tour uint à luy, il remeit sa preeminence de commander entre les mains de Miltiades, enseignant à ses autres compagnons, que se soubmettre & obeïr aux plus sages, non seulement n'est point chose reprochable, ains est & salutaire & honorable. Ainsi appaisant par son exemple le debat qui eust peu s'esmouuoir entre eulx, & les admonestant de s'accorder à suyure tout le conseil & auis de celuy qui entendoit mieulx le faict de la guerre, il fortifia grandement Miltiades, lequel se sentit bien plus asseuré & plus ferme quand l'autorité de commander ne fut plus distraitte: car depuis que Aristides luy eut une fois cedé son autorité, chascun des autres en feit autāt quād se uint à son tour, & se soubmeirent tous à luy. Mais au iour de la bataille l'endroit ou les Atheniens eurent le plus d'affaires, fut le milieu là ou estoient renees les lignees Leontide &

Antiochide : car ce fut le lieu ou les Barbares feirent plus d'effort, & ou ilz combattirent plus longuement , & là Temistocles & Aristides combatans à costé l'un de l'autre , pource que l'un estoit de la lignee Leontide , & l'autre de l'Antiochide, feirent de grandes prouesses à l'enuy l'un de l'autre , tant que finablement les Barbares ayans esté rompus & tournez en fuite à ual de rouverte, ilz les chasserent iusques dedans leurs uaisseaux : mais embarquez qu'ilz y furent, les Capitaines Atheniens uoyans qu'ilz ne prenoient pas la rouverte des isles , qui estoit pour eulx en retourner en Asie, ains estoient poulsez par l'impetuosité du uent & des courans de la mer , au dedans de l'Attique, uers la uille d'Athenes, ilz eurent peur que la trouuans desgarnie de gens de defense, ilz ne donnassent dedans, & à ceste cause y menerent en toute diligence neuf lignees, avec lesquelles ilz cheminerent si hastiuement, que le iour mesme ilz y arriuerét, ayās laissé au camp à Marathon Aristides avec les combatans de sa lignee pour garder les prisonniers, & le butin que lon auoit pris & gaigné sur les Barbares. En quoy ilz ne se trouuerent point deceuz de l'opinion qu'ilz auoyent de la preudhommie d'Aristides: car combien qu'il y eust force or & argent, force habillemens, meubles & autres biens infinis par toutes les tentes & pauillons des Barbares, & aussi dedans les uaisseaux qui

furent pris sur eulx, il n'eut iamais la conuoi-
tise d'y toucher seulement, ny ne souffrit qu'au-
cun autre y touchast, si ce ne fut à son desceu
que quelques uns y feirent bien leurs beson-
gues, comme entre autres Callias l'un des
presbtres de Ceres surnommé Dadouchos, c'est
à dire, porte torche, pource que es secrets sa-
crifices de Ceres, son office estoit de tenir la
torche: car il y eut un des Barbares, qui luy uoy-
ant la teste ceincte d'un badeau, & les cheveux
longs, pensa que ce fust quelque Roy, & se iet-
tant à ses pieds luy baïsa la main, & luy monstra
une grande quantité d'or qu'il auoit cachee &
enterree dedans une fosse: mais Callias se mon-
strant le plus cruel, le plus lasche & le plus
meschant homme de dessus la terre, enleua
l'or, & tua sur le champ le pauvre Barbare
qui le luy auoit enseigné, de peur qu'il ne le
dist à d'autres. C'est pourquoy les poëtes Comi-
ques par mocquerie appellent ceux qui sont de-
scendus de luy, Laccoplutes, comme qui diroit,
enrichiz de la fosse, à cause de la fosse ou
Callias trouua celle quantité d'or. Incontinent a-
pres ceste bataille Aristides fut eleu Preuost an-
nuel d'Athenes, quoy que Demetrius Phalereus
escriue que ce fut peu de temps auant sa mort,
apres la iournee de Plataës. Car es registres ou
sont escripts par ordre les Præteurs de chascun
an, il ne s'en treuve point qui ayent nom Aristi-
des, plusieurs anneés apres un Xanthippides, en

l'an duquel Mardonius lieutenant du Roy de Perse fut desfait aupres de Plataës : & au contraire, incontinent apres Phanippus, en l'an duquel fut la iournee de Marathon, on treuve Aristides enrollé au reng des autres Preuosts. Mais de toutes les uertus & louables qualitez, qui estoient en Aristides, la mieulx cogneue, & celle dont le peuple auoit plus d'experience, estoit sa iustice, pour autant que c'est la uertu dont l'usage & l'exercice est le plus cōtinuel, & du fruct de laquelle plus de gens se sentent ordinairement: dont il aduint que luy hōme pauvre, bas & simple, acquit le plus diuin & le plus royal surnom, que iamais homme sçauroit acquerir, c'est qu'il fut nommé par une publique uoix du peuple, le Iuste. Ce surnom n'a iamais esté requis ne desiré par les Roys, par les Princes, ny par les Tyrans: mais biē ont ilz pris plaisir de se faire surnommer les uns Poliorcetes, c'est à dire, forceurs de uilles: les autres Cerauni, c'est à dire, fouldroyans: aucuns Nicanores, c'est à dire, uictorieux ou conquerans: & quelques uns Aeri, & Hieraces, c'est à dire, Aigles, Faulcons & autres telz oyseaux de proye: aimās mieulx comme il appert par tels surnoms, la louange & la reputation procedente de force & de puissance, que celle qui procede de bonté & de uertu. Et neantmoins la diuine essence, à laquelle ilz desirent tant se conformer & egaler, precede toutes autres essences & natures en
trois

trois choses principalement, c'est à sçauoir, en immortalité, puissance & bonté, desquelles trois, la bonté & la uertu est la plus uenerable, & ou il y a plus de diuinité. Car d'estre incorruptible & immortel, les quatre elemēts & le uuide le sont aussi bien, ainsi que tiennent les philosophes naturelz : & quant à la force & puissance, les tremblemens de terre, les fouldres, les impetueux tourbillons de uēts, les torrens & inundatiōs d'eaux l'ont tresgrāde: mais de iustice, droiture & equité, il n'y a rien qui en puisse estre participant, sinon ce qui est diuin, par le moyē de la raison & de l'entendēmēt. Et pourtant, comme ainsi soit que les hommes ayent ordinaiремēt trois differentes affectiōs enuers les Dieux: l'une, qu'ilz les estimēt bienheureux: l'autre, qu'ilz les craignēt: & la tierce, qu'ilz les honorent: il semble qu'ilz les reputent heureux pour l'eternité & immortalité de leur essence: qu'ilz les craignent & redoubtent à cause de leur seigneurie & de leur toute-puissance: & qu'ilz les aiment, adorent & reuerent pour leur iustice: & neantmoins les qualitez de ces trois, que plus les hommes appetent, sont l'immortalité, de laquelle nature humaine n'est pas capable: & la puissance, dont la plus grande partie depend de la fortune: & ce pendant ilz laissent la uertu en arriere, qui est le seul bien des Dieux, duquel nous pouuons estre capables: en quoy ilz faillent & s'abusent grandement,

pource que iustice rend la uie de ceux qui sont colloquez en hault degré de fortune, de puissance & d'autorité, diuine & celeste: & iniustice la rend bestiale & sauuage. Or pour retourner à Aristides, ce surnom de Iuste du commencement luy apporta l'amour & bienueillance du peuple: mais depuis il luy en suscita & engendra l'euie par les menees de Themistocles mesmement, lequel alloit disant & semant par tout qu'Aristides auoit aboly tous les iugemens, pour autant que du gré & consentement des parties, il estoit tousiours eleu arbitre pour cognoistre & iuger de tous differents, & que par ce moyen il s'alloit secrettement acquerant une souueraine puissance de monarque, sans auoir besoing de gardes ny de satellites. Dauantage le peuple qui estoit deuenu hault à la main depuis la uictoire de Marathon, & qui uouloit que toutes choses entieremēt dependissent de luy & de son autorité, trouuoit mauuais & estoit marry quand quelcun des particuliers surpassoit les autres en bonne renommee & bonne reputation: à l'occasiō dequoy ilz s'assemblerent de tous les costez du païs de l'Attique, en la uille, & bannirent Aristides du ban qui s'appelloit Ostracisme, desguisans l'enuie qu'ilz portoyent à sa gloire, en l'appellant crainte de tyrannie. Car ceste maniere de bannissement qui s'appelloit Ostracisme, ou Exostracisme, n'estoit point punition ordonnee pour aucun

crime, ny forfaiture : ains disoit on, pour luy donner honeste couuerture, que c'estoit seulement un rabais & diminution d'autorité trop grande, & d'une puissance trop excessiue pour un estat de chose publique populaire : mais à la uerité, ce n'estoit autre chose qu'un moyen de contenter doucement & gracieusement l'enuie que le peuple cõceuoit à l'encontre de quelque particulier, laquelle enuie ne desployoit sa maluueillance à l'encontre de celuy dont la grandeur luy faschoit en aucun mal irreparable, ains seulement en ce qu'elle le releguoit & contraignoit de s'absenter pour dix ans. Mais depuis que par prâttiques & menees on commença à soubmettre de petites personnes, ou bien de mauuais hommes à ce bannissement, comme un Hyperbolus qui en fut le dernier banny, on desista du tout d'en user à Athenes. Si ne sera point hors de propos, de declarer en cest endroit, comment & pour quelle cause cestuy Hyperbolus en fut relegué : Alcibiades & Nicias estoient de leur tēps les premiers hommes d'Athenes, ayās picque l'un contre l'autre, comme il aduiant ordinairement entre pareilz. Et uoyās q̃ le peuple uouloit en une assemblee proceder à l'execution de cest Ostracisme, ilz se doubterēt bien que c'estoit pour en releguer & bannir l'un d'eulx : si en parlerent l'un avec l'autre, & accorderent leurs suyuañs & adherēts ensemble, & les ioignirent en une ligue si bien,

que quand ce uint à recueillir les uoix du peuple pour uoir à la pluralité des suffrages, qui estoit celuy qui demouroit banny, on trouua que c'estoit Hyperbol^o: dequoy le peuple fut si mal content, uoyant la chose ainsi auilee, moquee & deshonorée, qu'onques puis il n'en uolut user, & en abolit l'usage entieremēt. Mais pour donner sommairement à entendre que c'estoit, & comme il se faisoit, il fault noter qu'à certain iour qui estoit dict & prefix, chascun citoyē apportoit une coquille, sur laquelle il escriuoit le nom de celuy qu'il uouloit estre banny, & la portoit dedans un pourpris réfermé tout à l'entour d'une cloison de bois que lon faisoit sur la place: puis quand chascū y auoit porté la siene, les magistrats & officiers de la uille uenoyēt à cōpter toutes ces coquilles ensemble: car s'il y auoit moins de six mille citoyens qui eussent apporté de ces coquilles ainsi escrites, l'Ostracisme estoit imperfait. Cela fait on mettoit à part chascun nō escrit en ces coquilles: & celuy qui se trouuoit escrit par pl^o grād nōbre de citoyēs, estoit à son de trompe proclamé banny & relegué pour dix ans, durant lesquelz il iouissoit neātmoins de tous ses biens. Cōme dōques lors chascun escriuoit sur sa coquille le nō de celuy qu'il uouloit bānir, on dit qu'il y eut un païsan si grossier & si ignorāt qu'il ne sçauoit ny lire, ny escrire, lequel s'adressa à Aristides, pource qu'il le rencōtra le premier, & luy bailla sa co-

quille, en le priât de uouloir escrire dessus le nō d'Aristides. Dequoy Aristides s'esbahissant, luy demāda, si Aristides luy auoit fait quelque des-
23 plaisir: Nēny, respōdit le païsān: & qui pl^r est, ie
25 ne le cognois point, mais il me fasche de l'ouir
27 ainsi par tout appeller le Iuste. Aristides ayant
ouy ces paroles ne luy respondit riē, ains escri-
uit luy mesme son nō dessus la coquille, & la luy
rebailla. Mais au partir, en sortant de la uille, il
leua ses deux mains uers le ciel, & fit une prie-
re du tout cōtraire à celle d'Achilles en Home-
re, priant aux Dieux que iamais il n'aduinst de
telz affaires aux Atheniens, qu'ilz fussent con-
traints d'auoir souuenance d'Aristides. Toure-
fois trois ans apres, quād le Roy de Perse Xer-
xes avec son armee passa par les païs de la Thes-
salie & de la Bœoce, & entra iusques au fond de
celuy d'Attique: les Atheniens derogans à la
loy de leur Ostracisme, rappellerent tous ceux
qu'ilz auoyent releguez, & ce principalement
pour la crainte qu'ilz eurent qu'Aristides ne se
tournast du costé des Barbares, & que son ex-
emple n'en incitast beaucoup d'autres à faire
le semblable, en quoy ilz ne cognoissoyent pas
bien le naturel du personnage: car au parauant
qu'il fust rappelé, il ne cessa d'aller ça & là en-
horter & encourager les Grecs à maintenir &
defendre leur liberté. Et apres que le decret de
son rappel fut publié, & que Themistocles fut
eleu seul Capitaine general d'Athenes, il le se-

courut tousiours fidelemēt en tout & par tout, tant de sa peine que de son conseil : & en ce faisant rendit son plus grand ennemy comblé de gloire, pour autant qu'il estoit questiō du bien & du salut de la chose publique : car, comme Euribiades qui estoit Chef de toute l'armee des Grecs, eust deliberé d'abādonner l'isle de Salamine, & que les galeres des Barbares se fussent tirees en haulte mer, & eussent enuironné les isles tout à l'entour, & l'issue du bras de Salamine, sans que personne sceust rien de cest enuelpement, Aristides avec une estrange hardiesse partant de l'isle d'Ægine, alla passer à trauers les uaisseaux des Barbares, & feit tant qu'il arriua la nuict en la tente de Themistocles, lequel il appella dehors : & forty qu'il fut, luy parla en ceste maniere : Themistocles, si nous sommes sages tous deux, il est désormais temps que nous laissions celle uaine picque & ialouzie, que nous auons iusques icy eue l'un cōtre l'autre, & q nous en prenions une autre qui sera honorable & salutaire à l'un & à l'autre, c'est à sçauoir, à qui fera meilleur deuoir pour sauuer la Grece, toy en commandant & faisant l'office de bon Capitaine, & moy en te conseillant & executant ton commandement, attendu mesmement que i'entens que tu es seul maintenant qui touches le mieulx au poinct, & qui as le meilleur aduis, estant d'opinion & conseillant que lon

hazarde la bataille par mer dedans ce destroit
de Salamine, & le plus tost qu'il sera possible:
mais si noz alliez & confederez t'empeschent
de mettre ce tien conseil en execution, ie t'aduise
que les ennemis t'y aydent, pource que
la mer deuant & derriere, & tout à l'entour de
nous, est desia couuerte de leurs uaisseaux, tellement
qu'il est force que ceulx qui parauant
ne le uouloyent pas, maintenant uueillent ou
non, cōbatent & facent deuoir de gens de bien,
pource qu'ilz sont enclos de tous costez, & n'y
a passage par ou ilz peussent eschapper ny fourir.
A quoy respondit Temistocles: Il me desplaist,
Aristides, qu'en cecy tu te sois monstré plus
homme de bien que moy: mais puis qu'ainsi
ua, que l'honneur t'est deu d'auoir commencé,
& de m'auoir prouoqué à une si honeste & si
louable contention, ie mettray peine cy apres
de te uaincre par bien continuer. Ayant fait ceste
response, il luy compta la ruze, dont il auoit
proposé d'abuser le Roy Barbare, & le pria de
faire tant enuers Euribiades qu'il uoulust condescendre
à son opinion, en luy remonstrant qu'il n'y auoit ordre
de sauuer la Grece, sinon en combatant par mer, pource
que Euribiades adioustoit plus de foy aux paroles &
remonstrances d'Aristides, qu'il ne faisoit à celles de
Themistocles. Et pourrant au conseil ou tous les Capitaines
furent assemblez pour deliberer si on donneroit la bataille
ou non, cōme Cleo-

critus Corinthien dist à Themistocles, que son
aduis ne plaisoit pas à Aristides mesme, ainsi
qu'il apparoissoit par ce qu'estant present il ne
disoit mot: Aristides luy respōdit soudain: C'est
au contraire, car ie ne me tairoye pas si ie ne
pensoye que son conseil fust bon: mais mainte-
nant ie ne dis mot, non point pour bien que ie
luy uueille, ains pource que ie treuve son con-
seil bon & sage. Pendant que les Capitaines
Grecs estoient en ces disputes, Aristides uoyāt
Psfytalee, qui est une petite isle au deuāt de Sa-
lamine dedans le destroit, pleine de gens de
guerre des ennemis, il embarqua dedans les es-
quifz de ses galeres les meilleurs combatans &
plus deliberez qu'il eust de ses citoyēs, avec les-
quelz il alla descendre en ceste isle, ou il desfeit
en bataille, ce qu'il y trouua de Barbares qui fu-
rent tous mis à l'espee, exceptez les plus appa-
rens qui furent pris prisonniers, entre lesquelz
y auoit trois filz de la seur du Roy, qui auoit
nom Sandauce, lesquelz il enuoya à Themisto-
cles. Ces trois seigneurs par le commandement
du deuin Euphrantidas, furēt tous trois immo-
lez à Bacchus surnommé Omestes, c'est à dire,
cruel ou mangeant chair crue, suyuant un ora-
cle qui leur auoit esté respondu. Cela fait Ari-
stides meit au guet tout à l'entour de ceste
petite isle des soudards armez, pour espier ceux
qui par fortune de guerre ou de la mer seroyēt
illec iettez, à fin qu'il ne sy sauuaist nul des enne

mis, ny ne s'y perdist aussi aucun des amis, pour-
ce que le plus grand choc des uaisseaux & la
plus aspre meslee de toute la bataille fut à l'en-
tour de celle petite isle : au moyen dequoy le
trophee y fut dressé. Apres la bataille gaignee,
20 Themistocles uoulant sonder quelle seroit l'o-
20 pinion d'Aristides, luy dit: Nous auons fait une
20 belle œuvre, mais il en reste à faire encore une
20 autre beaucoup plus belle, c'est qu'il nous fault
20 prendre toute l'Asie entierement au dedans de
20 l'Europe, ce que nous ferons facilement, pour-
20 ueu que en toute diligence nous cinglions uers
20 le destroit de l'Hellepont, & allions rompre
20 le pont que le Roy y a fait faire. Aristides a-
20 donc s'escria tout hault, Ho ne parle iamais de
20 ce propos la : mais plus tost, dit il, trauaillons à
20 chercher le moyen de chasser comment que ce
20 soit ce Roy Barbare hors de la Grece, de peur
20 que si nous l'y enfermons avec une si grosse
20 puissance, quād il uerra qu'il n'aura plus moyen
20 de fouir, il n'ait recours par desespoir aux ar-
20 mes & à uailamment combattre. Ces paroles
ouyes, Themistocles enuoya de rechef secre-
tement l'Eunuche Arnaces, qui estoit prison-
nier, deuers le Roy Xerxes, l'aduertir de sa part
qu'il auoit retenu & destourné les Grecs, les-
quelz auoyent deliberé d'aller rompre le pont
qu'il auoit fait faire sur le destroit de l'Helle-
spont pour passer son armee, & qu'il l'en auoit
bien voulu aduertir pour luy aider à mettre sa

personne en seureté. Xerxes effroyé de ceste
nouuelle, se meit incontinent en chemin à grā-
des iournees pour gagner le destroit de l'Hel-
lespont, & laissa en la Grece Mardonius son
lieutenant general, avec trois cents mille des
meilleurs combatans qu'il eust en son exercite.
Si estoit ce Mardonius redoubtable aux Grecs
pour la puissante armee de terre qu'il auoit, &
les menaçoit en leur escriuant de telles lettres :

20 Vous auez uaincu avec des bois de marine des
30 hommes qui ont accoustumé de combatre à
30 pied ferme sur la terre, & qui n'ont point ap-
30 pris à manier la rame. Mais maintenant les plai-
30 nes de la Theffalie ou la campagne de la Bœoce
30 sont belles & larges pour gens de cheual &
30 gens de pied à y faire preuue de leur prouesse, si
30 uous uous y uoulez trouuer en champ de ba-
30 taille. Il escriuit aussi d'autres propos aux Athe-
niens par le commandement du Roy son mai-
stre, en leur offrant de par luy, de leur faire re-
difier leur uille, de leur donner grosse pension
de deniers, & oultre de les faire seigneurs de
toute la Grece, moyenant qu'ilz se uoulussent
deporter de ceste guerre : dequoy les Lacedæ-
moniens furent tantost aduertis, & craignans
qu'ilz ne s'y consentissent, enuoyerent en dili-
gence des ambassadeurs à Athenes, pour les
prier qu'ilz enuoyassent leurs femmes & leurs
enfans à Sparte, & leur offrir des uiures pour
entretenir & nourrir leurs uieilles gens, pour-

ce qu'il y auoit une extreme pauureté au peuple Athenien, à cause que leur uille auoit esté bruslee & destruite, & tout leur plat país pillé & gasté par les Barbares : mais apres auoir ouy les offres de ces ambassadeurs, les Atheniens feirent une merueilleuse responce aux Lacedæmoniens, de laquelle Aristides fut auteur :

23 Qu'ilz pardonnoyent aux Barbares, filz esti-
 23 moyent toutes choses uenales à pris d'or &
 23 d'argent, à cause qu'ilz ne cognoissoyent rien
 23 meilleur, ny n'auoyent rien plus cher en ce
 23 monde que la richesse & l'auoir : mais au con-
 23 traire, qu'ilz se mescontentoyent fort des Lacedæ-
 23 moniens, qui ne regardoyent qu'à l'indigen-
 23 ce & pauureté presente des Atheniens, & ou-
 23 blioient leur uertu & la grandeur de leur cou-
 23 rage, les cuidans induire à combattre plus uer-
 23 tueusement pour le salut de la Grece en leur fai-
 23 sant offre de uiures, Ceste responce ayant esté
 approuuee & authorisee par le peuple, Aristides
 fit adonc uenir les ambassadeurs de Sparte en
 l'assemblée, & leur cōmanda de dire de bouche
 aux Lacedæmoniens qu'il n'y auoit ny dessus ny
 dessous la terre tant d'or, que les Atheniens le
 uoulussent accepter ny receuoir pour loyer d'a-
 bandonner la defense de la liberté de la Grece :
 & quāt au herault qui estoit uenu de la part de
 Mardonius, il luy monstra le Soleil, & luy dit,
 Tant que cest astre tournera à l'entour du mô-
 de, les Atheniens seront mortelz ennemis des

Perſes , pource qu'ilz leur ont deſtruit & gaſté leur païs , & qu'ilz ont pollué & bruſlé les temples de leurs Dieux . Oultre plus il meit en auant , que les preſbtres par le commandement du peuple excommuniaſſent , maudiſſent & anathematifaſſent , celuy qui iamais ſeroit auteur , que lon enuoyaſt deuers les Perſes pour traiter appointment avec eulx , ne qu'on abãdonnaſt la ligue & alliance des autres peuples Grecs . A raiſon dequoy quand Mardonius uint pour la ſeconde fois courir le païs d'Attique , les Atheniens ſe retirerent auſſi une autre fois en l'isle de Salamine : & lors fut Ariſtides enuoyé ambaffadeur uers ceulx de Lacedæmone , qui les reprit & blaſma à bon eſciant de leur negligence & tardiueté , en ce qu'ilz auoyent ainſi de rechef abandonné en proye la uille d'Athenes aux Barbares , & les pria de ſe mettre pour le moins en deuoir de ſecourir & ſauuer le demourant de la Grece . Les Ephores , qui eſtoient certains officiers qui auoyent toute la ſuperintendence des affaires en la uille de Sparte , ayans ouy ces remonſtrances y donnerent prouiſion , combien qu'en apparence exterieure & publique , il ſemblaſt que pour tout ce iour la ilz n'entendiſſent encore à autre choſe qu'à iouer & faire bonne chere , à cauſe qu'ilz celebroyent ce iour une de leurs feſtes ſolenelles , qu'ilz appelloyent Hyacinthia : mais neantmoins la nuit enſuyuant , ilz meirent

aux champs , & feirent partir cinq mille naturels bourgeois de Sparte, tous bons combatans & hommes choiziz , chacun desquelz estoit acompagné de sept Ilotes, qui sont les païsans, & comme esclaves au païs de Lacedæmone , sans en faire rien entendre aux ambassadeurs d'Athenes. A l'occasion dequoy Aristides retourna une autre fois en leur conseil se plaindre de rechef de leur nonchalance : & eulx s'en prirent à rire, disans qu'il resuoit, ou qu'il se moquoit, pource que leur armee qu'ilz enuoyoyét cōtre les estrangers (car ainsi appelloyent ilz les Perses) estoit desia à la uille d'Orestion qui est en Arcadie. Ceste responce ouye , Aristides leur repliqua qu'ilz auoyent tort de se moquer ainsi d'eulx , ayans fait partir leurs gens si secretement, qu'eulx n'en auoyent rien sceu, & que ce n'estoit pas le temps qu'il se falloit amuser à tromper ses amis , ains plus tost les ennemis. Idomeneus le recite de poinct en poïct en ceste sorte. Toutefois au decret qu'Aristides proposa pour faire enuoyer des ambassadeurs à Sparte, il n'y est point nommé pour ambassadeur, ains y sont designez Cimon , Xanthippus & Myronides . Depuis il fut cleu par les uoix du peuple Capitaine general de l'armee d'Athenes en ceste guerre contre les Perses , & s'en alla au camp des Grecs pres la uille de Plataës avec huit mille hommes de pied tous bien armez . Là se trouua aussi Pausanias Capitaine en chef

de toute la puissance de la Grece, qui amena quand & luy les forces de Sparte, & y arriuoit tous les iours à la file une multitude grande de tous autres Grecs. Or quant aux Barbares, leur camp estoit tout le long de la riuiera d'Asopus: mais pour sa grande estendue, il n'estoit fermé ny fortifié aucunement, sinon qu'ilz auoyent seulement enuironné de muraille un certain pourpris quarré, duquel chascue costé auoit douze cens cinquante pas de long pour y retirer leur bagage, & leurs plus precieux meubles. Et quant aux Grecs, le deuin Tisamenus natif de la uille d'Elide auoit predict à Pausanias & à tous les Grecs ensemble, qu'ilz auroient la victoire, pourueu qu'ilz n'assaillissent point, & qu'ilz ne feissent que se defendre seulement. Et Aristides qui auoit enuoyé à l'oracle d'Apollo en la uille de Delphes au nom des Atheniens, eut responce qu'ilz uiendroyent au dessus de leurs ennemis, moyenant qu'ilz sacrifiasent & feissent prieres speciales à Iupiter & Iuno du mont de Cithæron, à Pan & aux Nymphes Sphragitienes, & qu'ilz feissent aussi sacrifices aux Demidieux, Androcrates, Leucon, Pisander, Damocrates, Hypsion, Actæon & Polyidus: & pourueu aussi qu'ilz hazardassent la bataille dedans leur territoire, en la plaine de Ceres Eleusiniene & de Proserpine. Cest oracle meit Aristides en grande peine & grande perplexité, pour autant que les Demidieux aus-

quelz il commandoit qu'on sacrifiaſt, eſtoient les anceſtres des Plataïens, & la cauerne des Nymphes Sphragitienes eſt en l'une des croupes du mont de Cithæron, regardant uers l'endroit ou le Soleil ſe couche en Eſté, & dit on qu'ancienement il y auoit un oracle, de l'eſprit duquel pluſieurs des habitans à l'enuiron eſtoient poſſedez, & en deuenoyent inſenſez, dõt on les appelloit Nympholepti, comme qui diroit, eſpris des Nymphes : & puis de dire que les Atheniës auroyēt la uictoire pourueu qu'ilz hazardaſſent la bataille en la plaine de Ceres Eleuſiniene, & au dedans de leur territoire, c'eſtoit les renuoyer au païs d'Attique : mais ainſi qu'il eſtoit en ceſte doubte Arimneſtus Capitaine des Plataïens eut une telle uiſion en dormant : Il luy fut aduiſ que Iupiter ſauueur ſ'apparut à luy, & luy demanda ce que les Grecs auoyent propoſé de faire, & qu'il luy reſpondit, Nous deuons, Sire, demain remuer noſtre camp au territoire d'Eleuſine, & là donnerons la bataille aux Barbares, ſuyuant ce que l'oracle d'Apollo nous a commandé. Iupiter luy reſpliqua alors qu'ilz ſabuſoyent grandement, pource que tout ce qu'Apollo leur auoit ſpeciſié par ſon oracle, eſtoit dedans le territoire des Plataïens, & qu'ilz le trouueroyent ainſi ſilz cherchoyent bien. Arimneſtus ayant eu ceſte uiſion bien expreſſe & bien manifeſte, le matin auſſi toſt qu'il fut eſueillé enuoya querir les

plus uieux & plus experimentez de ses citoyës, avec lesquelz, en conferant & cherchant ou pourroit estre ce lieu, il trouua qu'au pied du mont de Cithæron pres la uille de Hyfie, y auoit un ancien temple, que lon appelloit le temple de Ceres Eleusiniene & de sa fille Proserpine : dequoy si tost qu'ilz se furent aduisez, il en alla aduertir Aristides, & trouuerent que c'estoit un lieu merueilleusemēt à propos pour y renger en bataille une armee qui seroit foible de gens de cheual, pour autant que le pied du mont de Cithæron engardoit que les cheualx ne peussent aller au lieu ou estoit le temple basty, & ou la plaine uenoit à aboutir, avec ce que là mesme estoit la chappelle d'Androcrates, qui estoit tout à l'entour couuerte & cachee de bois fort espez: & à fin que rien ne leur defaillist de tout ce qui estoit particularisé par l'oracle pour l'esperance de la uictoire, les Plataïens feirent un decret public, par le conseil & aduis d'Arimnestus, que les bornes du territoire de la uille de Platæes fussent ostees du costé d'Athenes, & la terre dōnee en pur don aux Atheniens, à celle fin, que comme il estoit mādē par l'oracle, ilz peussent combattre contre les Barbares dedans leur terre pour le salut & la defense de la Grece. Ceste liberalité & munificence des Plataïens a tant esté renommee, que plusieurs anneés depuis, le Roy Alexandre le grand ayant ia conquis l'empire de l'Asie, feit rebastir

rebastir les murailles de la uille de Platæes , &
 en ce faisant feit proclamer par un herauld en
 l'assemblée des ieux Olympiques, qu'Alexādre
 faisoit ce bien & cest honneur aux Platæiens ,
 en memoire & recompense de leur magnani-
 mité, pource qu'en la guerre contre les Perſes
 ilz auoyent liberalement donné leur terre aux
 Atheniens pour le salut des Grecs, & festoyent
 monstrez gens de bon cueur, & bien affection-
 nez à la defense de la Grece. Or quant ce uint à
 ordonner l'armee des Grecs en bataille, il y eut
 diffension entre les Atheniens & les Tegeates ,
 pource que les Atheniens uouloyent, que com-
 me on auoit tousiours accoustumé de faire, si
 les Lacedæmoniens auoyent la poincte droite
 de la bataille, eulx en eussent la fenestre : & les
 Tegeates alencontre alleguoyent les prouesses
 & haults faicts d'armes de leurs ancestres, dont
 les Atheniens se mutinoient : mais Aristides se
 tira en auant, qui leur remonstra qu'il n'estoit
 pas temps de debatre contre les Tegeates de
 leur noblesse ny prouesse . Et quant à uous, sei-
 gneurs Spartiates, dit il, & uous autres Grecs,
 nous uous aduison, que le lieu ne donne, ny
 ne oste point la uertu, & uous asseurons, que
 quelque lieu que uous nous baillicz, nous le
 defendrons & garderons si bien, que nous n'y
 diminuerons point l'honneur ny la reputation
 que nous auons acquise es batailles preceden-
 tes : car nous sommes icy uenus, non point

» pour quereller ny debatre contre noz alliez ,
» ains pour combattre noz communs ennemis ,
» ny pour haultlouer noz predecesseurs , ains
» pour nous monstrier nous mesmes à l'effect
» gens de bien en la tuition & defense de la Gre-
» ce , pource que ceste iournee portera tesmoi-
» gnage à tous les Grecs , combien chaque uille ,
» chaque Capitaine & chaque homme particu-
» lier en son endroit fera à estimer . Ces paroles
d'Aristides ouyes , les Capitaines & tous ceulx
du conseil conclurent en faueur des Athe-
niens , qu'ilz auroient l'une des poinctes de la
bataille . Ainsi estoit toute la Grece en grand
branle , & mesmement l'estat des Atheniens en
extreme danger , pource qu'il se trouua quel-
que nombre de citoyens des plus nobles mai-
sons de la uille , & qui auoyent eu le plus de
biens auant ceste guerre , lesquelz se uoyans
lors reduits à pauureté , & qu'oultre leurs biens
qu'ilz auoyent perdus , ilz se uoyoyent encore
priuez de la preeminence & de l'autorité qu'ilz
souloyent auoir au gouuernement de la chose
publique , à cause que d'autres estoient lors en
credit , & estoient promeuz aux estats & offi-
ces de la uille : ilz s'assemblerent en une mai-
son de la uille de Platées , & là conspirerent en-
semble de ruiner & abolir à Athenes l'autho-
rité du peuple , ou filz ne pouuoient uenir au
dessus de leur entreprise , de plus tost perdre
tout , & de trahir la chose publique aux Bar-

bâres. Comme ces choses se menoyēt au camp, estans ia plusieurs entachez de ceste coniuration, Aristides en sentit le uent, & en eut grande peur, à cause du temps: si pensa de ne mettre point à nonchaloir une chose de si grande conséquence, & de ne la rechercher aussi point trop au uif ny ne la descouurir entierement; ne sachāt quel nombre se pourroit trouuer de coupables adherens à telle conspiration, qui la rechercheroit iusques au bout, en regardant plus tost à ce qui estoit iuste, qu'à ce qui selon le temps estoit profitable. Si en feit prendre huit seulement d'un grand nombre qu'il y en auoit, & de ces huit, les deux à qui on uouloit commencer à faire le procès, pource qu'ilz estoient les plus chargez, Æschines du bourg de Lampra, & Egésias du bourg d'Acharne, trouuerent moyen de s'en fouir du camp & de se sauuer: & quant aux autres, Aristides les eslargit, donnant moyen à ceulx qui pensoyēt n'estre point descouuerts de s'asseurer & de se repentir de leur mauuaise uoulunté, disant qu'ilz auroient la bataille pour iugement, en laquelle ilz se pourroyēt iustifier des charges qu'on leur mettoit sus, & monstrier qu'ilz n'auoyent onques eu autre intention que bonne & iuste enuers leur païs. Au demourant Mardonius uoulant sonder quel courage auroyēt les Grecs, enuoya route sa cheualerie, de laquelle il estoit plus puissant de beaucoup que les Grecs, pour les

escarmoucher. Or festoyent ilz logez au pied du mont de Cithæron en lieux forts & pierreux, exceptez les Megariens qui estoient trois mille combatans campez en la plaine, ce qui fut cause qu'ilz furent trauallez & endommagez par les gens de cheual des Barbares, qui les assailloyent de tous costez, pource qu'ilz en pouuoient approcher de toutes parts, tant qu'à la fin uoyans qu'ilz ne pouuoÿt plus eulx seuls soustenir si grande multitude de Barbares, ilz enuoyerent en diligence deuers Pausanias, le prier qu'il leur enuoyast promptement du secours. Pausanias oyant ceste nouuelle, & uoyant à l'œil le camp des Megariens presque tout couuert de traicts & de dards que leur tiroient les Barbares, & eulx contrains de se renger & serer en un petit coing, ne sceut qu'il y deuoit faire: car d'y aller en personne avec les Lacedemoniens qui estoient gens de pied pesamment armez, il pensa qu'il n'y auoit ordre: si essaya de mettre quelque aiguillon de conuoi-tise d'honneur & quelque ialousie entre les Capitaines particuliers & Chefs de bandes des autres Grecs, qui se trouuerent lors à l'entour de luy, pour uoir s'il pourroit en eschauffer quelcun à s'offrir uoluntairement d'aller secourir les Megariens: mais tous les autres feirent l'oreille sourde fors Aristides, lequel promet au nō des Atheniēs d'y aller, & despescha tout sur le champ Olympiodorus l'un des plus

uailans Capitaines qu'il eust soubs luy, avec sa compagnie qui estoit de trois cents hommes tous gens d'élite, & quelque gens de traict meslez parmy. Ces souldards furent prests en un moment, & marcherent incontinent en bataille le grand pas contre les Barbares. Ce que uoyant Masistius qui estoit general de la cheualerie des Perses, homme grand, fort & beau à merueilles, tourna son cheual & picqua droit à eulx. Les Atheniens l'attendirent de pied quoy, & y eut une rencontre fort aspre, pource que les uns & les autres uoulurent à cest essay faire un preiudice de l'issue de toute la bataille, & tant y fut combatu que le cheual de Masistius receut un grand coup de traict à trauers le corps, & de la douleur qu'il en sentit ietta par terre son maistre tout armé de pied en teste comme il estoit. Tumbé qu'il fut, il ne se peut releuer, tant pour la pesanteur de son harnois, que pour autant que les Atheniens luy coururent sus aussi tost: & combien qu'ilz fussent plusieurs à l'entour de luy à le charpenter, si ne pouuoient ilz trouuer moyen de le tuer, tant il estoit fort armé & chargé d'or, de cuyure & de fer, non seulement par le corps & par la teste, mais aussi par les iambes & par les bras, iusques à ce qu'il y eut quelcun qui luy fourra le fer de sa iaueline par dedans la uisiere de son armet, & le tua. Quoy uoyans les autres Perses, se tournerent incontinent en fuitte, &

abandonnerent le corps de leur general. Mais tantost apres on cogneut bien que lon auoit beaucoup fait en ceste escarmouche, non pour le nombre des ennemis qui y eussent esté tuez, car il n'y en auoit pas beaucoup, ains pour le grand dueil que les Barbares en demenerent: car ilz se tondirent eulx, leur cheuaulx & leurs mulets, pour le dueil de la mort de Masistius, & emplirent toute la campagne d'alenuiron de pleurs, de cris & de hurlemens, comme ceulx qui auoyent perdu le premier homme de tout leur camp en uaillance & en autorité, apres le lieutenant du Roy Mardonius. Depuis ceste premiere escarmouche ilz se teindrent en leur camp les uns & les autres sans sortir aux chāps plusieurs iours durans, pource que les deuins leur promettoient la uictoire autant aux Perfes comme aux Grecs, pourueu qu'ilz ne feissent que se defendre seulement, & au contraire les menaçoient d'estre desfaits filz se mettoient à assaillir. Mais Mardonius uoyant qu'il n'auoit plus de uiures que pour bien peu de iours, & dauantage que tous les iours il uenoit nouueau renfort de gens aux Grecs tant plus il dilayoit, il se resolut en fin de n'attendre plus, ains de passer la riuiera d'Asopus le lendemain au poinct du iour, & d'aller au desproueu courir sus aux Grecs, si commanda des le soir de deuant à ses Capitaines ce qu'ilz auoyent à faire, à fin que chacun se teinst tout prest: mais enui-

ron la minuiet il y eut un homme de cheual, lequel sans faire bruit aucun approcha si pres du camp des Grecs, qu'il parla à ceulx qui faisoient le guet, & les aduertit qu'il auoit quelque chose à cōmuniquer à Aristides Capitaine des Atheniens . Aristides fut appellé sur l'heure mesme, & sorty qu'il fut, l'homme de cheual luy dit : Je suis Alexádre Roy de Macedoine, qui pour l'amour & bienuueillance que ie uous porte, me suis mis au plus grand danger que ie sçauois faire , de uenir à telle heure icy, pour uous aduertir que demain au matin Mardonius uous dōnera la bataille, à fin que ceste surprise de uoz ennemis ne uous estonne point , pour estre assaillis au desprouueu, & ne uous garde point de uaiillamment combatre : car ce n'est point pour aucune bonne esperance ou confiance qui luy soit de nouueau suruenue, ains pour la necessité & disette de uiures , ou il se treuve , qui le contrainct à ce faire, attēdu que les deuins tant par les sinistres presages des sacrifices , que par les responses des oracles, le diuertissent tant qu'ilz peuuent de uous donner la bataille, de maniere que toute son armee en est en tresgrand effroy, & en a fort mauuaise esperance : mais il luy est force forcee d'essayer la fortune , & de mettre tout à l'aduēture, ou bien s'il s'obstine à ne uouloir bouger d'un lieu, de mourir de male faim .

Après que le Roy Alexandre luy eut faict cest aduertissement, il le pria de s'en seruir à par luy,

& s'en souuenir au temps à uenir, mais qu'il n'en dist rien à personne : & adonc luy respondit Aristides, qu'il n'estoit pas raisonnable de celler une chose de telle consequence à Pausanias, attendu que c'estoit luy qui auoit la charge principale & superintendence de toute l'armée : mais bien luy promeit il qu'il ne le diroit à nul autre auant la bataille, & que là ou les Dieux donneroyent la uictoire aux Grecs, il l'asseuroit qu'il n'y auroit personne qui n'eust en souuenance & recommandation la bonne uoulunté & bonne affection qu'il auroit monstree en leur endroit. Ces paroles dites d'une part & d'autre, le Roy Alexandre s'en retourna dont il estoit uenu : & Aristides au partir de là, s'en alla droit en la tente de Pausanias, ou il luy declara tout ce propos. Si furent incontinent mandez les autres Capitaines particuliers, & teint on conseil, auquel il fut ordonné que chacun tiendrait ses gens tous prests à combatre, pource que le lendemain on auroit la bataille. Mais sur ces entrefaites Pausanias, ainsi que recite Herodote, s'adressa à Aristides, & luy dit, qu'il uouloit transposer les Atheniens de la poincte gauche en la droite, à fin qu'ils eussent droit en teste les naturelz Persiens, & qu'ilz en cōbatroyent plus asprement, tant pource qu'ilz estoient tous duits & accoustumez à combatre contre eulx, comme aussi, pource qu'ils les auoyent desia uaincus, en la premiere récontre, &

qu'il uouloit prendre pour soy & pour ses gens la poincte gauche de la bataille, à l'édroit de laquelle deuoyent estre les Grecs, qui combattoient pour le party des Perses. Ce qu'entendans tous les autres particuliers Capitaines Atheniens s'en courroucerent, disans que Pausanias auoit tort, & qu'il n'y auoit point de propos de laisser tous les autres peuples Grecs en leurs lieux ou ilz auoyent tousiours esté ordonnez, & de remuer seulement les Atheniens, ne plus ne moins que si ce fussent esclauues, pour les mettre à son plaisir tãtost d'un costé & tãtost d'un autre, & les ietter deuant les plus belliques ennemis: mais Aristides leur respondit adonc, qu'ilz ne sçauoyent eulx mesmes qu'ilz disoyent, & qu'ilz se mescomptoyent grandement, par ce que nagueres ilz auoyent contesté encontre les Tegeates pour auoir seulement la poincte gauche de la bataille, & s'estoyent tenus pour bien honorez de ce que par sentence des Capitaines, ilz auoyent esté preferez à eulx: & maintenant que les Lacedemoniens eulx mesmes de leur bõ gré leur cedoyent la poincte droite, & par maniere de dire, leur liuroient entre leurs mains, & leur quittoient la principaulté de toute l'armee, ilz n'embrassoyent pas affectueusement cest honneur, & ne reputoyent pas à gaing & auantage pour eulx, ce qu'ilz n'auroient point à combattre contre ceulx qui estoient extraicts de mesme sang & de mesme

origine que eulx, ains contre des Barbares, qui
estoyent leurs naturelz ennemis. Apres qu'A-
ristides leur eut fait ces remonstrances, ilz fu-
rent trescontens de changer de place aux Lace-
dæmoniens, & n'oyoit on autre chose parmy
eulx que les preschemens qu'ilz se faisoient
les uns aux autres, d'auoir bon courage, & que
les Perses qui lors estoyent uenus, n'auoyent
point d'autres armes, ny les cueurs meilleurs
que ceulx qu'ilz auoyent uaincus & desfaits en
la plaine de Marathon: Car ce sont, disoyent
ilz, les mesmes arcs, les mesmes robbes enri-
chies de broderie, les mesmes chaines & car-
quans d'or sur des corps effeminez, & qui cou-
urët des ames molles, lasches & couardes: là ou
nous auõs bié les mesmes armes & les mesmes
corps aussi, mais les cueurs nous sont deuenus
plus grâds par tant de uictories que nous auons
depuis gaignees sur eux: & si y a dauantage, que
nous ne combatons pas comme noz autres al-
liez Grecs pour nostre uille & nostre païs seu-
lement, ains encore pour ne perdre point le re-
nom de prouësse, que nous acquismes es iour-
nees de Marathon & de Salamine, à fin que lon
n'estime point que la gloire de ces trophées là
& de ces uictories soit deuë à Miltiades seul, ou
à la fortune, ains à la uertu des Atheniens. Ainsi
donques estoyent les Grecs occupez à changer
en diligence l'ordonnance de leur bataille:
dequoy les Thebains furent incontinent ad-

uertis par quelques traistres qui passerent d'un camp à l'autre, & le feirent entendre à Mardonius : lequel soudainement changea aussi l'ordonnance de la siene, & meit les Perfes naturelz à la poincte droite uis à uis de la gauche des ennemis, fust ou pource qu'il eust crainte des Atheniens, ou que pour plus grande gloire, il eust enuie de combattre cõtre les Lacedæmoniens, & commanda aux Grecs qui tenoyēt son party, qu'ilz eussent à soustenir les Atheniens. Ceste transpositiõ fut si apparente, que chascun la peut uoir : parquoy Pausanias remua de rechef les Lacedæmoniens, & les remeit à la poincte droite, & Mardonius semblablement aussi remeit les Perfes à la gauche, comme ilz auoyēt esté du cõmencemēt à l'opposite des Lacedæmoniēs, tellement que le iour se passa sans rien faire es allees & uenues de ces remuemēs: puis sur le soir les Capitaines Grecs teindrent conseil, auquel il fut arresté qu'il estoit besoing de remuer leur cāp, & aller loger en lieu ou ilz eussent l'eau plus à commandemēt, à cause que les ennemis leur gastoyent & troubloyent ordinairement avec leurs cheuaux les ruisseaux & fontaines qu'ilz auoyent à l'entour d'eulx. Parquoy la nuiēt uenue, les Capiraines uoulurent faire partir leurs gens, pour aller au logis qui auoit esté ordonné : mais le peuple y alloit fort mal uouluntiers, & auoit on beaucoup de peine à les tenir ensemble: car ilz ne furēt pas plus

roft hors des trenchees & fortifications du cāp, que la plus part s'en courut uers la uille de Platæes, & y auoit un grand desordre, par ce qu'ilz se respandoyent ça & là, & tendoyent leurs pa-uillons là ou bon leur sembloit, sans qu'on eust departy les quartiers, & n'y eut que les Lacedæmoniens qui demourerent seuls derriere, enco-re fut ce malgré eulx, par ce qu'un de leurs Ca-pitaines nommé Amonpharetus, homme cou-rageux à merueilles, qui ne cognoissoit nul pe-ril, & ne demandoit de long temps autre chose que la bataille, estant impatient de tant de re-mises, & disant tout haut & clair, que ce remue-ment de cāp n'estoit autre chose sinõ une belle fuitte, iura qu'il ne bougeroit de là, & qu'avec sa cōpagnie il attédroit Mardonius. Pausanias alla deuers luy, & luy remonstra, qu'il falloit faire ce que les Grecs à la pluralité des uoix a-uoyent conclut & arresté au conseil. Et Amon-pharetus prit à deux mains une fort grosse pier-re, & la ietta deuāt les pieds de Pausanias, disant:

Et uoyla la balotte que ie donne moy pour
conclure à la bataille, & ne me soucie point de
toutes uoz autres lasches & couardes conclu-sions. L'opinia strete de cestuy Amompharetus estõna tāt Pausanias, qu'il ne sçauoit ou il en e-stoit. Si enuoya deuers les Atheniens qui e-stoyent desia en chemin, les prier qu'ilz le uou-lussent attédre, à fin qu'ilz s'en allassent ensēble: & quand & quand feit marcher le reste de ses

gens le chemin de Plataës, pensant que par là il contraindroit à la fin de se leuer & bouger de là Amompharetus, fil ne uouloit demourer tout seul. Mais en ces entrefaittes le iour uint & Mardonius estât bien aduertty que les Grecs abandonnoyent leur premier logis, feit incontinent marcher son armee en bataille pour aller courir sus aux Lacedæmoniens. Si ietterent les Barbares de grands cris & grandes huees, pensans n'aller pas pour combattre, mais pour seulement saccager & despouiller les Grecs fuyans, cōme aussi de faict il ne s'en fallut pas beaucoup. Car Pausanias uoyant la contenance des ennemis feit arrester ses enseignes, & commanda que chascun se preparast à combattre: mais il oublia, fust ou pour la cholere dont il estoit emeu contre Amôpharetus, ou pour l'estonnement de ceste soudaine charge des ennemis, à donner aux Grecs le mot de la bataille, dont il s'ensuyuit qu'ilz ne uindrent pas promptement ne tous ensemble au combat, ains par petites troupes les uns deçà, les autres delà, que la meslee estoit desia commencee. Cependant Pausanias uacquoit à faire sacrifices aux Dieux, & uoyant que ses premieres hosties ne leur estoient pas agreables, par les obseruations qu'en auoyent les deuins, il commanda aux Spartiates qu'ilz posassent leurs pauiols en terre deuant leurs pieds, & qu'ilz ne bougeassent de leurs places, ains seulement euf-

sent l'œil à ce qu'il leur commanderoit, sans se mettre en defense contre les ennemis. Cela fait il se prit de rechef à immoler d'autres hosties, que desia les gēs de chetial des ennemis approchoyent fort, & que les coups de flesches arriuoient iusques à eulx, tellement qu'il y eut quelques uns des Spartiates blecez, entre lesquels fut le pauvre Callicrates, le plus bel homme & le plus grand qui fust en tout l'ost des Grecs, lequel estant nauré à mort d'un coup de traict, en rendant l'esprit sur le champ, dit, qu'il ne regrettoit point sa mort, pource qu'aussi biē estoit il uenu de sa maison en deliberation de mourir pour la defense de la Grece, mais qu'il auoit regret de mourir ainsi laschement sans auoir donné un seul coup de sa main. Ceste mort fut fort pitoyable, & la cōstance des Spartiates admirable: car ilz ne bougerent iamais de leurs places, ny ne feirent semblāt de se defendre cōtre l'ēnemy, qui leur couroit sus, ains souffroyēt estre percez à coup de traict, & tuez sur le chāp, attendans l'heure que les Dienx leur monstrent, & que leur Capitaine leur commanderoit pour combattre. Encore disent aucuns, que comme Pausanias estoit apres à faire ses sacrifices, prieres & oraisons aux Dieux un peu arriere de la bataille, quelque troupe de Lydiēs luy courut sus, qui rauit & renuerſa sans dessus dessous tout son sacrifice, & q̄ Pausanias & ceulx qu'il auoit autour de sa personne, ne se trou-

ans à la main autres armes , les rechassèrent à coups de bastons & de fouets : en remembrance dequoy ilz disent qu'il se fait à tel iour une procession solennelle en Sparte, que lon appelle la processió des Lydiés , en laquelle les ieunes garçons sont fessez & fouettez à l'entour de l'autel . Si estoit Pausanias en grande destresse de uoir que le presbtre immoloit uictimes sur uictimes , & qu'il ne s'en trouuoit pas une agreable aux Dieux:& à la fin il tourna ses yeux en plorant deuers le temple de Iuno , & y tendant aussi les mains, supplia Iuno Cithæronine, & tous les autres Dieux, patrons & protecteurs de la contree Plataïde , fil n'estoit point es fatales destinees que les Grecs uainquissent en ceste bataille, à tout le moins qu'ilz ne mourussent point sans uendre cherement leur mort aux uaincueurs , & sans leur faire cognoistre & sentir par effect qu'ilz auoyent entrepris la guerre contre de uaillans hommes , & qui scauoyent tresbien combattre . Pausanias n'eut pas plus tost acheué ceste priere , que les sacrifices se trouuerent incontinent propices , & que les presbtres & deuins luy uindrent annoncer & promettre la uictoire:& le commandement estant aussi tost allé de main en main par tous les rengs , que lon marchast contre les ennemis , on eust dit à uoir le bataillon des Lacedæmoniens que ce n'estoit qu'un corps, comme de quelque beste courageuse qui se heris-

soit & se preparoit pour combattre . Si fut bien
incontinent aduis aux Barbares qu'ilz auroyēt
une bien rude rencontre , & trouueroyent des
gens qui combatroyēt iusques au dernier sou-
spir , pourtant se couuroyent ilz de leurs gran-
des targes à la Persiene , & tiroyent force flet-
ches & traicts contre les Lacedæmoniens , les-
quelz se tenans bien ioincts & serrez ensen-
ble , & se couurans de leurs pauois , alloyent
tousiours en auant iusques à ce qu'ilz uindrent
à les chocquer si uiuemēt, qu'ilz leur feirēt uo-
ler leurs targes hors des poings à grāds coups
de picques & de iauelines , dont ilz leur don-
noyent à trauers les uisages & les poitrines par
telle uiolence , qu'ilz en portoyēt plusieurs par
terre : lesquelz ne mouroyent point laschemēt:
car ilz prenoyent avec les mains toutes nues les
picques & iauelines des Lacedæmoniens, & en
brisoient plusieurs à force de bras: puis tiroyēt
habillement leurs cimenterres & leurs haches,
dont ilz combatoyent à bon esciant , iusques à
arracher par force les boucliers aux Lacedæ-
moniens , & à se prendre corps à corps avec
eulx, de maniere qu'ilz resisterent bien longue-
ment. Or ce pendant que les Lacedæmoniens
estoyent ainsi attachez au combat contre les
Barbares, les Atheniens les attédoyent de pied
quoy assez loing de là : mais quand ilz ueirent
qu'ilz demouroyent tant à uenir, & qu'ilz ouy-
rent un grand bruit cōme de gens qui se cōba-
royent:

royent : & dauantage , qu'il uint un meſſager qu'enuoya en diligence Pauſanias , les aduertir de ces nouuelles , adonc ilz ſe meirent en chemin à la plus grande haſte qu'ilz peurent , pour les aller ſecourir : mais ainſi comme ilz cheminoient à grand pas , à trauers la plaine , uers l'endroit dont ilz entendoient uenir le bruit , les Grecs qui tenoyent le party des Barbares leur uindrent au deuant. Ce que uoyant Ariſtides ſe ietta bié loing deuant ſes troupes , & cria premierement à haulte uoix tant qu'il peut crier , qu'il coniuroit les Grecs au nō des Dieux protecteurs de la Grece , qu'ilz euſſent à ſe deporter de ceſte guerre , & à ne dōner point d'empeschement aux Atheniēs , leſquelz ſ'en alloÿēt ſecourir ceux qui mettoient leurs uies en dāger pour defendre le bien public , & le commun ſalut de toute la Grece : mais quand il ueit que pour prieres ou coniurations qu'il leur feiſt , ilz ne ſ'en uouloyent point deporter , ains marchoyent rouiſiours les teſtes baiſſees pour le uenir chocquer , adonc il deſiſta de uouloir aller ſecourir les Lacedemoniens , & fut contraint de faire teſte à ceux qui luy couroyent ſus , eſtans bien environ cinquante mille combatans , deſquelz neantmoins la plus part ſe deſbenda incontinent , & ſe retira , meſmement quād ilz entendirent que les Barbares ſeſtoient auſſi rompus & deſbendez. Le plus fort de la bataille , & la plus aſpre meſlee , à ce que lon dit , fut à l'endroit ou

estoyent les Thebains, pource que les nobles & principaulx hōmes du pais cōbatoyent fort affectueusement pour les Barbares, & le peuple non, mais il estoit mené par le petit nombre de ceste noblesse qui leur cōmandoit. Ainsi fut ce iour la cōbatu en deux lieux, là ou les Lacedemoniēs furēt les premiers qui rōpirent & tournerent en fuitte les Barbares, & y mourut Mardonius le lieutenāt du Roy, d'un coup de pierre qu'un Spartiate nōmé Arimnestus luy dōna par la teste, suyuant ce que l'oracle d'Amphiarus luy auoit predict & prophetisé: car Mardonius auāt la bataille y auoit enuoyé un Lydien, & un Carien à celuy de Trophonius, duquel le prophete rendit responce au Carien en langue Carique: & le Lydien coucha dedās le santuaire d'Amphiarus, là ou il luy fut aduis en dormāt, que l'un des ministres du tēple luy feit cōmandement qu'il eust à sortir du lieu ou il estoit, ce qu'il ne uoulut faire, & que lors le ministre prit une grosse pierre qu'il luy rua à la teste, duquel coup il luy fut aduis qu'il mourut. ainsi le cōprelon. Mais au demourant, les Lacedemoniens chasserent les Perses fuyans, iusques dedans le pourpris qu'ilz auoyent remparé & fortifié de cloison de bois. Et peu de temps apres les Atheniens rompirent aussi les Thebains, en ayās occis sur le champ trois cents des plus nobles & des plus apparents seulement, pource que à l'instant que les Thebains cōmencerēt à tourner le

dos, il uint nouuelles aux Atheniés comme les Barbares festoyent enfermez dedans ce fort de bois, là ou les Lacedemoniens les tenoyent assiegez. Ainsi donnerent ilz loisir aux Grecs fuyans de se sauuer de uistesse, & s'en allerent aider aux Lacedemoniens à prendre le fort des Barbares: car ilz sy portoyēt assez froidement, pource qu'ilz n'estoyent pas experimentez à assaillir ny forcer une muraille, là ou incontinent que les Atheniés y furent arriuez, ilz le prirent d'assault avec un tresgrand meurtre des Barbares: car de trois cents mille combatans qu'il y auoit au camp de Mardonius, il ne s'en sauua que quarante mille soubz la conduite de Artabazus: & de la part des Grecs, il en mourut environ treze cents soixante en tout: entre lesquelz y en auoit cinquante & deux Atheniens tous de la lignee Aiantide, laquelle se porta ce iour la plus uaillamment que nulle autre, ainsi comme l'escriit Clidemus. C'est la raison pour laquelle les Aiantides faisoýēt un solennel sacrifice aux Nymphes Sphragitienes aux despēs de la chose publique, suyuant ce qui leur estoit ordonné par l'oracle d'Apollo, pour leur rédre graces de celle uictoire: des Lacedemoniens il y en mourut quatre uingts & unze: des Tegeates, seize. Mais ie m'esmerueille commēt Herodote dit qu'il n'y eut que ces peuples là qui combattissent en celle iournee contre les Barbares, & nulz autres des Grecs: car le nōbre des morts,

& auffi les ſepultures monſtrent & teſmoignēt,
que ce fut un exploit cōmun de tous les Grecs
enſemble : & qui plus eſt, ſil n'y euſt eu que
ces trois peuples qui euſſent alors combatu, &
que tous les autres fuſſent demourez ſans rien
faire, on n'eũt point engraué ſur l'autel qui
fut fondé au lieu de la bataille, un Epigramme,
dont la ſubſtance eſtoit telle,

- „ Les Grecs uainqueurs, par haults exploits de
„ guerre
„ Ayans chaffé les Perſes de leur terre,
„ Ce franc autel commun à toute Grece
„ Ont erigé à la digne haulteſſe
„ De Iupiter, qui de leur liberté
„ Contre Medois protecteur a eſté.

Ceſte bataille fut le quatrieme iour du mois
que les Atheniēs appellēt Boedromion, qui eſt
enuirō le mois de Iuillet, ou cōme comptēt les
Bœotiēs, le uingtſixieme du mois qu'ilz appel-
lent Panemus, auq̃l iour il ſe fait encore une af-
ſemblee publique des eſtats de la Grece en la uil-
le de Plataæs, ou les Platciēs font un ſolēnel ſa-
crifice à Iupiter protecteur de liberté, pour le
remercier touſiours de celle uictoire. Et ne ſe
fault point eſmerueiller de ceſte inegalité &
discordance des mois ny des iours, ueu meſme-
ment qu'aujourdhuy que l'art d'Aſtrologie eſt
beaucoup pl⁹ parfaitement entēdue qu'elle ne
l'eſtoit alors, encore cōmencent & acheuent les
uns leurs mois à un iour, & les autres à un au-

tre . Apres ceste desfaite des Barbares , il se-
meut debat entre les Atheniens , & les Lacede-
moniens touchât le pris & l'honneur de la uictoi-
re , pource q̃ les Atheniens ne le uouloyent point
ceder aux Lacedemoniens , ny leur permettre
qu'ilz en dressassent un trophée à part , tellemēt
qu'il s'en fallut biē peu que les Grecs pour ceste
occasion bādez & mutinez les uns cōtre les au-
tres , ne se ruinaissent eulx mesmes , si Aristides
n'eust par remōstrāces & raisons appaisé & rete-
nu les autres Capitaines ses cōpagnons , mesme-
mēt un Leocrates & un Myronides , enuers les-
quelz il feit tāt par uifues persuasiōs & sages pa-
roles , qu'ilz furent cōtens d'en remettre la tota-
le decisiō à l'arbitrage & au iugemēt des autres
peuples de la Grece . Si furēt les Grecs asēblez
au lieu mesme , pour uider ce differēt , & en ce
cōseil Theogiton Capitaine des Magariēs , pour
son opiniō dit , qu'il estoit necessaire , à fin d'eui-
ter guerre ciuile , qui estoit pour naistre entre
les Grecs , de deferer le pris & l'honneur de celle
uictoire à quelque autre cité que à l'une des
deux qui le querelloyēt : apres luy se leua Cleo-
critus Corinthien , que chascun pensoit uouloir
requerir cest hōneur pour la uille de Corinthe ,
pource que c'estoit celle qui auoit plus de digni-
té en la Grece , apres celles de Sparte & d'Athe-
nes : mais il feit une harengue à la louange des
Plataëiens , laquelle fut trouuee merueilleuse-
ment honeste & bien prise de chascun : car il

fut d'aduis, que pour oster l'occasion de tout ce different, lon donnaſt le pris & le loyer de ceſt honneur à la uille de Platees, pource que ny l'une ny l'autre des parties ne prendroit à deſdain que ceulx la fuſſent honorez. Il n'eũſt pas plus toſt acheué ſon dire, que Ariſtides le premier ſ'accorda à ſon aduis, & le conſentit au nom des Atheniens, & apres Pauſanias au nom des Lacedemoniens. Puis quand ilz ſe furent ainſi accordez, deuāt que partager le butin entre eulx, ilz meirent à part^a quatre uingts talents, qui furent donnez aux Plateiens, dont ilz edifierent un temple à Minerue, luy dedierent une image, & embellirent tout ſon temple de peintures, leſquelles iuſques au iourd'huÿ durent encore en leur entier: & neantmoins les Lacedemoniens dreſſerent à part leur trophée, & les Atheniens le leur auſſi à part: & ayās enuoyé à l'oracle d'Apollo en la uille de Delphes, pour ſçauoir à quelz Dieux, & cōment ilz deuoyēt ſacrifier, Apollo leur reſpondit, qu'ilz fondaffent un autel à Iupiter protecteur de liberté: mais qu'ilz ne feiſſent deſſus aucun ſacrifice, que premiere-ment ilz n'eũſſent eſteint tout le feu entiere-ment qui eſtoit en toute la cōtree: pource qu'il auoit eſté pollū & contaminé par les Barbares, & puis qu'ilz en allaſſent querir de pur & net à l'autel commun, ſur lequel on ſacrifioit à Apollo Pythien en la uille de Delphes. Ceſte reſponſe ouÿe, les magiſtrats & officiers des

a Quarante huit mille eſus.

Grecs allerent ça & là par tout le païs faire esteindre tous les feuz. Et y eut lors un homme de la uille mesme de Platées nommé Euchydas, lequel se uint de luy mesme offrir, & promettre qu'il apporteroit du feu du temple de Apollo Pythien en la plus extreme diligence qu'il seroit possible:& arriué qu'il fut en la uille de Delphes, apres auoir aspergé & purifié son corps d'eau nette, il meit dessus sa teste une couronne de laurier, & en tel estat alla prendre du feu sur l'autel d' Apollo, puis reprit aussi tost son chemin tant comme il peut courir uers la uille de Platées, là ou il fut de retour auant le Soleil couché, & fait par ce moyen en un iour mille stades de chemin, qui ualent enuiron soixante deux lieues & demie : mais apres auoir salué ses citoyens, & leur auoir liuré le feu qu'il apportoit, il tumba soudainement par terre, & rendit l'esprit. Les Platéiens l'enleuerent tout roide mort, & le feirent enterrer dedans le temple de Diane, qu'ilz surnommēt Euclia, c'est à dire, de bonne renommee, puis feirent engrauer dessus sa sepulture un Epitaphe de telle substance:

- 29 Icy fait son dernier seiour
- 29 Euchydas, qui d'icy courut
- 29 Iusqu'en Delphes, & racourut
- 29 De là icy en un seul iour.

Plusieurs estiment que ceste Deesse Euclia soit Diane, & la nomment ainsi : mais il y en a qui tiennēt, que c'estoit la fille de Hercules & de la

Nymphe Myrto , fille de Menœtius, & sœur de Patroclus, qui mourut uierge, & depuis fut honoree & reueree des Bœotiës & Locriës cōme une Deesse : car. en toutes leurs uilles on trouue tousiours es places cōmunes, un autel & une image dediee à elle, & luy sacrifient tous ceulx qui se marient, autāt hommes que femmes. Depuis il fut tenu une assemblee generale de tous les Grecs, en laq̃lle Aristides meit en auant, que par chascun an toutes les uilles de la Grece enuoyassent à certain iour leurs deputez en la uille de Platées , pour y faire prieres & sacrifices aux Dieux : & q̃ de cinq en cinq ans on y celebrast des ieux publiques, qui seroyent appelez les Ieux de liberté : & que pour faire la guerre aux Barbares on leuast sur route la Grece dix mille hommes de pied , mille cheuaux , & une flotte de cent uoiles . Item que les Platéiens de lors en auāt fussent tenuz pour saincts & sacrez, sans qu'il fust loisible de les endommager aucunement, & qu'ilz n'eussent autre charge que de sacrifier aux Dieux , pour le salut & la prosperité de la Grece. Tous lesquelz articles furent passez & authorizez de point en point, & s'obligerent les Platéiens de faire tous les ans des sacrifices solēnels, & des anniuersaires aux Grecs qui estoient morts pour la defense de la liberté des Grecs dedans leur territoire. Ce qu'ilz font encore iusques aujourd'hui en ceste maniere: Le seizieme iour du mois de Memacterion, que

les Bœotiens appellent Alalcomenos, & est enuiron le mois de Ianuier, lon fait une procession, deuant laquelle marche une trompette qui ua sonnant à larme: apres suyuent quelques chariots chargez de branches de meurte & de festons & chapeaux de triumphe, puis un taureau noir, & quelque nombre de ieunes enfans nobles, qui portent de grands uases à deux anses pleins de uin & de lait, que lon a accoustumé de respendre pour oblations propitiatoires sur les sepultures des morts, & d'autres ieunes garçons de libre cōdition qui portent des huyles de parfums & des senteurs dedans des phioles: car il n'est point loisible qu'aucune personne de seruile condition s'entremette ny s'employe à aucun office de ce mystere, pourautant que ceulx dont on y honore la memoire, sont morts en combatant pour defendre la liberté de la Grece. Apres toute ceste monstre suit le dernier, celuy qui pour lors est le Preuost des Plataiës, auquel tout le reste de l'annee il n'est pas loisible de toucher seulement du fer, ny de uestir robbe d'autre couleur que blanche: mais lors il est uestu d'un sayon teinct en pourpre, & tient en l'une de ses mains une buye qu'il prent en la maison de la uille, & en l'autre une espee toute nue, & marche en ceste contenance apres toute la pompe precedente à trauers la uille, iusques au cimetiere ou sont les sepultures de ceulx qui moururent en celle iournée, là ou

estant arriué il puise de l'eau en une fontaine qui là est, avec laquelle luy mesme laue les colonnes quarrées, & les images qui sont sur lesdites sepultures, & les oingt d'huyles de senteurs, puis immole un taureau dessus un amas de bois, qui est là tout prest, ne plus ne moins que quand on brusle les corps de quelques trespassez: & en faisant certaines prieres & oraisons à Iupiter & à Mercure terrestres, il conuie & semôd au festin du sacrifice funeral les ames de ces uaillans hommes, qui moururét en combattant pour la liberté de la Grece: puis il prent une coupe qu'il emplit de uin, & en le respendâr sur leurs sepultures dit ces mots tout hault:

" Le boy aux preux & uaillans hommes qui mou-
 " rurent iadis en defendant la franchise de la
 " Grece. Les Plataïens iusques auiourdhuy gar-
 " dent encore solennellement ceste cerimonie
 anniuersaire. Au demourant, quand les Atheniens furent retournéz en leur uille, uoyant Aristides qu'ilz uouloyent auoir à toute force le gouuernement de l'estat populaire, auquel l'autorité souueraine est entre les mains du peuple, estimant que le peuple estoit digne, & meritoit que lon eust esgard à la prouesse & grandeur de courage qu'il auoit monstree en ceste guerre, & aussi uoyant qu'il seroit bien malaisé de le forcer d'accepter autre gouuernement, attendu qu'il auoit les armes en la main, & le cueur accru par tant de belles & glorieu-

ses uictories qu'il auoit gaignees, il meit en auant un edict, Que l'autorité du gouuernement fust entre les mains de tous les citoyens également, & que de lors en auant tous bourgeois, autant pauures comme riches, peussent estre eleus par les uoix du peuple, & promeuz aux offices & magistrats de la uille. Au reste, comme Themistocles un iour eust dit en publique assemblee de uille, qu'il auoit propensé une chose qui estoit merueilleusement utile, profitable & salutaire à leur chose publique, mais qu'il y auroit danger à la dire en public, le peuple luy commanda qu'il la communiquast donques à Aristides tout seul & qu'il en consultast avec luy, pour resoudre si il estoit expedient ou non de la faire. Alors Themistocles luy dit en secret, qu'il auoit aduisé de mettre le feu dedans l'arsenal ou estoyét retirez tous les uaisseaux des Grecs, allegant que par ce moyen les Atheniés demoureroyent plus puissans que nuls autres peuples de la Grece. Cela, sans plus, entendu, Aristides s'en retourna incontinent deners le peuple, & dit en pleine assemblee du peuple, qu'il ne pouuoit estre chose plus profitable pour la chose publique d'Athenes, ny plus iniuste & plus meschante aussi, que celle que Themistocles auoit pensé de faire. Ceste response ouye, le peuple ordonna à Themistocles qu'il se deportast de celle siene entreprise, quelle qu'elle fust : tant estoit le peuple Athenien

amateur de iustice, & tant il auoit de confiance en la legalité & preudhommie d'Aristides. Lequel depuis fut enuoyé Capitaine de l'armée d'Athenes, avec Cimon, pour poursuivre & faire la guerre aux Barbares : là ou uoyant que Pausanias & les autres Capitaines Lacedæmoniens qui auoyent la superintendence sur toute l'armée, estoient rudes & rigoureux aux peuples confederez, luy au contraire parloit doucement à eulx, & se monstroit le plus familier & le plus gracieux qu'il pouuoit enuers eulx, rendant semblablement son compagnon accointable à tout le monde, & egal enuers tous, non pas foulant les uns pour soulager les autres es charges de la guerre. En quoy faisant, on ne se donna garde qu'il osta petit à petit aux Lacedæmoniens la principaulté de la Grece, non point par armes, par nauires, ny par cheuaux, ains seulement par bon sens & par sage conduite : car si la iustice & la bonté d'Aristides, & la douceur & debonairété de Cimon, rendoyent le gouuernement des Atheniens agreable & desirable aux autres peuples Grecs, l'auarice, arrogance & fierté de Pausanias, le faisoient encore plus souhaittable, pource qu'il ne parloit iamais aux autres Capitaines des peuples alliez & confederez, que ce ne fust tousiours en courroux, & les rabrouoit austèrement : & quant aux particuliers souldards pour les moindres faultes il les faisoit fouetter oul-

trageusement, ou bien demourer tout le long d'un iour debout, ayans une ancre de fer pesante sur leurs espaules. Il n'y auoit personne qui ozaſt aller au fourrage, ny prédre de la paille ou de la ionchee à faire paillasseſ, ne qui ozaſt mener boire ſes cheuaulx deuant les Spartiates : car il auoit ordonné des gardes pour cela, qui rechassoyent à coups de fouet ceulx qui sortoyent deuant eulx. Et un iour qu'Aristides luy en cuida dire & remonſtrer quelque choſe, il froncea ſon uiſage, & luy reſpondit qu'il n'auoit pas loisir de parler à luy, ne le uolâr point ouir. A l'occasion dequoy les Capitaines des autres Grecs, meſmement ceulx de Chio, de Samos & de Lesbos, depuis ſe meirent apres Aristides, pour luy perſuader qu'il entrepriſt la charge & l'autorité de commander aux autres peuples Grecs, & de prendre en ſa ſauuegarde les alliez & confederez, qui de long temps ne cherchoyent autre choſe que de ſe ſouſſtraire de l'obeiſſance des Lacedæmoniens, & ſe ſoumettre aux Atheniens. Aristides leur feit reſponſe, que non ſeulement ilz auoyent raiſon de faire ce qu'ilz diſoyent, mais qu'ilz y eſtoyēt totalement contraints : toutefois que pour donner aux Atheniens occasion de ſ'aſſeurer de leur foy & loyauté, il eſtoit beſoing qu'ilz feiſſent quelque cas notable à l'encontre des Lacedæmoniens, pour lequel leurs peuples n'ozaſſent plus deſormais ſe departir d'auec les Athe-

niens. Quoy entendans Vliades Samien & Autagoras de Chio, tous deux Capitaines de galeres coniuerez ensemble, allerent un iour inuestir l'un d'un costé, l'autre de l'autre, la galere Capitaineſſe de Pausanias assez pres de Constantinople, ainsi qu'elle uoguoit deuant toute la flotte. Ce que voyant Pausanias se leua incontinent en cholere, & les menaça que dedans peu de iours il leur feroit cognoistre, qu'il eust mieulx ualu pour eulx qu'ilz eussent assailly leur propre païs, que de luy auoir ainsi courus : mais ilz luy respondirent, qu'il se retirast habilement s'il estoit sage, & qu'il remerciaſt hardiement la fortune, laquelle auoit voulu que sous sa conduite les Grecs eussent emporté la uictoire en la iournee de Platæes, & qu'il n'y auoit eu autre chose que la reuerence d'icelle, qui eust iusques là retenu les Grecs & engardé de luy faire payer la peine que son orgueil & son arrogance meritoient. La fin fut, qu'ilz se departirent d'avec les Lacedæmoniés, & se rengerent deuers les Atheniens. En quoy se peult clairement uoir & cognoistre une grandeur de courage, & magnanimité admirable des Lacedæmoniens : car quand ilz s'apperceurent que leurs Capitaines se gastoyét & se corrompoyent pour la trop grande autorité & licence qu'ilz auoyent, ilz quitterent uoluntairement la superiorité qu'ilz auoyent dessus les autres Grecs, & cessèrent d'enuoyer de leurs

Capitaines pour auoir la superintendence sur toute l'armee des Grecs, aimans trop mieulx que leurs citoyens fussent obeïssans, & qu'ilz obseruassent de poinct en poinct la discipline & les ordonnances de leur pais, que qu'ilz eussent eulx la presidence & superiorité sur toute la Grece. Or contribuoyent bien les uilles & peuples de la Grece quelque somme d'argent, pour fournir aux frais de la guerre contre les Barbares, des le temps mesmes que les Lacedæmoniés auoyent la superiorité: mais depuis que elle leur eut esté ostée, les Grecs uoulurent qu'il se feist une taille, par laquelle chacune uille fust raisonnablement cottisée selon ses facultez, à fin qu'on sceust combié chacun deuroit payer: & pour cest effect demanderent Aristides aux Atheniens, auquel ilz donnerent pouuoir & mandement de cottiser & taxer egaleement chacune uille, eu esgard à la grandeur de son territoire, & au reuenu d'icelle selon qu'elle pourroit & deuroit raisonnablement porter. Mais si Aristides estoit pauvre quand il entra en ceste charge & autorité si grande, que par maniere de dire, la Grece se soubmettoit toute à sa discretion, il en sortit encore plus pauvre, & feit ceste taxe & assiette de taille, non seulement iustement & nettement, mais dauantage si equitablement selon la portee de chacun, qu'il n'y eut personne qui en demourast malcontent. Et tout ainsi que les anciens ont celebré &

chanté la felicité de ceulx qui uescurent sous le regne de Saturne, qu'ilz ont appellé l'aage doré, aussi feirent depuis les peuples alliez & confederez des Atheniens la taxe qui lors fut faite par Aristides, en la nommant le bon & heureux temps de la Grece, mesmement quand peu de temps apres elle doubla, & puis tripla tout soudain : car la taxe que feit Aristides monta environ ^a quatre cents soixante talents : & Pericles l'augmenta presque d'une tierce partie, pour ce que Thucydides escrit, que au commencement de la guerre Peloponesiaque les Atheniens leuoyent bien ^b six cents talents par chascun an sur leurs alliez : & apres la mort de Pericles, les harengueurs & entremetteurs du gouuernement de la chose publique, la haulserent petit à petit, iusques à la faire monter à la somme de ^c treze cents talents, non tant pour ce que celle guerre fust ainsi de grande despen- se, à cause de sa longueur, & des pertes que les Atheniens y eussent receuës, que pour autant qu'ilz accoustumerent le peuple à faire faire des distributions d'argent manuel à chaque citoyen, à faire iouer des ieux, & à faire faire de belles images, & edifier des temples magnifiques. Ainsi donques estoit Aristides à bõ droit honoré, loué & estimé de tout le monde, pour ceste iuste imposition de taille, excepté de Themistocles, lequel s'en moquoit, & alloit disant, que ce n'estoit point une louange propre à un
homme

a Deux cents soixante & seize mille escus.

b Trois cents soixante mille escus.

c Sept cens quatre-vingts mille escus.

homme de bien, ains plus tost à un coffre bien ferré, là ou lon peult mettre de l'argent seurement: ce qu'il disoit pour auoir sa reuêche, mais si ne le picquoit il pas si aigrement, comme Aristides l'auoit picqué ouuertement & au uif, quād un iour en deuissant Themistocles luy dit, qu'il estimoit la plus grande partie, & plus excellente uertu que sçauroit auoir un Capitaine, estre, sçauoir bié descouurir & preuoir les conseils & les entreprises des ennemis. Cela, respōdit Aristides, est bien necessaire, mais aussi est-ce chose honeste, & ueritablement digne d'un Gouverneur & Chef d'armee, d'auoir les mains nettes, & ne se laisser point corrompre par argent. Aristides donques feit iurer aux autres peuples Grecs qu'ilz obserueroient de poinct en poinct les articles de l'alliance, & luymesme comme Capitaine general les iura au nom des Atheniens: & en prononceant les execrations & malediCTIONS à l'encontre de ceulx qui faulseroyent leur serment, feit ietter des masses de fer ardēt dedans la mer, cōme priant aux Dieux que ainsi fussent esteincts & exterminiez ceulx qui uioleroient leur foy: toutefois depuis quād les affaires contraignirent, à mon aduis, ceulx d'Athenes de retenir un peu uiolentement leur domination, il dit aux Atheniens qu'ilz reietassent routes les execrations & malediCTIONS sur luy, & que au demourāt ilz ne laissassent point pour crainte d'icelles de faire les choses ainsi

qu'ilz uerroyent leur estre expedient. Brief Theophrastus escrit, que c'estoit un personnage parfaitement droit & iuste es choses priuees d'homme à homme, mais au gouuernemēt des affaires publiques, qu'il faisoit beaucoup de choses selon l'exigence des temps, & selon les occurrences de sa uille, laquelle bien souuent auoit besoing de grande uiolence & de grande iniustice, comme quand on meit en deliberation du conseil, à sçauoir, si lon deuoit enleuer l'or & l'argent, qui estoit en depost & espargne dedans l'isle de Delos au temple d'Apollo, pour suruenir aux affaires de la guerre contre les Barbares, & le transporter de là à Athenes, suyuant ce que les Samiens auoyent mis en auant, combien que ce fust directement contre les articles du traitté d'alliance faite & iuree entre tous les Grecs, quand on en demanda l'opinion à Aristides, il respondit, qu'il n'estoit pas iuste, mais qu'il estoit profitable: ce neâtmoins apres auoir mis en son païs, & donné à sa uille la superiorité de cōmander à tant de milliers d'hommes, encore demoura il tousiours en sa pauureté accoustumee, & aima tousiours iusques à son trespas autant la louange & la gloire qui luy uenoit de sa pauureté, comme des uictoires & trophées qu'il auoit gaignez: ce que lon peult iuger & cognoistre par cest argument: Callias le portetorche de Ceres, estoit son proche parent, lequel fut mis en iustice, par quelques siēs

maluueillans qui le chargerent de cas & crimes
capitaulx : & quand uint le iour, auquel la cause
deuoit estre plaidee, ilz deduisirent assez froi-
dement & assez legerement les autres crimes
dont ilz l'accusoyér: mais en extrauaguant hors
de leur matiere principale, ilz parlerét en ceste
„ maniere aux iuges : Messieurs, uous cognoissez
„ tous Aristides le filz de Lyfimachus, & sçauiez
„ comme pour sa uertu il est autant estimé entre
„ tous les Grecs qu'homme uiuant le sçauroit e-
„ stre. Comment estimez uous qu'il uiue en sa
„ maison, ueu que uous le uoyez sortir en public,
„ & aller par la uille avec une pauvre robbe tou-
„ te roinpue & usee ? N'est il pas uray semblable,
„ que celuy que nous uoyons en public trembler
„ de froit pour estre si mal uestu, endure grande
„ faim en son priué, & qu'il a grande necessité de
„ toutes choses requises à la uie de l'homme ? &
„ neantmoins cestuy Callias, qui est son propre
„ cousin germain, & le plus riche & opulent de
„ tous les bourgeois d'Athenes, est si malheu-
„ reux qu'il le laisse luy, sa femme & ses enfans,
„ en ceste necessité, combien qu'il luy ait sou-
„ uent fait plusieurs grands plaisirs, par le moyen
„ du credit qu'il a enuers uous. Callias uoyant
que ses iuges s'esmouuoient & faigrissoient
plus contre luy pour cela, qu'ilz n'auoyent fait
pour tout le demourant, feit appeller Aristides
en iugement, & le somma de porter tesmoigna-
ge de uerité, sil ne luy auoit pas par plusieurs

fois présenté bonne somme d'argent, & prié de le prendre, ce qu'il n'auoit iamais uoulu faire : ains luy auoit tousiours respondu, qu'il se pouuoit mieulx & à meilleur droit uanter de sa pauureté, que luy ne faisoit de sa richesse: & que lon trouuoit assez de gens qui uoyent les uns bien, les autres mal de leur richesse, mais qu'il n'estoit pas aisé d'en trouuer un seul, qui portast uertueusement & magnaniment la pauureté: & qu'il n'y auoit que ceulx qui estoient paures malgré eulx, qui deussent auoir honte de l'estre. Aristides tesmoigna que la uerité estoit telle, comme il disoit: & n'y eut pas un des assistens à ce plaidoyer, qui ne s'en allast avec ceste opinion & ceste uoulunté, qu'il eust mieulx aimé estre pauvre comme Aristides, que riche comme Callias. Ainsi l'a escrit Æschines le philosophe Socratique: & Platon luy defere tant, que de tous ceulx qui ont esté beaucoup estimez & renommez à Athenes, il ne fait compte

» que de luy seul: car les autres, dit-il, comme The
 » mistocles, Cimon & Pericles, ont bien emply
 » & embelly la uille de portiques, d'edifices, d'or
 » & d'argent, & autres telles superfluitez & cu-
 » riositez: mais Aristides est celuy seul, qui a diri-
 » gé tous ses conseils à la uertu au faict du gou-
 » uernement de la chose publique. On peult aussi
 euidemment cognoistre la grande bonté & equité qui estoit en luy par ses deportemens enuers Themistocles: car combien qu'il luy eust

rousiours esté ennemy & aduersaire en toutes choses, & qu'à sa poursuite & par ses menees il eust esté banny d'Athenes, neâtmoins il ne s'en uoulut point ressentir lors qu'il en eut l'occasiõ & le moyen, estant Themistocles accusé enuers le peuple de lese maiesté, & pourfuyuy asprement par Cimon, Alcmaon & plusieurs autres siens maluueillans : car Aristides ne feit ny ne dit alors chose quelconque à son preiudice, ny à son desauâtage, & ne se resiouit point de uoir son ennemy en aduersité, non plus qu'il ne luy auoit onques porté enuie en sa prosperité. Quant à son trespas, les uns disent qu'il mourut au royaume de Pont, là ou il auoit esté enuoyé pour les affaires de la chose publique: les autres tiennent, qu'il mourut de uieillesse en la uille de Athenes, grandement honoré, aimé & estimé de tous ses citoyens. Mais Craterus le Macedonien escrit de sa mort en ceste sorte: Apres que Themistocles, dit il, s'en fut enfouy, le peuple d'Athenes en estant deuenu fier & insolent, fut cause de faire soudre un grand nombre de calumniateurs qui se meirent à charger & accuser faulxement les premiers hommes & principaux personnages de la uille, & à leur procurer l'enuie & maluueillâce du commun populaire, qui s'enorgueillissoit pour la prosperité de ses affaires, & pour l'augmentation de sa puissance: entre lesquelz Aristides fut atteint de concussion & maleuerfation au gouuernement de la chose

publique, à la poursuite d'un nommé Diophantus natif du bourg d'Amphitrope, qui le chargea d'auoir pris argent des Ioniens, en leuant le tribut qu'ilz payoyent annuellement: & dit, que pour n'auoir peu payer l'amende en laquelle il fut condamné, qui estoit de cinq cents escus, il fut contrainct d'abandonner la uille d'Athenes, & qu'il s'en alla en Ionie, là ou il mourut. Toutefois ce Craterus n'allegue pas un tesmoignage, ny pas un argument pour uerifier son dire, ny le plaidoyer, ny la sentence de condamnation, ny decret aucun touchant ce faict, combien qu'il ait accoustumé de recueillir diligemment ailleurs tout cela, & d'alleguer tousiours ses auteurs. Qui plus est, tous les autres qui ont mis par escript, & fait un recueil des fautes que le peuple Athenien a laschement commises autresfois contre ses Capitaines & gouuerneurs, alleguēt bien l'exil de Themistocles, la captiuité de Miltiades qui mourut en prison, l'amende en laquelle fut condamné Pericles, la mort de Paches, qui se tua luy mesmes dedans la tribune aux harengues, quand il se ueit condamné: & amassent beaucoup de telles histoires, ausquelles ilz adioustent le bannissement d'Aristides, mais ilz ne font mention quelconque de ceste condamnation que dit Craterus. Dauantage lon monstre encore aujourdhuy la sepulture d'Aristides sur le port de Phalerus, qui luy fut faite aux despens de la

chose publique, comme lon dit, pource qu'il deceda si pauvre, que lon ne trouua pas chez luy dequoy le faire inhumer:& si dit on encore plus, que par decret du peuple ses filles furent mariees aux despens du public, & eurent chacune en mariage ^a trois mille drachmes d'argēt: & qu'à son filz Lysimachus furent dōnees, cent mines d'argent, & cent arpens de terre, & luy ordonna lon ^c quatre drachmes d'argent par iour de prouisiō ordinaire, à la poursuite d'Alcibiades, qui en meit le decret en auant. Et outre tout cela, cestuy Lysimachus laissa une seule fille nommee Polycrite, à laquelle le peuple ordonna, comme tesmoigne Callisthenes, toute telle prouision pour uiure, que l'auoyent ceulx qui emportoient le pris es ieux Olympiques. Et puis Demetrius le Phalerien, Hieronymus le Rodien, Aristoxenus le musicien, & Aristote le philosophe, au moins si le traitté que lō treuve intitulé, De la noblesse, est ueritablemēt des œuures d'Aristote: tous ensemble tesmoignent qu'une Myrto fille de la fille d'Aristides, fut mariee au sage Socrates, qui la prit en mariage (combien qu'il en eust une autre espousee) pour autant qu'elle estoit uesue, & ne trouuoit pas à qui se remarier pour sa pauvreté, & auoit beaucoup affaire à uiure: toutefois Panætius leur respond, & contredit assez, en ce qu'il a escrit de la uie de Socrates: mais Demetrius Phalerien escrit au liure qu'il a intitulé

^a Ce son
enuiro
trois cēt
escus.
^b Mille
escus.
^c Treize
solz &
quatre.

Socrates, qu'il auoit bonne souuenance d'auoir ueu un Lyſimachus, filz du filz ou de la fille de Aristides, qui estoit fort pauvre, & uiuoit de ce qu'il pouuoit gagner à interpreter des songes par certaines tables, ou estoit escrite l'art d'exposer les significances des songes, & se tenoit ordinairement aupres du temple de Bacchus, que lon appelle Iacchion, auquel ensemble à sa mere & à sa sœur, il dit auoir fait ordonner par le peuple pour leur aider à uiure, à chacū^a un triobole par iour. Il est bien certain que ce mesme Demetrius Phalerien, en reformant l'estat d'Athenes, ordonna qu'à la mere & à la fille seroit donné du public par chacun iour^b une drachme d'argent, & ne doit on point trouuer nouueau que le peuple d'Athenes ait eu si grand soing d'exercer charité enuers ces femmes la qui estoient resseantes en la uille, attédu que autrefois estant aduertie comme une petite fille d'Aristogiton estoit en l'isle de Lemnos en bien pauvre & petit estat, & que pour sa pauureté elle ne pouuoit pas trouuer mary, il la feit uenir à Athenes, & la maria en l'une des plus nobles maisons de la uille, & si luy donna pour douaire une possession au bourg de Potamos. Ceste uille a tousiours fait par le passé, & fait encore de present iusques à nostre temps de grands actes de bonté & d'humanité, pour lesquelz elle est à bon droit grandement louee, prisee & honoree de chacun.

^a Enuiron
vingt de-
niers tour
nois.

^b Trois
sols &
quatre.



MARCVS CATO LE CENSEVR.



MARCVS Cato & ses ancestres estoient , comme lon dit, de la uille de Thusculum : mais auant qu'il allast à la guerre , & qu'il s'entremist des affaires de la chose publique, il se tenoit & uiuoit en quelques terres & possessions que son pere luy auoit laissees au païs des Sabins. Et combien qu'il semblast à plusieurs que ses predecesseurs eussent esté totalement inco-
gneuz , toutefois luy mesme louë haultement son pere qui se nommoit Marcus , comme luy, disant qu'il auoit esté uaillant homme, & homme de guerre : & fait aussi mention d'un autre Caton son bisayeul, qui pour ses uaillâces auoit souuent eu de ses Capitaines les dons & pris d'honneur que les Romains ont accoustumé de donner à ceulx qui ont fait quelque acte de prouesse notable en une bataille, & qu'ayât perdu cinq cheuaulx de seruice en la guerre, la ualeur luy en fut rendue en argent des coffres de

la chose publique, pource qu'il s'estoit porté en homme de bien. Et comme la coustume de parler à Rome fust, qu'ilz appelloient hommes nouveaux ceulx qui n'estoyent point nobles de race, ains commenceoyent à s'ennoblir eulx mesmes, & à se faire cognoistre par leur uertu, on appelloit Caton pour ceste cause homme neuf: & quant à luy il confessoit bien estre uoirement homme neuf quant aux honneurs, offices & estats de la chose publique, mais quant aux beaux faicts & bons seruices de ses predecesseurs, il maintenoit qu'il estoit tres ancien. Il s'appelloit au commencement en son tiers nom Priscus: mais depuis, à raison de son grand sens & de sa suffisance, il fut surnomé Caton, pource que les Romains appellent un homme sage, & qui a beaucoup ueu, Catō. Il estoit un peu roux de uisage, & auoit les yeux pers, ainsi que donne à entendre celuy qui composa ces uers en haine de luy apres sa mort:

- Ce fauls rousseau Porcius aux yeux pers,
 Qui harassoit & mordoit tout le monde,
 Pluto ne ueult qu'il entre en ses enfers,
 Quoy qu'il soit mort, de peur qu'il ne luy
 gronde.

Au demourât, quât à la dispositiō de sa personne, il estoit merueilleusement fort & robuste pour s'estre des son ieune aage accoustumé à tra uailer de son corps, & à uiure sobremēt, cōme celuy qui auoit esté nourry aux armes & à la

guerre des son cōmencement, de maniere qu'il estoit egalemēt biē cōplexionné, & pour la force & pour la santé. Et quāt à la parole, estimant q̄ c'estoit un secōd corps & un util, nō seulement honeste, mais aussi necessaire à tout hōme qui ueult uiure en hōneur, & manier de grāds affaires, il s'exerceoit à biē parler es petites uilles & bourgs prochains de sa maison, là ou il alloit souuēt plaider des causes, & defendre en iugement ceulx qui l'en requeroient : de maniere qu'en peu de tēps il se rendit premieremēt bon plaideur, & eut la parole à cōmandemēt, & par traitt de tēps se feit orateur eloquēt. Depuis laquelle suffisance acquise, ceux qui le hantoyent ordinairement, cōmencerēt à apperceuoir en luy une grauité de meurs & de façōs de faire, & une magnanimité digne d'estre employee au manieement de grands affaires, & de s'exercer en la lumiere d'une chose publique souueraine : car nō seulement il se garda tousiours de prēdre aucun salaire ne payement mercenaire des plaidoirs qu'il faisoit, & des causes qu'il soustenoit : mais, qui plus est, il ne tenoit pas compte de l'hōneur qui luy uenoit de tel exercice, cōme si c'eust esté le but principal ou il eust pretēdu, ains desiroit beaucoup pl⁹ se faire cognoistre & estimer par l'exercice des armes, & par uailāment cōbatre contre les ennemis : de sorte q̄ des qu'il n'estoit encore qu'un ieune homme, il auoit desia l'esto mac tout cicatricé de coups qu'il auoit receuz

en diuerſes batailles & rencontres contre les ennemis: car luy meſme eſcrit, qu'il n'auoit que dixſept ans quand il alla premieremēt à la guerre, qui fut enuiron le temps des grandes proſperitez de Hānibal, lors qu'il couroit, bruſſoit & pilloit toute l'Italie. Or quand ce uenoit au ſaict de combatre, ſa couſtume eſtoit de frapper rudement, iamais ne bouger le pied, ny reculer en arriere, monſtrer un uiſage terrible à l'ennemy, & luy uſer de menaces en luy parlant d'une uoix aſpre & effroyable: ce qu'il prenoit tresbien, & enſeignoit ſagement aux autres à le faire ainſi, pource que telles choſes, comme il diſoit, effroyent bien ſouuent plus les ennemis, que ne fait l'eſpee qu'on leur preſente. En allāt par païs il cheminoit à pied, portant luy meſme ſes armes, & auoit quelque ſeruiteur apres luy, qui luy portoit ce qui luy eſtoit neceſſaire pour ſon uiure, auquel, à ce que lon dit, il ne ſe courroucea iamais pour choſe qu'il luy euſt appretēe à ſon diſner ou à ſon ſoupper, ains luy aidoit luy meſme le plus ſouuent à l'appreſter, quand il auoit loisir, apres auoir fait ce que le priuē ſoudard eſtoit tenu de faire pour la fortification du camp ou autre affaire. Il ne beuuoit iamais eſtant à la guerre que de l'eau, ſi ce n'eſtoit aucuneſois qu'il ſe trouuoit exceſſiuemēt alteré: car alors il prenoit un peu de uinaigre: ou bien qu'il ſe ſentoit foible: car alors il beuuoit de quelque petit uin. Or eſtoit d'auenture

l'heritage de Manius Curius, celuy qui gaigna par trois fois l'honneur du triumphe, & la maison ou il festoit ancienement tenu, prochaine des terres de Caton, lequel y alloit à l'esbat bié souuent: & uoyant le peu de terre qu'il y auoit, & comment le logis estoit petitement & pauuement basti, il pensoit en luy mesme quel personnage deuoit auoir esté celuy, qui estant le premier homme des Romains en son temps, & ayant uaincu & dópté les plus fieres & plus bel liqueuses nations d'Italie, & en ayant chassé dehors le Roy Pyrrhus, labouroit neantmoins & cultiuoit avec ses propres mains ce peu de terre, & habitoit en une si pauvre & si petite mestairie: en laquelle, apres ses trois triumphes, des ambassadeurs enuoyez de la part des Samnites l'allerent quelquefois uisiter, & le trouuerent au long de son foyer, ou il faisoit cuire des raues, & luy presenterent de par leur communauté une bonne quantité d'or: mais il les renuoya avec leur or, en leur disant, que ceulx qui se contentoyent d'un rel soupper, n'auoyent que faire d'or ny d'argent: & que quant à luy, il estimoit plus honorable, commander à ceux qui auoyent de l'or, que non pas en auoir. Caton rememorant ces choses en luy mesme, s'en retournoit chez luy, & se mettoit de rechef à reuoir tout l'estat de sa maison, ses terres, sa famille, ses serfs, sa despense, & à retrencher toute superfluité, & à traualler luy mesme de ses bras

plus que iamais. Au surplus, quand Fabius Maximus reprit la uille de Tarente, Caton y estoit soubz sa charge en fort grande ieunesse, là ou il prit familiere cognoissance auec Nearchus philosophe Pythagorien, lequel il auoit fort desiré ouir deuiser & discourir de la Philosophie. Si luy feit Nearchus les mesmes discours, que fait Platon, quand il appelle uolupté la principale amorche & le plus grand appast de mal faire que les hommes ayent : & quand il dit, que le corps est la premiere peste de l'ame, & que sa guarison, sa deliurance & sa purgation, sont les discours, les remonstrances & contemplations qui la retirent le plus loing des passions & affections corporelles. Caton adonc en aima encore dauantage la sobriété, la temperance, & l'accoustumance à se passer & cōtenter de peu : car au demourant, on dit qu'il se meit bien tard, & sur l'arriere saison de son aage, à apprendre les lettres Grecques, & à lire dedans les liures Grecs : entre lesquelz il faida un peu de Thucydides, mais beaucoup plus de Demosthenes à former son stile : & à dresser son eloquence : à tout le moins ses escripts & ses liures le tesmoignēt, qui sont ornez & enrichiz d'opiniōs, exemples & histoires prises es liures Grecs, & trouue l'on plusieurs de ses sentences & dicts moraux, rencontres & responses aigues, qui en sont trāslatees de mot à mot. Or y auoit il pour lors à Rome un personnage des pl⁹ no-

bles de la uille, homme d'autorité, & de bon iugement pour bien cognoistre les semences de uerru naissante en une ieune personne, & encore de plus grande bonté & honesteté pour l'auancer & poulser en auant : c'estoit Valerius Flaccus, lequel ayant des terres ioignantes à celles de Caton, & entendant le rapport que ses gens luy faisoient de ses meurs & de sa maniere de uiure, luy comptans comme il labouroit luy mesme sa terre, & qu'il auoit accoustumé de s'en aller de grād matin aux petites uilles d'alenuiron aduocasser & plaider pour ceulx qui s'adressoyent à luy, & puis s'en retournoit en sa maison, là ou si c'estoit en Hyuer, il iettoit seulement une iacquette sur ses espauls, & si c'estoit en Esté, il s'en alloit tout nud trauailler au labourage avec ses seruiteurs & ses ouuriers, puis se feoit avec eulx à table, beuuant de mesme uin & mangeant de mesme pain qu'eulx, & tout plein d'autres telles façons de faire, qui monstroyent une grande equité, moderation & bôté en luy, & avec cela luy recitoyent aussi quelques beaux dicts moraulx, & quelques graues sentences qu'ilz auoyent ouyes de luy. Ces choses entendues, Valerius commanda un iour qu'on l'allast semondre à uenir soupper avec luy, & apres l'auoir un peu hanté, & cogneu qu'il auoit la nature gentille, honeste & ciuile, & que c'estoit comme une bōne plante qui n'auoit besoing q̄ d'estre un peu cultiuee.

& transplantee en meilleur & plus noble terrouer, il l'enhorta & luy persuada qu'il s'en alast à Rome, & se meist à harenguer en public deuant le peuple Romain, & se mesler des affaires. ce qu'il feist, & n'y fut pas plus tost introduit, qu'il fut incontinent grandement estimé, & y acquit beaucoup d'amis pour les causes qu'il defendoit, oultre ce que Valerius Flaccus le poulsait & mettoit fort en auant par le port & la faueur qu'il luy faisoit: si bien qu'il fut premierement eleu par les uoix du peuple Tribun militaire, c'est à dire, Capitaine de mille hommes de pied, & depuis Quæsteur: & de là en auant, estant ia fort renommé, & ayant acquis autorité & reputation grande, il fut compagnon & concurrent de Valerius Flaccus es principaulx & plus dignes offices & magistrats de la chose publique: car il fut créé Consul quand & luy, & depuis Censeur. Mais pour son commencement il choisit entre tous les anciens Senateurs Romains Quintus Fabius Maximus, auquel il se uoua & dedia du tout, & ce non pas tant pour son credit, encore qu'en autorité & en reputation il surmontast tous ceulx de son temps, que pour la grauité de ses meurs & de sa uie, laquelle il se proposoit cōme un tresdigne mirouer & exemple à imiter: à l'occasion dequoy il ne faignit point d'entrer en picque & en querelle avec le grand Scipion, qui pour lors, encore qu'il fust ieune, contendoit avec l'autorité,

thorité, puissance & dignité de Fabius Maximus, lequel sembloit porter enuie à son accroissement. Car estant Caton enuoyé Quaesteur & superintendant des finances avec luy, quand il entreprit de passer en Afrique, & uoyant qu'il usoit de sa naturelle liberalité & magnificence accoustumee, en donnât largement sans rien espargner aux gens de guerre, il luy remonstra un iour franchement que ce n'estoit pas en la folle despenſe des deniers communs, que plus il greuoit & endommageoit la chose publique, mais que c'estoit en ce qu'il alteroit & corrompoit l'ancienne simplicité de leurs predecesseurs, qui uouloyent que leurs souldards fussent contens de peu, là ou il les accoustumoit à employer aux uoluptez, delices & choses superflues & uolūtaires l'argent qui leur restoit apres auoir satisfait à leurs necessitez. Scipion luy feit response qu'il ne uouloit point de tresorier qui le contrerollast ainsi, ne qui regardast de si pres à sa despenſe, pource que son intention estoit d'aller à la guerre à pleines uoiles en maniere de parler, & qu'il uouloit & entendoit rédre compte à la chose publique des choses qu'il auroit faittes, nō pas de l'argent qu'il auroit despendu. Caton ceste response ouye ſen retourna tout court de la Sicile à Rome, criant avec Fabius Maximus en plein Senat, qu'il faisoit une despenſe infinie, & qu'il ſamusoit à faire iouer des farces & comedies, & à uoir des combats de lu-

cteurs, comme si on l'eust enuoyé, non pour faire la guerre, mais pour faire iouer des ieux. Si feirent tant par leurs crieries, que le Senat commeit & deputa quelques uns des Tribuns du peuple pour aller uoir sur les lieux, & informer si les charges par eulx alleguees estoyēt ueritables, & si ainsi estoit, pour le ramener & faire retourner à Rome. Mais au cōtraire Scipion monstra aux cōmissaires qui y furent enuoyez, la uictoire toute cuidēte & asseuree en l'appareil & en la prouision qu'il dresseoit des choses necessaires à la guerre : & que biē faisoit il bonne chere en compagnie priuee avec ses amis, quād les affaires luy en dōnoyent le loisir, mais que pour quelque liberalité & gracieuseté dont il uisast enuers les gens de guerre, il n'en omettoit ny ne passoit en nonchaloir chose quelconque de son deuoir ne qui fust de conséquence : ainsi s'embarqua il, & se meit à la uoile la droite route de l'Afrique, ou il alloit faire la guerre. Au demourāt pour retourner à Catō, il acqueroit tous les iours de plus en plus authorité & credit par le moyen de son eloquēce, tellement que plusieurs l'appelloyēt le Demosthenes Romain : mais toutefois sa maniere de uiure estoit encore biē plus renommee & plus estimee, pour autant que l'eloquence & la louange de bien dire estoit desia le but ordinaire, auquel aspiroyēt & taschoyēt de paruenir tous les ieunes hommes Romains à l'enuy les uns

des autres : mais il s'en trouuoit bien peu qui uoulussent labourer la terre avec leurs propres mains, cōme faisoient leurs anciens ; soupper petitement ; dīner sans feu ny appareil de cuisine, ne qui se contētassent d'une robbe simple ; & d'un logis tel quel, ne brief qui estimassent plus le non appeter toutes telles delices & superfluites, que les auoir ny en user : à cause que la chose publique estoit desia si grande, qu'elle ne pouuoit plus retenir son ancienne discipline, celle purité de son austerité premiere, ains pour la longue estendue de son empire, & pour le grand nombre des peuples qu'elle auoit soubz elle, estoit force qu'elle fust meslee de plusieurs differentes façons de uiure, & de diuers exemples de meurs. Au moyen dequoy, ce n'estoit pas sans occasiō que lon auoit la uertu de Caton en grande admiration, quād on uoyoit les autres incontinent recreuz & rompuz du trauail, ou bien amolliz & eneruez de delices ; & luy au cōtraire inuincible de l'un & de l'autre, non seulement durāt le temps qu'il fut ieune & conuoiteux d'honneur, mais aussi depuis qu'il fut deuenue uieil & chenu, apres son Consulāt & son triumphe, cōme un bon & gentil champion de lūcte, qui en aiant gaigné le pris ne se lasseroit point de continuer tousiours son exercice iusques à la fin de ses iours : Car il e-
 scrit luy mesme qu'il ne porta onque robbe qui eust cousté plus de cent drachmes d'argent, &

à Dix e-
scus :

a Enuirō
dix folz
tournois.

qu'il auoit tousiours beu, tant en son Consulat
que durant le temps qu'il auoit esté Chef d'ar-
mee, du mesme uin que beuuoient les manœu-
res de sa maison, & que pour son soupper ia-
mais on n'auoit achepté au marché de la viande
pour plus de ^a trête ailes de monoye Romaine:

encore dit il que c'estoit à fin qu'il eust le corps
plus fort & plus dispos pour pouuoir mieulx
seruir à la chose publique aux affaires de la guer-
re. Et dit dauantage, qu'ayant quelquefois eu de
la succession de l'un de ses amis, qui l'auoit
fait son heritier, une picce de tapisserie de haulte
lice, que lon apportoit lors de Babylōne, il la
fait incontinent uendre: & que de toutes les
maisons qu'il auoit aux chāps, il n'y en auoit pas
une dont les murailles fussent crespies ny en-
duittes: & oultre, qu'il n'achepta onques serf
plus cher que mille cinq cents drachmes, qui ua-
lent enuiron cent cinquāte escus, comme celuy
qui ne cherchoit pas des serfs delicats, ny de
ceux que lō achapte pour leur beaulté, mais des
forts & robustes pour pouuoir porter le trauail,
comme des chartiers, palefreniers & des bou-
uiers, encore uouloit il qu'on les uendist
quand ilz deuenoyent uieux, à fin que lon ne
les nourrist point inutiles. Brief, il disoit que
lon n'auoit iamais bon marché d'une chose
dont on se pouuoit bien passer, & qu'une chose
dont on n'auoit que faire, encore qu'elle ne
coustast qu'un liard, que c'estoit tousiours

beaucoup & trop l'achepter. Il uouloit que lon
acquist des heritages & maisons ou il y eust
plus à semer & à pasturer, que non pas à balier
& à arrouser; mais quand à cela, aucuns di-
soient qu'il le faisoit par chicheté & par aua-
rice: les autres le prenoient en aūtre sens, &
disoient qu'il se retiroit & se resserroit ainsi e-
stroïttement, pour inciter les autres par son ex-
emple à retrencher leur superfluité en despen-
se. Toutefois de uendre ainsi les serfs ou les
chasser de la maison apres qu'ilz sont enuieilliz
en nostre seruice, ne plus ne moins que si c'e-
stoyent bestes mues, quand on en a tiré le ser-
uice de toute leur uie, il me semble que cela
procède d'une par trop rude & trop dure auste-
rité de nature, & qui pèse que d'homme à hom-
me il n'y ait point de plus grāde societé qui les
oblige reciproquement, que de tant qu'ilz peu-
uent tirer profit & utilité l'un de l'autre: & tou-
tefois nous uoyons que bonté l'estent biē plus
loing que ne fait iustice, par ce que nature nous
enseigne à user d'equité & de iustice enuers les
hommes seulement, & de grace & de benigni-
té quelquefois iusques aux bestes brutes: ce
qui procède de la fontaine de douceur & d'hu-
manité, laquelle ne doit iamais tarir en l'hom-
me. Car à la uerité nourrir les cheuaulx usez &
rompus de trauail en nostre seruice, & non seu-
lement nourrir les chiens quand ilz sont petits,
mais aussi les alimenter & en auoir soing en-

core quād ilz sont enuieillis avec no^r, sont offices cōuenables à une nature charitable & debonnaire. Comme le peuple d'Athenes uoulut & ordonna du temps que lon bastissoit le temple appellé Hecatompodon, qu'on laissast aller francs & libres les mules & mulets, qui auoyēt longuement trauaillé à l'acheuement de celle fabrique, & qu'on les souffrist paistre, sans leur faire empeschement, là ou ilz pourroyent: & dit on qu'il y eut une mule de celles qui auoyent ainfi esté deliurees, qui d'elle mesme se uint presenter au trauail, en se mettant au deuant des autres bestes de uoiture, qui trainnoyent les chariots chargez uers le chasteau, en marchant quand & elles, comme si elle les eust uolu inciter & encourager à tirer: ce que le peuple prit tant à gré, qu'il ordonna qu'elle seroit nourrie aux despens de la chose publique, tant qu'elle uiuroit: & uoit on encore les sepultures des iuments de Cimon, avec lesquelles il gaigna par trois fois le pris de la course es ieux Olympiques, & sont lesdittes sepultures tout ioignant celle de Cimon. Aussi treuue lon plusieurs qui ont inhumé des chiens qui auoyent esté nourris avec eulx, ou qui leur auoyēt tousiours fait cōpagnie, cōme entre les autres, l'ancien Xantippus enterra son chié sur un Chef en la coste de la mer, que lon appelle encore auiourd'hui le Chef de la sepulture du chié, pource que quād le peuple d'Athenes à la

uenue des Perſes abandonna la uille, ce chiẽ ſuy-
uit touſiours ſon maĩſtre, nageant en mer coſte
à coſte de ſa galere, depuis la coſte de terre fer-
me, iuſques en l'isle de Salamine: car il n'eſt pas
raiſonnable d'uſer des choſes qui ont uie & ſen-
timẽt, tout ainſi que nous feriõs d'un ſoulier, ou
de quelque autre uenſile, en les iettant apres
qu'elles ſont toutes uſees & rompues de nous
auoir ſeruis : ains quand ce ne ſeroit pour autre
cauſe, q̃ pour nous diure & exerciter touſiours
à humanitẽ, il nous fault accouſtumer à eſtre
doux & charitables, iuſques à telz petits & me-
nus offices de bõrẽ. Et quant à moy, ie n'auois
iamais le cuer de uendre le bœuf qui auroit
longuement labourẽ ma terre, pource qu'il ne
pourroit plus trauailler à cauſe de ſa uieilleſſe,
& encore moins un aſclauẽ en le chaſſant, cõ-
me de ſon paĩs, du lieu ou il auroit long temps
eſtẽ nourry, & de la maniere de uiure qu'il au-
roit de longue main accouſtumeẽ, pour un pe-
tit d'argent que i'en pourrois retirer en le uen-
dant, lors qu'il ſeroit autant inutile à ceulx qui
l'acheteroyent, comme à celuy qui le uendroit.
Mais Caton au contraire faiſant gloire, dit qu'il
laiſſa en Heſpaigne le cheual duquel il ſ'eſtoit
ſeruy à la guerre, durant ſon Conſulat, pour
eſpargner à la choſe publique l'argent qu'il euſt
coſtẽ à le ramener par mer en Italie. Or ſi ce-
la ſe doit attribuer à une magnanimitẽ, ou
bien à une chichetẽ, on en pourroit alleguer

des raisons apparentes d'une part & d'autre: mais au demourant, c'estoit ueritablement un personnage d'abstinence merueilleusement admirable: car estant Chef d'armee, il ne prit iamais du public plus de trois minots de froment par mois, pour la nourriture de luy & de sa famille, ny pl^{us} de minot & demy d'orge par iour, pour la nourriture de ses cheuaux & autres bestes de uoitture. Le gouuernement de l'isle de Sardagne luy escheut une fois par le soit estant Præteur, & au lieu que les autres Præteurs auant luy mettoient le pais en grands frais, à les fournir de pauillons, de lits, de robes & autres meubles, & chargeoyent les habitants d'une grande suite de seruiteurs, & grand nombre de leurs amis qu'ilz trainnoyēt tousiours quād & eulx, & d'une grosse despense qu'ilz faisoyēt ordinairement en banquets & festoyemens: luy au contraire y feit un changemēt de superfluité excessiue en simplicité incroyable: car il ne leur feit pas couster pour luy un tout seul denier, pource qu'il alloit faisant sa uisitatiō par les uilles à pied sans monture quelcōque, & le suyuoit seulement un officier de la chose publique, qui luy portoit une robe & un uase à offrir du uin aux Dieux es sacrifices. Mais comme il se monstroit ainsi simple & facile aux subiects en telles choses, aussi leur faisoit il d'autre costé bien sentir sa grauité & son austerité es choses qui concernoyent le saict de la iu-

stice, là ou il ne pardonnoit à personne, & es ordonnances & commandemens, qu'il leur faisoit au nom de la chose publique : car là il y estoit si feuerre & si aspre, qu'il ne uouloit pas que lon y faillist d'un seul poinct, tellemēt que l'Empire Romain ne fut iamais ne plus aimable, ne plus redoutrable aux habitans de la Sardagne, qu'il fut sous son gouuernement. Ce que son stile mesme & sa maniere d'escrire & de parler nous represente euidentement: car elle est plaisante, & neantmoins graue, doulce & espouuentable, guaye & austere, sententieuſe, & toutefois familiere, telle qu'il fault à disputer : ne plus ne moins que Platon dit, que Socrates à l'aborder sembloit de prime face hōme ignorant & grossier à ceulx qui n'en cognoissoient que le dehors, ou moqueur & picquant en paroles : mais quand on le uenoit à sonder iusques au fond & penetrer au dedans, on le trouuoit plein de graues sentences, de raisons, remonstrances & discours, qui ataignoyent si bien les cueurs au uif, qu'elles faisoient uenir les larmes aux yeux des escoutans, & tournoyēt les hommes en tel sens cōme il uouloit. Pourtant ne puis-ie entendre quelle raison meurt ceulx qui tienent que le stile de Caton ressemble à celui de Lyſias: toutefois laissons en faire le iugement à ceulx qui font profession de discerner les diuers genres d'orateurs, & les differentes formes de stile : car quant à moy ie me

contenteray pour le present, de mettre par e-
 script seulemēt quelques uns de ses beaux dicts
 & sentences notables, pource que ie suis d'opi-
 nion que les meurs des hommes se descourent
beaucoup mieulx par les paroles, que non pas
par les traicts du uisage, comme plusieurs esti-
ment. Vn iour donques qu'il taschoit à destour-
 ner le peuple Romain, lequel uouloit à toute
 force que lon feist, hors de saison, une distribu-
 tion gratuite de bled à chasque citoyen de Ro-
 me, il commença sa harengue par une telle
 » preface: Il est bien difficile, Seigneurs Ro-
 » mains, de reduire à la raison par remonstrances
 » un uentre qui n'a point d'aureilles. Et une au-
 » tre fois en blasmant la mauuaise police, qui lors
 » estoit à Rome, il dit, qu'il estoit malaisé preser-
 » uer de ruine une cité, en laquelle un poisson se
 » uendoit plus qu'un bœuf. Il disoit aussi, que les
 » Romains ressembloyent un troupeau de mou-
 » tons: car tout ainsi que chasque mouton à part
 » n'obeit pas au berger, mais quand ilz sont en-
 » semble, alors ilz suyuent tous, l'un pour l'amour
 » de l'autre, ceulx qui vont deuant: aussi, disoit il,
 » quād uous estes tous ensemble, uous uous lais-
 » sez mener par le nez à telz, de qui chacun de
 » uous à part ne uoudroit pas prendre le conseil
 » en ses priuez affaires. Et une autre fois en deu-
 » fant de la puissance que les Dames Romaines
 » auoyent sur leurs maris: Les autres hommes,
 » dit il, commandent à leurs femmes, & nous à

72 tout le demourant des hommes, & noz fem-
33 mes nous commandent. Mais ce dernier est
emprunté & translaté des dictz aigus de The-
mistocles, lequel comme son filz luy feist faire
beaucoup de choses par le moyen de sa mere,
33 dit un iour à sa femme: Les Atheniens com-
33 mandent au demourant des Grecs, moy aux
33 Atheniens, roy à moy, & ton filz à toy: pour-
33 tant admoneste le, qu'il use un peu plus mode-
33 recement & plus reserueement de la licence
33 qu'on luy permet, par le moyen de laquelle il a
33 tout estourdy & fol qu'il est, plus de puissance
33 & d'autorité que nul autre des Grecs. Il disoit
33 aussi, que le peuple Romain ne mettoit pas seu-
33 lement le pris & la ualeur aux diuerfes sortes
33 de pourpre, mais aussi aux estudes & aux exer-
33 cices de la ieunesse: Car tout ainsi, disoit il, que
33 les teinturiers teignent le plus souuent la cou-
33 leur qu'ilz uoyent estre la plus requise, & qui
33 plus uniuersellement plaist aux yeux des hom-
33 mes: aussi les ieunes gens Romains mettent
33 peine d'apprendre, & s'addonnent aux estats,
33 uacations & exercices à qui plus uous donnez
33 de louange, & que plus uous honorez. Il admo-
nestoit ordinairement les Romains, que si par
uertu & par temperance ilz estoient deuenuz
ainsi grands & puissans, ilz ne se muassent point
en pis: ou filz festoyent faits grands par uice
& par intemperance, qu'ilz se changeassent en
mieulx: pource que par ces moyens la ilz se-

royent ia deuenuz assez grands . Il disoit aussi ,
 que ceulx qui briguoyent ambitieusement &
 fouuent les estats & offices de la chose publi-
 que , sembloient auoir peur de faillir leur che-
 min , & pour ceste cause qu'ilz uouloyent touf-
 iours auoir des huiffiers & des massiers deuant
 eulx pour les conduire , de peur qu'ilz ne s'esga-
 rassent par la uille . Il reprenoit aussi ceulx qui
 elisoient plusieurs fois de mesmes personnes à
 » mesmes magistrats : Car il semble , dir il , ou que
 » vous n'estimez pas beaucoup uoz magistrats ,
 » ou que vous n'avez pas beaucoup d'hommes
 » que vous iugiez dignes de les administrer . Il y
 auoit un de ses ennemis qui menoit une mes-
 chante , malheureuse & honteuse uie , duquel il
 fouloit dire , que quand sa mere prie aux Dieux ,
 qu'ilz le laissent sur la terre , elle ne cuide pas
 prier , mais maudire : comme uoulant dire , que
 c'estoit une peste au monde . Et d'un autre qui
 auoit uendu les terres & heritages que son pe-
 re luy auoit laissez , estans au long de la marine ,
 en le monstrant au doigt , il faisoit semblant de
 s'esbahir comment il estoit si puissant homme ,
 qu'il auoit plus de force que n'auoit la mer : car
 ce que la mer ua minant petit à petit en long
 temps & à grand' peine , luy l'a auallé tout à un
 coup . Vne autre fois que le Roy Eumenes e-
 stoit uenu à Rome , le Senat luy fait un recueil
 merueilleux , & se perforçoyent tous les plus
 gros personnages de la uille à le caresser & ho-

norer à l'enuy l'un de l'autre : mais Caton au contraire monstroit euidentement qu'il auoit routes ces caresses pour suspectes, & se gardoit de le hanter: & comme quelcun de ses familiers
luy dist, Le m'esmerueille bien comme uous
fuyez ainsi la frequentation du Roy Eumenes,
ueu que c'est un si bon prince, & qui tant ueult
de bien aux Romains : Le ueux bien, respondit
il, qu'il soit ainsi : mais comment qu'il en aille,
un Roy est tousiours de sa nature une beste rauissante, & qui uit de proye: & si n'y eut onques
Roy, tant fust il loué & estimé, qui meritast
d'estre comparé à un Epaminondas, un Pericles, un Themistocles, ny à un Manius Curius,
ou à un Amilcar surnommé Barca. Il disoit aussi que ses ennemis luy portoyent enuie, pource que ordinairement il se leuoit la nuict auant le iour, & oublioit ses particuliers affaires pour uacquer aux publiques. Et affermoit qu'il aimoit mieulx estre priué de la recompense d'un bienfaict, que non puny d'un mesfaict : & qu'il pardonnoit à tous autres qui failloyent par erreur, excepté à soy mesmes. Vn iour comme le peuple eust eleu & député trois ambassadeurs pour enuoyer au royaume de Bithynie, dont l'un auoit les pieds tous gastez de gouttes, l'autre la teste toute pleine de trous & de fosses, pour les coups qu'il y auoit euz, & le tiers estoit tenu pour fol, Caton en se riant se prit à dire, que lon enuoyoit une ambassade, qui n'a-

a C'est à dire, enté dement: car ils esti moyent que le fidge de la raisõ fust au cuer, fuyuant l'opinion d'Aristo-
 te.
 uoit ne piedz, ny teste, ny cuer a. Scipion le pria une fois en faueur de Polybius pour les bannis du pais d'Achaïe: la matiere fut mise en deliberation du Senat, là ou il y eut grande dispute & grande diuersité d'opinions entre les Senateurs, pource que les uns uouloyent qu'ilz fussent restituez en leurs maisons & en leurs biens, les autres l'empeschoyent: & Caton se dressant en pieds leur dit, Il semble que nous n'ayons autre chose à penser ny à faire, ueu que nous nous amusons tout un iour à disputer &

” contester, à sçauoir si ces uieillards Grecs icy se-
 ” ront portez en terre par les fossoyeurs & por-
 ” teurs de Rome, ou bien par ceulx d'Achaïe. Si
 fut à la fin conclu & arresté qu'ilz seroyent re-
 mis & restituez en leur pais: mais quelques
 iours apres Polybius uoulut de rechef presen-
 ter requeste au Senat, tendant à ce que ces ban-
 nis restituez par ordonnance du Senat eussent
 les mesmes estats & honneurs en Achaïe qu'ilz
 y auoyent quand ilz en furent dechassez, mais
 auant que le faire, il uoulut premierement son-
 der ce qu'il en sembloit à Caton: lequel luy re-
 ” spondit en riant, Il me semble, Polybius, que tu
 ” fais comme Vlysses, qui estant une fois eschap-
 ” pé de la cauerne du geant Cyclops, y uoulut re-
 ” tourner pour aller querir son chapeau & sa
 ” ceincture qu'il y auoit oubliez. Il disoit aussi
 que les sages apprenoyent & profitoyent plus
 des fols, que ne faisoient les fols des sages:

pource que les sages uoyét les faultes que font
les folz, & se donnent garde d'y tumber, là ou
les folz ne s'estudient point à imiter les beaux
& bons actes que font les sages. Il disoit dauan-
tage qu'il aimoit mieulx les ieunes hommes
qui rougissoyent, qu'il ne faisoit ceulx qui pal-
lissoyent: & qu'il ne uouloit point de soudards
qui remuassent les mains en allant par les
champs, ny les pieds en combatant, ne qui ron-
flassent plus fort en dormant, qu'ilz ne crioient
en se batant. Et un iour blasmant quelqu'un
qui estoit extremement gras & replet: A quoy,
dit il, pourroit estre utile à la chose publique
un corps, qui depuis le menton iusques à la na-
ture n'est rien que uentre? A un autre homme
uoluptueux qui cherchoit à l'accointer, & à en-
trer en familiarité avec luy: Je ne sçaurois, dit
il, en le refusant, uiure ne conuerser avec hom-
me qui ait le palais & la langue plus sensible
que le cueur. Il disoit aussi que l'ame d'un a-
moureux uiuoit en corps d'autrui: & qu'en
toute sa uie il s'estoit repenty de trois choses.
La premiere, s'il auoit iamais dit aucune chose
de secret à femme: La seconde, s'il estoit on-
ques allé par eau là ou il eust peu aller par terre:
La troisieme, s'il auoit passé un iour entier sans
rien faire. Et à un uieillard de mauuaise uie, en
le reprenant: Vieillard, dit il, la uieillesse a de
soy mesmes assez d'autres laideurs, n'y adiouste
point encore celle qui procede de uice. Et à un

Tribun du peuple seditieux, que lon suspen-
çonnoit d'estre un empoisonneur, & qui tas-
choit à faire passer à toute force, & autoriser
par le peuple un edict qui estoit inique: Je ne
sçay, dit il, lequel des deux est le pire, ou de boi-
re les breuuages que tu bailles, ou de receuoir
les edicts que tu suades. Vne autre fois estant
iniurié par un qui auoit tousiours uescu desor-
donneement & meschamment. Je ne suis, dit il,
pas pareil à toy en ceste façon de combattre à
iniures: car tu es tout accoustumé & à dire faci-
lement, & à souffrir aiseement que lon te die
oultrage & uillannie, là ou quant à moy ie n'ay
point accoustumé d'en ouir, ny ne prens point
de plaisir à en dire. Voila quelle estoit la manie-
re de ses rencontres & sentences notables, au
moins de celles que lon nous a laissées par e-
script, par lesquelles on peult coniecturer de
quelles meurs & de quelle nature il estoit. Or
après qu'il eut esté eleu Consul auec son amy
Valerius Flaccus, il luy escheut par le sort le
gouuernement de l'Hespagne qui est deça la
riuiere de Batis: & comme il y faisoit la guerre,
en conquerant aucuns des peuples par force
d'armes, & gaignât les autres par amiable uoye,
il se trouua tout à un coup surpris & enuironné
d'une grande & grosse armee des Barbares, tel-
lement qu'il estoit en grand danger d'estre hō-
teusement pris prisonnier, ou bien tué sur le
champ: parquoy il enuoya soudainement de-
mander

mander du secours aux Celtiberiens, qui sont
 uoïfins de la marche ou lors il se trouuoit. Ces
 Celtiberiens luy demanderent^a deux cents ta-
 lents, pour salaire de l'aller fecourir: ce que les
 autres Romains qui estoient autour de luy ne
 pouuoient comporter, que lon acheptast ainsi
 le secours de ces Barbares: mais Caton leur re-
 spondit qu'ilz s'abusoyent, par ce qu'il n'y auoit
 en cela ny danger ny deshonneur: Car si nous
 gagnons la bataille, nous leur payerons ce que
 nous leur aurons promis des despouilles & de
 l'argent de noz ennemis: & si nous la perdons,
 eulx & nous y demourerons, tellement qu'il
 n'y aura plus ne qui paye, ne qui demande à e-
 stre payé. A la fin il gagna ceste bataille, mais
 ce fut apres l'auoir bien debatue, & depuis luy
 succederent ses affaires fort heureusement: car
 Polybius escrit qu'à son mandement les murail-
 les de toutes les uilles qui sont deça la riuiera
 de Batis furent toutes abbatues & razees en un
 iour, & si y en auoit un grand nombre pleines
 de bons hommes de guerre. Il escrit bien luy
 mesme qu'il prit plus de uilles en Hespagne,
 qu'il n'y demoura de iours: ce qui n'est point
 uaine uäterie, si ce que lon en treuve par escript
 est ueritable, qu'il y en auoit bien quatre cents.
 Et combien que les soudards en ce uoyage euf-
 sent biē fait soubz luy leurs besongnes, & qu'ilz
 eussent beaucoup gagné: toutefois encore leur
 feit il departir à chacun une liure pesant d'ar-

^a Six
 uings mil
 le efcus.

gent, disant qu'il ualoit mieulx que plusieurs retournassent en leurs maisons auec de l'argët, que peu auec de l'or : mais quant à luy, il afferme que de tout le butin qui fut gaigné sur les ennemis, il n'en estoit iamais rien uenu iusques

» à luy, sinon ce qu'il en auoit beu & mangé: non

» pas, dit il, que ie blasme ceulx qui taschèt à s'en-

» richir de telles despouilles : mais pource que

» i'ayme mieulx estriuer & combattre de la uertu

» auec les plus uertueux, que des richesses auec

» les plus riches, ny de la conuoitise d'amasser a-

» uec les plus auaricieux. Et si ne se maintenoit pas luy seul pur & net de toutes corruptions & concussions, ains aussi tous ses domestiques & autres qui dependoyent de luy. Il auoit en ce uoyage la d'Hespagne cinq de ses seruiteurs quād & luy, dont l'un, qui se nommoit Paccus, achepta trois ieunes garçons de ceulx que lon auoit pris à la guerre, quand on uendit le pillage au plus offrant. Caton le sceut: dequoy le seruiteur eut si grande frayeur, qu'il se pendit & estrangla luy mesme, de peur de uenir deuant la face de son maistre : & Caton feit reuendre les garçons, & en mettre l'argent qu'ilz auoyent esté uendus, aux coffres de l'espargne publique. Au reste, luy estant encore en Hespagne, Scipion le grand, qui estoit son ennemy, & uoloit empescher le cours de ses prosperitez, & aussi auoir l'honneur de parachuteuer la conqueste de toutes les Hespagnes, feit tāt à Rome par

les menees, que le peuple l'eleut pour aller au lieu de Catō. Si ne fut pas plustost deputé à celle charge, qu'il se hasty à la plus grande diligence qui luy fut possible de s'y en aller, à fin de tant plustost faire cesser & expirer l'authorité & la puissance de Caton : lequel, ce uoyant, prit seulement cinq enseignes de gens de pied, & cinq cents cheuaulx, pour l'accompagner & recōduire; avec lesquels toutefois en passant chemin il subiugua un peuple d'Hespagne qui se nomme les Lacetaniens, & reprit six cents traistres qui estoient passez du camp des Romains & allez se rendre aux ennemis, lesquels il feirous mourir, dont Scipion fut fort marry, disant que Caton luy faisoit tort : mais Caton se mocquant de luy sous paroles couuertes, disoit que c'estoit le uray moyen, par lequel la cité de Rome deuiendroit tresgrande & tresflorissante, quand les citoyens qui seroient descendus & extraicts d'ancienne noblesse, ne uouldroyent point souffrir que les hommes neufz & uenus de bas lieu emportassent le pris de la uertu deuant eulx : & aussi quand ceulx qui seroient nez en petit lieu, & issus de race populaire, combatroyēt à qui seroient plus uertueux, à l'encontre de ceulx qui les surmonteroyent en noblesse de sang & en gloire de leurs ancestres. Toutefois arriué qu'il fut à Rome de retour, le Senat ordonna, que rien ne seroit changé ne mué de tout ce que Catō auroit fait ou institué

durant le temps de son magistrat, tellement que le gouuernement que Scipion auoit si affectueusement quis & prochassé en Hespagne, luy diminua plus sa gloire, qu'il ne fait celle de Caton, par ce que tout son tēps se passa en paix, sans qu'il y eust matiere d'y faire exploit aucun digne de memoire. Au surplus Caton, apres auoir esté Consul, & obtenu l'honneur du triumphe, ne fait point comme beaucoup d'autres, qui ne se proposent pas la uraye uertu pour leur but, ains seulement l'honneur & la gloire du monde: au moyen dequoy depuis qu'ilz sont paruenuz aux supremes degrez d'honneur, comme quand ilz ont esté Consulz, ou qu'ilz ont obtenu quelque triumphe, ilz se retirēt de l'administration des affaires de la chose publique, pour de là en auant uiure à leur aise en delices, sans plus se uouloir entremettre de rien. Mais au contraire Caton n'abandonna iamais l'exercice de uertu: ains tout ainsi que ceulx qui ne font que commencer à uenir au monde, & qui sont par maniere de dire, affamez d'honneur & de reputation, il recōmencea tout de nouueau, en prenant autant ou plus de peine que iamais, & se presentant ordinairement sur la place pour faire plaisir tant à ses amis, qu'à tous autres citoyens qui auoyent besoing de son conseil ou de sa peine, defendant leurs causes en iugement, & les accompagnant en leurs charges de guerre, cōme il accompagna Tiberius Sem-

pronius estant Consul, & fut l'un de ses lieutenans en la conqueste du païs de la Thrace, & des prouinces uoïfines de la riuïere du Danube en celle marche. Et encore depuis il fut en la Grece en estat de Tribun militaire, ou Coulonnel de mille hommes de pied, sous Manius Aquilius, contre le Roy Antiochus, surnommé le Grand, lequel espouuenta autant les Romains, que feit onques ennemy apres Hannibal: car ayant conquis tous les royaumes & prouinces de l'Asie, qu'auoit auparauant tenues Seleucus Nicanor, & auoir dompté & reduit à son obeïssance plusieurs Barbares nations fort belliqueuses, il en eut le cueur si esleué, qu'il oza bien entreprendre la guerre contre les Romains, comme contre ceulx qui seuls luy restoyent dignes & assez puissans pour contester de l'empire à l'encontre de luy. Si prit une couleur pour ce faire, & une couuerture honeste, disant que c'estoit pour affranchir & remettre en liberté les Grecs qui n'en auoyent aucun besoing, attendu qu'ilz uiuoient lors à leurs loix, ayans esté nouuellement affranchis de la seruirude du Roy Philippus & des Macedoniés par le benefice des Romains: mais nonobstant cela il passa de l'Asie en la Grece avec une grosse & puissante armee, & fut incontinent toute la Grece en grand branle, sollicitée par les belles promesses & grandes esperances que leur mettoient deuant les yeux ceulx qui estoient au

gouuernement des citez, que le Roy auoit corrompus & gaignez par argent. A l'occasion dequoy, Manius y enuoya des ambassadeurs par les uilles, entre lesquelz Titus Quintius Flaminius en fut l'un, qui reteint en office & garda de fesmouuoir la plus grande partie des peuples qui ia commenceoyent à prester l'oreille à ces nouuelletez, ainsi que nous auons plus au long déclaré en sa uie: mais Caton qui y fut aussi enuoyé ramena à la raison les Corinthiens, ceulx de Patras & les Ægiens, & seiourna assez longuement en la uille d'Athenes. Et y en a qui disent que lon treuve encore une siene harengue en langage Grec, qu'il prononcca deuant le peuple d'Athenes à la louange des anciens Atheniens, là ou il dit, qu'il auoit eu grand plaisir de uoir Athenes, pour la beaulté & la grandeur de la uille: mais cela est fauls: car il parla aux Atheniens par un truchemēt, combien qu'il eust bien peu haréguer en Grec sil eust uoulu: mais il se contentoit tant des loix & coustumes de son pais, & du langage Romain, qu'il se moquoit de ceulx qui louoyent & auoyent en admiration le Grec: comme il se moqua de Posthumius Albinus, lequel a escrit une histoire en langue Grecque, ou il prie les lecteurs en son prologue, que lon l'excuse sil y a quelque imperfection au langage: car il eust bien meritē, disoit Caton, qu'on luy pardonnast uoirement, sil eust esté contraint d'escire son histoire en

” langage Grec par ordonnance des estats de la
” Grece , qui s'appelle le Conseil des Amphi-
ctyons . Mais on dit que les Atheniens s'esmer-
ueillerent grandemēt de la soudaineté & brief-
ueté de son langage , pource que ce qu'il auoit
dit rondement en peu de paroles , le truche-
ment leur interpretoit & redisoit par une lon-
gue circuition & grande trainnee de langage ,
tellement qu'il leur laissa & imprima ceste opi-
nion, que le parler ne sortoit aux Grecs que des
leures , & aux Romains du cuer . Or auoit le
Roy Antiochus occupé les pas & destroits
des montagnes , que lon nomme les Thermo-
pyles, par ou lon entre en la Grece, & les auoit
remparez tant de son armee qui estoit campée
au pied de la montagne, que de murailles & de
trenchees qu'il y auoit fait faire à la main , oul-
tre les naturelles fortifications des lieux de
montagne, & se reposoit sur lesdits rempare-
mens, cuidant bien auoir du tout arresté là, &
diuertý ailleurs le fort de la guerre, aussi n'e-
speroyent pas les Romains de les pouuoir for-
cer de front : mais Caton rememorant en soy
mesme le circuit que iadis auoyent fait les Per-
ses pour semblablement penetrer au dedans de
la Grece, se partit une nuict du camp avec par-
tie de l'armee pour essayer sil pourroit trouuer
le mesme chemin du tour que feirent les Bar-
bares : mais ainsi qu'ilz cheminoyent contre-
mont la mōtagne, leur guide qui estoit l'un des

prisonniers que lon auoit pris au pais, faillit le chemin, & les esgara en lieux fort aspres & fort malaisez, dont les soudards entrerent en grand effroy. Et lors Caton uoyant le danger auquel il les auoit mis, commanda à toute la troupe, que lon ne bougeast de là, & que lon l'y attendist de pied coy: & ce pendant luy seul avec un autre nommé Lucius Manlius, homme fort dispos de sa personne, & habile pour grauir contre les rochers des montagnes, se meit en chemin avec une peine incroyable, & non moindre danger de sa uie, marchant la nuict toute noire, que la Lune ne luisoit point, à trauers des Oliuiers sauuages, & entre des rochers haults & droits qui les gardoyent de uoir deuant eulx, tellement qu'ilz ne sçauoyent ou ilz alloient, iusques à ce qu'ilz tumberent en un petit sentier, lequel à leur aduis falloit rendre au pied de la montagne à l'endroit ou estoit le camp des ennemis. Si meirent quelques brisees & enseignes sur les plus haultes croupes des rochers, & que lon pouuoit choisir à l'œil de plus loing au dessus du mont qui s'appelle Callidronus: puis cela fait, s'en retournerent en arriere pour querir leurs gens, qu'ilz conduisirent uers leurs enseignes, tât qu'ilz entrerent en leur sentier, là ou ilz disposerent leurs soudards en ordre pour marcher: mais ilz n'eurent pas gueres cheminé par ce chemin qu'il auoit trouué, qu'il leur faillit tout court, pource qu'ilz rencontrerent une

grande fondriere, qui les meit de rechef en plus grãde destresse, & leur feit plus grande frayeur que parauant, ne sachãs pas qu'ilz fussent si pres de leurs ennemis, cõme à la uerité ilz estoient. Le iour comenceoit desia un petit à poindre, & fut aduis à l'un de ceulx qui marchoyent deuât qu'il oyoit qlque bruit, & qu'il entreueoit tout au bas au pied des rochers le camp des Grecs, & quelques uns qui faisoýt le guet: parquoy Caton feit là arrester toute la troupe, & commanda que les souldars Firmaniens, sans autres, uinssent deuers luy, pource qu'il les auoit tousiours trouuez fort fideles & fort prompts à executer ses commandemens. Ilz ne faillirent pas à accourir incontinent, & à se renger tout autour de luy, & alors il leur parla en ceste maniere:

» Compagnõs, il est besoing que i'aye entre mes
» mains quelqu'un de nos ennemis uif, pour en-
» querir & sçauoir de luy, qui sont ceulx la qui
» gardent ce pas de montagne, en quel nombre
» ilz sont, quel ordre ilz tiennent, comment ilz
» sont campez & armez, & en quel equippage
» ilz deliberent de nous attẽdre. Le moyen de ce
» faire gist en uistesse & hardiesse de l'aller sou-
» dainement rauer & surprendre, comme font
» les Lions, qui sans aucunes armes ne faignent
» point de s'aller ruer au milieu d'un troupeau
» de bestes timides. Il n'eut pas plus tost ache-
» ué ses paroles, que les souldars Firmaniens se
» prindrent à courir à ual de la montagne, tout

ainsi qu'ilz estoient, droit à ceulx qui faisoient le guet, & les chargeans en deffoude les meirent aiseement tous en rouverte, & en faisoient un au corps avec ses armes, qu'ilz amenerent aussi tost à Caton, lequel par la deposition du prisonnier fut aduerty, comme le fort de l'armée des ennemis estoit logé avec le Roy en personne dedans le destroit mesmes & dedans la uallée de la montagne: mais que ceulx qu'ilz uoyoyent, estoient six cents Ætoliens tous hommes d'élite, que lon auoit choiziz & ordonnez pour garder quelques croupes de rochers au dessus du camp d'Antiochus. Quoy entendu, Caton sans en faire autrement compte, tât pour le petit nôbre qu'ilz estoient, que pour le mauuais ordre qu'ilz gardoyent, feit incontinent sonner les trompettes, & marcher ses gens en bataille avec grands cris, cheminant luy mesme le premier deuant toute sa troupe l'espee traitte en la main: mais aussi tost que les Ætoliens le ueirent descendre des rochers & uenir droit à eulx, ilz se meirent à fouir uers leur grâd camp, là ou ilz emplirent tout d'effroy, de trouble & de defarroy. Et d'autre costé Manius au mesme instant donna l'assault aux murailles & fortifications, que le Roy auoit fait faire à trauers les uallées & destroits des montagnes: auquel assault Antiochus mesme receut un coup de pierre sur le uisage, qui luy ietta des dents hors de la bouche, tellement que

pour la douleur qu'il en sentit, il destourna son cheual & se tira arriere de la presse : & adonc n'y eut il plus rien en son armee qui feist teste, ne qui peust soustenir l'impetuosité des Romains : ains combien que les lieux fussent fort mal aisez pour fouir, à cause qu'il estoit impossible de s'escarter, pource que d'un costé ilz auoyent les haults rochers coupez, & de l'autre costé les fondrieres & les mareits fort profonds, esquelz ilz tumboyét si l'aduenoit que les pieds leur glissassent, ou que lon les poullast, neantmoins ilz se iettoyent les uns sur les autres à trauers les destroits, & s'entrepoulsoyent tellement qu'ilz se perdoient eulx mesmes, de peur des coups d'espee que leur tiroyét les Romains. Et là Marcus Caton qui n'estoit iamais chiche de celebrer & prescher ses louanges, & qui n'auoit point de honte de haultlouer soy-mesme tout ouuertement, estimant que c'estoit une suitte qui deuoit tousiours accôpagner les grandes prouesses & les haults faicts d'armes, adiousta à ce glorieux exploit une braue magnificence & haultesse de paroles : car il escrit luy-mesme, que ceulx qui le ueirent ce iour la chassant & foudroyant les ennemis, furent contrains de cōfesser que Caton ne deuoit point tant au peuple Romain, comme le peuple Romain deuoit à Caton, & que le Consul mesme Manius, bouillant encore de l'ardeur du combat, le teint longuement embrassé, tout chauld

aussi d'auoir chassé les ennemis, & qu'il s'escria tout hault, de grande ioye, que ne luy ne le peuple Romain ne scauroyent payer à Caton loyer egal à ses merites. Apres ceste bataille le Consul l'enuoya à Rome pour porter luy mesme de bouche les nouuelles de ceste uictoire : si s'embarqua tout incontinent, & eut le temps si à propos, qu'il trauersâ la mer sans fortune iusques à Brindes, & de là alla iusques à Tarente en un iour, & de Tarête en quatre autres iours à Rome, tellement qu'il y arriua en cinq iournees, depuis qu'il eut pris terre en Italie, & feist si bonne diligence, qu'il fut le premier qui y apporta les nouuelles de ceste uictoire : si emplit à son arriuee toute la uille de resiouissance & de sacrifices, & le peuple Romain de grande & haultaine opinion de soy mesme, comme celuy qui se persuada estre desormais assez puissant pour conquerir la monarchie du monde tant par mer que par terre. Ce sont la presque tous les plus beaux & les plus notables faicts d'armes de Caton. Mais quant aux actes ciuilz en matiere de gouuernement, il semble qu'il auoit ceste opinion, que poursuyure les meschans en iustice, estoit l'une des principales choses à quoy deuoit uacquer & s'appliquer un homme de bien & bon gouuerneur de chose publique : car luy seul en accusa plusieurs, & se soubscriuit en compagnie avec d'autres qui en accusoyent aussi. Brief il suscitoit tousiours quelque accu-

sateur, comme il feit un certain Petilius à l'encontre de Scipion: mais quant à celuy la, uoyât bien que pour la noblesse de sa maison, & pour la uraye magnanimité & grandeur de courage qui estoit en luy, il mettoit soubz les piedz toutes les calumnies & imputations que lon proposoit à l'encontre de luy, n'esperant pas le pouoir iamais faire condamner à mourir, il se reporta de la poussuite: mais bien se formalisa il avec d'autres accusateurs à l'encontre de Lucius Scipion son propre frere, & le poursuyuit de sorte, qu'il le feit condamner en amende d'une bien grosse somme de deniers enuers la chose publique, laquelle ne pouuant payer, il fut en grand danger d'estre pris au corps & constitué prisonnier, & eut fort affaire à s'en sauuer, en appellant de la sentence deuant les Tribuns du peuple. Auquel propos lon compte que quelque iour passant à trauers la place, il rencontra en son chemin un ieune homme, lequel uenoit d'obtenir sentence, par laquelle il auoit fait noter d'infamie un des plus grands ennemis de son pere nagueres decedé, & que Caton avec une chere ioyeuse, l'embrassa & luy dit:

» C'est cela, mon filz, c'est cela que les gentils en-

» sans doyuent sacrifier & offrir à l'ame de leur pe-

» re, non pas des aigneaux ny des cheureaux, ains

» les larmes & condamnations de leurs ennemis

» & aduersaires. Mais cōme il trauailloit bien les autres, aussi n'estoit il pas luy mesme sans dāger

en l'administration de la chose publique: car si l'on donoit la moindre prise du monde sur luy, il estoit incōtinent mis en iustice par ses malueillans, de maniere que l'on dit qu'il fut accusé pres de cinquante fois, à la dernière desquelles il estoit aagé de quatreuingts ans: & fut là ou il dit une parole, qui depuis a esté bien recueillie & bien notee, Qu'il estoit malaisé de rendre compte & raison de la uie deuant les hommes d'un autre siècle q̄ de celuy auquel on auoit uescu. Encore ne fut pas ce proces la le dernier de ses cōbats: car quatre ans depuis, en l'aage de quatreuingts dix ans, il accusa Seruius Galba: ainsi uescut il, comme Nestor, presque trois aages d'homme, tousiours en continuelle action. Car ayāt eu de grandes picques & grands differens touchant les affaires de la chose publique à l'encontre du premier Scipion surnommé l'Africain, il passa oultre iusques au temps du second Scipion, lequel fut adopté par le filz dudit premier Scipion, estāt filz naturel & legitime de Paulus Æmylius, celuy qui desfeit Perseus le Roy de Macedoine. Au demourant Marcus Cato dix ans apres son Consulat demanda l'office de Censeur, qui estoit à Rome la cyme de dignité, & le comble d'honneur le plus hault ou pouuoit atteindre un citoyen Romain, & par maniere de dire, le couronnement de toutes les charges & authoritez q̄ lon peut auoir au gouuernemēt de la chose publique. Car entre autres pouuoirs,

un Censeur à loy d'enquerir sur la uie, & de reformer les meurs d'un chascun : pource que les Romains ont estimé, qu'il ne falloit pas qu'il fust loisible à chascun de soy marier, engendrer enfans, uiure chez soy en priué, ny faire bâquets & festins à sa uoulunté, sans craindre d'en estre repris ne recherché, & qu'il n'estoit point bon de lascher la bride à tout le monde, à fin que chascun en feist à sa guise, comme son appetit l'inciteroit, ou q son iugement le guideroit:ains estimans que le naturel & les meurs des hommes se descouuroyent plus en telles choses, que non pas en celles que lon fait publiquement en plein iour & deuant tout le monde, ilz elisoyēt deux reformateurs, gardes & correcteurs pour auoir l'œil, & engarder que personne ne se desuoyast du chemin de la uertu en celuy de uolupté, & ne transgressast les ordonnances, statuts & coustumes de leur chose publique. Lesdicts officiers s'appelloyent en langage Romain Censeurs, & y en auoit tousiours un necessairement des anciennes nobles maisons, que lon nommoit Patricienes, & l'autre des populaires. Ilz auoyent l'autorité & puissance d'oster le cheual public au cheualier, & de debouter & priuer un Sénateur du Senat, sil estoit trouué qu'il eust desordōneemēt & meschāmēt uestu. A culx appartenoit de faire la prisee & l'estimatiō des biens de chasque citoyen, de discerner les lignees, les aages, les estats & degrez

de la chose publique, & en tenir registres, outre plusieurs autres preeminences & prerogatives qu'auoit encore ledit magistrat. A raison dequoy, quand Caton s'alla presenter entre les poursuuyans qui demandoient & briguoyent ledict office, tous les principaulx & les plus nobles hommes presque du Senat se meirent en effort de l'empescher d'y paruenir: les uns par enuie, estimans que c'estoit une honte & une tache à la noblesse de souffrir que des hommes issus de lieu bas & obscur, & qui estoient les premiers de leurs races paruenuz aux dignitez de la chose publique, fussent tout incontinent ainsi poussez & auâcez iusques aux supremes degrez d'honneur, & aux estats d'autorité souveraine. Les autres qui se sentoient uereux, & qui sçauoyent biẽ qu'ilz auoyent transgressé les loix & ordōnances de leur païs, redoubtoient l'austerité & la seuerité de cest homme, pensans bien qu'il n'espargneroit ny ne pardonneroit à personne quand une fois il auroit autorité. Parquoy apres en auoir consulté ensemble, ilz luy opposerent & meirent à l'encontre sept competeurs, lesquelz alloient caressant & flattant la commune, avec gracieuses paroles & belles promesses qu'ilz luy mettoient en auãt, comme si le peuple eust eu besoing de magistrats qui le traitassent doulcemẽt, & feissent les choses à sa uoulonté. Mais au contraire Caton, sans monstrier aucune apparence de uouloir

loir estre doux ne gracieux en l'administration dudit office, ains au contraire menaçant tout publiquement de la tribune aux harègues ceulx qui auoyent meschamment & malheureusement uescu : & criant à haulte uoix, que la uille auoit besoing d'une grande purgation, admonestoit le p̄eule d'elire, non pas les plus gracieux, mais les plus aspres & plus rigoureux medecins, comme luy en estoit un tel qu'il falloit, & entre les patriciens Valerius Flaccus un autre, en compagnie duquel seul il auoit esperance, filz estoient eleuz Censeurs ensemble, de faire un grād bien à toute la chose publique, en couppant & bruslant cōme les testes d'une Hydre, les delices, la uolupté & superfluité qui festoyent coulees en la chose publique : & qu'il ueoit bien, que tous les autres poursuyuans taschoyent à y paruenir par mencees & uoyes obliques, pource qu'ilz redoubtoient ceulx qui uouloyent y uerser droittement, & y faire le deuoir de gens de bien. Là monstra biē le peuple Romain qu'il estoit ueritablement magnanime & digne de grands & magnanimes gouuerneurs : car il ne refouit point la rudesse & roideur inflexible de ce personnage, ains en reietāt tous ces autres gracieux, qui donnoyēt apparence de uoloir faire toutes choses au bon plaisir du peuple, il eleut Marcus Cato Censeur avec Valerius Flaccus, en luy obeissant tout ainsi que fil eust esté ia poisseur, & non

poursuyuant d'un magistrat, lequel estoit à luy à donner à qui bon luy sembleroit. La premiere chose donques qu'il feit apres estre instalé en l'estat, fut qu'il nomma Prince du Senat son amy & compagnon au magistrat de la Censure, Lucius Valerius Flaccus : & priua de la dignité de Senateur, entre plusieurs autres, Lucius Quintius, lequel auoit esté Consul sept ans auparauant, & estoit frere germain de Titus Quintius, qui desfeit en bataille Philippus Roy de Macedoine, ce qui luy estoit plus honorable, que d'auoir esté Consul: mais la cause, pour laquelle il le ietta hors du Senat, fut telle: Cestuy Lucius Quintius auoit tousiours en sa compagnie, & menoit quand & luy à la guerre un ieune garson, dont il auoit abusé charnellement des l'enfance du garson, & luy donnoit autant de credit & d'autorité qu'au plus grand de ses familiers & amis qu'il eust autour de soy : aduint donques un iour, qu'estant gouuerneur d'une prouince consulaire, il feit un festin, auquel ce garson, comme de coustume, estoit assis à la table aupres de luy, qui commença à le flatter, sachant bien qu'il se laissoit aiseemēt aller quād il auoit beu: & entre autres flatteries luy dit, qu'il estoit tant espris de son amour, que combien que sur son partement on eust tout préparé à Rome pour donner au peuple l'esbatement de uoir escrimer & combattre des gladiateurs à oultrance, neantmoins il s'en

estoit party à grande haste pour le uenir trou-
uer sur le poinct que le combat se deuoit faire,
encore qu'il n'eust iamais ueu, & qu'il desirast
for uoir occire un homme. Adonc ce Lucius
Quintius, pour luy rēdre la pareille, & le cares-
ser aussi de son costé: Ne te chaille, dit il, ia de ce
plaisir que tu as failly à uoir, & n'en fais ia pire
chere pour cela: car ie satisferay bien prom-
ptement à ton desir quant à cela. Et aussi tost
qu'il eut dit ces paroles, il commanda que lon ti-
rast de la prison tout sur l'heure, un des crimi-
nelz condamnez à mourir, & que lon l'amenaist
en la salle, & le bourreau quand & quand avec
sa hache. Ce qui fut aussi tost fait. Et lors
il demanda au garson sil uouloit uoir tuer
presentement cest homme: le garson luy re-
spondit, que ouy: & adonc commanda à l'exe-
cuteur, qu'il luy trenchast la teste. La plus gran-
de partie des auteurs anciens le recitent ainsi.
Et mesme Ciceron, au liure qu'il a escrit de la
vieillesse, dit qu'il est ainsi escrit en une haren-
gue que Caton en fait deuāt le peuple Romain.
Ayant dōques Lucius Quintius esté ainsi igno-
minieusement ietté hors du Senat par Catō, son
frere Titus, qui en fut fort desplaisant, ne sceut
ou recourir, sinō au peuple, lequel il supplia de
faire commandement à Caton qu'il eust à dire
la cause, pour laquelle il donnoit une telle note
d'infamie à sa maison. Parquoy Caton en pre-
sence du peuple fait le recit de tout ce festin: &

comme Lucius le niaſt, & affermaſt qu'il n'en eſtoit rien, Caton luy deſera le ſerment qu'il iuraſt publiquement, ce dont il le chargeoit n'eſtre pas ueritable : mais Lucius ſe uoulut excuſer de le faire, à l'occaſion dequoy le peuple iugea ſur le champ qu'à bon droit il auoit receu ceſte note d'infamie . Toutefois quelque téps apres ainſi que lon iouoit des ieux au Theatre, Lucius y uint, & paſſant oultre le quartier qui eſtoit ordonné pour ceux qui auoyent eſté Conſulz, ſalla ſeoir à l'eſcart aſſez loing . Le peuple en eut pitié, & luy cria tât qu'il le cōtraignit de retourner ſe ſeoir parmy les autres Senateurs de dignité Cōſulaire, en rabillât le mieulx qu'il luy eſtoit poſſible ceſt ignominieux accident aduenu à une noble famille. Il priua auſſi & ietta hors du Senat un autre nommé Manilius qui auoit de grandes arres de deuoir eſtre Conſul l'annee enſuyuant, & ce pour autât qu'en plein tour & deuant ſa fille, il auoit trop amoureuſement baiſé ſa femme, & diſoit q̄ iamais la ſienne ne l'embraſſoit, ſinon quand il tonnoit bié fort, & pource auoit il accouſtumé de dire en ſe iouant, qu'il eſtoit bien heureux quand Iupiter tonnoit . Il oſta auſſi le cheual public à Lucius Scipion qui auoit triumpué pour les uictoires gaignees à l'encōtre du grād Roy Antiochus, ce qui luy cauſa une grande malueueillance, pource qu'il ſembla à tout le monde qu'il le feiſt expreſſement pour faire honte à Scipion l'A-

fricain qui estoit decedé. Mais ce qui plus universellement fut trouué dur, & qui offensa plus de gens, fut qu'il retrencha les delices & la superfluité: car de l'oster du tout, & tout ouuertement, il estoit impossible, tant il y auoit desia d'hommes, qui en estoient entachez, corrompuz & gastez: mais tournoyant obliquement à l'entour, en faisant la prisee & l'estimation des biés & facultez de chascun citoyé, il feit mettre en taxe & estima les uestemés, les coches, les lictieres, les bagues & ioyaux de femmes, & les autres meubles & utensiles de mesnage, qui auoyent cousté plus de ^a mille cinq cents drachmes pour piece, dix fois plus qu'ilz n'auoyent cousté & qu'ilz ne ualoyent, à fin que ceulx qui auroient despendu & mis leur argent en telles choses curieuses & superflues, en payassent de tant plus de taille aux cōtributions qu'il conuiendroit faire pour les affaires de la chose publique, que leurs biés seroyent surtaxez, & plus hault estimez: & si ordonna que pour chascun mille d'arain, c'est à dire, pour chascun mille ^b as- ses, que telles choses auroient esté prisees & estimees, les maistres en payassent trois de tribut à la chose publique, à celle fin q̄ se sentans greuez de telle taille, & uoyans que ceulx qui auoyent autāt uaillant comme eulx, mais qui se contenoient simplement, & ne portoyēt point si grand estat, payoyent beaucoup moins de taille à la chose publique, & estoynet moins char

^a Eniron cent cinquante escus.

^b C'estoyent petites pieces de billō qui ualoyent un peu plus de quatre deniers tournois.

gez que eulx, se chaſtiaſſent eulx meſmes, en ſe deportant d'eſtre ſuperflus, ſumptueux & delicieux. Toutefois il en encourut la haine & maluueillance d'un coſté de ceulx qui aimèrent mieulx payer ce tribut que de laiſſer leurs delices, & d'autre coſté de ceux qui aimérēt mieulx abandonner leurs delices que de payer le tribut: car il y en a pluſieurs qui eſtimēt, que c'eſt leur oſter leur ri cheſſe, que leur empêcher les moyens d'en faire monſtre, & ſi ont ceſte folle perſuaſion, qu'elle ſe monſtre mieulx es choſes ſuperflues, qu'elle ne fait es neceſſaires, dequoy lon dit que le philoſophe Ariſton ſ'eſbahilloit autant & plus que de nulle autre choſe, comment les hommes reputoyēt ainſi riches & biē-heureux ceulx qui poſſedoyent les choſes curieuſes, ſuperflues & uoulunraies, plus toſt que ceulx qui poſſedoyent les utiles & neceſſaires. Et Scopas Theſſalien, comme quelqu'un de ſes familiers luy demādaſt ne ſçay quoy qui ne luy ſeruoit pas de beaucoup, & luy diſt, pour plus
20 facilement l'induire à luy conceder, C'eſt choſe
20 qui ne uous eſt ny neceſſaire ny utile. Et c'eſt,
20 dit il, ce en quoy ie ſuis plus opulent & plus
20 riche, qu'en choſes ſuperflues, & qui ne ſeruent
20 de rien. Ainſi l'ardeur & la conuoitiſe d'auoir, ne procéde d'aucune affection ou neceſſité naturelle, ne qui ſoit conioincte à noſtre chair, ains ſ'engendre en nous d'ailleurs, & nous uiēt d'une faulſe opinion du vulgaire. Mais Caton

se foudiant moins que de chose du monde des crieries que lon faisoit à l'encontre de luy, en roidissoit & tendoit encore dauantage son austerité, faisant couper & rompre les tuyaux, par lesquelz aucuns particuliers desrobboyét l'eau des fontaines publiques, ainsi qu'elles passoyét au long de leurs maisons, & la tiroient en leurs logis & en leurs iardins priuez, & faissant aussi demolir & abbatre toutes les saillies des edifices priuez qui sauançoient sur les rues & places publiques, & diminuant le pris des ouurages qui se faisoient aux despens de la chose publique, & au contraire haussant les fermes & gabelles au plus haut qu'elles pouuoient aller. Toutes lesquelles choses luy engendrerent une grâde haine & maluueillance de beaucoup de gens: parquoy Titus Flaminius & quelques autres bandez à l'encontre de luy, feirent en plein Senat rescinder, casser & annuller tous les marchez & les contraux qu'il auoit faicts avec des maistres ouuriers, pour la reparation & entretenement des edifices publiques & sacrez, comme estans faicts au dommage de la chose publique, & susciterent les plus audacieux & plus temeraires Tribuns du peuple contre luy, à ce qu'ilz l'appellassent en iustice deuant le peuple, & requissent qu'il fust cōdamné en l'amende de ^a deux talents: aussi luy feirent ilz beaucoup de destourbier & d'épescement en l'edificatiō du palais qu'il feist bastir aux despēs de la

a Douze
cents e-
leus.

chose publique , regardant sur la grande place au deffoubz de celuy ou se tenoit le Senat : lequel palais fut neantmoins paracheué, & appelé de son nom Basilica Porcia , comme qui diroit, le palais que fait edifier le Céseur Porcius : toutefois il semble que le peuple Romain eut tresagreable, & loua grandement ce qu'il auoit fait en l'administration de sa Censure: car il luy fait dresser une statue au temple de la Deesse Santé, soubz laquelle il ne fait point escrire ses faicts d'armes ny son triūphe, ains y fait engraver une inscriptiō dont la sentence estoit telle à la translater de mot à mot, A l'honneur de Marcus Cato Censeur. pourautant que par bonnes meurs, sainctes ordonnances & sages enseignemens, il redressa la discipline de la chose publique Romaine, laquelle inclinoit desia & se tournoit à mal . Si est-ce que auparauant que ceste image luy fust dressée, il se souloit moquer de ceulx qui aimoyent ou appetoyent telles choses, disant qu'ilz ne s'apperceuoient pas qu'ilz se glorifioient, non de leurs uertus, mais des ouurages des fondeurs, peintres & statuaires: & quant à luy, que ses citoyens portoyent tousiours quand & eux de tresbelles images & portraictures de luy empraintes en leurs cueurs: entendant la memoire de sa uie & de ses faicts. Au moyen dequoy il respōdit une fois à quelques uns qui s'esmeruilloyent comment on dressoit ainsi des images à plusieurs petits & inco-

» gneuz personnages, & à luy non: l' aime mieulx,
» dit il, que lon demande pourquoy lon n'a point
» dressé de statue à Caton, que pourquoy on luy
» en a dressé. Brief il ne uouloit pas qu'un hom-
me de bien mesme souffrist qu'on le louast, si
n'estoit que cela tournast au profit de la chose
publique: & neantmoins ce a esté l'un des hō-
mes qui s'est le plus loué soy mesme, tellement
que s'il se trouuoit quelques uns, qui par erreur
eussent en aucune chose oublié leur deuoir,
quand on uenoit à les en reprendre, il disoit
qu'on les deuoit excuser, pource qu'ilz n'e-
stoyent pas Catons, pour ne point faillir. Et
ceulx qui raschoyent à imiter quelcun de ses
faicts, qui ne leur aduenoit pas bien, il les ap-
pelloit sinistres Catons. Il disoit dauantage,
que es temps plus dangereux, le Senat iettoit
les yeux sur luy, ne plus ne moins que les passa-
gers qui sont dedans une nauire regardent le
pilote quand il se leue en mer une tourmente,
& que souuentefois le Senat differoit & remet-
roit à un autre temps des affaires de bien gran-
de consequence, quand il n'estoit pas present:
ce que d'autres que luy tesmoignent auoir esté
ueritable: car il eut tresgrande autorité en
l'administration de la chose publique, tant pour
sa grande preudhommie, que pour son eloqué-
ce, & aussi pour son extreme uieillesse. Mais
oultre cela, on luy donne la louange d'auoir
esté bon pere enuers ses enfans, bon mary en-

uers sa femme, & bon mefnager à bien gouuer-
ner & faire profiter ses biens : car il n'estimoit
point que ce fust chose legere ne dont on deust
faire peu de compte, & ne s'en mesler qu'en
passant le temps seulement : pourtant ne sera il
point hors de propos, à mon aduis, d'en dire icy
quelque mot en tant qu'il peult seruir à la ma-
tiere presente. Premièrement il espousa une
femme plus noble que riche, sachant tresbien
que l'une & l'autre seroit orgueilleuse & fiere :
mais estimant aussi, que celles qui sont extrai-
tes de noble sang, ont plus de uergongne des
choses mal honestes que n'ont pas les autres, &
que par là elles se rendent plus obeissantes à
leurs maris en choses raisonnables & honestes.
Au demourant, il disoit que celuy qui batoit sa
femme ou son enfant, commettoit aussi grand
sacrilege, comme qui uioleroit ou pilleroit les
plus sainctes choses qui soyent au monde : & e-
stimoit plus grande louange à un homme d'e-
stre bon mary que bon Senateur : à l'occasion
dequoy il ne trouuoit rien plus louable en la
uie de l'ancien Socrates, que sa patience de se-
stre tousiours humainement & doucement
porté enuers sa femme qui auoit si mauuaise te-
ste, & ses enfans qui estoient si eceruellez. De-
puis que sa femme luy eut fait un filz, il n'eust
sceu auoir affaire si pressé, si ce n'estoit pour la
chose publique, qu'il ne le laissast pour s'en
aller en sa maison à l'heure que sa femme l'auoit

& remuoit son enfant : car elle le nourrissoit elle mesme de son propre laiçt, & bien souuent donnoit à tetter aux petits enfans de ses esclaves, à fin de leur imprimer une charité & amour naturelle enuers son filz, pour auoir esté nourriz ensemble & d'un mesme laiçt. Quand son filz fut paruenu à l'aage de raison, & qu'il commença à estre capable d'apprendre, luy mesme luy enseigna les lettres, combien qu'il eust un serf nommé Chilon, honeste homme & bon grammarien, qui en enseignoit beaucoup d'autres : mais comme il dit luy mesme, il ne uouloit point qu'un esclau tenska son filz, ne qu'il luy tirast l'oreille, quand peult estre il n'apprendroit pas assez promptement ce qu'on luy monstreroit, & si ne uouloit point que son filz fust tenu ny redeuable à un serf d'une si belle & si grande chose, comme de luy auoir enseigné les lettres. Au moyen dequoy luy mesme luy enseigna la grammaire, les loix, l'escrime, non seulement pour lancer le iauelot, iouer de l'espee, uoltiger, picquer cheuaux, & manier toutes armes, mais aussi pour combatre à coups de poing, endurer le froid & le chauld, passer à nage le courant d'une riuiere impetueuse & roide : & si dit dauantage qu'il composoit & escriuoit de sa propre main de belles histoires en grosse lettre, à fin que son filz des la maison de son pere eust cognoissance des gens de bien du temps passé, &

de leurs faicts uertueux, à l'exemple desquelz il peust former sa uie pour en mieulx ualoir. Et si dit qu'il se donnoit autant garde d'user de paroles sales & uillaines en la presence de son filz, comme il eust fait deuant les religieuses Vestales. Iamais ne festuuoit avec luy : mais cela estoit alors une usance commune à tous Romains : car les gendres mesmes ne se baignoyér point avec leurs beaux peres, ains auoyent honre de se despouiller les uns deuant les autres. Depuis ayàs appris des Grecs à se baigner nuds avec les hommes, ilz leur ont maintenant en recompense enseigné à se despouiller & baigner nuds avec les femmes mesmes. Or ne defailloit point le bon uouloir au filz de Caton, qui en desiroit faire un chef d'œuvre, en le formant & composant au moule de la parfaite uertu : car il auoit le cueur si gentil, qu'il taschoit à faire tout ce que son pere luy mōstroit : mais il auoit le corps de nature si debile & si foible, qu'il ne pouuoit pas endurer grand traual : à raison dequoy son pere luy relascha un petit la trop dure & trop estroite austerité & regle de uie que luy mesme obseruoit. Mais neantmoins, quoy qu'il fust de nature debile & de petite & foible complexion, si ne laissa il pas pourtant d'estre uaillant homme, & de faire tresbien son deuoir en la guerre : car il combattit uaillammēt en la bataille ou Perseus le Roy de Macedoine fut desfait par Paulus Æmylius,

là ou luy estant l'espee uolee des poings par un grand coup qu'il receut dessus, avec ce qu'il auoit la main suante, il en fut fort desplaisant, & pria quelques uns de ses amis qu'ilz luy aidassent à la recouurer : si se ruerent tous ensemble sur les ennemis à l'endroit ou elle luy estoit tumbee, & feirent tant à force d'armes qu'ilz fendirent la presse, & esclarcirent le lieu, ou à la fin ilz la trouuerent, mais ce fut à grande peine, pource qu'elle estoit ia couuerte de monceaux d'autres armes & de corps morts, tant des Romains que des Macedoniens entassez les uns sur les autres. Le general Paulus Æmylius ayant entendu cest acte, en loua & prisagrandement le ieune homme : & trouue lon encore auiourdhuy une lettre missiue de Caton à son filz, par laquelle il louë & magnifie fort haultement cest acte de prouesse, & celle diligence qu'il fait de recouurer son espee. Depuis ce ieune Caron espousa l'une des filles de Paulus Æmylius, sœur du second Scipion, qui s'appelloit Tertia, & fut receu en l'alliance de ceste si noble maison, non moins pour sa propre uertu, que pour la dignité & l'autorité de son pere : ainsi eut l'estude, la peine & le soing que Caton meit à instituer son filz, issue telle comme elle meritoit. Il auoit tousiours grand nombre de serfs, qu'il acheptoit petits & ieunes quand on uendoit les prisonniers de guerre à l'encant : & les choissoit ainsi ieunes, pource

qu'ilz estoient encore en aage de prendre le ply de telle nourriture qu'il leur uouloit bail-
ler, & qu'ilz en estoient plus faciles à dompter,
ne plus ne moins que de petits poulains, ou de
ieunes chiens. Mais nul de tout tant qu'il en a-
uoit n'entra onques en maison d'autrui, sinon
que Caton ou sa femme l'y eussent enuoyé. Si
on leur demandoit que faisoit Caton, ilz ne re-
spondoyent sinon, Je ne sçay : & falloit, quand
ilz estoient en la maison, qu'ilz feissent quelque
chose de necessaire, ou qu'ilz dormissent : car il
aimoit fort ceulx qui dormoyent uoluntiers,
estimant que les serfs qui aimoyent à dormir e-
stoyent plus maniables, & que lon en faisoit
mieulx ce qu'on uouloit, que ceulx qui estoient
esueillez : & ayant opinion que ce qui incitoit
les esclauues à entreprendre & faire les plus grâ-
des meschancetez, estoit pour accomplir leur
uolupté avec les femmes, il ordonna que les
siens pourroyent auoir la compagnie des ser-
ues de sa maison pour un pris d'argent qu'il leur
taxa, avec expresse defense de n'auoir affaire à
autre femme quelconque hors de sa maison.
Au commencement qu'il se meit à suyure les
armes, n'estant pas encore riche, il ne se cour-
rouçoit iamais pour faulte que feissent ses ser-
uiteurs au seruice d'alentour de sa personne, di-
sant qu'il trouuoit cela laid & malseant à une
personne d'honneur, que de tenfer ses serui-
teurs, & quereller avec eulx pour son uentre :

mais depuis quand son bien & son estat furent augmentez, si d'adventure il festoyoit ses amis ou ses compagnons, incontinent apres le soupper, il punissoit & fouettoit avec une escorcee ceulx qui auoyent failly de seruir à la table, ou d'apprester quelque chose que ce fust. Et procuroit tousiours par subtilz moyens, qu'il y eust noise & dissension entre eulx : car il auoit leur amitié & concorde pour suspecte, & la craignoit. Et si d'adventure il y en auoit quelqu'un qui eust commis aucun cas digne de mort, il luy faisoit son proces en presence de tous les autres, & puis s'il estoit condamné, le faisoit aussi mourir deuant eulx tous. Mais à la fin il deuint un peu trop aspre & trop ardent à acquerir, & abandonna le labourage, disant que l'agriculture estoit de plus grâde delectation que de grand profit. Parquoy, à fin que son argent fust mieux asseuré, & de plus grand & plus certain reuenu, il se meit à achepter des lacs & estangs, des baings naturelz d'eau chaulde, des places appropriées pour le mestier des foulons, des terres ou il y eust force pasturages, tailis & bois reuenans, dont il recueilloit de grands deniers tous les ans : & si Iupiter mesme, ce disoit il, ne luy en pouuoit diminuer le reuenu. Dauantage, il presta son argent à usure, & encore à usure maritime, qui est la plus reprouuee & la plus blasmee de routes, pource qu'elle est plus excessiue : & le faisoit en

ceste sorte: Il uouloit que ceulx à qui il prestoit son argent pour traffiquer sur mer, associaissent plusieurs autres marchands avec eulx, iusques au nombre de cinquante, & qu'ilz eussent autant de nauires, & lors il entroit en la societé pour une partie seulement, laquelle il faisoit manier par un de ses serfs affranchiz qui s'appelloit Quintion, & estoit en cela son facteur, nauigant & traffiquant avec les autres parsonniers de la societé à qui il auoit presté son argent à usure. Par ainsi ne mettoit il pas tout son argent au hazard de la fortune, ains une petite partie de son sort principal seulement, & en tiroit un bien gros profit de l'usure. Qui plus est, il prestoit aussi de l'argent à ses propres esclauues qui en uouloyent pour achepter d'autres ieunes serfs, lesquelz ilz enseignoient & dressoyēt à quelque seruice aux despens mesmes de Caton, puis les reuendoyent au bout de l'an, & Caton en retenoit plusieurs pour soy mesme, leur en dōnant & deduisant autant comme on leur en auoit le plus présenté. Et pour inciter son filz à faire ainsi profiter son argent, il luy disoit que ce n'estoit point fait en homme de cueur, que de diminuer son patrimoine, ains plustost le faict d'une femme ueufue: mais encore estoit ce un signe de plus uiolente nature, & plus aspre à l'auarice, qu'il oza dire que celuy estoit homme diuin & digne de louange immortelle, qui par son industrie augmentoit tellement

lement ses facultez, que l'accessoire qu'il y ad-
ioustoit, montoit plus que le principal qu'il a-
uoit eu & herité de ses parents. Au surplus il e-
stoit ia fort auant au declin de son aage quand
Carneades philosophe de la secte Academique,
& Diogenes de la Stoïque, uindrent d'Athe-
nes ambassadeurs à Rome, pour obtenir grace
& remission d'une amende^a de cinq cents ta-
lents, en laquelle le peuple d'Athenes auoit esté ^{a Trois}
condamné par contumace, à faulte de compa- ^{cets mille}
roir, par sentēce des Sicyoniens, à l'instance &
poursuite des Oropiens. Incontinent que ces
deux philosophes furent arriuez en la uille, les
ieunes hommes Romains qui aimoyent l'estu-
de des lettres, les allerent saluer & uisiter, & les
eurent en tresgrāde estime apres les auoir ouys,
mesmement Carneades, la grace duquel en son
parler, & la force de persuader ce qu'il uouloit,
n'estant pas moindre que le bruit qu'on luy en
donnoit, mesmement quand il se trouua à dis-
courir en si grand auditoire, & deuāt auditeurs
qui ne furent point malings à taire sa louange,
remplit incontinent toute la uille, comme si
c'eust esté un uent qui eust fait sonner ce bruit
aux oreilles d'un chacun, qu'il estoit arriué un
homme Grec sçauant à merueilles, qui par son
eloquence tiroit & menoit tout le monde là ou
il uouloit, & ne parloit on d'autre chose par la
uille, pource qu'il auoit empraint es cueurs des
ieunes hommes Romains, un si grand & si ue-

hement desir de sçauoir, que tous autres plaisirs & exercices mis en arriere, ilz ne uouloyent plus faire autre chose que uacquer à la philosophie, comme si ce fust quelque inspiration diuine qui à ce les eust incitez: dequoy les autres seigneurs Romains estoient bien aises, & prenoient plaisir de uoir leurs ieunes hommes s'adonner à l'estude des lettres & disciplines Grecques, & frequenter avec ces deux grands & excellents personages. Mais Marcus Cato des le commencement que les lettres Grecques commencerent à auoir lieu & estre aimees à Rome, en fut malcontent, craignant que les ieunes gës ne tournassent entierement là leur affection & leur estude, & ne quittassent la gloire des armes & de bien faire, pour l'honneur de sçauoir & de bien dire: mais quand encore il ueit que l'estime & le renom de ces deux personages alloit tousiours croissant de plus en plus, tellement que Caius Aquilius l'un des premiers hommes du Senat auoit prochassé & prié d'estre leur truchement pour interpreter leurs premieres harangues, il delibera de les renuoyer hors de la uille sous quelque honeste couuerture & couleur: si reprit un iour en plein Senat les magistrats, de ce qu'ilz retenoyent ainsi longuement ces ambassadeurs sans les despescher, attendu mesmement que c'estoyent hommes qui pouoyent facilement persuader & faire à croire tout ce qu'ilz uouloyent, & que quand il n'y

auroit autre raison, pour ceste seule cause ilz deuoyent arrester quelque chose sur le faict de leur ambassade, & les renuoyer en leurs escholes disputer avec les enfans des Grecs, & laisser ceulx des Romains apprendre à obeir aux loix & aux magistrats de leur pais, comme au parauant. Or faisoit il cela, non pource qu'il eust aucune priuee inimitié à l'encõtre de Carneades, comme quelques uns ont cuidé: mais pource que generally il haïssoit toute la philosophie, & que par une ambition il mesprisoit toutes les Muses & les lettres Grecques: ueu mesmement qu'il disoit que l'ancien Socrates n'estoit qu'un causeur & un seditieux, qui taschoit par tel moyen qui luy estoit possible à usurper tyrannie, & à dominer en son pais, en peruertissant les meurs & coustumes d'iceluy, & tirant ses citoyens en opinions contraires à leurs loix & coustumes anciennes. Et se moquant de l'eschole d'Isocrates, qui enseignoit l'art d'eloquence, il disoit que ses disciples enuieillissoyent chez luy, pour aller puis apres exercer leur eloquence & plaider des causes en l'autre monde deuant Minos, quand ilz seroyent morts. Et pour diuertir & desgouter son filz d'estudier es lettres & disciplines Grecques, il luy disoit, en renforçant & grossissant sa uoix plus que sa uieillesse ne portoit, comme si par inspiration diuine il eust prononcé quelque prophetic: Toutes & quantes fois que les

- » Romains fadonneront aux lettres Grecques,
» ilz perdront & gasteront tout. Et toutefois le
temps a monsté sa detraction & mesdisance
uaine & faulse : car iamais la uille de Rome n'a
tant flory, ny l'empire de Rome n'a esté si grád,
que quand les lettres & les sciences Grecques y
ont esté en honneur & en pris. Mais Caton n'a-
uoit pas seulement en haine les philosophes
Grecs, ains auoit aussi pour suspects ceulx qui
faisoyent profession de medecine à Rome : car
il auoit ouy ou leu la responce que fait Hippo-
crates, quand le Roy de Perse l'enuoya querir,
& luy fait offrir grosse somme d'or & d'argent,
sil le uouloit aller seruir, quand il iura que ia-
mais il ne seruiroit aux Barbares, attendu qu'ilz
estoyent naturelz ennemis des Grecs. Caton af-
fermoit que cela estoit un serment que tous au-
tres medecins iuroyent semblablement : au
moyen dequoy il commandoit tresexpressmēt
à son filz de les fouir tous egalemēt, disant qu'il
auoit fait un petit traitté de medecine, par le-
quel il guerissoit ceulx de sa maison quand ilz
estoyent malades, & les entretenoit quand ilz
estoyent en santé. Il ne leur defendoit iamais le
manger, mais il les nourrissoit de quelques her-
bes, & de quelques chairs legeres, comme de
Canes, de Palumbes & de Lieures : car telles
uiandes, disoit il, sont bonnes pour les malades
& faciles à digerer, excepté qu'elles font songer
& refuer ceulx qui en mangent : & se uantoit

qu'avec ce regime la & ceste façon de medecin-
ner, il festoit tousiours maintenu sain quant à
luy, & auoit aussi gardé ses domestiques en san-
té. Toutefois quant à cela, il me semble qu'il ne
faisoit pas tout ce dont il se uiantoit : car il per-
dit sa femme, & son filz : & quant à luy, pource
que de nature il auoit le corps robuste & bien
composé tant pour la force que pour la santé, il
dura longuement entier, de maniere qu'en son
extreme uieillesse encore uisoit il de la compa-
gnie des femmes, & se remaria hors d'aage à
une ieune fille, ce qu'il feit pour une telle occa-
sion : Apres que sa premiere femme fut morte,
il maria son filz à la fille de Paulus Æmylius,
sœur du second Scipion l'Africain, & luy qui es-
toit ueuf se seruoit d'une ieune garce seruante,
qui l'alloit à la desrobee trouuer en sa chambre:
toutefois cela ne se pouuoit faire si secrettemēt
en une petite maison, ou il y auoit une ieune
Dame marice, que lon ne s'en apperceust bien :
& comme un iour ceste garce par trop auda-
cieusement fust passée deuant la chambre du
ieune Caton, pour entrer en celle du pere, le
ieune homme n'en dit mot : mais son pere ap-
perceut bien qu'il en auoit eu honte, & qu'il l'a-
uoit regardee de mauuais œil : & pource co-
gnoissant que cela desplaisoit à ces deux ieunes
personnes, son filz & sa femme, sans s'en plain-
dre à eulx, ny leur en faire pire chere, il s'en alla
un matin, comme il auoit de coustume, sur la

place, avec la troupe de ceulx qui l'accompa-
gnoyent par honneur, entre lesquelz estoit un
Salonius qui auoit autrefois esté son greffier, &
l'accompagnoit comme les autres par hōneur :
Caton l'appellant tout hault par son nom, luy
demanda s'il auoit point encore marié sa fille.
Salonius luy respondit que non, & qu'il n'auoit
garde de le faire sans luy en auoir premiere-
ment communiqué. Caton adonc luy repliqua :
23 Le luy ay donques trouué un mary, & à toy un
23 gendre, qui ne sera pas mal à propos pour elle,
23 si d'adventure l'aage ne luy fasche, pource qu'il
23 est fort uieil : mais au demourant, il n'y a que
23 plaindre en luy. Salonius respondit, que quant
à cela il s'en remettoit du tout à luy, & luy re-
commandoit sa fille, le priant de luy donner tel
party que bon luy sembleroit, pource qu'elle e-
stoit son humble seruante, qui dependoit entie-
rement de luy, & auoit besoing de sa prouoyan-
ce. Et lors Caton sans plus differer luy dit, que
c'estoit luy mesme qui la demandoit en maria-
ge. Salonius de prime face fut estonné de ces
paroles, pource qu'il luy sembloit que Caton
desormais estoit hors d'aage de faire nopces, &
que de son costé il n'estoit pas hōme pour auoir
alliance d'une maison de dignité Consulaire &
triumphale : mais à la fin quand il ueit que Ca-
ton le disoit à bon esciant, il l'accepta tresuou-
luntiers : & en ces termes s'en allans ensemble à
la place, y passerent sur l'heure le contract de

mariage. Et comme lon apprestoit les nopces, Caton le filz prenant quelques uns de ses parens & amis avec luy, alla deuers son pere, luy demander sil auoit commis aucune faulte enuers luy, ou sil luy auoit point fait quelque desplaisir, pour despit duquel il luy amenaist en la maison une marastre. Et lors le pere s'escria, O ne dis iamais cela, mon filz, ie treuve bon tout ce que tu fais, & ne m'en sçauois plaindre en sorte que ce soit: mais ie le fais pour autant que ie desire auoir plusieurs enfans, & laisser plusieurs citoyens telz que tu es à la chose publique. Lon dit que Pisistratus le tyran d'Athenes feit une route telle responce à ses enfans de sa premiere femme, qui estoient desia tous grâds quand il espousa sa seconde Timonassa natifue d'Argos, de laquelle il eut, comme lon dit, Iophon & Thessalus. Mais pour retourner à Caton, il eut de ceste seconde femme un filz, lequel fut surnommé du nom de sa mere, Caton le Salonien: & son filz aîné mourut estant en office de Præteur, duquel il fait souuent mention en plusieurs passages de ses liures, le louât comme un fort homme de bien. Et dit on qu'il porta ceste perte fort constamment, & en homme graue & sage, sans que pour cela il fust de rien moins ententif aux affaires de la chose publique, qu'il auoit esté parauant. Car il ne feit point comme feirent depuis Lucius Lucullus, & Metellus surnommé Pius, qui sur leur

uieillesse se retirerent totalement du gouuernement des affaires publiques, ains estima que c'estoit une charge & un deuoir, auquel tout homme de bien, tant qu'il a uie, est tenu: ny comme Scipion l'Africain auoit fait auparauant, lequel uoyant que la gloire de ses haults faicts luy suscitoit l'enuie des autres citoyens, changea le demourant de sa uie en repos, & abandonnant les affaires & la uille, s'en alla tenir aux champs. Mais comme lon a escrit, que quel qu'un dit & conseilla à Dionysius le tyran de Syracuse, qu'il ne pouuoit mieux ny plus honorablement estre inhumé & ensepuluré que en la tyrannie: aussi estima Caton, qu'il ne pouuoit mieulx ne plus honestement enuieillir, qu'en s'entremettât rousiours, iusques au bout, des affaires de la chose publique. Et ce pendant quand il se uouloit un peu recreer & reposer, il passoit son temps à composer des liures, & à uaquier au mesnage des champs. Voila dont uient qu'il a tant escrit, & de toutes sortes de liures & d'histoires. Quant au labourage & mesnage des champs, il y uaquua en ses ieunes ans pour l'utilité & le profit. Car il dit qu'il n'auoit que deux sortes de reuenu, le labourage & l'espargne: mais en sa uieillesse, ce qu'il faisoit aux champs n'estoit plus que pour plaisir, & pour contempler & apprendre tousiours quelque chose de la nature: car il a mesme composé un traitté de la uie rustique, & du mesnage des champs,

auquel il escrit iusques à la maniere comme il fault faire des tartes & gasteaux, comment il fault contregarder les fruiçts des arbres : tant il se uouloit monstrier singulier & bien entendu en toutes choses. Quand il estoit en ses maisons des champs il uiuoit un peu plus opulenterment qu'ailleurs, & enuoyoit souuent conuier ses uoïfins & ceulx qui auoyēt des terres ioignant aux siennes à uenir soupper avec luy, & se resiouissoit avec eulx, de maniere que sa compaignie & sa frequentation n'estoit pas seulement plaisante & agreable à ceulx qui estoient de son aage, mais aussi delectable aux ieunes gens : car il auoit ueu & experimēté beaucoup de choses, & s'estoit trouué en beaucoup de bōs affaires, & auoit beaucoup de bōs mots qui estoient plaisans & profitables à ouïr racompter. Il estimoit la table estre l'un des principaulx moyens d'engendrer amitié entre les hommes, & à la siene il mettoit tousiours en auant quelques bons propos à la louange des gens de biē, & des uertueux citoyens, & ne uouloit pas que lon parlast aucunemēt des inutiles & meschās, se donnant bien garde d'en entamer iamais le propos en quelque banquet ou il fust, ny en biē ny en mal. Au reste lon estime que son dernier chef d'œuvre en l'administration de la chose publique fut la destruction finale de Carthage : car celuy qui la destruisit & ruina de faict, fut bien le second Scipion, mais ce fut par le con-

seil & aduis de Caton principalement, que la guerre derniere contre les Carthaginois fut entreprise, & ce par une telle occasiō: Il fut enuoyé en Afrique pour entendre les causes des differents qui estoient entre lesdicts Carthaginois, & Massinissa le Roy de Numidie, lesquelz auoyēt grosse guerre ensemble: & y fut enuoyé, pour autant que le Roy Massinissa de tout temps auoit tousiours esté amy des Romains, & les Carthaginois estoient deuenuz leurs allies depuis la derniere guerre, en laquelle ilz auoyent esté desfaicts par le premier Scipion qui leur osta & rongna pour l'amēde une bonne partie de leur empire, & leur imposa un gros tribut. Quand dōques il fut sur les lieux, il trouua la uille de Carthage non point affligee, faille de cueur, ny appauurie, comme pensoient les Romains, ains pleine de ieunesse, opulente en biens, & abondante de toutes sortes d'armes & de munition de guerre, de maniere que pour ceste opulence elle en auoit la teste droite & le cueur eleué, & si ne proiettoit rien de petit. Si pensa qu'il n'estoit pas temps pour les Romains de s'embesongner à cognoistre des differēts d'entre les Carthaginois & Massinissa, ains que filz ne prouoyoyēt de bōne heure à exterminer du tout ceste cité, qui de tout temps leur estoit capitale ennemie, qui se ressentoit du passé, & qui s'estoit ainsi remise sus, & accreue en si peu de tēps plus que lō ne sçauroit ny croire ny

estimer, ilz seroyent pour retomber en aussi
grands dangers qu'ilz auoyent onques esté. Et
pourtant si tost qu'il fut de retour à Rome, il
ne faillit pas de remonstrer uifvement au Se-
nat, que les pertes & dōmages que les Cartha-
ginois auoyent receuz par le passé es guerres
qu'ilz auoyēt eues cōtre eux, ne leur auoyēt pas
tant osté de puissance, comme de folie & d'im-
prudence, & qu'il y auoit danger que les dittes
aduersitez ne les eussent rendus plus tost experi-
mentez qu'affoibliz pour faire la guerre, & que
desia ilz s'essayoyent & s'exercitoient en ceste
guerre contre les Numides, pour puis apres la
faire à bon esciant aux Romains, & que la paix
qu'ilz auoyēt avec eulx n'estoit qu'une surseēce
d'armes & un delay de guerre, pour laquelle re-
nouueller ilz n'attendoient que quelque occa-
sion opportune. Et dit on, qu'oultre ces remon-
strāces il auoit expressement apporté dedās le re-
ply de sa lōgue robe des figures d'Afrique, les-
quelles il ietta emmy le Senat en secouant sa
robe: & comme les Senateurs s'esmerueillas-
sent de uoir de si belles, si grosses & si fresches
33 figures, La terre qui les porte, leur dit il, n'est di-
33 stante de Rome que de trois iournees de nauig-
ation. Mais encore est plus uiolent ce qui s'en
racompte oultre cela: C'est que de lors en a-
uant iamais il ne disoit son aduis au Senat de
quelque matiere que ce fust dōt on deliberaſt,
qu'il n'y adioustast tousiours ce refrein dauan-

33 tage, Et me semble aussi qu'il est besoing que
34 Carthage soit du tout ruinee. Au contraire de-
quoy Publius Scipion, surnommé Nasica, disoit
35 aussi tousiours, Il me semble expediēt que Car-
36 thage demeure. car ce personnage uoyoit, à mō
aduis, que le peuple Romain par sa fierté insol-
lente commettoit beaucoup de grandes & lour
des fautes, & deuenoit si haultain à cause de ses
prosperitez qui luy eleuoient le cueur, que le
Senat ne le pouuoit plus qu'à grande peine
contenir, & que par le moyen de la trop gran-
de authorité qu'il se donnoit, il tiroit à force
toute la uille, là ou sa fantasie le poulsloit. A rai-
son dequoy il uouloit que ceste crainte de la ci-
té de Carthage demourast tousiours, comme
une bride pour retenir l'insolence du peuple
Romain, estimant que les Carthaginois n'e-
stoyent pas assez puissans pour combattre, ne
pour uaincre les Romains, mais qu'ilz l'estoyēt
aussi trop pour les contemner, & ne les crain-
dre point. Caton repliquoit au contraire, que
c'estoit enquoy il y auoit plus de danger, qu'u-
ne cité de tout temps grosse & puissante, & lors
deuenue sage pour auoir esté chastiee par plu-
sieurs pertes & plusieurs aduersitez, demourast
tousiours au guet à espier le peuple Romain,
qui faisoit du cheual eschappé, & qui par une li-
cence effrence qu'il se donnoit luy mesme, com-
mettoit de bien grands erreurs : au moyen de-
quoy luy sembloit, que ce n'estoit pas sagement

aduisé de ne luy point oster du tout le danger du dehors, & la crainte de perdre son empire, quand on luy laissoit au dedans les moyens de retomber tousiours en ses fautes. Voila comme lon tient que Caton fut cause de la tierce & derniere guerre des Romains à l'encontre des Carthaginois. Mais au reste quād elle fut commencée, il mourut, & auant que mourir il prophetisa, par maniere de dire, qui seroit celuy qui y mettroit fin. C'estoit le second Scipion, qui pour lors estant ieune homme, auoit charge de mille hommes de pied seulement: mais en toutes les rencontres, & par tout ou il y auoit des affaires, il faisoit tousiours des actes de bõ sens & de grande hardiesse, dont les nouuelles uenoyent ordinairement à Rome: & Caton les oyant reciter, prononcea, comme lon dit, ces deux uers d'Homere,


” Celuy la seul est du nombre des sages,

” Les autres tous ne sont qu'ombres uolages.

Laquelle prophetie Scipion bien tost apres confirma par effect, & monstra estre ueritable. Au demourant la posterité que Caton laissa, fut un filz de sa seconde femme: lequel, comme nous auons dit, fut surnommé à cause de sa mere, Caton le Salonien, & un petit filz de son filz aisné qui estoit mort auant luy. Cestuy Caton Salonien deceda estant Præteur, mais il laissa un filz lequel paruint à la dignité Consulaire, & fut ayeul de Catõ, que lon surnomme le Philosophe,

l'un des plus uertueux & des plus renommez
personnages de son temps.

LA COMPARAISON D'A-
RISTIDES AVEC M. CATO.

 R maintenant que nous auons
recueilly par escrit les plus nota-
bles choses & plus dignes de
memoire de ces deux grâds per-
sonnages, si nous uoulons con-
ferer toute la uie de l'un en bloc à toute la uie
de l'autre, il ne sera pas à l'aduenture bien aisé
de discerner la difference qu'il y a de l'un à l'au-
tre, estant obscurcie & cachee soubz plusieurs
grandes similitudes qu'ilz ont entre eulx:
mais si nous uenons à les comparer l'un à l'au-
tre par le menu, comme nous ferions quel-
ques œuures de poësie, ou quelques tableaux
de portraiture, tout premierement nous trou-
uerons qu'ilz ont cela de commun entre eulx,
que sans auoir eu autre chose qui les auan-
ceast, ne qui les recommandast, que leur seu-
le uertu & propre suffisance, ilz ont tous
deux gouuerné leur chose publique, ou ilz ont
acquis grand honneur & grande reputation.
Mais il me semble que quand Aristides uint
à s'entremettre des affaires publiques, l'estat
& seigneurie d'Athenes n'estoit pas encore
grande chose, & qu'il luy fut facile de se met-

être en auant , par ce que les autres gouuerneurs & Capitaines qui estoient de son tēps , & ses concurrens, n'estoient pas fort riches ny fort apparens par dessus les autres. Car la taxe des plus riches, qui fussent lors à Athenes, estoit de ceulx qui pouuoient auoir de reuenu la ualeur de cinq cents minots de bled & au dessus, & les appelloit on pour ceste cause Pentacosimedimni . La seconde taxe estoit de ceux qui en auoyent uaillant trois cents , & les appelloit on les Cheualiers . La troisieme & derniere estoit de deux cents, & les appelloit on Zeugitæ. Là ou Marcus Cato sortant d'une petite uillette & d'une uie chāpestre & rustique , f'alla tout d'un plein sault ietter, cōme par maniere de dire , en une mer infinie du gouuernement de la chose publique Romaine, laquelle n'estoit plus gouuernee par de telz gouuerneurs & Capitaines qu'estoyēt áciēnemēt un Curius , un Fabricius, un Ostilius. Car le peuple Romain ne donnoit plus les magistrats & offices à telz simples gēs besongnās de leurs bras , qui uinssent tout freschement de mener la charrue ou de manier la houe , ains estoit ia accoustumé à regarder à la noblesse des maisons, aux richesses , à ceux qui leur donnoient argent, ou qui les prioient à grande instance pour les auoir : & pour la grandeur de son empire & de sa puissance se faisoit faire la cour par ceux qui aspiroyent aux honneurs & estats de la chose publique : & si

n'estoit pas chose pareille d'auoir pour concurrent & aduersaire un Themistocles, lequel n'estoit ny de maison noble, ny gueres riche: car on dit que tout le bien que son pere luy laissa, ne ualoit que^a quatre ou cinq talents, quand il commença à s'entremettre des affaires de la chose publique, au pris que de combatre du premier lieu d'honneur & d'autorité contre un Scipiō l'Africain, un Seruilius Galba, un Quintius Flaminius, sans auoir autre support ny autre appuy ne moyen, que une langue librement parlante pour la raison & pour la iustice. D'auantage Aristides. en la bataille de Marathon, & en celle de Plataës n'estoit que l'un de dix Capitaines des Atheniens: là ou Caton fut eleu un de deux au Consulat entre plusieurs grands & puissans competeurs, & l'un de deux aussi à la Censure deuant sept autres poursuyuans, qui estoient des plus notables personnages de toute la uille, lesquelz il surmonta. Et si y a plus, que Aristides en nulle uictoire ne fut onques le premier: car en celle de Marathon, Miltiades emporta le premier lieu, en celle de Salamine Themistocles, & en celle de Plataës Pausanias, comme dit Herodorus, qui escrit qu'il y gagna une tresbelle uictoire. Encore y en a il qui debatoient pour le second lieu à l'encontre d'Aristides, comme un Sophanes, un Amynias, un Callimachus, & un Cynegirus, qui tous feirent de grands actes de prouesses en ces batailles la: &

à l'oppo-

a Trois
mille e-
cus.

à l'opposite, Caton non seulement estoit Chef, & le premier de toute son armee en prouësse & en conseil, durant la guerre qu'il feit en Hespagne au temps de son Cōsulat : mais aussi depuis en la iournee ou le Roy Antiochus fut desfaict au pas des Thermopyles, ou il n'estoit que Capitaine de mille hommes de pied soubz la charge d'un autre qui estoit Cōsul, il emporta l'honneur de la uictoire, ayant ouuert les portes aux Romains pour courir sus à Antiochus, en l'alloant surprendre & assaillir par derriere, lors qu'il ne cuidoit auoir affaire que de front, & qu'il ne regardoit que deuant luy : car celle uictoire, qui sans point de doubte est un des chefs d'œuvres de Caton, chassa l'Asie hors de la Grece, & ouurit & feit le chemin à Lucius Scipio, pour passer depuis en Asie. Ainsi doncques quant aux faicts d'armes, ne l'un ne l'autre ne fut onques uaincu ne desfaict en bataille: mais en paix & en matiere de gouuernement Aristides a esté uaincu & supplanté par Themistocles, qui par ses menees feit tant qu'il le ietta hors d'Athenes, & l'enuoya pour un temps en exil: là ou Caton ayant pour ennemis coniurez presque tous les plus grands, les plus nobles & les plus puissans hommes qui fussent de son temps à Rome, & ayant continuellement tousiours combatu contre eulx, iusques au decours de sa uieillesse, se garda bien, comme un ferme & roide champion de lucte, d'estre renuersé

par terre, & ne tūba iamais. Car il a accusé plusieurs en iugement publique, & plusieurs l'ont accusé aussi : mais il en a faict condamner beaucoup, & luy ne le fut iamais une seule fois, ayant pour toute defense de sa uie & de son innocence sa langue, qui luy estoit un util, dont il se sçauoit tresbiē aider à faire de belles & grandes choses, & auquel, selon mon aduis, on doit plus tost attribuer ce qu'il n'a iamais rien souffert indignement, ny n'a onques esté condamné iniustement, que non pas à la faueur de fortune, ny à la sauuegarde d'aucun Dieu. Car c'est ueritablement une tresgrande partie que l'eloquence, cōme le tesmoigne bien ce qu'Antipater escrit du philosophe Aristote apres sa mort, disant qu'entre les autres singulieres graces & perfections qui estoient en luy, il auoit celle la souueraine, qu'il persuadoit ce qu'il uouloit. Or est ce une maxime confessee de tout le monde, que l'homme ne sçauoit auoir ny acquerir une uertu ne science plus grande que la Politique, c'est à dire, l'art de sçauoir gouuerner & regir une grande multitude d'hommes, comme est une grosse cité : de laquelle science, selon l'opinion de plusieurs, l'Oeconomique, c'est à dire, l'art de biē regir un mesnage, est l'une des principales parties, attendu que une cité n'est autre chose qu'une assemblée de plusieurs mesnages & maisons ensemble, & est adonc la cité forte & puissante en public, quand les habitans &

citoyens d'icelle sont riches & opulents en leur particulier . Et pourtant Lycurgus qui bannit l'or & l'argent de Lacedamone, y establiſſant de la monnoye de fer, lequel encoré eſtoit corrompu & gaſté auec du feu & du uinaigre, ne defendit pas à ſes citoyens ceſte diligence de meſnager : car il retrencha bien la ſuperfluité, les delices, l'auarice & l'ardeur d'amaſſer, qui accompagnent ordinairement les richesses: mais auſſi eut il l'œil autant q̄ reformateur de loix qui fut onques, que ſes citoyens euſſent prouiſion de toutes choſes requiſes & neceſſaires à la uie de l'homme, craignant de uoir habiter en ſa cité, & iouir des priuileges d'icelle, un deſert neceſſiteux & indigent, ſans heritage ne maiſon, encore plus qu'un preſumptueux, inſolent & ſuperbe pour ſa grande ri cheſſe . Si m'eſt aduiſ que Caton ne fut pas moins bõ pere de famille, que bon & ſage gouuerneur de choſe publique: car il augmenta honeſtement ſon bien, & ſi enſeigna aux autres le moyen de l'accroître par bon meſnage, & par intelligence du labourage, es liures qu'il en a eſcripts, ou il a recueilly pluſieurs beaux & bons preceptes ſeruans à ce. Mais Ariſtides au cõtraire par ſa pauureté à diſſamé & rendu odieuſe la iuſtice, comme celle qui fait l'homme pauure, & ruine une maiſon, eſtant plus profitable à tous autres, qu'à ceulx qui l'ont & qui l'exercent: & touteſois le poète Heſiode qui nous recommande tant & ſi fort la

iustice, nous admoneste quand & quand d'entendre diligemment au mesnage, blasmant la paresse de ne uouloir rien faire, comme le commencement & la source de toute iniustice. Et pourtāt me semble il que Homere parle tressagement en un passage, ou il dit:

- » Le n'ay iamais aimé à besongner,
- » Ny du mesnage aucunement soigner,
- » Pour mes enfans nourrir, & biens acquerre:
- » Ains ay aimé les armes & la guerre,
- » Courir en mer sur fustes & galeres,
- » Manier dards & sagettes legeres:

Comme nous uolant donner à entendre, que ce sont deux choses relatives necessairemēt enchainees l'une avec l'autre, que celuy qui n'a soing du sien & de sa maison, uiue iniustement & prenne de l'autruy: car la iustice n'est pas cōme l'huile que les medecins disent estre tressaine au corps humain, si lon en use par le dehors, & au contraire tresmauuaise, si lon en use par le dedās: ny ne doibt pas l'hōme iuste estre profitable aux estrāgers, & ce pendant n'auoir soing ny de foy ny des siens. A l'occasion dequoy il m'est aduis, que la uertu politique & ciuile d'Aristides estoit defectueuse en cest endroit, fil est uray ce que la plus part des auteurs en escrit, qu'il n'eut pas la prouoyance de laisser seulement à ses filles dequoy les marier, ny dequoy se faire enterrer: là ou la maison de Catō, iusques à la quatrieme ligne, bailla des Preteurs

& des Cōsulz à Rome : car les enfans de ses enfans, & encore plus bas, les enfans des enfans de ses enfans, obtreindrent à Rome des plus honorables offices & estats . Et Aristides qui fut de son temps le premier homme de la Grece, laissa sa posterité en si grande & si extreme pauureté, que les uns furent contraincts de faire les deuins, qui uont interpretans les songes & disans la bonne aduéture pour gagner leur uie , & les autres de demander publiquement l'aumosne par necessité : & ne laissa moyen à pas un d'eulx de penser à faire chose aucune grande ny digne de luy . Mais au rebours, cela est le premier poinct , auquel on pourroit faire instance & le rappeler en doubte : car pauureté n'est nulle part mauuaise ny deshoneste de soy mesme, sinõ là ou elle est signe de paresse , de uie desordonnee , de superfluité & de folie : car quand elle se treuve en un personnage bien uiuant , laborieux, diligent, iuste, uaillant, sage & bié gouuernāt une chose publique, alors elle est une grande preuue de magnanimité & de grandeur de courage, pource qu'il n'est pas possible que celuy face de grandes choses qui a le cueur si bas que de penser tousiours à de petites , ny que celuy secoure beaucoup d'indigens , qui luy mesme est indigent de beaucoup de choses : & n'est pas la prouision la plus necessaire qui soit à ceulx qui se ueulent en gens de bien mesler & entremettre du gouuernemēt de la chose publi-

que, que la richesse, ains est la suffisance, laquelle estant contente de soy, & ne desirant particulièrement aucune chose superflue, ne distraict par ce moyen iamais celuy qui l'a, de penser & iuaquer aux affaires publiques. Car Dieu est celuy seul qui n'a simplement & absoluëment affaire de rië qui soit : parquoy la plus haulte uertu de l'hôme & la plus approchäte de la diuinité, doit estre estimee celle qui fait q l'homme a besoing de moins de choses. Et tout ainsi cōme un corps bien cōposé & bien complexionné n'a que faire ny de nourriture, ny de uesture curieuse ne superflue : aussi une uie & une maison saine & nette s'entretient de peu de chose, & fault que les biës soyēt proportionnez à l'usage & à la necessité, pource q celuy qui en amasse beaucoup & se passe de peu, n'a pas suffisäce. Car soit qu'il ne face pas grande despëse, pource qu'il ne l'appete pas, il est fol de se trauailler à en amasser plus qu'il ne luy en fault : & fil l'appeté, mais que par chicheté il n'ose despendre & iouir du fruiët de son labeur, il est miserable. Suyuāt laquelle raison ie demanderois uoluntiers à Caton, Si les biens ne sont faicts que pour en user, pourquoy te glorifies tu d'en auoir beaucoup amassé, quand peu te suffit? Et si c'est chose louable, comme ueritablement elle est, se contenter de pain le premier trouué, boire du mësme uin q les ualets & les manœuures, ne se foudier point d'auoir des robbes teinctes en pourpre,

ny des maisons dont les murailles foyent enduittes ne crespies, il s'ensuit, que ny Aristides, ny Epaminondas, ny Manius Curius, ny Caius Fabricius, n'ont rien omis ny oublié de leur deuoir, quād ilz ne se sont point souciez d'acquiescer ce, dont ilz n'eussent point uoulu user. Car il n'estoit point de besoing à un homme qui estoit les raues & les naueaux l'une des meilleures uiandes du monde, & qui les faisoit luy mesme bouillir en son foyer, pendant que sa femme luy pestrissoit du pain, de mener tant de bruit, & parler d'un asse qui ualoit enuiron quatre deniers & maille, ny se traualier d'escrire par quel art & industrie lon se peult biē tost enrichir. Car il est bien uray, que c'est une belle chose & louable que le contentement de peu, & la suffisance : mais c'est pour autant qu'elle nous exempte de desirer les choses non necessaires, & de nous en soucier. Et pourtant trouue lon qu'Aristides dit au plaidoyer de la cause du riche Callias, que ceulx qui estoient pauvres malgré culx deuoient bien auoir honte de pauureté : mais au contraire, que ceulx qui l'estoyēt uoluntairement s'en pouuoient & deuoient glorifier : car ce seroit sottise de penser que la pauureté d'Aristides procedast de lascheté de cueur & de paresse, attendu qu'il pouuoit, sans commettre chose aucune mauuaise ny deshoneste, s'enrichir promptement, en prenant seulement la despouille de quelqu'un des Barbares

qu'il auoit desfaits, & se faifissant de quelqu'une de leurs tentes. mais c'est deormais assez discouru sur ce poinct. Au demourant quant aux uictoures & batailles gaignees par Caton, elles n'adiousterēt presque riē à l'empire de Rome, lequel estoit desia si grand qu'il n'en pouuoit guerres accroistre: mais celles d'Aristides sont les principaux & les plus memorables faicts d'armes que feirent onques les Grecs, comme la iournee de Marathō, la bataille de Salamine & celle de Platēes: & si n'est pas raisonnable de comparer le Roy Antiochus au Roy Xerxes, ny les murailles des uilles d'Hespagne que Caton feit demolir, à tant de milliers de Barbares, qui lors furent desfaits & passez au fil de l'espee par les Grecs, tant sur la terre que sur la mer: esquelz actes Aristides ne fut à nul second, quant à l'effect de mettre uailamment la main à l'œuvre, mais bien en ceda il la pompe & la gloire à ceulx qui l'appetoyēt plus que luy, tout aussi facilement, comme il quitta l'or & l'argent à ceux qui en auoyent plus affaire que luy: en quoy il monstra qu'il estoit plus excellent, & plus digne personnage qu'eulx tous. Au reste, quant à moy ie ne ueux point reprendre la coustume de Caton, de se louer soy mesme si haultement, & de se preferer à tous les autres, comme que luy mesme en quelque siene haren gue dit, que se louer soy mesme est autāt important, cōme se despriser & blasmer: mais biē me

semble il, que celuy la est plus parfaict en uertu qui n'appete point qu'autres le louent, que celuy qui se louë ordinairement soy mesme : car n'estre point ambitieux, est une grande partie de la priuaulté & facilité requise à celuy qui ueult uiure entre les hommes au gouuernemēt d'une chose publique : & au cōtraire l'ambition est un uice fort odieux, & qui suscite grande enuie contre celuy qui en est entaché, duquel Aristides estoit totalement deliuré, & Caton fort taré. Car Aristides aida Themistocles son ennemy capital en ses plus beaux actes, & par maniere de dire, luy seruit de soudard & de satellite en sa charge de Capitaine general, se rendant ministre de sa gloire : ce qui fut cause de sauuer & remettre sus la uille d'Athenes. Et au cōtraire, Caton s'opposant & resistant aux entreprises de Scipion, cuida empescher son uoyage & son expedition de Carthage, en laquelle il desfeit Hannibal, qui iusques là auoit esté inuincible, encore à la fin luy dressant tousiours quelques soupçons & quelques calumnies, il ne cessa iamais qu'il ne l'eust chassé hors de la uille quāt à luy, & fait condamner tres ignominieusement Lucius Scipion son frere, de larcin & de maleuerfation en sa charge. Dauantage quant à la tēperance & continence que Caton a tousiours exaltee & ornee de tresbelles & tresgrandes louanges, Aristides ueritablement l'a tousiours gardee nette & immaculee. Mais les nopces se-

condes que feit Caton, prenant en mariage une fille, qui n'estoit ny de maison conuenable à sa dignité, ny d'aage sortable à la siene, le rendit grandement, & non sans apparente raison, suspect d'auoir esté luxurieux: car on ne le sauroit nullement excuser, ne luy donner couleur qui soit honeste, en ce qu'estant ia hors d'aage de marier, il amena à son filz marié & à sa belle fille une marastre en sa maison, & encore la fille d'un greffier, & qui seruoit de notaire & de scribe publiquement pour de l'argent à qui le uoloit employer: car soit qu'il le feist par appetit de uolupté, ou par despit, pour se uenger de ce que son filz auoit regardé sa garse de mauuais œil, l'un & l'autre tourne tousiours à sa honte, & autant l'effect que la cause. Et la couuerture qu'il allegua à son filz par laquelle il disoit qu'il se remarioit, n'estoit point ueritable: car si ueritablement il eust euy desir d'engendrer autres enfans, qui fussent aussi gens de bien comme estoit son filz aîné, ainsi qu'il disoit, il deuoit dōques des incontinent que sa femme fut morte y prouuoir, & faire diligence de trouuer une autre femme de quelque honeste maison, non pas se contenter de coucher avec une garse commune, iusques à ce que son filz s'en fust apperceu, & puis quand il se ueit descouuert, fallier de celuy, non duquel l'alliance luy estoit plus honorable, mais plus aisee & plus facile à auoir.



PHILOPOEMEN.

EN la uille de Mátinee y eut iadis un citoyen nommé Cassander, de l'une des plus nobles & plus anciennes familles, & qui eut autant de credit & d'autorité au gouvernement de la chose publique, que nul autre de son temps : toutefois à la fin fortune luy courut sus, de maniere qu'il fut chassé de son país, & se retira en la uille de Megalipolis, pour le regard principalement de l'amitié qu'il auoit avec Crausis le pere de Philopœmen, homme excellent, liberal & magnifique en toutes sortes, & particulierement affectionné en son endroit. Or tant comme ledict Crausis uescut, Cassander fut si bien traité de luy, qu'il n'eut faulte d'aucune chose : & apres qu'il fut decédé, Cassander luy uoulant rendre la pareille du bon recueil & amiable traitemēt qu'il luy auoit fait en sa uie, dressa & institua son filz estant demeuré orphelin, de la maniere

qu'Homere dit qu'Achilles fut institué & nourry par le uieillard Phœnix. Si prit incontinent le naturel de l'enfant un ply de nourriture ueritablement genereuse & royale, en croissant tousiours de bien en mieulx. Depuis au sortir de son enfance, Ecdemus & Demophanes, tous deux Megalopolitains, le prirent en leur gouvernement. C'estoyent deux philosophes qui auoyent esté familiers & auditeurs d'Arcefilaus en l'escole de l'Academie, & depuis employèrent ce qu'ilz auoyent appris en l'estude de la philosophie, au gouvernement de la chose publique, & maniement de grands affaires, autant ou plus que nulz autres de leur temps: car ilz deliurerent leur uille de la tyrannie d'un Aristodemus qui la tenoit soubs le ioug de seruitude, en attiltrant ceulx qui le tuerent: & aiderent aussi à Aratus à dechasser de Sicyone le tyran Nicocles: & à la requeste des Cyreniens, qui estoyent trauaillez de seditions ciuiles, & de partialitez qu'ilz auoyent entre eulx, allerent à Cyrene, là ou ilz reformerent l'estat de la chose publique, & leur establirent de bonnes ordonnances: mais quant à eulx, ilz comptoyent entre leurs plus beaux actes la nourriture & l'institution de Philopœmien, estimans auoir procuré un bien uniuersel à toute la Grece, en nourrissant un personnage de telle nature, es enseignemens & preceptes de la philosophie. Aussi à la uerité, la Grece l'aima singulierement

comme le dernier homme de uertu qu'elle au-
roit porté en sa uieillesse, apres tant de grands
& renommez Capitaines anciens, & luy aug-
menta tousiours sa puissance & son authorité, à
mesure que sa gloire croissoit : au moyen de-
quoy il y eut un Romain, qui pour le bié louer,
l'appella le dernier des Grecs, comme uoulant
dire, que depuis luy iamais la Grece ne porta de
grand personnage, ne qui fust digne d'elle. Au
demourant, quant à sa personne, il n'estoit pas
laid de uisage, comme aucuns estiment, car on
peult uoir encore auiourd'hui en la uille de
Delphes son image entiere, portraite au natu-
rel apres le uif : & quant à ce qu'ilz alleguent
d'une siene hostesse en la uille de Megare, qui
le prit pour un ualet, cela aduint pour sa facili-
té, en ce qu'il faisoit peu de compte de soy, & se
uestoit tousiours fort simplement : car ceste ho-
stesse siene ayant esté aduertie, que le Capitai-
ne general des Achæiens uenoit loger en son
logis, se trauailloit & tourmentoit pour luy ap-
prester à soupper, à cause que d'adventure son
mary ne se trouua pas pour lors en la maison : &
sur ce poinct Philopœmen arriua, uestu d'un
pauvre manteau. Elle le uoyant en cest habit,
pensa que ce fust quelqu'un de ses seruiteurs
qui uinst deuant pour luy apprester son logis : si
luy pria de la uouloir aider à faire la cuisine : &
luy posant incontinent son manteau, se meit à
fendre du bois. Mais en ces entrefaittes le mary

arriua, qui le trouuant ainsi embefongné, luy
30 demanda, Ho ho, que ueult dire cela, seigneur
30 Philopœmen? Non autre chose, luy respondit
30 il en sa langue Dorique, sinon, que ie porte la
30 peine de ce que ie ne suis pas beau filz ny hom-
30 me de belle apparence. Il est bien uray que Ti-
tus Quintius luy dit un iour, semblant se mo-
30 quer de l'habitude de son corps, O Philopœ-
30 men, tu as bien belles mains & belles iambes,
30 mais tu n'as point de uentre: pource qu'il estoit
fort gresse & fort menu par le fond du corps.
Toutefois il m'est aduis, que ce mot de risce e-
stoit plustost adressé à la qualité de son armee,
que non pas de son corps, à cause qu'il auoit de
bonnes gens de pied & de cheual: mais l'argent
pour les entretenir & nourrir luy defailloit or-
dinairement. Ce sont des propos qui se tiennent
es escholes touchant Philopœmen. Mais pour
uenir à ses meurs & à sa nature, il semble que
son ambition & le desir qu'il auoit d'acquérir
honneur en son faict, n'estoit point sans quel-
que opiniaistreté & quelque cholere: car se uou-
lant du tout cōformer à l'exemple & imitation
d'Epaminondas, il representa bien sa hardiesse à
entreprendre, & son bon sens à executer toutes
grandes choses, & aussi son entiere preudhom-
mie à ne se laisser iamais corrompre ny gagner
par argent: mais aux debats & differents qui
entreuient es choses ciuiles, il ne se pou-
uoit pas quelquefois contenir dedans les bor-

nés de grauité, de patience & de benignité, ains s'en iettoit souuent dehors par cholere & par opiniaistreté: à l'occasion dequoy il semble, qu'il auoit plus des parties de bon Capitaine pour la guerre, que de sage gouuerneur de chose publique pour la paix. Aussi auoit il tousiours des son enfance aimé les gens de guerre & les armes, & auoit pris grand plaisir à se duire & dresser aux exercices du corps qui y sont conuenables, comme à escrimer, picquer cheuaux, & uoltiger. Et pourautant qu'il sembloit auoir une naturelle adresse à la lûcte, aucuns de ses amis, & de ceulx qui auoyent soing de luy, l'admonestoyent qu'il s'adonnast à telz combats. Il leur demanda si la uie que menoyent ceulx qui faisoient mestier de telz ieux de pris, luy porteroit point d'empeschemēt quant aux exercices de la guerre. On luy feit responce que la disposition de la personne & la maniere de uiure que suyuoyent les lûcteurs, & ceulx qui se prepa-royent aux autres telz combats, estoit en tout & par tout contraire à celle d'un bon homme de guerre, mesmement quant à son uiure & à son exercice ordinaire, pour autant que les lûcteurs mettoyēt peine d'entretenir & augmenter soigneusement leur enbonpoinct par beaucoup dormir, boire & manger continuellement, se traouiller & reposer à certaines heures sans y faillir d'une minute, & estoient tousiours en dāger de perdre la force & roideur du

corps qu'ilz en acqueroyent, filz faisoient le moindre excès du monde, ou filz passoyent leur ordinaire d'un seul poinct: là ou il fault que gens de guerre soyent faicts & accoustumez à toute diuersité & toute inegalité de uie, & mesme qu'ilz ayent appris de ieunesse à supporter facilement la disette de toutes choses necessaires à la uie de l'homme, & à endurer aisement de passer les nuicts sans dormir. Ce que Philopœmen ayant entendu, non seulement il reietta pour lors tous telz exercices & s'en moqua, mais depuis encore quand il fut Chef d'armee, il s'estudia par tous moyens d'infamie & d'opprobres qu'il leur peut faire, d'en amortir & esteindre du tout la coustume, comme celle qui rendoit les corps des hommes inutiles aux trauaux & aux combats necessaires pour la defense de leur païs, qui autrement y seroyent tres idoines & utiles. Au reste, si tost qu'il fut hors de la puissance de maistres & gouuerneurs, & qu'il commença à porter les armes es courtes que faisoient ceulx de Mantinee sur les terres des Lacedæmoniens, pour surprendre d'emblee ou piller quelque chose, il s'accoustuma à estre tousiours le premier à l'aller & le dernier à retourner: & quand il estoit de loisir, en temps de paix ou de trefues, il endurcissoit son corps & le rendoit dispos, robuste & leger à force de chasser continuellement, ou bien de labourer la terre: car il auoit un bel heritage

heritage qui n'estoit qu'à une lieue & un quart seulement loing de la uille, là ou il s'en alloit ordinairement apres disner ou apres soupper: & puis la nuict uenue il se iettoit dessus quelque meschante paillasse, & y reposoit ne plus ne moins que l'un de ses manœuvres, & le matin au poinct du iour il s'en alloit ou avec les uignerons besongner aux uignes, ou avec les laboureurs à la charrue, & par fois s'en retournoit à la uille, là ou il uaquoit aux affaires de la chose publique avec ses amis, & avec les officiers & magistrats de la uille. Or tout ce qu'il pouuoit espargner & gagner à la guerre, il le despendoit à achepter de beaux cheuaux, ou à faire forger de beaux harnois, ou à payer la rançon de ses pauvres citoyens, qui auoyent esté pris prisonniers en la guerre: mais quant à son bien, il taschoit à l'entretenir & à l'accroistre par le reuenu du labourage seulement, comme par le moyen qu'il estimoit estre plus droit & plus iuste que les autres, & si n'y uaquoit pas en passant tēps seulement par maniere d'esbat, ains y employoit grande sollicitude, comme celuy qui estimoit que tout homme d'honneur doit traualler à si bien gouuerner & augmenter le sien, qu'il n'ait occasion d'appeter ou usurper l'autrui. Il ne prenoit pas plaisir à ouïr toutes sortes de propos ny à lire rous liures de philosophie, ains seulemēt ceulx qui luy pouuoÿēt profiter à deuenir de plus en plus uertueux: & ne

lisoit uoluntiers d'Homere que les passages qui luy sembloient auoir quelque efficace pour emouuoir les cueurs des hommes à aimer la prouësse : mais entre toutes & sur toutes autres lectures, il estoit singulierement affectionné à lire les liures d'Euangelus, touchant l'art & maniere de dresser les batailles, & aussi les histoires des faicts & gestes de Alexandre le grand, disant qu'il falloit tousiours reduire les paroles à effect, si lon ne uouloit que ce fussent comptes faicts à plaisir, & un parler ietté en l'air sans porter aucun profit : car mesme en ses liures de l'art de dresser & ordonner les batailles, il ne se contentoit pas d'en uoir les exemples & les figures portaittes sur des tables, ains en uouloit uoir l'experience, & faire les preuues sur les lieux mesmes : & pource quād l'armee marchoit en bataille par les champs, il y estudioit, considerant diligemment en soy mesme les accidens & les formes diuerses qui aduiennent à une bataille quand elle descend en une uallee, ou que la plaine luy uient à faillir, quand elle passe une riuiera, ou un fossé, ou un pas & un chemin estroit, quand il fault qu'elle s'eslargisse, ou qu'elle s'estroicisse : & non seulement l'estudioit à par soy, mais aussi en disputoit avec ceulx qui estoient autour de luy : car sans point de doubte Philopœmen a esté l'un des hommes du monde qui a le plus estimé l'art militaire, & quelque fois plus à l'aduenture qu'il n'eust esté de be-

soing, & plus aimé la guerre, comme le plus ample champ, & le subiect le plus plantureux que la uertu scauroit auoir pour s'exerciter; tellement qu'il auoit en mespris & desestimoit ceulx qui ne s'en mesloyent point, comme gens qui n'estoyent bons à rien faire. Estant donques ia arriué au trentieme an de son aage, Cleomenes le Roy des Lacedæmoniens uint une nuict à l'improuueue assaillir la uille de Megalipolis; si uiuement que d'arriuee il forcea les gardes & le guet, & entra dedás iusques sur la place, qu'il gaigna. Quoy entendant Philopœmen accourut soudain au secours: ce neantmoins, quoy qu'il feist tout deuoir de bien & hardiement combattre, si ne peut il iamais repoulser les ennemis, ny les rechasser hors de la uille: mais au moins donna il temps & loisir à ses citoyens de se sauuer & se desrober de la uille, en arrestant ceulx qui les poursuiuoient, & tirant tousiours Cleomenes apres luy, tellement qu'il eut à la fin beaucoup d'affaire à se sauuer luy mesme le dernier, bien blecé, & son cheual luy ayant esté tué soubs luy. Or quelques iours apres Cleomenes estant aduertý que les Megalopolitains s'estoyent retirez en la uille de Messine, leur enuoya faire entendre qu'il estoit prest de leur rendre leur uille, leurs heritages & tous leurs biens: & Philopœmen uoyant que ses citoyens estoyent fort ioyeux de ceste nouuelle, & que chacun s'apprestoit pour sy en

retourner à grande haste, il les en destourna par les remonstrances qu'il leur feit, en leur donnant à entendre que Cleomenes ne leur uouloit pas tant rendre leur uille, que les prendre eulx mesmes avec leur uille, preuoyant bien qu'il ne pourroit pas tousiours demourer là pour garder des murailles & maisons toutes uuides, & que luy mesme à la fin seroit contrainct d'en partir. Ceste remonstrance feit arrester les Megalopolitains: mais aussi donna elle occasion à Cleomenes de brusler & demolir une grande partie de la uille, & d'en emporter une grosse somme d'argent & grande quantité de tout butin. Depuis comme le Roy Antigonus fust uenu au secours des Achæiens contre Cleomenes, & que Cleomenes eust occupé le hault des montagnes de Sellasie, & saisy tous les pas & aduenues de ce quartier la, le Roy Antigonus renga son armee en bataille tout aupres, en deliberation de l'assaillir & le forcer si luy estoit possible. Philopœmen estoit lors entre les gens de cheual avec ceulx de sa uille, qui auoyent à leur costé les Esclauons bons combatans à pied & en grand nombre, lesquelz seroyent la queue de toute l'armee. Or leur auoit il esté enioinct & commandé qu'ilz se teinsent tout coy sans bouger, iusques à ce que de l'autre poincte de la bataille ou estoit le Roy en personne, on leur monstraist en l'air une cotte d'armes rouge attachee & estendue au bout d'une

picque : mais nonobstant ce commandement, les Capitaines qui conduisoient ces Esclauons n'eurent pas la patience d'attendre, & allerent rascher à forcer les Lacedæmoniens, qui tenoyent le hault des montagnes : les Achæiens au contraire demourerent fermes en leur place, & se teindrent en ordonnâce comme il leur auoit esté commandé : parquoy Euclidas frere de Cleomenes, uoyant ce desemparement & ceste separation des gens de pied des ennemis d'auec leurs gens de cheual, enuoya soudain les plus legerement armez, & les plus dispos qu'il eust en ses troupes, pour charger ces Esclauons par derriere, & essayer de leur faire tourner uisage uers eulx, attendu qu'ilz estoient desnuez de gens de cheual : ce qui fut faict, & meirent ces legerement armez les Esclauons en grand trouble & grand desarroy. Quoy uoyât Philopœmen, & considerant qu'il seroit bien aisé de rompre ces armez à la legere & les faire retirer, attendu que l'occasion mesme les appelloit presque à ce faire, il s'en alla le remonstrer aux Capitaines du Roy qui conduisoient la gendarmerie : mais quand il uic qu'il ne leur pouuoit mettre en teste, & qu'ilz ne faisoient compte des raisons qu'il leur alleguoit, ains le tenoyent pour un fol, à cause qu'il n'auoit pas encore acquis tant d'estime & de reputation, que lon le iugeast homme pour pouuoir inuenter ny executer une telle ruze de guerre, il

fy en alla luy mefine, y trainnant avec soy ceulx de sa uille : là ou de premiere arriuee il meit ces legerement armez en grand trouble, & finablement les tourna tous en fuite avec un bien grand meurtre. Et pour encourager encore davantage les gens du Roy Antigonus, & aller tout chaudement charger les ennemis, pendant qu'ilz estoient en ce trouble, il laissa son cheual & marcha à pied à trauers lieux bossus & rabboteux, pleins de ruisseaux & de fondrières, ayant sur son dos une cuirace d'hōme d'armes, & le reste du harnois fort pesant : & combatant en cest equippage à grande peine & grand mesaise, il eut les deux cuisses percees de part en part d'un coup de iavelot qui se darde avec une courroye attachee au milieu : & combien que le coup n'entraist pas fort avant dedans la chair, si fut il grand & roide, car il percea les deux cuisses d'oultre en oultre, tellement que le fer passoit de l'autre costé. Si demoura sur l'heure empestre de ce coup, ne plus ne moins que qui luy eust mis des fers aux pieds, & ne sçauoit qu'il deuoit faire : car la courroye attachee au milieu du iavelot, luy faisoit grande douleur quand on cuidoit retirer le iavelot par ou il estoit entré, & n'y auoit personne de ceulx qui estoient là presens qui y ozaist mettre la main : d'autre costé Philopœmen uoyant que le combat estoit en sa plus grande fureur, laquelle se passeroit incontinent, perdoit pa-

tience de despit, tant il auoit d'ardeur de retourner au combat : si feit tant en retirant l'une de ses cuisses & auanceant l'autre, qu'il rompit la hampe du iauelot en deux, & s'en feit arracher les deux tronçons, l'un deça l'autre delà : puis quand il se sentit ainsi despestré, il meit incontinent l'espee au poing, & s'en alla à trauers les combatans aux premiers rens affronter l'ennemy, de maniere qu'il renforcea grandement le courage aux siens, & leur apporta une enuie d'imiter sa prouësse. Apres donques que la bataille eust esté gaignee, Antigonus demanda à ses Capitaines Macedoniens pour les tenter, qui les auoit meuz à faire partir & charger la cheualerie auant le signe qui leur auoit esté cōmandé : ilz respondirent, qu'ilz auoyent esté cōtraints d'ainsi le faire contre leur uoulunté, parce qu'un ieune gentilhomme Megalopolitain estoit allé auant le temps commencer la charge avec sa compagnie : & adōc leur dit Antigonus

en riant, Ce ieune gentilhomme la que uous
dittes, a fait un tour de sage & uaillant Capitaine. Cest exploit d'armes ioint avec le tesmoignage d'Antigonus, comme lon peult penser, donna grāde reputation à Philopœmen. Si luy feit le Roy Antigonus tresgrāde instance qu'il uoulust prendre party avec luy, luy offrant compagnie de gens d'armes, & biē bon appoinement s'il uouloit aller à son seruice : ce que Philopœmen refusa, pour autant principalemēt

qu'il cognoissoit sa nature, & que difficilement il se fust rengé au uouloir & commandement d'autrui : mais aussi ne uoulant pas demourer oisif ny estre sans rien faire, il monta sur mer & s'en alla en Candie, là ou il sçauoit qu'il y auoit guerre, pour tousiours se diure & s'exerciter de plus en plus aux armes: & apres y auoir demouré long temps à s'agguerrir avec les Candiots, qui sont bien bons combatans & fort addroits à toutes sortes de ruzes de guerre, & dauantage fort sobres & estroicts en leur uiure, il s'en retourna en Achaïe, avec si bon nom & si grande reputation enuers un chacun, qu'il fut incontinent eleu Capitaine general de la gendarmerie: & là à son aduenement il trouua, que ceulx qui deuoyent seruir à cheual auoyent de meschans petits cheuaux, les premiers qu'ilz pouuoient trouuer, & qu'encore le plus souuent ilz s'exemptoyent d'aller eulx mesmes en personne à la guerre, & y enuoyoyent d'autres en leurs places, & brief qu'ilz n'auoyent ne cueur ny experience aucune des armes & de la guerre : dequoy les autres officiers & Capitaines de la communaulté des Achæiens, qui auoyent esté parauant luy, n'auoyent tenu compte, craignans de les offenser, pource que ce sont tous les plus gros, & qui ont le plus d'autorité & de moyen de punir ou honorer qui bon leur semble: toutefois Philopœmen ne chala point pour cela, ny ne laissa

point de faire ce que portoit son deuoir : ains alla luy mesme en personne par toutes les uilles enhorter & encourager les ieunes gentils-hommes à se bien monrer , & se mettre en bon equippage pour acquerir honneur : & là ou il estoit besoing de contrainte , il condamnoit à l'amende ceulx qui y faisoient faulte , & leur faisoit souuent faire mōstres, ioustes, tournois, & combattre les uns contre les autres , mesmement es temps & lieux ou il sçauoit qu'il se deuoit trouuer grande multitude d'hommes pour uoir l'esbattement : de maniere qu'en peu de temps il les rendit merueilleusement courageux , prompts & addroits à cheual , qui est un des principaux poincts pour tenir bon ordre, & bien garder ses rens quand on est en bataille: tellement que s'il estoit besoing, que toute une troupe de gens de cheual tournast ensemble à demy ou à faict, ou bien chasque homme d'armes à part, ilz y estoient si duits & si bien accoustumez , qu'il sembloit proprement à les uoir, que ce ne fust qu'un corps de toute la troupe renee en bataille qui se remuast d'une mesme uolunté, tant ilz se mouuoient aiseement toutes fois & quantes qu'il falloit tourner, ou d'un costé ou d'autre. Or en une grosse bataille que les Achæiens eurent contre les Ætoliens & les Eliens au long du fleuve de Larissus, le Chef de la cheualerie des Ætoliens, Demophantus, se ietta hors de ses troupes pour aller choquer

Philopœmen, lequel luy alla auffi à l'encontre, & frappa le premier si rudement d'un si grand coup de ianeline qu'il l'abbatit mort en terre. Incontinent que celuy la fut tumbé, le reste des ennemis se meit à fouyr : ce qui donna reputa- tion grande à Philopœmen, comme à celuy qui ne cedoît, ny aux ieunes gens en prouësse pour uailamment combattre de la main, ny aux uieux en prudence pour bien conduire une armee, & mener gens à la guerre sagement. Bien est il uray que celuy qui premier eleua la communaulté des Achæiens en quelque puif- sance & en quelque dignité, ce fut Aratus: car auparauant luy, c'estoit bien peu de cho- se, à cause que les uilles de l'Achaïe faisoient leurs affaires, chascune à par soy, & Aratus fut celuy qui premier les r'allia ensemble, & esta- blit entre elles un gouuernement ciuil & ho- neste, & ueritablement digne de la Grece, dont il aduint, que, comme nous uoyons es ruisseaux & riuieres, depuis qu'il y a quelque chose, tant petite soit elle, qui s'arreste & prend pied au fond, tout ce que le cours de l'eau em- mene aual s'y attache & s'y lie si bien, que l'un par le moyé de l'autre s'y affermit, & prend une fermeté asseuree. Aussi estât la Grece fort affoi- blic en ce temps la, & les citez bendees en par- tialitez les unes contre les autres, les Achæiens furent les premiers qui se rallierent ensemble, & puis tirerent à leur ligue les autres uilles qui

sont à l'entour d'eulx : les unes en leur portant confort & aide pour les deliurer de l'oppressiõ des tyrans , & les autres en les gaignant par leur union & concorde , & par la bonté de leur gouvernement : de maniere qu'ilz auoyent intention de reduire par ces moyens tout le pais du Peleponese en un corps & en une ligue . Toutefois du uiuant d'Aratus ilz se rengeoient encore la plus part du temps soubz les armes & la puissance des Macedoniens, faisans la cour premierement au Roy Ptolomæus , & depuis à Antigon⁹ & à Philippus, lesquelz s'en-tremettoient fort auant , & auoyent en main tous les principaulx affaires de la Grece : mais lors que Philopœmen uint à gouverner & à tenir le premier lieu, les Achæiens estans desia assez puissans d'eux mesmes pour resister aux plus puissans , ilz cesserent adonc de marcher soubz enseigne d'autrui , & d'user de gouuerneurs & Capitaines estrâgers: car quant à Aratus, il semble auoir esté un peu lêt & trop froid pour les exploits d'armes, & pourtât feit il la pluspart de ses faicts par amiables traittez , par intelligences , & par l'amitié qu'il auoit avec ces Roys, ainsi comme nous auons escrit au long en sa uie . Mais Philopœmen estant homme d'execution, hardy & uaillant de sa personne , & qui en ses premieres rencontres auoit eu fauorable fortune , moyennant laquelle il estoit uenu au dessus de ses entreprises, augméta le cueur avec

la puissance des Achéïens, pourautât que soubz
sa conduite ilz auoyent accoustumé de battre
tousiours leurs ennemis, & d'auoir du meilleur
en la pluspart de leurs affaires. La premiere cho
se donques qu'il leur feit à son arriuee, fut qu'il
changea la maniere de dresser leurs batailles &
leur façon de s'armer: car auparauant ilz usoyét
de petits boucliers fort legers, à cause qu'ilz
estoyent si minces & si estroicts, qu'ilz ne cou
uroyent pas le trauers du corps de l'homme, &
portoyent des iauelines beaucoup plus courtes
que picques: au moyen dequoy ilz estoyent bié
dispos, & bons pour escarmoucher & comba
tre de loing: mais quand se uenoit à choquer
de pres à pied ferme, les ennemis auoyét auan
tage sur eulx: & quant à la forme de leurs ba
tailles, ilz ne sçauoyent que c'estoit de les or
donner en limaçon ou en rond, & n'usoyent
que de figure quarree seulement, encore ne luy
dōnoyent ilz point de front, ou les fers des pic
ques de plusieurs rens frappassent tous ensē
ble, & ou les soudards fussent si bien ferrez que
leurs targes se touchassent l'une à l'autre, cōme
il se fait au quarré de la bataille Macedoniene,
au moyen dequoy ilz estoyent aiseement re
poussez & ouuerts. Ce que Philopœmen corri
gea, en leur persuadant de prendre au lieu du
bouclier & de la iaueline ou de l'espieu, la tar
ge & la picque, & de s'armer les testes de bons
morriens, les corps de halecrets, & les cuisses &

iambes de bons cuiffots & bonnes grefues, à fin de combattre à pied ferme fans reculer ne bouger, non pas remuer, & courir ça & là, comme escarmoucheurs armez à la legere : Ainfi ayant enseigné & persuadé aux ieunes hommes de s'armer à bon elciant, premierement il les en rendit plus affeurez & leur eleua les cueurs, comme filz fufset deuenus inuincibles: & puis il conuertit leurs delices & superfluitez ordinaires en honeste despenfe: car de leur oster du tout une folle & uaine accoustumance qu'ilz auoyent prise de longue main à l'enuy les uns des autres, qu'ilz uouloyent estre uestus richement, meublez en leurs maisons de liets & de tapisseries sumptueusement, & seruiz à la table opulentemēt & delicatemēt, c'estoit chose impossible: mais pour commencer à destourner ce desir qu'ilz auoyent d'estre tousiours propres & bien empoint des choses nō necessaires & superflues, es choses utiles & honestes, il leur persuada & conseilla de resserrer un peu la despenfe ordinaire qu'ilz faisoient à l'entour de leurs personnes, tant en habillemens qu'en seruiçe de table, & espargner pour se monstrier magnifiques & bien en ordre en armes, & en tout autre equippage de guerre . Parquoy lon ne uoyoit plus autre chose par les boutiques des orfeures, que couppes & pots d'or & d'argent, que lon rôpoit pour mettre à la fonte, halecrets & cuiraces que lon doroit, boucliers & mords

de bride que lon argentoit . Es lices & lieux ordonnez à picquer cheuaulx uous n'eussiez neuz que ieunes poulains que lon domptoit & dressoit, & ieunes hōmes qui s'exercitoient aux armes. Et entre les mains des Dames ne se uoyoit que morriōs & armets, ausq̃lz elles attachoyent des pennaches de diuerses couleurs, sayes & corttes d'armes qu'elles enrichissoient d'ouurages : desquelles choses la ueuē leur augmentoit le cueur, & leur engendroit une enuie & un propos de bien faire, sans s'espargner, à la guerre . Car il est bien uray que la superfluité & sumptuosité que lon uoit en autres spectacles, attraiēt secrettement les uouluntez des hommes, & les induit à cōuoiter les delices, & si red les courages de ceulx qui en usent, molz & effeminez ; pource que le grattement & chattouillement, par maniere de dire, du sens exterieur qui s'en delecte, amollit & lasche quand & quād la roideur & la uigueur du pensement : mais aussi au cōtraire, la sumptuosité de despense qui se fait en equippage de guerre, fait croistre & fortifie un gētil cueur: ne plus ne moins qu'Homere fait qu'Achilles quand sa mere luy apporte à ses pieds les armes nouuelles, qu'elle luy auoit fait faire par Vulcain, en les regardant ne peult arrester en place, ains bout & bruslé d'un ardent desir de les employer . Apres donc que Philopœmen eut conduit la ieunesse d'Achaïe à ce point, de s'armer & accoustre ainsi braue-

mēt, il se meit à la dresser & exerciter aux armes continuellement: en quoy nō seulement ilz luy estoient obeïssans, ains se perforceoyent davantage à l'enuy l'un de l'autre, de faire mieux que leurs cōpagnons: car ilz trouuoÿēt merueilleusement bonne l'ordōnance de bataille qu'il leur auoit enseignee, pource qu'estant si bien ioincte & serree ensemble, il leur estoit biē aduis qu'il seroit malaisé de les rompre: & par cōtinuation d'auoir souuēt leurs armes sur le dos ilz les en trouuoÿent plus aisces & plus legeres, oultre le plaisir qu'ilz prenoÿent à les uoir & porter ainsi riches & belles: de maniere qu'ilz ne demādoÿent plus que quelque occasiō pour bien tost les essayer & employer cōtre leurs ennemis. Or auoyent les Achæiens pour lors la guerre cōtre Machanidas tyran des Lacedemoniens, lequel avec une grosse & puissante armee espioit tous les moyens de se faire seigneur absolu de tous les Peloponesiens: comme dōques les nouvelles fussent uenues qu'il estoit entré sur les terres des Mantiniés, Philopœmen aussi se meit incōtinent aux champs avec son armee pour l'aller trouuer: si se rencontrerent au plus pres de la uille de Mantinee, là ou ilz rengèrent l'un & l'autre aussi tost leurs gēs en bataille. Ilz auoyēt tous deux bon nōbre de soudards estrangers à leur foulde, oultre toutes les forces entieres de leurs païs: & quād ce uint à chocquer, Machanidas avec ses estrangers char-

gea si rudement quelques gēs de traict & quelques archers que Philopœmen auoit mis au deuant de la bataille des Achæiens, pour cōmencer & attacher l'escarmouche, que d'arriuee il les tourna tous en fuitte: mais au lieu d'aller tout d'une tire droit à l'encontre des Achæiens qui estoÿēt en bataille, pour essayer de les rompre, il samusa à chasser ces premiers fuyans, & passa tout au long des Achæiens qui teindrent bien leurs rens. Ceste rouverte si grande estant aduenue tout au commencement de la bataille, il sembloit bien à beaucoup de gēs que tout fust perdu & ruiné pour les Achæiens: mais Philopœmen fait semblant que ce n'estoit rien, & qu'il n'en faisoit point de compte: & uoyant la grande faute que faisoÿēt les ennemis de pourfuyure ainsi à toute bride ces auantcoureurs qu'ilz auoyent rompus, & d'esloigner la bataille de leurs gens de pied, qu'ilz laissoÿent tous nuds, & abandonnoÿent la place uuide, il ne leur alla point au deuant por les arrester, ny ne s'efforça point de les garder qu'ilz ne chassassent ceux qui fuyoyent, ains les laissa passer oultre: & quand il ueit qu'ilz estoÿent assez esloignez de leurs gens de pied, adonc il fait marcher les siens contre les Lacedæmoniens qui auoyent les flancs desnuez de gens de cheual, & les chargeant à costé en se hastât de gaigner à la course l'un des flancs, il les met en rouverte avec un biē grand meurtre: car on dit qu'il en demoura plus

plus de quatre mille sur la place, pource qu'ilz n'auoyent personne qui les conduisist, & qu'ilz ne s'attendoient pas d'auoir plus à combattre, ains pensoient auoir tout gaigné, uoyans Machanidas chasser ainsi à toute bride ceulx qu'il auoit rompus. Apres ceste descōfiture, il reuint au deuant de Machanidas qui retournoit de la chasse avec ses estrangers: mais il se trouua d'adueture un fossé profond & large entre eux deux, sur les bords duquel ilz cheuaucherent une espace de tēps uis à uis l'un de l'autre, l'un cherchant quelque endroit commode pour passer & s'en fouir, & l'autre pour le garder de ce faire. Si sembloit proprement à les uoir ainsi les uns deuant les autres, que ce fussent bestes sauuages reduittes à l'extreme necessité de se defendre à force par un si aspre ueneur comme estoit Philopœmen: mais comme ilz estoient en ce debat, le cheual du tyran qui estoit courageux & fort, & dauantage se sentoît broché des esperons d'une part & d'autre iusques au sang, se hazarda de uouloir franchir le fossé, & s'approchant du bord se dressa sur les pieds de derriere pour lancer ceulx de deuât à l'autre bord: & adōc Simmias & Polyænus, qui auoyēt tousiours accoustumé d'estre aux costez de Philopœmen quand il combattoit, accoururent celle part pour luy presenter les fers de leurs iauelines & le garder qu'il ne faultast: toutefois Philopœmen y fut deuant eulx, & uoyant que le

cheual du tyran leuoit la teste , tellement qu'il couuroit tout le corps de son maistre, il destourna un peu le sien , & prenant sa iaueline à deux mains luy en donna si grand coup, en poulsant de toute sa puissance, qu'il le renuersa mort dedās le fossé. En memoire dequoy les Achēiens, qui estimerent grandement cest acte de prouesse, & ensemble le bon sens qu'il eut à bien conduire ceste bataille, luy feirent dresser une statue de cuyure en tel geste & en telle action, au temple d'Apollo en la uille de Delphes. Et dit on qu'en l'assēblee des ieux publiques qui s'appellēt Nemeça, & qui se celebrēt en l'honneur de Hercules, non gueres loing de la uille d'Argos, bien tost apres qu'il eust gaigné ceste bataille de Mantince, estant pour la seconde fois Capitaine general de la ligue des Achēiens, & se trouuant de loisir, à cause de la feste, il monstra premierement aux Grecs, qui estoient là uenus pour uoir le passetemps des ieux, son armee regee en bataille, & leur feit uoir comment elle se remuoit aiseemēt de tous les mouuemens qui peuuent estre necessaires en combatant, sans se troubler ne confondre, avec une grande force & grande legereté. Puis cela faict, il entra dedans le theatre pour ouïr les Musiciens chantans sur les instrumens à qui gaigneroit le pris, estant suyuy & accompagné des ieunes gentilzhommes, qui estoient uestus de leurs manteaux de pourpre, & de leurs casa-

ques & sayons d'escarlatta à porter sur le har-
nois, tous en fleur d'aage, dispos de leurs person-
nes, & portans grand honneur & reuerence à
leur Capitaine, & qui avec cela monstroyent
secrettement une certaine gentillesse de cuer,
qui leur estoit elcué par plusieurs belles rencon-
tres, ou ilz auoyent tousiours eu l'aduantage
sur leurs ennemis : & d'aduenture ainsi comme
ilz furent entrez, le Musicien Pylades chantant
un poëme de Timotheus, qui s'appelle les Per-
ses, tumba sur ces uers,

- » C'est luy duquel la uertu & bon heur
» Vous rend, ô Grecs, de liberté l'honneur.

Et comme le Musicien eust prononcé ce passa-
ge d'une uoix haute & claire, ainsi qu'il appar-
tenoit à la grauité du subiect, tous les Grecs
qui estoient au theatre assemblez pour uoir
les ieux, ietterét incōtinent de tous costez leurs
yeux sur Philopœmen, & se prirent avec une
tresgrāde liesse à frapper de leurs mains l'une
contre l'autre, pour l'esperance qu'ilz conce-
uoient que les Grecs par son moyen recou-
ureroyēt bien tost entierement leur ancienne re-
putation, & pour la confiance qu'ilz prenoient
d'estre ia arriuez à la magnanimité de leurs an-
cestres. Et tout ainsi que les ieunes cheuaulx de-
mandent tousiours ceulx qui ont accoustumé
de les cheuaucher, tellement que si d'autres
montent sur eulx, ilz s'en effarouchent & s'en
reueuent tout estonnez: aussi quand se uenoit à

un bon affaire, qu'il falloit hazarder une bataille, l'armee des Achæiens n'auoit point de cueur, si autre que luy estoit Capitaine general, & regardoit tousiours uers luy : & si tost qu'elle le uoyoit elle reprenoit courage, & ne demandoit plus qu'à mettre la main à l'œuvre, tant elle auoit de fiance en son heur & en sa uertu, & non pas sans cause, attendu qu'ilz uoyoyent que c'estoit celuy seul de tous leurs Capitaines que les ennemis n'ozoyēt regarder au uisage, & duquel ilz craignoient seulement le nom & la reputation, comme il apparoissoit par les choses qu'ilz faisoient. Car Philippus Roy de Macedoine se persuadant que fil pouuoit oster de ce monde Philopœmen par quelque moyen que ce fust, les Achæiens se rengeroient de rechef à sa deuotiō, il enuoya secrettement des gens en la uille d'Argos pour le faire tuer en trahison: mais l'embusche fut descouuerte, dont ce Roy fut depuis haï mortellemēt, & réputé lasche & meschant par tous les Grecs uniueruellement. Et comme les Bœotiens eussent un iour mis le siege deuant la uille de Megare, & eussent grande esperance de l'emporter du premier assault, il se leua soudainement un bruit parmy eulx, que Philopœmen la uenoit secourir, & qu'il en estoit desia bien pres avec son armee: cela estoit faulx: mais toutefois les Bœotiens en eurent si grande peur qu'ilz laisserent là leurs eschelles qu'ilz auoyent desia dres-

sees contre les murailles, & se meirent incontinent tous en fuitte. Vne autre fois comme Nabis tyran des Lacedæmoniens, ayant succedé à Machanidas, eust surpris d'emblee la uille de Messine, Philopœmen qui pour lors estoit hōme priué, & n'auoit aucune charge de gens de guerre, s'en alla deuers Lysippus Capitaine general des Achæiens pour celle annee, luy remōstrer qu'il deuoit prōptemēt aller au secours de Messine. Lysippus luy feit response qu'il n'estoit plus temps d'y aller, & que c'estoit une uille perdue sans remede, attendu que les ennemis estoient ia dedans. Parquoy Philopœmen, uoyāt qu'il ne luy pouuoit mettre en teste qu'il y allast, s'y en alla luy mesme avec les forces de sa uille tant seulement : si n'attendirent pas les Megalopolitains qu'il se feist une assemblee publique de conseil, auquel à la pluralité des uoix du peuple par decret publique ceste commission luy fust donnee, ains le suyurent tous uoluntairement, comme estant leur Capitaine perpetuel, celuy qui par nature estoit plus digne de commander. Quand il fut aupres de Messine, Nabis qui en ouit les nouuelles ne l'osza pas attendre, cōbien qu'il eust son armee dedās la uille mesme, ains en sortit à la desrobbee par une autre porte, & emmena son armee à la plus grande haste qui luy fut possible, estimant que ce luy feroit un grand heur s'il pouuoit eschapper, & se retirer à sauueté, comme il

feit, & fut par ce moyen la uille de Messine deliuree de captiuité. Or ce q̄ nous auōs escrit iusques icy, est sans point de doubte grādement à l'honneur & à la gloire de Philopœmen : mais depuis il fut fort blasmé pour un uoyage qu'il feit en Candie à la requeste des Gortyniēs, qui l'enuoyerēt prier de uouloir estre leur Capitaine en une guerre, dont ilz estoyēt lors trauaillez : car il s'y en alla au temps que le tyran Nabis faisoit plus fort la guerre à son païs, & luy imputa lon, ou qu'il fuyoit la lice, ou que hors de saison il se uouloit monstrier à des estrāgers, lors que les Megalopolitains ses citoyens furēt si pressezz de la guerre, que tout leur plat païs estant perdu & gasté, ilz se retirerent dedans le pourpris de leurs murailles, & semerēt les places uuides & les rues de leur uille pour uiure, aians leurs ennemis cāpez presque iusques dedans leurs portes : & luy ce pendant faisant la guerre aux Candiots, & seruant des estrangers oultre mer, donna occasion à ses maluueillans de luy mettre sus, qu'il fuyoit à cōbatre pour la defense de son païs. Toutefois il y en auoit d'autres qui disoyent, que pour autant que les Acheïens elisoÿent d'autres Capitaines generaux que luy, il auoit uoulu se trouuāt homme priuē employer son loisir en la charge de Capitaine general des Gortyniens, qui l'en auoyent enuoyé prier à grandē instance : car il estoit homme qui ne pouuoit demourer oisif, & qui

uouloit sur toutes choses maintenir en continuuel exercice sa uertu militaire, & mettre en action sa suffisance en l'art de bié conduire une armee. A quoy se rapporte une parole qu'il dit un iour du Roy Ptolomæus : car comme quelques autres le haultlouassent, disans qu'il exercitoit tresbié son armee, & que luy mesme dressoit & endurcissoit fort sa personne tous les
 30 iours à l'exercice des armes: Ce n'est, dit il, pas
 30 chose louable à un Roy, en l'aage ou il est, de se
 30 dresser encore à l'exercice des armes : car il les
 30 deust hormais realement & de faict employer.

Tant y a que les Megalopolitains furent si mal contents de ceste siene absence, laquelle ilz estimerent estre une espece de trahison, qu'ilz le uoulurent bannir & priuer du droit de bourgeoisie de leur uille, & l'eussent faict n'eust esté que les Acheïës y enuoyerēt leur Capitaine general Aristenerus, lequel encore qu'il eust quelques differents avec Philopœmen, touchant les affaires de la chose publique, ne uoulut pas pourtant souffrir qu'il fust par sentence banny: & depuis uoyant que ses citoyens ne faisoient plus compte de luy, il feit par despit soubfleuer & rebeller à l'encontre d'eulx plusieurs petites uilles & uillages du plat pais, leur enseignant à dire & mettre en auant qu'ilz n'estoyent point leurs subiects, ny n'auoyent point esté leurs contribuables des le commencement, & si leur aidoit à le maintenir pu-

bliquement, en brouillant la uille de Megalopolis de ce proces deuant le conseil de la ligue des Acheïens. Ces choses aduindrent quelque temps apres : mais pendant qu'il feit la guerre en Candie pour les Gortyniens, il ne s'y porta point en Peloponesien, ny en homme né au pais de l'Arcadie, faisant la guerre magnanimement & à la descouuerte, ains se transforma es meurs des Candiots usant de leurs ruzes, cautelles, surprises & embusches à l'encontre d'eulx mesmes, & leur feit cognoistre que toutes leurs finessees n'estoyent que ieux d'enfans, par maniere de dire, à cōparaison de celles qui estoyēt inuentees & conduittes par le sens d'un bon Capitaine, experimēté & exercité à faire la guerre à bon esciant. Ayant donques un tresglorieux renom pour les choses qu'il auoit faittes en Candie, il s'en retourna au Peloponese, là ou il trouua que Philippus Roy de Macedoine auoit esté desfait en bataille par Titus Quintius, & que les Acheïens ioincts avec les Romains faisoient la guerre au tyran Nabis, contre lequel il fut incōtinēt à son retour eleu Capitaine, & luy presenta la bataille par mer: en laquelle il luy prit presque tout ainsi qu'il feit iadis à Epaminondas, pource que l'issue de ceste rencontre fut de beaucoup pire que lon ne l'attendoit de sa uertu & de sa renommee. Toutefois quant à Epaminondas, aucuns ueulent dire qu'il s'en retourna uoluntairement de l'Asie

& des isles sans rien faire , pource qu'il ne uou-
loit pas que ses citoyens goustassent les gaings
& profits de la marine , de peur qu'au lieu de
bons combatans de terre ferme , ilz ne deuin-
sent, comme dit Platon , petit à petit mariniers
dissolus. Mais au contraire Philopœmen presu-
mant que la suffisance qu'il auoit de bien dres-
ser une bataille en terre ferme, luy seruiroit as-
sez & suffiroit encore en la marine, apprit à ses
despens, quel lieu tient l'exercitation en la uer-
tu, & combien elle adioust de force en toutes
choses à ceulx qui sont bien experimentez : car
non seulemēt il fut batu en ce combat de mer ,
pour n'estre pas bien entendu au faict de la ma-
rine , mais encore fait il une autre treslourde
faulte : c'est qu'il fait tirer en mer un uais-
seau, lequel autrefois auoit bien esté fort bon ,
mais il y auoit quarante ans qu'il n'auoit flotté,
& embarqua de ses citoyens dessus , lesquelz
cuidèrent tous perir, pource que le uaisseau fai-
soit eau de toutes parts . Ceste rouverte fut cause
que ses ennemis l'eurent en grand mespris , se
persuadans qu'il s'en seroit du tout fouy, & leur
auroit entierement quitté la marine, au moyen
dequoy ilz allerent fierement mettre le siege
deuant la uille de Gythium: dont Philopœmen
estant aduerty , embarqua soudainement ses
gens, & leur alla courir sus au desproueu, ainsi
qu'ilz ne se doubtoient de rien , ains estoient
escartez ça & là, sans soy tenir sur leurs gardes ,

À raison de la uictoire qu'ilz uenoyent de gagner . Si descendit habilement ses gens en terre de nuict , & alla mettre le feu dedans leur camp , qu'il brulla tout entierement , & en cest effroy en tua un bien grand nombre . Peu de iours apres ceste surprise le tyran Nabis se trouua soudainement deuant luy , ainsi qu'il auoit à passer par un tresmauuais & dangereux passage: dequoy les Achaiëns furent bien estonnez , cui dans de prime face qu'il fust impossible , que iamais ilz se peussent tirer à sauueté hors d'un si perilleux endroit , attendu que les ennemis en tenoyent toutes les aduenues . Mais Philopœmen s'arrestant un peu sur soy , considera toute la nature & situation du lieu , & apres l'auoir bien consideree , monstra euidemment , que de toute l'art militaire le plus grand poinct est , sçauoir bien selon le temps & l'affiette du lieu ordonner une armee en bataille: car il ne feit que changer un peu la forme de sa bataille , & l'acommoder à la situation du lieu , auquel il estoit enclos : & en ce faisant , sans trouble ny tumulte , il osta toute la doubte du danger , & chargea ses ennemis de telle sorte , qu'il les tourna en peu d'heure tous en fuite : & uoyant qu'ilz ne fuyoyent pas tous en troupe uers la uille , ains s'escartoyent parmy les champs ça & là , il feit sonner la retraite , defendât que lon ne les chassast plus , pourautât que tout le país à l'enuiron estoit país couuert & bossu , malaisé pour gens

de cheual, à cause des ruisseaux, uallees & fondrières qu'il falloit passer, & se logea qu'il estoit encore grand iour, se doubtant bien que les ennemis, sur le soir, quand il commenceroit à faire brun, se retireroient à la file un à un, & deux à deux dedans la uille: parquoy il enuoya bon nombre d'Achéïens en embusche au long des ruisseaux & coustaux qui sont autour de la uille, lesquelz feirent grand meurtre des gens de Nabis, à cause qu'ilz ne se retiroient pas en troupe, ains à la file, selon qu'ilz s'en estoient fouys l'un d'un costé, l'autre d'un autre, & faisoient rēdre entre les mains de leurs ennemis, ne plus ne moins que les petits oiseaux qui donnent dedans les retz de l'oïseleur. Ces actes estoient cause que les Grecs aimoyent singulierement Philopœmen, & luy faisoient de tresgrands honneurs en tous les theatres & toutes les assemblees publiques: dequoy Titus Quintius, qui de sa nature estoit ambitieux & conuoiteux d'honneur, auoit un peu de ialousie, estimant qu'un Consul Romain par raison deuoit estre plus honoré & prisé des Achéïens, qu'un simple gentilhomme d'Arcadie: & si pensoit bien auoir de beaucoup mieulx meritē de la Grece, que non pas luy, attendu que par un seul cry de herault il auoit affranchy & remis en sa liberté ancienne toute la Grece, qui auant sa uenue estoit serue & subiette au Roy Philippus & aux Macedoniens. Depuis Titus

Quintius feit paix avec le tyran Nabis, lequel peu de temps apres fut occis en trahison par les Etoliens. A raison dequoy la uille de Sparte se trouua en grand trouble, & Philopœmen embrassant promptement ceste occasion, s'y en alla avec son armee, & feit si bien partie par amour, & partie par force, qu'il gaigna la uille, & la ioignit à la ligue des Achæiens : si fut fort estimé & loué des Achæiens pour ce grand chef d'œuvre, d'auoir acquis à leur ligue & communauté une uille de telle puissance & de si grande authorité : car ce n'estoit pas petit accroissement de forces & de reputation, que la uille de Sparte uinst à estre partie de l'Achaïe : & si gagna par ce moyen l'amour & bienueillance de tous les plus gens de bien du païs de Lacedæmone, pour l'esperance qu'ilz eurent d'auoir trouué en luy un defendeur & protecteur de leur liberté. Parquoy quand la maison & les biens du tyran Nabis eurent esté uendus, comme confisquez à la chose publique, ilz resolerent en leur conseil de luy faire present de l'argent, qui môta enuiron la somme de^a six uingts talents, & luy enuoyerent ambassadeur expres pour la luy offrir : là ou Philopœmen feit euidentement cognoistre que sa preudhommie n'estoit point apparence feincte, ains une reale uerité : car premierement il n'y eut homme de tous les Spartiates qui ozaist prendre la hardiesse de luy aller presenter cest argent : ains crai-

a Soixante
& douze
mille e-
scus.

gnans tous de luy en porter la parole, & s'en excusans, à la fin en feirent prendre la charge à un Timolaus qui particulièrement estoit son amy & son hoste : & celuy la encore quand il fut arriué à Megalipolis, estant logé & festoyé chez Philopœmen, eut en si grande reuerence la grauité uenerable de ses propos & de sa conuersation, la simplicité de son uiure ordinaire, & la netteté de ses meurs si entieres, qu'il n'y auoit ordre d'en approcher pour les corrompre par argēt, qu'il n'oza onques ouurir sa bouche pour luy parler du present qu'il luy auoit apporté, ains controuua quelque autre occasion, pour laquelle il dit estre uenu deuers luy : & y estant renuoyé pour la seconde fois, il en fait encore tout autant : mais au troisieme uoyage, à toute peine s'aduentura il à la fin de luy en ouurir le propos, luy declarant la bonne affection que luy portoit la uille de Sparte. Philopœmen fut bien aise de l'ouir, & le tout entendu s'en alla luy mesme à Sparte, ou il remonstra au conseil, que ce n'estoyēt point les gens de bien ny leurs bons amis qu'ilz deuoyent tascher à corrompre & à gagner par argent, attendu qu'ilz se pouoyent à leur besoing seruir de leur uertu sans qu'il leur coustast rien : mais que c'estoyent les meschans, & ceulx qui par leurs seditieuses harangues au conseil mutinoient & mettoient la uille en combustion, qu'ilz deuoyent acheter & gagner par loyer mercenaire, à fin que

ayans les bouches fermées par dons, ilz leur
feissent moins d'ennuy au gouvernement de la
» chose publique : car il est, dit il, plus expedient
» d'oster la licence de parler & clorre la bouche
» aux ennemis, qu'il n'est pas aux amis. tant estoit
Philopœmen magnanime contre toute conuoï
tise d'argent. Mais quelque temps apres Dio-
phanes qui pour lors estoit Capitaine general
des Achæiens, fut aduertie que les Lacedæmo-
niés attentoient quelques nouuelletez, & s'ap-
prestoit pour les aller chastier : de l'autre costé
aussi les Lacedæmoniens se preparans à la guer-
re, mettoient en combustion tout le Pelopo-
nese : parquoy Philopœmen tascha à addoucir
& appaiser le courroux de Diophanes, en luy
remonstrant, qu'estans pour lors le Roy Antio-
chus & les Romains attachez en guerre les uns
côté les autres, avec deux si puissantes armées,
tout au milieu de la Grece, c'estoit là ou un bon
Capitaine & sage gouverneur deuoit auoir
l'œil, & y employer toute sa pensée, non pas re-
muer aucune chose dedans son païs en telle fai-
son, ains plustost dissimuler pour un temps, &
ne faire pas semblant de uoir ny d'ouir quel-
ques fautes que lon y pourroit cōmettre. Dio-
phanes n'en uolut rien faire, ains entra à main
armée dedans le territoire de Lacedæmone a-
uec Titus Quintius, & tirerent tous deux en-
semble droit uers la uille mesme de Sparte, de-
quoy Philopœmen conceut en luy mesme une

relle indignation, qu'il entreprit de faire une chose, laquelle n'estoit pas bonnement legitime ny totalement iuste, mais bien estoit-ce entreprise d'un grand cueur & d'une merueilleuse hardiesse: car il se ietta dedans la uille de Sparte, & estant homme priué garda le Capitaine general des Achæiens & le Consul des Romains d'y entrer: puis ayant appaisé les troubles & seditions qui s'y estoient soubleuees, la remeit à la communaulté des Achæiens comme elle estoit au parauant. Toutefois luy-mesme depuis estant Capitaine general des Achæiens, pour quelques fautes que les Lacedæmoniens commeirent, il les contraignit de receuoir les bannis qu'ilz auoyent chassés de leur uille, & feit mourir quatre uingts naturelz citoyens de Sparte, ainsi comme l'escriit Polybius, ou trois cents cinquante, ainsi que met Aristocrates un autre historien: feit abbatre les murailles de la uille, leur retrencha grande partie de leur territoire, qu'il attribua aux Megalopolitains, contraignit de sortir du païs de Lacedæmone tous ceulx à qui les tyrans y auoyent ottroyé droit de bourgeoisie de Sparte, & les feit tous aller habiter ailleurs en Achaïe, exceptez trois mille qui ne uoulurent pas obeïr à son commandement, à raison dequoy il les uendit comme esclaves, & de l'argent qui en prouint, pour leur faire plus de despit & d'iniure, feit bastir un

portique dedans la uille de Megalipolis . Et pour se fouler encore dauantage de faire le pis qu'il pouuoit aux Lacedæmoniens , & par maniere de dire , les fouler aux pieds en leur affliction plus griefue qu'ilz n'auoyent merit  , il feit un acte trescruel contre toute raison & c tre toute iustice . C'est qu'il les contraignit de laisser la discipline & maniere de nourrir les enfans , que Lycurgus leur auoit anciennement instituee , & les forcea de prendre celle dont lon ufoit en Acha e , au lieu de celle dont ilz auoyent d'ancienet  accoustum  d'user en leur pa s , pource qu'il uoyoit bien qu'ilz n'auoy t iamais les cueurs bas ny petits tant qu'ilz garderoient les ordonnances de Lycurgus . Si furent pour lors contraincts de ployer les testes sous le ioug pour le faix du malheur qui les accabloit , & endurer malgr  eulx que Philop emen couppast ainsi , par maniere de parler , les nerfs de leur chose publique : mais depuis ilz requirent aux Romains qu'il leur fust permis de repr dre leur ancienne discipline , ce que leur estant ottroy  , ilz reietterent arriere celle de l'Acha e , & remir t sus au moins mal qu'il leur fut possible , apres tant de malheurs & si grande corruption de meurs , les anciennes coustumes & ordonnances de leur pa s . Or enuiron le temps que la guerre commença entre les Romains & le Roy Antiochus au dedans de la Grece , Philop emen se trouua homme pri  sans

sans autorité publique, & uoyant que ce Roy Antiochus s'arrestoit en la uille de Chalcis à ne rien faire que l'amour, & à se marier à une ieune fille hors la saison de l'aage ou il estoit: & uoyant aussi que ses gens de guerre Syriens ne faisoient autre chose qu'aller ça & là par les uilles en grand desordre, commettans mille insolences, sans conduitte d'aucuns Capitaines, il estoit bien marry qu'il n'auoit lors la charge de Capitaine general des Achæiens, & disoit aux Romains qu'il leur portoit enuie, de ce qu'ilz auoyent la guerre à des ennemis qui leur
20 cousteroyent si peu à desfaire: Car si fortune
20 eust uoulu, ce disoit il, que ie me fusse maintenant trouué Capitaine des Achæiens, ie les euf-
20 se tous mis en pieces par les cabarets & tauer-
nes. Depuis les Romains ayans desfaict Antiochus, commencerent à ancrer de plus en plus sur la Grece, de sorte qu'ilz enueloppoyent ia de tous costez les Achæiens, mesmement que les gouuerneurs des uilles fleschissoyent soubz eulx pour gaigner leur bonne grace: & alloit desia plus que le pas la grandeur de leur puissance à la monarchie de tout le monde, avec la faueur des Dieux, qui les auoyent ia approchez bien pres du but, ou il falloit à la fin que la fortune se terminast. Philopœmen ce pendant faisoit comme le bõ pilote, qui resiste le plus qu'il peut à la rudesse du temps, & à la force des undes: & combien qu'il fust contrainct de ceder

& laisser aller quelques choses à la qualité du temps, si est ce qu'il leur estoit contraire & leur resistoit en la plus part des occurrences, rascant tousiours à tirer à la defense de la liberté ceulx, qui par leur bien dire ou bien faire auoyent le plus d'autorité entre les Achæiens. Et comme Aristænetus Megalopolitain homme de grand credit en la communaulté, & qui s'estoit tousiours monstré fort affectionné aux Romains, dist un iour en plein conseil des Achæiens, qu'il ne les falloit desdire en chose quelconque, ny se mōstrer ingrats enuers eulx, Philopœmen oyāt ce propos se teut pour quelque temps, & le lascia dire, combiē qu'il en fust fort despit en son courage, toutefois à la fin il fut si pressé d'impatience & de cholere, qu'il ne
se peut plus tenir de luy dire : Dea, Aristænetus,
pourquoy as tu si grande haste de uoir la malheureuse destinee de la Grece ? Vne autre fois comme Manius estant Consul des Romains, apres auoir desfait & uaincu le Roy Antiochus, requist au conseil des Achæiens, que les bannis de Lacedemone peussent retourner en leurs pais & maisons, & Titus Quintius les en priaist aussi, Philopœmen l'empescha, non pour haine qu'il eust à l'encontre des bannis, mais pource qu'il uouloit que cela se feist par son moyen & par la seule grace des Achæiens, à fin qu'ilz ne fussent tenus de ce benefice ny à Titus, ny aux Romains: & depuis luy mesme estāt

Capitaine general de la communaulté, les restitua en tous leurs droicts. ainsi estoit quelquefois Philopœmen, à cause de son grand cueur, un peu trop querelleux & trop opiniastre, mesmement quād on uouloit auoir les choses d'authorité. Finablement estant aagé de soixante & dix ans, il fut eleu pour la huitieme fois Capitaine de la ligue des Achæiens, & esperoit bien passer non seulement l'annee de sa charge en repos & en paix, mais aussi tout le reste de sa uie, sans emotion de nouuelle guerre, selon qu'il uoyoit le train que prenoient les affaires de la Grece. Car ne plus ne moins que la force des maladies decline à mesure que la uigueur naturelle des corps malades ua descroissant: aussi entre les uilles & peuples de la Grece, l'enuie de quereller & de guerroyer se passoit au pris que la puissance leur apetissoit. Toutefois à la fin la uengeance diuine, qui ne laisse ny les faicts ny les dicts insolents des hommes impunis, le renuersa par terre tout au bout de son terme, ne plus ne moins qu'un bon coureur qui par malheur se laisseroit tūber au plus pres du bout de sa carriere. Car on compte que se trouuant en une compagnie ou lon louoit & prisoit haultement un certain personnage de ce temps la comme bon Capitaine, il se prit à dire: Et comment faites uous cas de celuy la, ueu qu'il s'est laissé prendre uif prisonnier à ses ennemis? Peu de iours apres nouuelles uindrēt cōme Dinocrates

Messenien, homme particulièrement ennemy de Philopœmen pour quelques priuez differents qu'ilz auoyent euz ensemble, & uniuersellemēt mal uoulu de tous autres gens de bien & d'honneur pour sa meschanceté & sa uie desordonnee, auoit soubstraiēt la uille de Messine de la communaulté des Achæiens, & disoit on qu'il uenoit en armes pour occuper un bourg appellé Colonide. Philopœmen estoit pour lors en la uille d'Argos malade de la fiebure, & toutefois ces nouuelles ouyes, il se meit en chemin pour aller à Megalipolis en la plus grāde diligence qui luy fut possible, tellement qu'il feit en un iour plus de uingt & cinq lieues: & de là se partit incontinent & sans delay, pour aller uers Messine, prenant avec luy les hommes d'armes Megalopolitains seulemēt, qui estoient les plus riches & les plus nobles de la uille, mais tous fort ieunes, lesquelz uoluntaiремēt pour l'affection qu'ilz luy portoyent, & aussi pour le zele d'ensuyure sa uertu, s'offrirent à aller quād & luy: si se meirent en chemin droit uers la uille de Messine: & tant allerent qu'ilz arriuerent pres la motte d'Euander, là ou ilz rencontrerent Dinocrates & sa troupe, qu'ilz chargerent si rudement qu'ilz le tournerent en fuite: mais en ces entrefaictes suruindrent cinq cents hommes de renfort, que Dinocrates auoit laissez pour la garde du plat païs de Messine: quoy uoyans ceulx qui auoyent esté rompus, & qui

fuyoyent, se rallierent & rassemblerent par les coustaux. Parquoy Philopœmen craignant d'estre enuironné, & uoulant aussi remener à sauueté ces ieunes hommes qu'il auoit amenez quand & luy, commença à se retirer par lieux bossus & malaiséz, se tenant luy mesme à la queue, & tournant souuent uisage aux ennemis en faisant des courses & saillies sur eulx, pour les destourner d'aller apres les autres, sans que personne d'eulx luy oüst toutefois courir sus: car ilz ne faisoient que crier de loing, & uoltiger autour de luy. Mais en s'esloignant ainsi par plusieurs boutées de sa troupe, pour donner loisir à ces ieunes hommes de se retirer tous les uns apres les autres à sauueté, il ne se donna garde qu'il se trouua seul enuelpé de tous costez entre grand nombre d'ennemis, desquelz encore n'y eut il pas un qui l'oüst aller affronter pour le combattre à coups de main, ains seulement à coups de traict, qu'ilz luy tiroient de loing, le presserent tant qu'ilz le rengerét à la fin en des lieux pierreux entre des rochers coupeez, là ou il auoit beaucoup d'affaire à guider son cheual, encore qu'il le deschirast à coups d'esperon: & quant à sa uieillesse elle ne l'empeschoit point de se sauuer, car elle estoit uerte & robuste pour le continuel exercice qu'il prenoit: mais de malheur, son corps estant affoibly de maladie, & ia las du long chemin qu'il auoit fait ce iour là, se trouua pesant

& malaisé, de maniere que son cheual uenant à broncher le uersa par terre. La cheute fut lourde, & luy froissa toute la teste, tellement qu'il en demoura sur la place long temps tout estendu sans remuer ny parler, de sorte que les ennemis pensans qu'il fust mort, uindrent retourner son corps pour le despouiller : mais quand ilz luy ueirent leuer la teste & ouurir les yeux, ilz se ietterent adonc plusieurs sur luy, & luy prirent les deux mains qu'ilz luy lierent derriere le dos, faisans tous les oultrages & uillanies qu'il est possible de faire à un personnage, qui n'eust pas cuidé que iamais Dinocrates luy eust sceu faire une telle iniure, nō pas en songe mesme. Si furent ceulx qui estoient demourez dedans la uille de Messine, espris de merueilleuse ioye quand ilz entendirent ceste nouuelle, & accoururent tous aux portes de la uille pour le uoir arriuer : mais quand ilz ueirent qu'on le trainnoit ainsi contumelieusement lié & garrotté contre la dignité de tant d'honneurs qu'il auoit receuz en sa uie, & de tant de trophées & de uictoires qu'il auoit gaignees, la pluspart en eut pitié, iusques à leur en uenir les larmes aux yeux, en considerant l'infirmité de la nature humaine, ou il y a si peu de fiance que c'est moins que rien. Ainsi commença peu à peu à courir un propos de doulceur par les bouches du peuple, qu'il falloit auoir souuenance des graces qu'il leur auoit faittes auparauant, & de la li-

berté qu'il leur auoit rendue, quand il chassa le tyran Nabis de Messine. Au contraire, il y en auoit d'autres, mais bien peu, qui pour gratifier à Dinocrates, disoyent qu'il luy falloit donner la gehenne, & puis le faire mourir comme un tresdangereux ennemy, & qui ne pardonnoit iamais depuis qu'on l'auoit une fois offensé: au moyen dequoy il seroit plus à craindre à Dinocrates, s'il eschappoit apres auoir receu de luy une telle ignominie, & auoir esté prisonnier entre ses mains, qu'il n'estoit auparauant: toutefois à la fin ilz le porterét en un certain caueau dessous terre qu'ilz appellent le Tresor, lequel n'a air ny lumiere de dehors aucunement, ny n'a porte ny demie, sinõ une grosse pierre dont on bousche l'entree: ilz le deuallerét là dedans, & puis refermerent le pertuis avec la pierre, & meirent des hommes armez à l'environ pour le garder. Or ce pendant les ieunes cheualiers Achaiens, apres auoir fouy un espace de chemin, reuindrent un peu à eulx: & regardans ça & là que Philopœmen ne comparoissoit point, cuidoient qu'il eust esté occis. Si s'arrestèrent long temps à l'appeller par son nom, & uoyans qu'il ne leur respondoit point, commencerent à dire les uns aux autres qu'ilz estoient bié lasches de se retirer ainsi, & que ce leur seroit un reproche à iamais d'auoir abandonné leur Capitaine pour eulx sauuer, attendu mesmement que luy n'auoit point espargné sa uie pour les remenes

à sauueté:& en pourfuyuant tousiours leur chemin & enquerant par tout de luy, ilz furent en fin aduertiz comment il auoit esté pris, dont ilz allerent porter la nouuelle par toutes les uilles de la ligue des Achæiens, lesquelz en menèrent tous bien grand dueil, estimans que c'estoit une fort grande perte pour eulx: parquoy ilz delibererent de l'enuoyer requerir aux Messeniens par une ambassade expresse, & neantmoins ce pendant faire tous leurs apprests pour y aller en armes, à fin de l'auoir ou par amour ou par force. Voila ce que faisoient les Achæiens. Mais Dinocrates ne craignoit rien plus que le delay du temps, pource qu'il se doubtoit bien, que c'estoit ce qui seul pourroit sauuer la uie à Philopœmen. Parquoy pour preuenir toutes les prouisions que les Achæiens y pourroyent donner, quand la nuit fut uenue, & que tout le peuple Messenien se fut retiré, il feit ouurir le caueau, & y feit deualer l'executeur de haulte iustice avec un breuûage de poison pour luy presenter, luy commandant de ne partir d'aupres de luy qu'il ne l'eust beu. Or estoit Philopœmen lors que l'executeur entra, couché sur un petit manteau, non qu'il eust enuie de dormir, mais bien le cuer ferré de douleur, & l'entendement troublé d'ennuy. Quand il ueit de la lumiere, & cest homme aupres de luy, tenant en sa main un gobelet où estoit le breuuaige du poison, il se leua en son seât, mais ce fut à

grande peine tant il estoit foible, & prenant le gobelet, demanda à l'executeur s'il auoit rien ouy dire des cheualiers qui estoient uenez avec luy, principalement de Lycortas. L'executeur luy fit response, que la pluspart s'estoit sauuee. Adonc il fit un peu de signe de la teste seulement, & en le regardant d'un bon uisage luy dit,

Il ua bien, puis que nous n'auons pas esté malheureux en tout & par tout: & sans iamais ietter autre uoix, ny dire autre parole, il beut tout le poison, & puis se recoucha comme deuant: si ne fit pas sa nature grande resistance au poison, tant son corps estoit debile, ains en fut tantost estouffé & esteinct. La nouuelle de ceste mort en alla incontinent par toutes les uilles d'Achaïe, lesquelles uniuersellement y eurent grand regret, & en menerent grand dueil: mais aussi tost tous les ieunes hommes & les conseillers de chascune uille s'assemblerent en la uille de Megalipolis, là ou ilz conclurent & arrestèrent, que sans aucun delay il falloit uéger ceste mort. Si eleurēt Lycortas pour leur Capitaine, soubz la conduite duquel ilz entrerent en armes dedans le païs des Messeniens, ou ilz menerent tout à feu & à sang: de sorte que les Messeniens effroyez de ceste fureur, se rendirent, & receurent d'un commun accord les Acheïens en leur uille: mais Dinocrates ne leur donna pas loisir de le faire mourir par iustice, car il se desfeigny mesme, & tous ceulx qui auoyent esté d'ad-

uis qu'il falloit faire mourir Philopœmen, se desfeirent aussi eulx mesmes : mais ceulx qui auoyent dit qu'il luy falloit donner la gehenne, Lycortas les feit tous prédre pour les faire eulx-mesmes puis apres mourir en tourments . Cela fait, ilz bruslerēt le corps, & en meirent les cendres dedans une buye, puis se partirēt de Messine, nō en desordre ny pesse messe comme chacun uoulut, ains avec une ordōnāce telle, q̄ parmy ce cōuoy de funerailles, ilz meslerēt cōme un triumphe de uictoire : car les hommes y estoient biē couronnez de chappeaux de laurier en signe de uictoire, mais neātmoins ilz auoyēt les larmes aux yeux en tesmoignage de dueil, & y menoit on les ennemis prisonniers enchainez & enferrez : mais aussi y estoit la buye, dedans laquelle estoient les cendres, si couuerte de chappeaux de fleurs, de festons & de bendeaux, qu'à peine la pouuoit on uoir, estāt portee par un ieune homme nommé Polybius, filz de celuy qui pour lors estoit Capitaine general des Achæiens, à l'entour duquel marchoyent tous les principaulx & plus honorables hommes des Achæiens: apres lesquelz suyuoient les autres gens de guerre tous armez, & leurs cheuaulx bien accoustrez: & au demourāt n'estās ne si tristes en leur cōtenāce que le sont ordinairement ceulx qui ont cause de si grand dueil, ne si esiouiz que ceulx qui uenoyent de gaigner une si grande uictoire . Ceulx des uil-

les, bourgs & uillages de dessus le chemin uenoyent au deuant pour toucher à la buye de ses cendres, ne plus ne moins qu'ilz luy souloyent toucher en la main & le caresser quād il retournoit de quelque guerre, & accōpagnerent son conuoy iusques à la uille de Megalipolis : à l'ētree de laquelle se trouuerent les uieilles gens avec les femmes & les enfans, qui se messans parmy les gens de guerre renquellerent les pleurs, regrets & lamentatiōs de toute la miserable uille, laquelle estimoit auoir perdu quād & son citoyen le premier lieu d'honneur en la cōmunaulté des Achæiens. Si fut inhumé cōme il luy appartenoit fort honorablement, & furent les prisonniers de Messine tous assōmez à coups de pierre à l'entour de sa sepulture. Toutes les uilles de l'Achaïe entre plusieurs autres honneurs qu'elles luy decernerēt, luy feirent dresser des images à sa semblance : mais depuis au malheureux temps de la Grece, quād la uille de Corinthe fut arse & destruite par les Romains, il y eut un calumniateur Romain, qui s'efforcea de les faire toutes abbatre, le chargeāt & l'accusant, cōme fil eust esté en uie, d'auoir esté rousiours ennemy des Romains, & malaffectionné à la prosperité de leurs affaires : mais apres que Polybius luy eut respondu, ny le Cōsul Mummius ny ses asseurs & lieutenans ne uoulurent permettre que lon abolist les honneurs faits à la memoire d'un si excel-

lent personnage, combié qu'il eust en plusieurs choses nuit & à Titus Quintius, & à Manius. Mais ces gens de bien la mettoient difference entre le deuoir & le profit, & estimoyent estre choses distinctes & separees l'une de l'autre que l'honnesteté & l'utilité, ainsi comme le droit & la raison le ueulent aussi, ayans opinion que tout ainsi comme ceulx qui reçoient des bienfaicts sont tenus d'en rendre la paraille à leurs bienfaicteurs, & leur en doyent la reconnaissance : aussi aux hommes de uertu toutes gens de bien doyent honneur & reuerence. Voila quant à la uie de Philopœmen.



TITVS QVINTIVS FLA-
MINIVS.



L est aisé à uoir de quelle forme & stature estoit Titus Quintius Flaminius, que nous appariôs à Philopœmen, par une statue de cuyure faite à sa semblance, qui est encore au-iourdhy à Rome aupres du grand Apollo, qui fut apporté de Carthage, assis tout droit deuant l'entree des lices, & y a soubz ladicte statue une inscription en lettres Grecques : mais quât à ses meurs & à son naturel, on dit qu'il estoit prompt & soudain, tant à se courrouter, comme à faire plaisir, diuersement toutefois: car sil chastioit quelcun à qui il fust courroucé, il le faisoit legerement, & si ne tenoit point son courroux : & au contraire, ses biensfaicts estoyét grâds, & si demouroit tous-iours bien affectiôné enuers ceulx à qui il auoit

une fois fait plaisir, ne plus ne moins que si eulx mesmes luy en eussent fait, estât tousiours prest à faire de bien en mieulx pour ceulx qui luy estoÿét redeuables, à fin de les entretenir & garder tousiours en sa deuotion, cōme la plus belle acquisition qu'il eust sceu faire. Et pource qu'il estoit conuoiteux de gloire & d'honneur sur toutes choses, quād il se presentoit quelque bel & grand exploit à faire, il le uouloit luy mesme faire sans qu'autre y meist la main : & se trouuoit plus uoluntiers avec ceux qui auoyét besoin de son aide, que avec ceux qui luy pouuoÿét aider & bien faire : pour autant qu'il estimoit les uns matiere d'exercer sa uertu, & les autres ses competeurs & concurrens au prochas d'honneur & de gloire. Son premier aage se rencontra d'aduenture au temps que la uille de Rome auoit le plus d'affaires, & estoit empeschée en plus grosses guerres, lors que les ieunes hommes Romains, aussi tost qu'ilz auoyent aage de porter armes, estoient enuoyez à la guerre, pour apprendre en faisant le mestier de soudard à deuenir bōs Capitaines. Ainsi fut il nourry en cest apprentissage de la discipline militaire, & la premiere charge de gens qu'il eut, fut en la guerre contre Hannibal de Carthage, ou il eut mille hommes de pied soubz le Consul Marcellus, lequel ayant esté occis en une embusche que luy dressa Hānibal, on eleut Titus Quintius gouuerneur de la prouince

& uille de Taréte, qui fut reprise pour la seconde fois : & en ce gouuernement acquit reputation non moins d'homme droitturier & iuste, que bien entédu au faict des armes . Au moyen dequoy, quand il fut question d'enuoyer gens pour repeupler les uilles de Narnia & de Cossa, il en fut deputé conducteur & commissaire : ce qui principalemēt luy donna cueur & hardiesse d'aspirer tout du premier coup au Consulat, en passant par dessus les autres moindres offices, qui sont l'Ædilité, le Tribunat, & la Præture, par lesquelz, comme par des degrez, les autres ieunes hommes auoyent accoustumé de paruenir au Consulat . Quand donques ce uint au temps que se faisoit l'election des Consulz, il se presenta entre les poursuyuans du Consulat, accompagné de grand nombre de ceux qu'il auoit menez en ces deux uilles nouuellement repeuplees , qui poursuyuoient affectueusement pour luy : mais deux des Tribuns du peuple, Fuluius & Manlius, sy opposerent, disans que c'estoit chose desraisonnable, que ce ieune homme anticipast ainsi presque par force l'office de supreme dignité, contre les us & coustumes de Rome, auāt que d'auoir esté, par maniere de dire, receu & passé par les premiers mysteres de la chose publique : toutefois le Senat en remeit l'entiere decisiō aux uoix & suffrages du peuple, lequel tout sur le champ le declara Consul avec Sextius Ælius, combien qu'il n'eust

pas encore trête ans : puis en partissant au forē les charges de la chose publique avec son compagnon, il luy escheut celle de faire la guerre à Philippus Roy de Macedoine. Enquoy il me semble que la fortune fauorisa grandement aux affaires des Romains, faisant tumber la cōduite de ceste guerre entre les mains d'un tel personnage, pource qu'ilz auoyēt affaire à des hōmes, cōtre lesquelz un gouuerneur & Capitaine n'eust pas esté bon, qui eust uoulu auoir toutes choses par force & par uiolence d'armes, & qui estoient plus tost gaignables par sages remonstrāces & discours de raison: car pour soutenir le choc d'une bataillē cōtre les Romains, Philippus auoit bien assez de puissance de son royaume de Macedoine seulement : mais pour entretenir une guerre qui eust pris traict de lōgue dureé, & pour luy fournir argēt, uiures, retraitte, & brief toute autre chose requise à l'entretènement de son armee, les forces de la Grece luy estoient necessaires. Ainsi si elles n'eussent esté sagemēt departies & desiointes d'avec luy, la guerre encontre luy n'estoit pas pour se decider par une seule bataille, & la Grece qui iusques à ce temps n'auoit pas encore eu grande conference avec les Romains, ains commençoit lors premier d'auoir communicatiō d'affaires à bon esciant avec eulx, si leur Capitaine n'eust esté homme de sa nature doux & traittable, qui eust plus usé de la raison que de la force, &

ce, & qui eust sceu dire de bonne grace ses raisons, & escouter benignement celles que luy faisoient entendre ceulx qui auoyent à faire à luy, & oultre tout cela, qui eust tenu roide pour le droit & pour la iustice : il n'est pas uray-semblable, que la Grece se fust uoulu si tost soubstraire de la domination de ceulx qu'elle auoit desia tout accoustumez, pour se soubmettre à celle de nouueaux estrangers. mais cela se pourra plus clairement uoir par le recit de ses faicts. Estant donques Titus informé, que les Capitaines qui auoyent esté parauant luy enuoyez à ceste guerre de Macedoine, comme Sulpiti-
 tius & Publius, n'y estoient entrez que bien tard sur l'arriere saison de l'annee, & encore apres estre arriuez y auoyent fait la guerre bien froidement, s'amusans à faire de petites cour-
 ses & legeres escarmouchés, tantost si, tantost là, contre Philippus, comme pour gaigner quelques aduenues, ou pour enleuer quelques uiures, pensa qu'il ne luy falloit pas faire ainsi qu'ilz auoyent fait, en consumant toute l'annee de leur Consulat à Rome aux affaires de gouuernement, & à iouir en leurs maisons des honneurs de leur magistrat, & puis apres sur la fin se partir pour aller à la guerre, à fin de gaigner une annee par dessus celle de son office, l'une en laquelle il auroit exercé son Consulat, & l'autre en laquelle il feroit la guerre : ains desirât auoir cest hōneur d'employer l'an-

nee mesme de son Consulât à faire uiuement la guerre qui luy estoit commise, il quitta uoluntai-
 rement toutes les prerogatiues & preeminences qu'il pouuoit auoir de son estat en demou-
 rant à Rome, & requit au Senat qu'on luy bail-
 last son frere Lucius Quintius, pour son lieu-
 tenant en l'armee de mer : & oultre ce prit en-
 uiron trois mille uieux souldards de ceulx qui
 auoyent desfaict premierement Asdrubal en
 Hespagne, & depuis Hânibal en Afrique soubz
 la conduite de Scipion, qui estoient encore en
 aage de seruice, & qui uoluntairement se con-
 descendirent à le suyure en ce uoyage, pour en
 faire le fort de son armee. Auec laquelle troupe
 il trauersâ la mer sans fortune, & alla descen-
 dre en Epire, là ou il trouua Publius Iulius cam-
 pé auec son armee au deuant de Philippus, qui
 de long temps auoit planté son camp aupres de
 la bouche du fleuue Apsus, pour en defendre
 l'entree, & garder ce pas la, par ou lon entre au
 dedans du royaume d'Epire: tellement que Pu-
 blius auoit ia demouré là longuement sans rien
 faire, à cause de la naturelle force & aspreté des
 lieux. Si prit Titus l'armee de ses mains, & le
 renuoya à Rome, puis alla luymesme uoir à
 l'œil & considerer la nature du païs, qui est tel:
 C'est une longue uallee emmuree de costé &
 d'autre de grandes & haultes montagnes, non
 moins aspres que celles qui enferment la uallee
 que l'on appelle Tempé en Theffalie: mais il n'y a

pas de si beaux bois, ny des forests uerdoyâtes, guayes praries, ny autres lieux de plaisance, cōme il y a en l'autre: ains est seulement une grande & profonde fondriere, par le milieu de laquelle court la riuere qui s'appelle Apsus, laquelle en grosseur, en roideur & uistesse de cours ressemble assez au fleuue de Peneus. Elle occupe tout l'interualle, qui est entre les pieds des montagnes, excepté qu'il y a un petit chemin qui a esté taillé à la main dedans le roc, & une sente fort estroitte au long de l'eau, si mal aisee, qu'à grande peine une armee y pourroit passer, encore qu'elle ne trouuast personne qui luy defendist le passage: mais sil est tant soit peu gardé, il est du tout impossible qu'elle y puisse passer. Or y auoit il aucuns en l'armee qui conseilloyent à Titus d'aller faire un grand circuit par la contree Dassaretide, & par la uille de Lyncus, là ou le pais est plain, & le chemin aisé: mais luy auoit peur que sil s'esloignoit de la mer, & falloit ietter en pais maigre & peu cultiué, il n'eust faulte de uiures: mesmement si Philippus refusoit la lice & fuyoit le combat, & qu'il ne fust encore à la fin contraint de s'en retourner uers la marine sans rien faire, comme auoit fait son predecesseur. Parquoy il delibera d'aller à trauers les montagnes charger son ennemy, & tascher de gagner le passage à force. Or tenoit Philippus le hault des montagnes avec son ar-

mee : & quand les Romains se perforceoyent de grauir contremont , ilz estoient accueilliz de force coups de dard & de traict qu'ilz leur donnoyent deça & dela par les flancs: si estoÿt les escarmouches fort alpres pour le tēps qu'elles duroyent , & y demouroyent plusieurs blecez & plusieurs tuez d'une part & d'autre: mais ce n'estoit pas pour decider ne uider ceste guerre. En ces entrefaittes uindrent deuers Titus quelques gens du pais , qui auoyent accoustumé de garder les bestes par ces montagnes, & luy dirent qu'ilz sçauoyent un chemin tournoyant que les ennemis ne gardoyent point, par lequel ilz promettoyent conduire son armee, de sorte que dedās trois iours, au plus tard, ilz la rendroyt au dessus de la mōtagne: & à fin que lon se fiasst & fasseraist plus de leur dire, ilz declarerent que c'estoit Charopus filz de Machatas qui les y enuoyoit. Ce Charopus estoit le premier homme des Epirotes, lequel portoit bōne affection aux Romains, & leur fauorisoit secrettement & soubz main pour la crainte de Philippus: auquel Titus se cōfiant, adiousta foy au dire de ces guides, & enuoya quand & eulx l'un de ses Capitaines avec quatre mille hommes de pied, & trois cents cheuaux. Les pastres seruans de guides marchoyent deuant , estans liez & garrotez , & quand le iour uenoit toute la troupe se reposoit en quelque fonceau couuert de bois , & la nuit ilz cheminoyent à la

clarté de la Lune, laquelle de bonne aduventure estoit lors au plein . Cependant Tirus depuis qu'il les eut enuoyez, tint le demourant de son camp en repos, sinon qu'il feit les autres iours dresser q̄lques legeres escarmouches pour tous iours amuler les ennemis : mais le iour auquel ses gés, qui alloÿt faire le tour, se deuoyent rendre au plus hault de la montagne au dessus du camp des ennemis, il tira hors de son camp des l'aube du iour toute son armee entierement, laquelle il departit en trois troupes, & avec l'une d'icelles se ietta luy mesme du costé de la riuere, là ou le chemin est le plus estroit, faisant marcher ses bandes droit contremont la coste de la montagne . Les Macedoniens alencontre luy tiroÿt d'amont force coups de traict, & en quelques endroits parmy les rochers uenoyent à s'attacher à coups de main: & au mesme temps les deux autres troupes, à ses deux costez, faisoÿent aussi pareillement tout deuoir à l'enuy l'une de l'autre, de monter amont, & grauifsoÿent de grand courage contremont la pente roide & aspre de la môtagne. Quand le Soleil fut leué, on apperceut de loing comme une fumee non pas gueres apparente pour le commencement, ains ressemblant proprement aux brouees que lon uoit ordinaiemēt autour des crouppes des montagnes . Les ennemis n'en pouuoÿent rien uoir, pour autant que c'estoit derriere eulx estant desjà la cyme de la monta-

gne occupee: & les Romains, encore qu'ilz n'eussent pas bien asseurez, toutefois au travail du combat ou ilz estoient, espererent que c'estoit ce qu'ilz desiroient: mais quand ilz ueirēt qu'elle alloit tousiours croissant de pl⁹ en plus, de sorte qu'elle obscurcissoit l'air, ilz s'asseurerent adonc que c'estoit certainement le signe que leur deuoyent faire leurs gens. Si se prirent à crier, en montant contremont de si grand courage, qu'ilz renegerent leurs ennemis iusques aux plus roides & plus aspres endroits de la montagne, & aussi ceulx qui estoient derriere leur respondirent à haults cris de dessus la cyme de la montagne, dont les ennemis s'effroyerent si fort, que tout incontinent ilz se meirent tous en fuitte: toutefois il n'en fut pas tué plus de deux mille, à cause que l'aspreté & malaisance des lieux engarda que l'on ne les peust suyure. Mais les Romains pillerent leur camp, & prirent tout ce qu'ilz trouuerēt dedans leurs tentes, & leurs esclaves aussi, & gaignerent le pas de la montagne par ou ilz entrerent au dedans du pais d'Epire, & le trauerferent si modereement, & avec si grande abstinence, que combien qu'ilz fussent loing de leurs uaisseaux & de la marine, que lon ne leur eust point distribué leur bled qu'ilz souloyent auoir tous les mois, & q^d d'ailleurs ils fussent assez à destroit de viures, iamaïs toutefois ilz ne prirent rien sur le pais, combien qu'ilz y trouuassent de tous

biens en abondance. Car Titus estant aduertý, que Philippus, en passant par la Theſſalie, comme fuyant de peur, auoit fait sortir les habitans hors des uilles, retirer les personnes aux montagnes, & puis mettre le feu dedás les maisons, en abandonnant à piller à ses souldards ce que les habitans y laissoýent de leurs biens, pource qu'ilz n'auoyent pas moyen de l'emporter, à cause de la quantité ou de la pesanteur, tellemét qu'il sembloit qu'il quittaſt desia le païs aux Romains, il auoit l'œil, & admonestoit ses gens d'y passer sans y faire ne porter aucun dommage, comme en païs qui leur estoit ia tout acquis, & que leurs ennemis leur auoyent cedé. Si ne demourerent pas longuement à ſentir combien leur auoit ualu ceste continence : car aussi tost qu'ilz entrerent en la Theſſalie, les uilles se rendirent uoluntairemét à eulx: & les Grecs mesmes habitans oultre le pas des Thermopyles, desirerent singulierement à uoir Titus, ne demandans autre chose que de se donner à luy. Les Achæiens semblablement renoncerent à la ligue & alliance qu'ilz auoyent avec Philippus: &, qui plus est, arreſterent en leur conseil, de luy faire la guerre en compagnie des Romains. Et combien que les Ætoliens fuſſent pour lors amis & alliez des Romains, & qu'ilz se mōſtraſſent fort affectionnez à leur party en celle guerre : toutefois quand ilz demanderent aux Opuntiés, qu'ilz meiſſent leur uille entre leurs

mains, & qu'ilz la leur garderoyent & defendroyent seurement encontre Philippus, ilz n'y uoulurent onques entendre, ains enuoyerent querir Titus, & se meirent eulx & leurs biens en sa protection & sauuegarde. Lon dit que le Roy Pyrrhus, la premiere fois qu'il apperceut de dessus une haulte eschoguette l'armee des Romains renee & ordonnee en bataille, dit que l'ordonnance de ces Barbares ne luy sembloit point barbaresque. Mais aussi ceux qui n'auoyent iamais ueu Titus, & qui uenoyēt à parler la premiere fois avec luy, estoient cōtraints d'en dire presque autant : car ilz auoyent ouy dire aux Macedoniens, qu'il uenoit un Capitaine de Barbares, qui à force d'armes ruinoit tout par ou il passoit, & mettoit tout en seruitude: & au contraire ilz uenoyent à trouuer un persōnage, qui premieremēt estoit ieune d'aage, doulx & humain de uisage, parlāt bō Grec, & amateur de urayc gloire, dont ilz s'en retournoyēt merueilleusement aises, & alloient emplisans les uilles & citez de la Grece de bonne affection enuers luy, disans qu'elles auoyent trouué en luy un Capitaine qui les remettroit en leur liberte ancienne: mais encore plus quand Philippus monstra auoir uolunté de faire appointement, & que Titus luy offrit la paix & l'amitié du peuple Romain, pourueu & soubz condition qu'il laissast les Grecs en leur entiere franchise, en retirant ses garnisons hors de

leurs uilles & fortes places , & qu'il n'en uoulut rien faire: car adonc tous unanimement iusques à ceulx mesmes qui fauorisoyent aux affaires de Philippus , dirent que les Romains n'estoyent pas uenus faire la guerre aux Grecs, ains plustost aux Macedoniens , en faueur des Grecs. Au moyen dequoy toutes les autres parties de la Grece se uenoyét d'elles mesmes, sans aucune contrainte , rendre à luy. Et comme il passast à trauers le païs de la Bœoce sans aucune demonstration de guerre , les principaulx de la uille de Thebes sortirent au deuant de luy, cōbien qu'ilz reinsent le party du Roy de Macedoine à cause d'un particulier nommé Brachillelis : toutefois ilz uoulurent bien honorer & caresser Titus, comme ceulx qui estoyent contents de demourer en amitié avec l'un & avec l'autre . Titus les embrassa & parla à eulx gracieusement, poursuyuant tousiours son chemin tout bellement, en leur demandant une chose , & leur en comptant une autre , & faisant expressement durer leurs propos, à fin que ce pendant ses soudards estans trauaillez du chemin reprissent un peu d'haleine: & ainsi en marchāt tousiours peu à peu , il entra dedans la uille quand & eulx , dequoy ces seigneurs Thebains ne furent gueres contents, mais pourtant ilz ne luy ozerent pas refuzer , attendu mesmement qu'il n'auoit point lors grand nombre de gens de guerre autour de luy . Quand il fut dedans

Thebes il demanda audience, en laquelle il suada au peuple, tout aussi soigneusement que s'il n'eust pas tenu la uille en sa puissance, qu'il uoulust plus tost elire le party des Romains, que celuy de Philippus. A quoy faire le Roy Attalus, qui d'aduenture se trouua en ceste assemblee, le seconda, enhortât les Thebains en grande instance à faire ce que Titus leur suadoit: mais il s'efforcea un peu plus que son aage ne portoit, pour le desir qu'il auoit, comme ie croy, de monstrier son eloquence à Titus, & s'eschauffa & emeut tellement, que soudain il luy prit au milieu de son parler un esuanouissement, & une descente de reume, qui luy osta tout sentiment, de sorte qu'il tumba tout pasmé, & peu de iours apres fut reporté sur ses nauires en Asie, là ou il n'arresta gueres à mourir. Mais ce pendant les Bœotiens se rengèrent du costé des Romains: & Philippus ayant enuoyé des ambassadeurs à Rome, Titus y enuoya aussi de ses gens, solliciter pour luy, à deux fins: l'une, que si la guerre auoit à durer contre Philippus, que son temps luy fust prolongé: l'autre, que si le Senat luy ottroyoit la paix, que luy eust l'honneur de l'arrester & conclurre: car estant de sa nature fort ambitieux, il auoit peur que lon ne luy enuoyast un successeur pour continuer ceste guerre, qui luy ostant la gloire de l'auoir acheuee. Mais ses amis feirent si bonne diligence de solliciter, que ny le Roy Philippus n'ob-

teint ce qu'il demandoit, ny ne fut enuoyé un autre Capitaine au lieu de Titus, ains luy fut gardee & continuee la charge de ceste guerre. Parquoy si tost qu'il en eut receu la commiffion & le mandement du Senat, il tira uers la Theffalie en grande esperance de uenir au deflus de Philippus : car il auoit en son armee plus de uingt & six mille combatans, dont les Ætoliens faisoient six mille hommes de pied, & trois cents cheuaulx. L'armee de Philippus de l'autre costé n'estoit pas moindre en nombre, & commencerent à marcher l'un contre l'autre, tant qu'ilz arriuerent tous deux pres la uille de Scotuse, là ou ilz se resolurent d'essayer le hazard de la bataille. Si ne f'estonnerent point ny eulx ny leurs gens, pour se uoir si pres les uns des autres, ains au contraire, les Romains d'un costé en prirent plus grand cueur & plus grande enuie de combattre, pensans en eulx mesmes le grand honneur que ce leur seroit de uaincre les Macedoniens, qui estoient entre eulx tant renommez de prouësse & de uaillance, à cause des haults faicts d'Alexandre le grād: & de l'autre costé aussi les Macedoniens, pensans bien que les Romains estoient autres combatans que les Perses, auoyent bonne esperance filz gaignoyent ceste bataille, de rendre leur Roy Philippus plus renommé par le monde, que ne l'estoit Alexandre. Titus donques faisant assembler ses gens, les prescha & enhorta

de faire leur deuoir & se monstrent gens de bien en celle bataille, comme ceulx qui auoyent à faire preuue de leur ualeur au milieu de la Grece, c'est à dire, au plus beau theatre, en la plus belle ueuë de tout le monde, & contre les plus nobles & plus estimez aduersaires. Et Philippus par cas d'aduenture, ou pour la grande haste qu'il auoit, à cause que l'heure le pressoit, alla monter, sans y prendre garde, dessus un charnier ou lon auoit enterré plusieurs corps, pour ce que c'estoit comme une butte un peu releuee, assez pres des trenchees de son camp, & de là cōmencea à prescher & encourager ses gens, comme les Capitaines ont accoustumé de faire deuant une bataille: mais les uoyant tous descouragez, à cause qu'ilz prenoient pour un sinistre presage, ce qu'il s'estoit ainsi monté dessus une sepulture pour les prescher, il s'en troubla luy mesme, & differa de donner la bataille pour ce iour la. Et le lendemain, pour autant que la nuict auoit esté moitte, à l'occasion des uents du Midy qui auoyent soufflé, les nuees se resolurent en brouees, & emplirent toute la plaine d'un brouillas obscur, descendant des montagnes d'alenuiron un air gros & trouble, qui obscurcissoit & couuroit de tenebres, tout le long du matin, la campagne qui estoit entre les deux camps: au moyen dequoy les coureurs qui furent enuoyez d'une part & d'autre, pour descouurir & pour espier que faisoient les en-

nemis, en bien peu d'heure se rencontrerent, & s'entrechagerent les uns les autres en un endroit qui l'appelle les Testes de chien, qui sont des poinctes de rochers posees sur de petites mottes l'une deuant l'autre, & assez pres les unes des autres, que lon a appellees Testes de chien, pource qu'elles en ont quelque semblance. Si y eut en ceste escarmouche plusieurs mutations, ainsi qu'il aduient ordinairement quand on combat en lieux bossus & rabotteux, pource que tantost les uns fuyoyent & les autres chassoyent, tantost ceulx qui auoyent chassé fuyoyent eulx mesmes, & ceulx qui auoyent fouy chassoyent, par ce que des deux camps on enuoyoit tousiours nouveau renfort à ceulx qui estoient pressez & contraincts de se retirer. Ia commenceoit le brouillas à tumber, & l'air à s'esclarcir, de sorte que les deux Capitaines pouuoient uoir à l'œil clairement ce qui se faisoit entre leurs deux camps : au moyen de quoy ilz tirerent l'un & l'autre toutes leurs forces aux champs en bataille. Si eut Philippus l'aduantage en la poincte droite de son armee, laquelle estoit dessus le hault d'une pente, dont elle uenoit tout à un coup fondre sur les Romains par telle impetuosité, que les plus forts & plus uaillans ne peurent onques soustenir le faix de ce front de bataille si fort serré, ny celle haye de picques si furieuse : mais en la poincte gauche il ne fut pas ainsi, pource que les files

du bataillon ne sy peurent ferrer de pres, ny ioindre escu contre escu, à cause que c'estoit entre les mottes & rochers qu'elle se trouuoit rengee, & estoit force pour l'inegalité & malaisance des lieux qu'elle fust entreouuerte & desunie en plusieurs endroits. Ce que Titus apperceuant, abandonna la poincte gauche de sa bataille qu'il uoyoit forcee par la droite de celle des ennemis, & passant soudain à l'autre, alla charger de ce costé la les Macedoniens, qui ne peurent ferrer leurs files en front, ny approcher leurs renga en fond, ce qui est toute la force d'une bataille rengee à la Macedoniene, à cause que le champ estoit hault & bas: & pour combattre d'homme à homme, ilz estoient arriere si presse, qu'ilz s'entreheurtoient & s'entremeschoyent les uns les autres: car la bataille Macedoniene a cela, que tant qu'elle se maintient en son ordonnance iointe & serree, il semble que ce ne soit, par maniere de dire, qu'un corps d'une beste de force inuincible: mais aussi depuis qu'elle est une fois entreouuerte & desiointe, elle perd non seulement la force & puissance de son corps entier, mais aussi celle de chasque particulier combatant, partie à raison de la sorte des armes, dont ilz combattent, & partie aussi à raison que l'effort du total consiste plus en la disposition & liaison des files & des renga qui s'enforcissent les uns les autres, qu'il ne fait en la prouesse & ualeur de chacun

homme à part. Quand donques ceulx de ceste poincte gauche furent tournez en fuitte, une partie des Romains alla apres, & les autres coururent charger par les flancs ceulx de la poincte droite, qui combatoyent encore, dont ilz feirent un grand meurtre, de maniere que alors ceulx mesmes qui du commencement auoyent l'aduantage s'esbranlerent, & à la fin fouirent cōme les autres à ual de roupte, en iettant leurs armes: si n'en fut pas tué moins de huit mille sur le champ, & en fut pris de prisonniers enuiron cinq mille: & ne fut que la faulte des Ætoliens, que Philippus se sauua de uistesse, pource qu'ilz s'amuserent à piller & saccager son camp, pendant que les Romains chassoyent & poursuyuoient les fuyans, de sorte qu'à leur retour ilz ne trouuerēt plus rien à piller. A l'occasion de quoy il commença à auoir quelques querelles entre eulx, & s'entredirēt des paroles iniurieuses les uns aux autres: mais depuis encore fascherent ilz bien dauantage Tirus, par ce qu'ilz s'attribuerent l'honneur de ceste uictoire, & feirent courir le bruit parmy la Grece, que c'estoyent eulx qui auoyent desfaict en bataille le Roy Philippus, de maniere que es chāsons que les Poètes en feirent, & que le menu peuple chantoit par les uilles à la louange de ce faict d'armes, on mettoit tousiours les Ætoliens deuant les Romains, comme en ceste cy qui eut le plus de cours, & qui fut plus chantee par tout;

- 30 Sans pleur d'amis, sans droit de sepulture,
 30 Amy passant, icy sommes gisans
 30 Trente milliers d'hommes par guerre dure
 30 En Theſſalie ayans finy noz ans:
 30 Desfaits nous ont les armes d'Ætolie,
 30 Et les Latins, dont Titus eſtoit Chef,
 30 Qui amenez les auoit d'Italie
 30 En Macedoine à noſtre grand meſchef:
 30 Et Philippus avec ſa fiere audace
 30 S'en eſt foui plus uiſte que ne uont
 30 Biches & Cerfs, quand de pres à la trace
 30 Par aſpres chiens es bois chaffeſſez ilz ſont.

Le poëte qui feit les uers de ceſte chanſon fut Alcæus, & les feit en haine de Philippus, augmentant faulſement le nombre des hommes qui moururēt en la bataille, pour luy faire plus de deſpit & de honte: mais il faiſoit encore plus de deſpit à Titus que à Philippus, à cauſe qu'on la chantoit par tout: car Philippus ne ſ'en feit que rire: & pour le contrepicquer d'un pareil traiēt de moquerie, il feit une chanſon à l'imitation de la ſienne, dont la ſubſtance eſtoit telle:

- 30 Sans fueille aucune & ſans eſcorce auſſi,
 30 Amy passant, on a fait icy tendre
 30 Sur ce couſtau ceſte potence cy
 30 Expreſſement pour Alcæus y pendre.

Mais Titus, qui deſiroit ſingulierement auoir hōneur entre les Grecs, le prenoit fort à cuer: au moyen dequoy de là en auant il mania le reſte des affaires tout ſeul, ſans plus faire compte
des

des Ætoliens, dont ilz estoÿët fort marris, mesmement quād il receut une ambassade de Philippus, & presta l'oreille aux propos d'appointement qu'il luy feit mettre en auant: car alors ilz en furent si malcontents, qu'ilz allerent crians par toutes les uilles Grecques, que Titus uendoit la paix à Philippus, là ou lon pouuoit desraciner entierement toute ceste guerre, & exterminer totalement la puissance & seigneurie qui auoit la premiere reduit la Grece en seruitude. Ces calumnies que les Ætoliens alloÿent ainsi semans par tout, troublerent aucunement les amis & alliez des Romains: mais Philippus luy mesme leur osta toute suspicion, quand il uint en personne requerir paix, en se soubsmettant de tout poinct à la discretion de Titus & des Romains. Titus luy ottroya la paix, en luy laissant son royaume de Macedoine, & luy com mandant qu'il eust à se departir de tout ce qu'il renoit en la Grece, & oultre qu'il payast pour l'amende six cents mille escus, luy ostant dauantage toute son armee de mer, exceptees dix nauires seulement: & pour assurance de l'entretènement de ce traicté, luy prit un de ses enfans qu'il enuoya à Rome en ostage. En quoy faisant, il est tout certain que Titus dispensa tresbien le temps, & prouueur sagement à l'aduenir: car desia estoit Hannibal de Carthage, tresgrand ennemy de l'empire Romain, banny de son païs, & retiré deuers le Roy Antiochus,

auquel il mettoit en teste, & le sollicitoit incessamment de poursuyure sa fortune, & l'accroissement de son estat, qui estoit ia si bien acheminé, ioint que Antiochus de luy mesme en auoit bien bonne enuie, pource que sur la confiance de ses prosperitez, & des haults faicts d'armes qu'il auoit ia executez, pour lesquelz il auoit acquis le surnom de grand, il aspireroit à la monarchie de tout le monde, & ne demandoit que quelque occasion de s'attacher aux Romains : tellement que si Titus preuoyant de loing cela, n'eust sagement incliné à la paix, & que la guerre d'Antiochus se fust rencontrée au mesme tēps de celle de Philippus, de sorte que ces deux, les plus grāds & plus puissans princes du monde, pour leur commun interest, se fussent conioincts ensemble contre la uille de Rome, elle n'eust pas eu moins d'affaires, ny n'eust pas esté en moindre danger qu'elle auoit esté en la guerre des Carthaginois & de Hannibal : mais Titus entreiettant opportunément ceste paix entre les deux guerres, retrencha celle qui estoit presente, auant que celle qui estoit prestée à soudre commenceast, & osta par ce moyen à l'un de ces Roys sa dernière, & à l'autre sa première esperance. Ce pendant les dix commissaires que le Senat Romain enuoya à Titus, pour luy assister & aider à donner ordre aux affaires de la Grece, luy conseillerent de mettre en pleine franchise tout le reste de la Grece, &

retenir seulemēt avec bonnes garnisons les uilles de Chalcide, de Corinthe & de Demetriade; pour s'asseurer qu'elles n'entrassent en quelque pratrique d'alliāce & de ligue avec Antiochus: & adonc les Ætoliens cōustumiers de detrācter & mesdire, commencerent à mutiner tout ouuertement les uilles, en sommant Titus de deslier les fers de la Grece: car ainsi souloit Philippus appeller ces trois uilles la: puis demādoyēt, par maniere de mocquerie, aux Grecs, filz estoient pas bien aises d'auoir maintenant des ceps aux pieds plus pesans, mais mieulx polis & plus luisans que ceulx qu'ilz auoyent au parauant; & filz ne se sentoient pas bien tenuz à Titus de ce qu'il auoit deslié les pieds de la Grece pour l'attacher par le col: dequoy Titus estāt fort ennuyé & marry, pria tant ceulx du conseil qu'à la fin il les feit condescendre à sa requēste, que ces trois uilles la fussent aussi deliurees de toute garnison, à fin que les Grecs ne se peussent plus de là en auant plaindre, que sa grace & liberalité ne fust entierement & de tout poinct accomplie enuers eulx. Parquoy estant escheut le temps de la feste que lon appelle Isthmia, il sy trouua une multitude infinie de peuple pour uoir l'esbatement des ieux qui sy font, pource que la Grece, apres auoir esté longuement trauaillee de guerres, se uoyant lors en paix certaine, & en bonne esperance de pleine liberté, ne demandoit qu'à faire festes & à se resiouir.

Il fut adonc fait commandement à l'assemblée à son de trompe, que lon eust à faire silence : & cela fait le herault se tira en auant au milieu de toute l'assistance, qui proclama à haulte uoix, que le Senat de Rome, & Titus Quintius Consul du peuple Romain, apres auoir uaincu & desfaict en bataille le Roy Philippus & les Macedoniens, deliuroyent de toutes garnisons, & affranchissoyent de toutes tailles, subside & imposts, pour desormais uiure à leurs loix anciennes en pleine liberté, les Corinthiens, Locrions, ceulx de la Phocide, ceulx de l'isle d'Eubœe, les Achæiens, les Phthiotes, les Magnesiens, les Thessaliens & les Perrhæbiens. Or pour la premiere fois toute l'assemblée ne peut pas ouir la uoix du herault, & de ceulx qui l'ouirent, la pluspart ne peut encore pas distinctement entédre ce qu'il auoit dit, ains y auoit par tout le parc ou se faisoient les ieux un bruit confus, & un tumulte du peuple, qui s'esmerueilloit, & demandoit que ce pouuoit estre : de sorte qu'il fallut que le herault recommenceast une autre fois à proclamer. Parquoy estant de rechef fait silence, le herault poulsant sa uoix plus fort que deuant, s'escria si hault, que son cry fut ouy de toute l'assemblée : & lors se leua une clameur de ioye que tout le peuple ietta si haulte, qu'elle fut entendue iusques en la mer : & incontinent tout le monde qui auoit ia pris place, & s'estoit assis pour uoir l'esbat des com-

batans , se leua en pieds sans plus se soucier des ieux , & s'en allerent tous à grande ioye saluer , embrasser & remercier leur bienfaiteur , & le protecteur & affranchisseur de la Grece, Titus . Tellement , que ce que lon dit ordinairement quand on ueult exprimer une excessiue force & grandeur de bruit & de clameur, aduint lors: car il y eut des corbeaux , qui par cas d'adventure uolans par dessus le parc du theatre , tumberent dedans . Ce qui aduint à cause que l'air se fend & se rompt par la uiolence d'une si forte uoix , tellement qu'il n'a pas la fermeté de soustenir le uol des oiseaux : au moyen dequoy il est force qu'ilz tombent à terre , comme trauersans par une espace uague , & uuide de tout soustien : si nous ne uoulions dire que ce soit plustost pour la uiolence de la clameur qui fiert & frappe les oiseaux en passant par l'air, ne plus ne moins que si ce fussent coups de flesches , dont ilz rumbent en terre tous morts . Il peult aussi estre qu'il se fait en l'air un tourbillon, cōme nous uoyons en la mer agitee , qu'il se fait quelquefois un tournoyement des undes par la uiolence de la tourmente. Tant y a, que si Titus preuoyant bien la foule du peuple qui accouroit pour le uoir , ne se fust de bonne heure retiré incontinent que les ieux furent finis , il eust eu beaucoup d'affaires à se sauuer d'estre estouffé , tant il accourut de monde de tous costez à l'entour de luy . Mais apres qu'ilz furent

bien las de crier & de chanter autour de son pa-
 uillon iusques à la nuict: à la fin ilz se retirerent,
 & en se retirant, filz rencontroyent quelques
 uns de leurs parents, amis ou citoyens, ilz s'en-
 tre-embrassoient & s'entrebaïsoient l'un l'autre
 de ioye, puis s'en alloient soupper & faire bon-
 ne chere ensemble, là ou s'esjouïssans encore
 d'auantage, comme lon peut penser, à la table
 ilz ne tenoyent autres propos que des affaires
 de la Grece, discourans entre eulx combien de
 grosses guerres elle auoit faictes & souffertes
 par le passé, toutes pour recouurer ou defen-
 dre sa liberté, & neantmoins iamais ne l'auoit
 peu, ne plus ioyeusement, ne plus certaine-
 ment obtenir qu'elle faisoit alors, receuant le
 plus honorable loyer, & le plus digne d'estre
 combatu qui scauroit estre au monde, par la
 prouësse d'hommes estrangers qui comba-
 toient pour elle, sans qu'il luy coustast une seu-
 le goutte de son sang, par maniere de dire, ne
 qu'elle perdist un seul homme, pour la mort
 duquel on deust porter le dueil. C'est bien cho-
 se rare entre les hommes, d'en trouuer un uail-
 lant entierement ou sage: mais encore est il
 bien plus rare & plus difficile, que de toute au-
 tre sorte de uertueux, d'en trouuer un iuste: car
 Agesilaus, Lyfander, Nicias, Alcibiades, & tous
 ces autres grands Capitaines du temps passé,
 ont bien sceu comment il falloit conduire une
 guerre, mener une armee, & gagner une batail-

le tant par mer comme par terre : mais employer leurs uictoires en une beneficence genereuse & ueritablement honeste, iamais ilz ne l'ont sceu:ains, si uous exceptez le faict d'armes contre les Barbares en la plaine de Marathon, la bataille de Salamine, la iournee de Platares, celle des Thermopyles, ce que fait Cimon à l'entour de Cypre, & sur le fleue Eurymedon, toutes les autres guerres & batailles que la Grece à iamais faittes, ont tousiours esté contre soy mesme, & pour se mettre sous le ioug de seruitude : & tous les trophées qui furent onques dressez par elle, l'ont esté à sa honte & à sa perte: tellement qu'elle s'en est à la fin totalement ruinee & destruite, & ce principalement par la meschanceté & opiniaistreté des gouuerneurs & Capitaines des uilles, enuieux les uns sur les autres. Là ou une nation estrangere, laquelle, ce semble, auoit bien peu d'occasion qui la deust emouuoir à ce faire, pour n'auoir pas eu par le passé grande communication avec l'ancienne Grece, & du conseil & bon sens de laquelle il deuoit sembler estrange que la Grece peust receuoir aucune utilité, l'a neantmoins avec tresgrands dangers, combats & trauaux infiniz, deliuree de l'oppression & seruitude de uiolents seigneurs & tyrans. Ces discours & autres semblables uenoyent lors en l'entendement des Grecs, & qui plus est, l'effect respondoit aux paroles de la proclamation:

car en un mesme temps Titus enuoya Lentulus en Asie pour remettre en liberté les Bargiliens, & Titillius en Thrace pour faire sortir des uilles & des isles les garnisons que Philippus y tenoit, & aussi fut Publius Iulius en Asie deuers le Roy Antiochus, pour luy parler d'affranchir & remettre en liberté les Grecs qu'il tenoit en sa subiection. Quant à Titus il fut luy mesme en la uille de Chalcide, là ou il monta sur mer, & s'en alla en la prouince de Magnesie, dont il feit par tout sortir les garnisons des uilles, & rendit aux citoyens de chacune, le gouvernement & administration de leur chose publique. Depuis estant escheut le temps que lon celebre en la uille d'Argos la feste de Nemea en l'honneur de Hercules, Titus fut eleu iuge & recteur des ieux qui sy font, là ou ayant tresbien ordonné toutes choses appartenantes à la solennité de la feste, il y feit encore une autre fois proclamer publiquement & solennellement la deliurance & affranchissement general de toute la Grece, & allant par les uilles y establit de tresbonnes ordonnances, reforma la iustice, & remeit les habitans & citoyens de chacune en bonne paix, amitié & concorde les uns avec les autres, en rappelant ceulx qui estoient bannis & fuitifs, & appaisant les uieilles dissensions & querelles qu'ilz auoyent entre eulx: ce qui ne luy apportoit pas moins de ioye & de contentement, de pouuoir par

remonstrances induire les Grecs à se recôcilier les uns avec les autres, que d'auoir par force d'armes uaincu les Macedoniens : de sorte que le recouurement de liberté que Titus auoit rendu aux Grecs, leur sembloit le moindre des bienfaicts qu'ilz eussent receuz de luy. Or dit on que l'orateur Lycurgus uoyant un iour comme les fermiers & recepueurs des tailles menoyent en prison le philosophe Xenocrates, à faulte de payement d'un certain impos que deuoyent les estrangers habitans en la uille d'Athenes, le leur osta par force d'entre les mains : & oultre cela les poursuyuit si bien en iustice, qu'il leur feit payer l'amède pour l'iniure qu'ilz auoyent faite à un tel personnage, & que depuis le philosophe rencontrant par la uille les

» enfans dudit Lycurgus, leur dit: Je réds à uostre
 » pere une belle recompense du plaisir qu'il m'a
 » faict : car ie suis cause qu'il est loué & prisé par
 » tout, de ce qu'il a fait en mon endroit. Mais les
 bienfaicts des Romains & de Titus enuers les Grecs ne leur apporterét pas seulement ce fruit en recompense, qu'ilz en furent louez & honorez par tout le monde, ains furent cause d'accroistre leur domination & seigneurie sur les autres nations, & que depuis le monde eut grande confiance en eulx à bonne & iuste cause, de maniere que les peuples & uilles, non seulement receuoyét les Capitaines & gouuerneurs qu'ilz leur enuoyoyent, ains alloient au deuant d'eulx,

& les appelloyent pour se mettre entre leurs mains:& non pas seulement les uilles & communaultez, mais aussi les princes & les Roys qui se trouuoient oppressez par autres plus puissans qu'eulx, n'auoyent autre plus seur recours, que de se mettre en leur sauuegarde: au moyen dequoy en peu de temps, avec la faueur & l'aide des Dieux, comme ie croy, tout le monde se submeit à leur obeissance, & soubz la protection de leur empire. Aussi se glorifioit Titus d'auoir remis la Grece en liberté, pl^{us} que de nul autre exploit qu'il eust onques fait. Car quand il offrit au temple d'Apollo en la uille de Delphes des boucliers d'argent, avec son propre escu, il y feit engrauer dessus des uers, dont la substance estoit telle,

- 30 Nobles iumeaux, ô Tyndarides nez
- 30 De Iupiter, Roys de Sparte aguerrie,
- 30 Qui à dompter cheuaux plaisir prenez
- 30 Et exercer l'art de cheualerie,
- 30 Titus Romain, d'estrange seigneurie,
- 30 Ayant aux Grecs osté le ioug pesant,
- 30 En leur rendant leur liberté perie,
- 30 Vous a donné ce singulier present.

Il donna aussi une courône d'or massif à Apollo, sur laquelle il feit mettre ceste inscription,

- 30 Celuy qui t'a donné ceste couronne
- 30 Massifue d'or luyfant & espuré,
- 30 Qui dignement, Apollo, enuironne
- 30 Les longs cheueux de ton beau chef doré,

- 27 C'est un Romain Capitaine honoré,
 28 Titus, en qui toute prouëſſe abonde.
 29 Fais donc, Seigneur, que ſon nom decoré
 30 En ſoit chanté par tous les coings de monde.

Ainſi la uille de Corinthe a eu ceſt heur, que les
 Grecs y ont eſté par deux fois declarez affran-
 chiz & remis en liberté: la premiere fois par Ti-
 tus Quintius, & la ſeconde par Neron en no-
 ſtre tēps, & en meſme ſaiſon, c'eſt à ſçauoir, lors
 que lon celebroit la feſte qui ſ'appelle Iſthmia:
 mais la premiere fois ce fut par la uoix du he-
 rault, ainſi comme nous auons cy deſſus déclaré
 plus au lōg, & la ſeconde fois ce fut Neron luy-
 meſme, qui le proclama en une harengue qu'il
 feit au peuple en pleine aſſemblee de uille ſur
 la place: mais cela a eſté long temps depuis. Au
 reſte, Titus commença lors une fort belle
 & fort iuſte guerre alencontre de Nabis, le
 malheureux & meſchant tyran des Lacedæmo-
 niens: mais à la fin il trompa l'eſperance de la
 Grece, car le pouuant prédre, il ne le uoulut pas
 faire, ains appointa avec luy, en abandonnant
 la pauvre Sparte indignement oppreſſée ſoubz
 le ioug de ſeruitude, fuſt ou pource qu'il eut
 peur, que ſi la guerre prenoit traict, il ne uiſt
 un ſucceſſeur de Rome, qui luy emportast la
 gloire de l'auoir paracheuée, ou pour une enuie
 & ialouſie qu'il auoit de l'honneur que lon fai-
 ſoit à Philopoemen: lequel ſ'eſtant monſtré par
 tout ailleurs auſſi excellent Capitaine qu'il en

fut onques en la Grece, & meſmement en celle guerre, ayant fait de merueilleux actes, tant de grand ſens comme de hardieſſe, eſtoit honoré & reueré par les Achæiens es theatres & aſſemblees publiques, tout autant comme Titus : dequoy Titus eſtoit malcontent, pource qu'il luy ſembloit deſraiſonnable, que un Arcadien, qui n'auoit iamais eſté Chef d'armee, ſinon en petites guerres legeres alécontre de ſes uoiſins, fuſt autant eſtimé & autant honoré comme un Cōſul de Rome, lequel eſtoit uenu faire la guerre pour le recouurement de la liberté de la Grece: & toutefois encore rendoit Titus quelque raiſon & iuſtification de ce faiçt, diſant qu'il ueoit bien qu'il ne pouuoit ruiner & deſfaire ce tyrâ, ſans une grande calamité des autres Spartiates. Au demourant, de tous les honneurs que les Achæiens luy decernerent, qui furent grands & en grand nombre, il n'y en a pas un qui me ſemble auoir iuſtement & egalemeſt contrepelſé ſes bienſaiçts, ſinon un preſent qu'ilz luy feirēt, lequel il eut plus cher que tout le demourant: & fut le preſent tel : Durant la ſeconde guerre Punique, que les Romains eurent contre Hannibal, il y en eut pluſieurs qui furent faits priſonniers es rencontres & batailles qu'ilz perdirent, & eſtans uendus çà & là, demourerent eſclaues en pluſieurs prouinces, cōme entre les autres il ſ'en trouua bien par la Grece iuſques au nombre de douze cēts, leſquelz de tous tēps

auoyent biē fait pitié & compassion à ceulx qui
 les ueoyent en si miserable changement de leur
 fortune, mais encore plus alors qu'ilz rencon-
 troient en l'armee des Romains les uns leurs
 filz, les autres leurs freres, & les autres leurs cō-
 pagnons & amis libres & uictorieux, là ou eulx
 estoient serfs & esclaués. Si estoit Titus bien
 marry de les uoir en telle captiuité, mais toute-
 fois il ne les uoluit pas oster par force à ceulx
 qui les auoyent : & les Achæiens les retirerent
 & achepterēt tous à cinquante escus pour teste,
 & les ayans assemblez en une troupe, en fei-
 rent un present à Titus, ainsi cōme il estoit sur
 son embarquement, pour s'en retourner en Ita-
 lie : qui fut cause qu'il s'en alla avec plus de
 ioye & de cōtētement, ayāt receu de ses beaux
 faicts une belle recompense & digne d'un grād
 personnage amateur de ses citoyens & de son
 païs. Aussi fut ce l'ornement, qui plus, à mō ad-
 uis, embellit son triumphe : car ces pauures gens
 feirēt ce que les esclaués ont accoustumé de fai-
 re le iour q̄ lon leur dōne liberté, c'est à sçauoir,
 qu'ilz font raire leurs testes, & portēt de petits
 chapeaux dessus. Ces Romains rachetez en fei-
 rent autant : & en c'est estat suyuirent le chariot
 triūphal de Titus le iour qu'il feit son entree en
 triumphe dedans la uille de Rome. Il est uray,
 qu'il faisoit bien bon uoir aussi les despouilles
 des ennemis qui furent portees en la monstre
 de ce triumphe, comme force armets faits à la

Grecque, force boucliers, escus & picques à la Macedoniene, avec grâde quantité d'or & d'argent. Car Itanus historien escrit, qu'il en fut porté une bien grosse somme, c'est à sçauoir, d'or fondu en masse, trois mille sept cents treze liures pesant, & d'argent en masse aussi quarante trois mille deux cents soixante & dix liures, & d'or monnoyé en pieces qui s'appelloient Philippus, quatorze mille cinq cents & quatorze, sans les mille taléts que Philippus deuoit payer pour l'amende: lesquelz depuis luy furent remis par les Romains à l'intercession & requeste de Titus principalement, qui luy procura ce bien, & le feit appeller amy & allié du peuple Romain, & luy renvoyer son filz Demetrius, qui estoit en ostage à Rome. Mais quelque tēps apres le Roy Antiochus passa de l'Asie en la Grece avec grosse flotte de uaisseaux, & une puissante armee, pour solliciter les uilles de quitter l'alliance des Romains, & les mettre en dissension les unes avec les autres: à quoy faire le secondoyent les Ætoliens, qui de long temps auoyent conceu grande malueillance contre le peuple Romain, & desiroient auoir guerre à luy: si enseignoyent au Roy Antiochus à dire, que la guerre qu'il entreprenoit, estoit pour affrâchir les Grecs & les remettre en liberté, dont ilz n'auoyent point de besoing, attendu qu'ilz estoient francs & libres: mais pour autant qu'ilz n'auoyent point de iuste tiltre de commencer la

guerre, ilz luy enseignoyent à la couvrir de la plus honeste couleur qu'il eust sceu prendre. Parquoy les Romains redoubtrons fort le mouvement & le bruit de la puissance de ce grand Roy, y enuoyerēt pour Capitaine en chef Manius Acilius, & Titus pour l'un de ses lieutenās, à cause des Grecs, desquelz à son arriuee il asseura ceux qui auoyent bōne uoulunté, & les rēdit encore plus fermes en l'alliance des Romains, des qu'ilz l'eurent seulement ueu : les autres qui commençoeyēt desia à flechir & à se laisser corrompre, il les reteint en leur deuoir, & les engarda de faillir, en leur refreschissant la memoire de l'amitié qu'ilz luy auoyent portee, ne pl⁹ ne moins que fait un sage medecin qui sçait bien à poinct donner medecine à un patient pour le preseruer d'une grosse maladie. Il est uray qu'il y en eut quelques uns, mais bien peu, qui luy eschapperent, ayans esté desia gaignez & gastez de tout poinct par les Ætoliens, lesq^{lz} encore qu'il fust à bon droict indigné & irrité contre eulx, il preserua neantmoins apres la bataille : car Antiochus ayant esté uaincu au pas des Thermopyles, s'en fouyt, & à grande haste monta sur mer pour s'en retourner en Asie. Et le Consul Manius poursuyuant sa victoire, entra dedans le païs des Ætoliens, là ou il prit luy mesme aucunes des uilles par force, & abandonna les autres en proye au Roy Philip-
pus: si estoeyēt d'un costé les Dolopiens, les Ma-

gnesiens, les Athamiens & les Aperantins pilliez & saccagez par ce Roy de Macedoine: & de l'autre costé Manius auoit ia aussi destruit la uille de Heraclee, & mis le siege deuant celle de Naupacte, que les Ætoliés tenoyét: mais Titus ayant pitié de uoir ainsi destruire ces pauures peuples Grecs, passa du Peloponese, ou il estoit lors, au camp de Manius, & le reprit en premier lieu de l'erreur qu'il faisoit, en ce qu'ayant uaincu, il souffroit q̄ Philippus emportast le fruit & le loyer de sa uictoire, conquerant & domptant plusieurs peuples, païs & Roys, pendant que luy par un opiniaistre courroux s'amusoit à tenir siege deuant une uille. Et puis incontinent que les assiegez l'apperceurent de dessus leurs murailles, ilz l'appellerét par son nom, en luy tendant les mains, & le priant qu'il uoulust auoir pitié d'eulx: à quoy il ne leur respōdit rien sur l'heure, ains se tournant de l'autre costé se prit à plorer: mais depuis il parla avec Manius, & apaisant son courroux, feit tant enuers luy qu'il impetra aux Ætoliens surseance d'armes pour quelques iours, tant qu'ilz peussent enuoyer des ambassadeurs à Rome pour uoir filz pourroyent obtenir grace & pardon du Senat. Mais la plus grande peine & plus grande difficulté qu'il eut, fut à prier pour les Chalcidiens, auquelz le Consul Manius estoit plus aigremét courroucé qu'à tous les autres, à cause que le Roy Antiochus, estant desia la guerre

encom-

encommencee, auoit pris femme en leur uille
 contre ce que son aage portoit, & que la quali-
 té du tēps ne requeroit : car il estoit desia uieil,
 & en son uieil aage, au milieu de la guerre, e-
 stoit deuenu amoureux d'une ieune damoiselle
 fille de Cleoptolemus, la plus belle qui fust de
 ce tēps la en la Grece. Ce qui feist que les Chal-
 cidiens se formaliserent fort affectueusement
 pour luy, & meirent leur uille entre ses mains,
 pour s'en seruir comme d'un fort aux affaires de
 ceste guerre: au moyē dequoy, quand il eut per-
 du la bataille il s'y retira à la plus grande haste
 qu'il luy fut possible : & prenant la ieune dame
 qu'il auoit espousee, sō or, son argēt & ses amis,
 mōta sur mer incōtinēt, & sē retourna en Asie.
 Pour ceste cause le Consul Manius, aussi tost
 qu'il eut gagné la bataille, tira droit avec son
 armee uers la uille de Chalcide en grande fu-
 reur de courroux: mais Titus qui le suyuoit, l'al-
 loit tousiours addoulcissant, & le pria tant luy
 & les autres Romains qui estoient en estat, &
 auoyent authorité au cōseil, qu'à la fin il les ap-
 paisa, & impetra pardon à ceulx de Chalcide.
 Lesquelz ayans esté preseruez d'un si grand pe-
 ril par son moyē, luy consacrerent en recom-
 pense les plus beaux edifices & plus sumptueux
 ouurages publics qui fussent en leur uille,
 ainsi que lon peult uoir par les inscriptions qui
 y sont encore iusques auioürdhuy : comme au
 » parc des exercices, Le peuple Chalcidiē a dediē

22 ce parc des exercices à Titus & à Hercules: & au
 23 temple nommé Delphinium, Le peuple Chal-
 24 cidien a consacré ce temple à Titus & à Apol-
 lo. Et encore iusques à present il l'eslir par les
 uoix du peuple un presbtre expressement pour
 faire sacrifice à Titus, auquel sacrifice, apres que
 l'hostie est immolee, & l'effusion du uin faite
 dessus, le peuple assistant chante un cantique de
 triumphe fait en uers à sa louange: mais pource
 qu'il seroit trop lóg à l'escire tout entier, nous
 en auons seulement extrait la fin, qui est telle:

25 La foy blanche immaculee
 26 Des Romains nous adorons,
 27 Et garder inuiolee
 28 Loyaulté nous leur iurons.
 29 Chantez, filles, à la gloire
 30 De Iupiter tout puissant,
 31 Allez en chant de uictoire,
 32 Rome & Titus benissant.
 33 Chantez le preux Capitaine
 34 Titus, par qui uous auez
 35 De perdition certaine
 36 Iadis esté preseruez.

Si n'estoyent pas les Chalcidiens seulz qui luy
 portoyent honneur & reuerence, ains estoit ho-
 noré par tous les Grecs uniuersellement com-
 me il luy appartenoit, & merueilleusement
 aimé pour la douceur & debonnaireté de sa
 nature: ce qui monstre que ce n'estoit point par
 contrainte ne par feinte, mais à bon esciant,

& de bonne uolunté qu'ilz l'honoroyent. Car combien qu'il ait eu quelques differents pour les occurrences des affaires, ou pour quelque ialousie d'honneur à l'encontre de Philopœmen premierement, & depuis à l'encontre de Diophanes Capitaines generaux de la communauté des Achèiës, iamais il ne teint son cueur; ny ne passa onques son courroux iusques à mettre en execution aucune mauuaise chose contre eulx: ains se termina tousiours en quelque contention de paroles es assemblees de conseil; là ou il parla franchement à eulx: pourtant n'y eut il iamais personne qui le teinst pour homme aigre ny uindicatif, mais bien a il semblé à plusieurs leger, prompt & soudain à se choler de sa nature. Autrement c'estoit bien la plus doulce & la plus agreable compagnie d'homme qu'il estoit possible, & qui rencontroit aussi plaisamment & aussi aiguëment: comme quand il dit une fois aux Achæiens qui se uouloyêt attribuer l'isle des Zacynthiens, pour
 33 les diuertir de ceste entreprise, Vous uous met-
 33 trez en danger, seigneurs Achæiens, si uous sor-
 33 tez une fois hors du Peloponese, ne plus ne
 33 moins que les tortues, quâd elles mettent la te-
 33 ste hors de leur cocque. Et la premiere fois
 qu'il parla avec Philippus pour traiter
 d'appointement, comme Philippus luy eust dit:
 33 Tu as amené beaucoup de gens avec toy, & ie
 33 suis uenu seul: il luy respōdit proprement: Aus-

30 si as tu tant fait que tu es demouré seul, ayant
 30 fait mourir tous tes parents & amis. Vne autre
 fois à Rome Dinocrates Messenien, apres auoir
 bien beu en un festin, se desguisa en habit de
 femme, & dansa en tel habit: puis le lendemain
 s'en alla deuers Titus, le prier qu'il le uoulust
 aider à cōduire son entreprise à chef, qui estoit
 de retirer la uille de Messine hors de la ligue des
 Achæiens. Titus luy fait responce, qu'il y pen-
 30 seroit: Mais ie m'esmerueille, dit il, de toy, com-
 30 ment tu puis dâser en habit de femme, ny chan-
 30 ter en un festin, ayât entrepris de si grâdes cho-
 ses. Au conseil des Achæiens les ambassadeurs
 du Roy Antiochus estans uenus pour les soli-
 citer & induire à quitter l'alliâce des Romains,
 & prendre celle de leur maistre, feirent un long
 narré de la grande multitude des combatans,
 qui estoient en l'armee de leur maistre, & les
 nombrerent par plusieurs diuers noms. A quoy
 30 Titus respondit, que un iour un sien amy &
 30 hoste luy donnoit à soupper, & qu'il fut seruy
 30 à table de tant de mets qu'il en tensa & reprit
 30 son hoste, s'esmerueillant dont il pouuoit auoir
 30 si tost recouuré tant de sortes de uiandes & en
 30 si grande quantité: son hoste luy respondit,
 30 que le tout n'estoit que chair de porc, laquel-
 30 le estoit ainsi diuersifiée de plusieurs sauces &
 30 differentes manieres de l'accoustrer: Aussi, Sei-
 30 gneurs Achæiens, dit il, n'estimez pas d'auanta-
 30 ge l'armee d'Antiochus pour ouir nôbrer tant

20 de gensdarmes portans lances, portás iauelines,
 20 & tant de gens de pied : car ce ne font que tous
 20 Syriens differéts de diuerſes ſortes de meſchan-
 20 tes petites armes ſeulement . Au demourant a-
 pres ces choſes faittes par Titus en la Grece , &
 apres que la guerre d'Antiochus fut acheuee , il
 fut eleu à Rome Cenſeur auec le filz de celuy
 Marcellus , qui auoit eſté cinq fois Conſul . Ce
 magiſtrat eſt de trefgrande dignité, & par ma-
 niere de dire, le comble & le couronnement de
 tous les honneurs qu'un citoyen peult auoir en
 la choſe publique Romaine . Ilz ietterent hors
 du Senat quatre perſonnages, mais ce n'eſtoyét
 pas gens gueres notables, & receurent au nom-
 bre des citoyens Romains tous ceux qui ſe pre-
 ſenterent pour eſtre enregiſtrez es regiſtres pu-
 bliques , pourueu qu'ilz fuſſent nez de pere &
 mere de libre condition , & furent contraincts à
 ce faire par Terétius Culeo Tribun du peuple,
 lequel en haine de la nobleſſe, & pour leur faire
 deſpit, perſuada au peuple de le cōmander ainſi .
 Or eſtoyent pour lors les deux plus renommez
 & plus eſtimez perſonnages qui fuſſent à Ro-
 me , Publius Scipio Africain , & Marcus Por-
 cius Cato , leſquelz eſtoyent ennemis l'un de
 l'autre . Titus en eleut & nomma l'un, à ſçauoir
 Scipion, Prince du Senat, comme le premier &
 le plus homme de bien qui fuſt en toute la uil-
 le, & prit inimitié contre l'autre qui eſtoit Ca-
 to, pour une telle infortune : Il auoit un frere

nommé Lucius Quintius Flaminius , qui ne luy ressembloit en chose quelconque : car il estoit si dissolu en uoluptez , & si abandonné à son plaisir, qu'il en oublioit tout deuoir d'honesteté. Il aimoit un ieune garson dōt il abusoit charnellement, & le menoit tousiours avec luy quand il alloit dehors en quelque guerre, ou en quelque charge & gouuernemēt de prouince. Ce garson le flattant un iour, luy dit, qu'il estoit si fort espris de son amour, qu'il auoit laissé à uoir les cōbats de gladiateurs & escrimeurs à oultrance, qui se preparoyent à Rome, sur l'heure de son partement, combien que iamais il n'eust ueu tuer hōme, ayant plus cher de seruir au plaisir de luy que au sien propre. Lucius estant bien aise de ce propos luy respondit incontinent, Il n'y a rien gasté pour cela, car ie t'en feray tout à ceste heure passer ton enuie : si commanda que lon tirast de la prison un des criminelz cōdamnez à mourir, & feit quand & quand uenir le bourreau, auquel il commanda de luy trencher la teste au milieu du soupper. L'historien Valerius Antias escrit, que ce ne fut pas pour l'amour d'un garson, ains d'une femme qu'il aimoit : mais Titus Liuius met, qu'en une harengue que Caton mesme en feit, il y auoit escript que c'estoit un Gaulois, qui trahissant les siens s'estoit uenu rendre à la porte de ce Flaminius avec sa femme & ses enfans, & que Flaminius l'ayāt fait entrer en sa salle, le tua

luy mesme de sa propre main, pour donner le
 plaisir de le uoir mourir à un garson dont il e-
 stoit amoureux. Mais il est uray-semblable que
 Caton l'escriuit en ceste sorte pour aggrauer
 le crime, & le rendre plus atroce : car qu'il
 soit uray que ce ne fust pas un traistre, ains un
 criminel condamné à mourir, plusieurs l'ont e-
 scrit, & entre autres Ciceron mesme l'orateur
 le recite au traitté qu'il a composé de la uieilles-
 se, ou il le fait racompter à Caton mesme. Com-
 ment que ce soit Marcus Cato ayant esté eleu
 Censeur, & nettoyant le Senat des personnes
 indignes d'y estre, en ietta hors Lucius Quin-
 tius Flaminius, combien qu'il fust de dignité
 Cōsulaire, & qu'il semblast que ceste note d'in-
 famie touchast aussi à son frere Titus : à l'occa-
 sion dequoy les deux freres tous esplorez, en
 toute humilité se allerent presenter au peuple
 en pleine assemblée, & feirent une requeste qui
 sembla raisonnable & ciuile, à sçauoir qu'il fust
 enioinct à Caton de uenir publiquement dire
 & declarer pour quelle cause il auoit imprimé
 ceste marque d'ignominie à une si noble famil-
 le & si bien renommee que la leur. Cato a-
 donc sans dilayer ny tirer arriere uint avec son
 compagnon sur la place, là ou il demanda tout
 hault à Titus, s'il sçauoit rien de ce banquet
 ou auoit esté commis le faict. Titus respondit
 que non : & lors Cato le racompta de bout en
 bout, & à la fin de sa narratiō prouoqua Lucius

Quintius à iurer publiquement, fil uouloit
 maintenir que ce qu'il luy mettoit sus ne fust
 ueritable. Lucius ne respondit mot : au moyen
 dequoy le peuple iugea, que la note d'infamie
 luy auoit esté iustement imprimée, & recon-
 uoya par honneur Caton depuis la tribune aux
 harangues iusques en sa maison : mais Titus
 desplaisant de la calamité de son frere, se
 benda à l'encontre de Caton, avec ceulx qui de
 longue main luy uouloyent mal, & feit tant par
 ses menees enuers le Senat, que tous les baux à
 ferme, tous les marchez, & tous les arrentemés
 qu'il auoit faits durant son magistrat, furent
 cassez & annullez, & si luy prepara & suscita
 plusieurs grâds proces: enquoy ie ne sçay fil feit
 sagement ne ciuilement, de prendre inimi-
 tié capitale à l'encontre d'un personnage hom-
 me de bien, bon citoyen, & faisant le deu de son
 office, pour un sien proche parent, mais indi-
 gne de sa parenté, & qui auoit bien merité la
 honte que lon luy auoit faite. Toutefois quel-
 que temps apres astant le peuple assemblé au
 theatre pour uoir l'esbatement des ieux, & y
 estans les Senateurs selon la coustume assis au
 plus honorable lieu, Lucius y entra, qui s'alla
 seoir humblement & simplement sans hōneur
 es plus reculez sieges du theatre: ce que uoyant
 le peuple, en eut pitié, & ne peult supporter de
 le uoir ainsi deshonoré: si se prit à luy crier qu'il
 fostaft de là, & ne cessa iusques à ce qu'il se

fust allé seoir entre les Senateurs Consulaires, qui luy feirent place, & le receurent entre eulx. Mais pour retourner à Titus, son ambition & la conuoitise d'honneur qu'il auoit de nature, fut bien estimee tant qu'elle eut matiere idoine pour s'exercer es guerres, dont nous auons par cy deuant parlé: car encore depuis son Consulat, il fut Tribun militaire de sa propre uolunté, sans que personne l'en pressast: mais quand son aage commença à decliner, & qu'il eut desisté, comme estant hors de saison, de plus pro-chasser ny exercer charge publique, alors descouurit on euidentement qu'il estoit ambitieux oultre mesure, de se laisser maistriser à ceste passion de ieunesse au decours de sa uieillesse, qui n'estoit plus apte ny propre aux actions: car il me semble que ce fut la seule cause qui l'incita à procurer la mort de Hannibal, ce qui luy apporta la malueillance, & le meit en mauuaise opinion de plusieurs: pource que Hannibal s'en estant fouy de son país, se retira premierement deuers le Roy Antiochus, lequel apres la bataille qu'il perdit en la Phrygie, se contenta fort bien que les Romains luy ottroyassent la paix à telles conditions qu'ilz uoulurent: parquoy Hannibal s'enfouit encore d'auec luy, & apres auoir longuement esté errant ça & là, finalement s'arresta au Royaume de la Bithynie au pres du Roy Prusias, au sceu & à la ueuë de tous les Romains, qui ne s'en soucioyent plus,

pource qu'il estoit uieil & cassé, sans force ne puissance aucune, comme un homme que la fortune auoit de tout poinct ruiné & foulé aux pieds. Mais Titus estant enuoyé par le Senat ambassadeur à ce Roy Prusias pour quelque autre affaire, trouua Hannibal qui faisoit sa residence en Bithynie, & fut marry de le uoir uiure, tellement que combien que Prusias luy feist de tresgrandes prieres qu'il uoulust auoir pitié de ce pauvre uicillard son familier, qui festoit uenu ietter comme en franchise entre ses bras, iamais ne le uolut laisser uiure. Or auoit Hannibal long temps au parauant eu un oracle touchant sa mort, lequel estoit de telle substance:

- » Terre Libyque engloutira le corps
- » De Hannibal quand l'ame en sera hors.

Si pensa que cela sentendist de la Libye, c'est à dire, de l'Afrique, comme s'il eust deu acheuer ses iours en Afrique pour estre inhumé à Carthage. Mais il y a en la Bithynie une certaine contree sablonneuse pres de la mer, en laquelle est une petite bourgade qui s'appelle Libyssa, là ou Hannibal faisoit sa demeure ordinaire, & se deffiant tousiours de la pusillanimité de Prusias, & redoubtant la haine des Romains, il auoit fait long temps deuant cauer soubz terre sept mines & issues secretes, lesquelles respondoient toutes au lieu ou il se tenoit, & alloient sortir les unes & les autres là, assez loing de son

logis, sans que lon en apperceust rien par dehors. Quand donques il fut aduerty lors du commandement que Titus auoit fait à Prusias de le luy liurer entre ses mains, il essaya de se sauuer par ses mines, mais il trouua que par tout il y auoit aux issues des gardes de par le Roy, & resolut adonc de se faire mourir luy mesme. Si disent aucuns qu'il entortilla quelque linge à l'en tour de son col, & puis commanda à un sien ser uiteur qu'il luy meist le genouil sur la fesse, & qu'en pesant dessus il tirast par derriere le linge de toute sa force en luy renuersant le col, & le pressant iusques à ce qu'il luy feist rēdre l'ame: les autres disent qu'il beut du sang de taureau comme parauant auoyent faict Midas & Themistocles. Mais Liuius escrit qu'il auoit du poi son qu'il gardoit pour une telle occasion, & l'ayant destrempé dedans une coupe, en la te nant en sa main, il dit auant que le boire: Or sus
 20 deliurons le peuple Romain de ce grand sou
 20 cy, puis qu'ainsi est qu'il luy griefue, & luy sem
 20 ble trop long d'attendre la mort naturelle de
 20 ce pauvre uieillard que tant il hait, combien
 20 que Titus n'en rapportera ia uictoire qui luy
 20 soit gueres honorable ny digne des anciens Ro
 20 mains, lesquelz feirent aduertir leur ennemy
 20 Pyrrus lors qu'il leur faisoit la guerre, & auoit
 20 ia gaigné des batailles sur eulx, qu'il se gar
 20 dast du poison qu'on luy auoit appareillé. Tel
 le fut la fin de Hannibal ainsi que lon treuve

par escript : dont la nouuelle estant uenue au Senat à Rome, il y eut plusieurs à qui Titus sembla par trop importun & trop cruel, d'auoir ainsi fait mourir Hannibal lors que l'aage l'auoit de tout poinct matté, ne plus ne moins qu'un oiseau à qui toutes les plumes & tout le pennage sont rumbez de uieillesse: de tant plus mesmement qu'il n'y auoit occasion quelconque qui le pressast de ce faire, sinon une conuoitise de gloire, à fin que par les chroniques il fust nommé cause & autheur de la mort de Hannibal. Et au contraire de tant plus en louoyent & estimoyent ilz la clemence & la magnanimité de Scipion, lequel l'ayant desfait en bataille dedans le pais d'Afrique, lors qu'il estoit encore redoubtable, & qu'il n'auoit iamais esté uaincu, ne le feit point chasser hors de son pais, ny ne le demanda point aux Carthaginois, ains & deuant la bataille quand il parla avec luy d'appointement, il luy toucha gracieusement en la main, & apres la bataille es conditions de paix qu'il donna aux uaincus, iamais ne meit rien en auant au preiudice de sa personne, ny ne luy courut sus en sa calamité. Et dit on que depuis ilz se rencontrerent une autre fois ensemble dedás la uille d'Ephese, là ou ainsi qu'ilz se promenoient, Hannibal premierement se meit au plus honorable lieu: ce que Scipion endura patiemment, & ne laissa pas pour cela de se promener, sans môstrer aucun semblant d'en

estre marry : puis en deuifant de plusieurs choses, ilz tumberent en propos des anciens Capitaines, & Hannibal prononcea & donna sa sentence, que Alexandre le grand auoit esté le plus grand & le plus excellent de tous les autres. Pyrrus le second, & luy le troisieme, & que adonc Scipion en se soubfiant tout doulcemēt

20 luy demanda : Et que dirois tu donc, si ie ne
 20 t'eusse point uaincu ? Le me mettrois, respondit
 20 Hannibal, non point au troisieme lieu, mais au
 20 premier, par dessus tous les Capitaines qui furent onques. Ainsi plusieurs louans ces beaux dictz & faictz de Scipion, blasmoient grandement Titus, de ce qu'il auoit, par maniere de parler, mis les mains sur le mort d'autrui. Au contraire aussi y en auoit il d'autres qui trouuoient bon ce qu'il en auoit fait, disans que Hannibal tant comme il eust uescu, estoit un feu pour l'empire Romain, qui n'auoit besoing que de quelcun qui le soufflast : & que tant comme il auoit esté en la force & uigueur de son aage, ce n'auoit point esté sa main ny son corps qui auoit donné tant d'affaires aux Romains, mais son bon sens & sa suffisance en l'art de la guerre, avec une haine qu'il auoit enracinee en son cuer, & une rancune enuieillie à l'encontre des Romains, ce que la uieillesse n'oste ny ne diminue aucunement : car la nature & la qualité des meurs demoure tousiours, mais la fortune ne dure pas tousiours une, ains se va chan-

geant, & en se changeant incite par esperance à nous courir sus ceulx qui tousiours nous font la guerre de uolunté, d'autant qu'ilz nous haïssent en leur cueur. Les choses que lon a depuis ueuës aduenir font grande foy aux raisons que lon allegue à ce propos à la descharge de Titus. Car d'un costé Aristonicus filz de la fille d'un musicien ioueur de Cithre, pour la renommee d'Eumenes, duquel il estoit bastard, emplit toute l'Asie de guerres & de rebellions de peuples qui se soubслеuerent en sa faueur: & d'autre costé Mithridates, apres tant de pertes qu'il auoit faictes contre Sylla & contre Fimbria, & apres tant de ses armées desconfites, & tant de ses Capitaines morts en bataille, se remeit sus & se refait encore grand & puissant tant par mer que par terre contre Lucullus. Et certes Hannibal n'estoit ia plus au bas que fut Caius Marius: car il auoit un Roy amy, qui luy donnoit au moins estat pour s'entretenir luy & sa maison, & si auoit superintendence sur les nauires, la cheualerie & les gens de guerre de ce Roy: là ou Marius alloit errant & mendiant sa uie par le pais d'Afrique, de sorte que ses ennemis qui estoient à Rome se mocquoyent de luy, lesquels neantmoins tantost apres se prosternerent deuant luy, quand ilz se ueirent fouetter, meurtrir & ruer dedans Rome mesme, par son commandement. Ainsi n'y a il rien que lon puisse dire asseurement petit ou grand, pour l'incertitude

de l'aduenir , attendu qu'il n'y a autre fin de changement & de mutation en l'homme que celle de l'estre . Encore y en a il qui disent que Titus ne fait pas cest acte seul ny de sa propre authorité , mais qu'il fut enuoyé ambassadeur avec Lucius Scipion , non pour autre chose , que pour faire mourir Hannibal en quelque sorte que ce fust . Au reste nous n'auons point trouué que Titus ait fait autre chose digne de memoire ny en paix ny en guerre depuis ceste ambassade : car il mourut de mort naturelle paisiblement en sa maison .

LA COMPARAISON DE TITVS

QVINTIVS FLAMINIVS AVEC

PHILOPOEMEN.

RARQVOY il est temps maintenant que nous uenions à les comparer . Quant est donques à la grâdeur des bienfaits enuers la nation Grecque , non seulement il ne fault pas accomparer Philopœmen à Titus , mais ny les autres anciens beaucoup plus grands personnages & plus excellents Capitaines que luy : car tous ces anciens la presque , estans Grecs , ont fait la guerre à d'autres Grecs , & Titus n'estant point Grec a combattu pour les Grecs . Et lors que Philopœmen , n'ayant

moyen de secourir les pauures citoyens trauaillez & affligez de guerre, s'en alla en Candie, Titus ayant desfait en bataille le Roy de Macedoine, Philippus, affranchit & remeit en liberté tous les peuples & toutes les uilles d'icelle, qui parauant estoient en seruitude. Et si lon ueult examiner de pres les batailles de l'un & de l'autre, lon trouuera que Philopœmen estat Capitaine des Achæiens a fait mourir plus de Grecs, que Titus n'a de Macedoniens, en combatant contre eulx pour la liberté des Grecs. Et quant aux imperfections, l'un estoit ambitieux, & l'autre opiniastre: l'un estoit prompt & soudain à se courroucer, l'autre difficile à appaiser. Car Titus laissa au Roy Philippus son royaume, & la dignité royale, apres l'auoir uaincu, & usa de grande benignité enuers les Ætoliens: là ou Philopœmen par un despit osta à son propre pais, & à la uille de sa naissance, les bourgs & uillages, qui de tout temps estoient ses uasfaux & contribuables. Dauantage Titus demouroit fermement amy de ceulx à qui il auoit une fois fait plaisir: & Philopœmen par une cholere estoit prest à oster ce qu'il auoit donné, & à desfaire le plaisir qu'il auoit une fois fait. Car ayant fait beaucoup de bien à ceulx de Lacedæmone, depuis il raza les murs de leur uille, destruisit & gasta tout leur plat pais, & finalement renuersa toute la forme de leur gouuernement. Et si semble que par la temerité de
sa cho-

sa cholere il fut luy mesme cause de sa propre mort, pour s'estre trop hasté d'aller auant qu'il en fust temps, courir sus à ceulx de Messene: nō pas comme Titus, qui conduisit tousiours ses affaires par grand sens, & tousiours uisa au plus seur. Mais si nous regardons au noībre & à la pluralité des batailles & des uictōires, la guerre que feit Titus à l'encontre de Philippus fut acheuee en deux batailles seulement: là ou Philopœmen en infinies batailles & rencontres ou il a tousiours eu du meilleur, ne laissa iamais en doubte que sa sūffisance ne luy eust plus aidé à gaigner la uictōire, que la faueur de fortune. Qui plus est, Titus acquit hōneur par le moyen de la puissance de Rome lors qu'elle estoit en sa fleur, & Philopœmen se feit renommer par ses faictz lors que la Grece commenceoit à decliner & decheoir: de sorte que les effectz de l'un sont communs à tous les Romains, & ceulx de l'autre propres à luy seul: pource que Titus se trouua Chef de bons & uaillans combatans, lesquelz il n'auoit pas fait telz: & Philopœmen ayant esté eleu Capitaine, rendit ses gens bons combatans & bien aguerris, qui ne l'estoyent pas au parauant. Et quant à ce que Philopœmen eut tousiours la guerre contre les Grecs, il est bien uray que ce ne luy fut pas heur, mais bien fut ce une preuue certaine de sa ualeur. Car là ou routes autres choses sont semblables & egales, il fault iuger que ceulx qui uainquent

ont plus de uertu. Or est il que Philopœmen faisant la guerre aux plus belliqueuses nations de la Grece, c'est à sçauoir aux Candiots & aux Lacedæmoniens, en a uaincu les plus fins par ruze & cantelle, & les plus uaillans par prouesse & hardiesse. Dauantage Titus uainquit en mettant seulement en euvre ce qui estoit desia trouué, estably & ordonné, c'est à sçauoir la discipline militaire, & la maniere de renger une armee en bataille, à laquelle ses gens estoient ia de longue main tous duits : là ou Philopœmen apporta & introduisit l'une & l'autre en son país, & remua tout l'ordre qu'ilz auoyent parauant accoustumé de tenir : tellement, que ce qui est le principal pour gaigner une bataille, fut trouué tout de nouueau & introduit par l'un en lieu ou il n'estoit point auparauant, & seulement employé par l'autre, qui s'en sceut bien aider l'ayant trouué tout prest. Au demourant quant aux actes de prouesse faits de leur main propre, lon en peult alleguer plusieurs beaux & grands de Philopœmen, & de Titus pas un: ains au contraire y eut un Ætolien nommé Archedemus, qui se mocquant de luy un iour, luy reprocha, que le iour de la bataille pendant qu'il couroit l'espee au poing, là part ou il uoyoit que les Macedoniés combatoyent & faisoient teste, Titus rendoit les mains iointes au ciel, & samusoit à faire prieres aux Dieux sans se bouger, lors qu'il estoit heure de comba-

tre à bon esciant. Qui plus est, tous les beaux
 faicts que feit onques Titus, furent tousiours
 en estat de Consul ou de lieutenant, ou com-
 ment que ce soit, en magistrat : là ou Philopœ-
 men se monstra aux Achæiens, non moins uer-
 tueux ny de moindre execution estant homme
 priué qu'estant Capitaine : car estant Capitaine
 il chassa Nabis hors de Messene, & deliura les
 Messeniens de seruitude : & estant homme pri-
 ué, il ferma les portes de la uille de Sparte au
 uisage de Diophanes Capitaine des Achæiens
 & de Titus, les gardant d'y entrer, en quoy fai-
 sant il sauua la uille d'estre saccagee. Par ainsi e-
 stant né pour commander, il ne sçauoit pas seu-
 lement commander selon les loix, ains aux loix
 mesmes quand il en estoit besoing, & que le
 bien public le requeroit : car lors il n'attendoit
 pas que ceulx qu'il deuoit gouuerner luy don-
 nassent autorité de commander, ains la pre-
 noit de luy mesme, & uoit d'eulx quand il en
 estoit temps, estimant, que celuy qui entendoit
 mieulx qu'eulx ce qu'il falloit qu'ilz feissent, e-
 stoit plus ueritablement leur Capitaine, que ce-
 luy qui estoit eleu par eulx. Parquoy bien font
 à louer les actes de clemence & de benignité
 que Titus feit enuers les Grecs, mais encore
 plus ceulx de hardiesse & de magnanimité que
 Philopœmen feit enuers les Romains : car il est
 bien plus aisé de faire plaisir & gratifier aux
 plus foibles, qu'il n'est pas de nuire & de resi-

fier aux plus puissans . Puis que donques apres
 les auoir ainsi examinez & conferez l'un avec
 l'autre, il est mal aisé à discerner entierement ce
 qu'il y a de difference entre eulx , à l'adventure
 ne sera ce point trop mal arbitré ny iugé , si
 nous donnons au Grec la couronne de l'art mi-
 litaire , & la louange de bon Capitaine , & au
 Romain celle de clemence , de iustice & de
 bonté.



P Y R R V S.

QN treuve par escript, que depuis le deluge, le premier Roy des Thesprotiens & des Molossiens fut Phaëton, l'un de ceulx qui avec Pelasgus uindrent en la province d'Epire : mais quelques autres ueulent dire, que Deucalion & sa femme Pyrra, apres auoir edifié & fondé le temple de Dodone au pais des Molossiens, s'y arresterent. Comment que ce soit, long temps depuis Neoptolemus filz d'Achilles y amenant grand peuple quand & luy, conquist le pais, & laissa apres luy une succession des Roys, qui de son nom furent appelez les Pyrrides, à cause que des son enfance il auoit esté surnommé Pyrrus, qui uault autant à dire comme, Roux, & l'un de ses enfans legitimes qu'il eut de Lanassa fille de Cleodes filz de Hyllus, fut aussi nommé par luy Pyrrus. C'est la cause pour laquelle Achilles est honoré & reueré en Epire comme

un Dieu, y estant appellé Aspetos en langage du païs : mais apres les premiers Roys descendans de celle race, ceulx du milieu deuindrent Barbares, de sorte qu'il n'est point de memoire d'eulx ny de leur puissance, iusques à un nommé Tharrytas, lequel ayant le premier poly les uilles de son païs, & orné de lettres Grecques, loix & coustumes ciuiles, en rendit son nom cognu à la posterité. Ce Tharrytas laissa un filz qui eut nom Alcetas, d'Alcetas nasquit Arymbas, d'Arymbas & de Troiade sa femme sortit Æacides qui espouza Phthia fille de Menon Thessalien, qui fut homme fort renommé du temps de la guerre que lon surnomme Lamiaque, & qui y eut plus d'autorité que nul autre des confederez apres Leosthenes. Cestuy Æacides eut de sa femme Phthia deux filles, Deidamia & Troiade, & un filz, qui fut Pyrrus : mais de son temps les Molossiens se mutinerent, & le chasserent de son royaume, lequel ilz mirent entre les mains des enfans de Neoptolemus. Au moyen dequoy les amis d'Æacides que lon peut prendre au corps, furent tous mis à mort : mais Androclides & Angelus desrobberent Pyrrus qui estoit encore enfant de mamelle, que les ennemis cherchoyent par tout pour le faire mourir, & s'en fouirent à tout, trainans avec'eulx peu de seruiteurs, & les femmes qui estoient necessaires pour traiter l'enfant & luy donner à tetter, à l'occasion dequoy leur fuitte

estoit fort empeschee, & ne pouuoient pas faire grand chemin, de sorte qu'ilz furent facilement attaincts par ceulx qui les poursuyuoÿent: & lors ilz meirent l'enfant entre les mains de Androclion, Hippias & Neander trois ieunes hommes forts & dispos, desquelz ilz se foyent, & leur commanderent qu'ilz s'en courussent le plus roide qu'ilz pourroient uers une uille du royaume de Macedoine qui s'appelle Megares; & eulx ce pendant partie en priant, & partie en combatant arresterent les poursuyuans iusques au soir. Et les ayans à la fin fait retirer à toute peine, ilz s'en coururent apres ceulx qui portoyent Pyrrus, lesquelz ilz trouuerent qu'il estoit ia Soleil couché: & là cuidans estre arriuez au but desiré de leur esperance, ilz s'en trouuerent bien loing, pource qu'ilz rencontrerent la riuiera qui court au long des murailles de la uille, si aspre & si roide, qu'elle leur faisoit frayeur à uoir: & quand ilz sonderent le guay ilz trouuerent qu'il estoit impossible de la guayer, tant elle estoit trouble & enflée de quel que rauage de pluyes qui estoient suruenues, avec ce que l'obscurité de la nuict rendoit toutes choses encore plus effroyables. Si ne furent pas d'aduis ceulx qui portoyent l'enfant d'essayer à le passer eulx seulz ny les fêmes aussi qui le nourrissoient, & oyans sur l'autre bord de la riuiera quelques gés du païs, les prierent & supplierēt au nom des Dieux, qu'ils leur uoulassent

aider à passer cest enfant, en leur monstrant de loing Pyrrus: mais ces gens ne les entendoient point pour le grand bruit que faisoit le cours de la riuere, & demourerent long temps en ce poinct les uns à crier, les autres à prester l'oreille, sans pouuoir rien entendre, iusques à ce qu'il y eut quelque un de la compagnie qui s'aduisa d'arracher de l'escorce d'un chefine, sur laquelle il escriuit avec l'ardillon d'une boucle la fortune & necessité de l'enfant: puis entortilla l'escorce à l'entour d'une pierre pour luy donner pois, à fin de la pouuoir lancer, & ainsi la ietta de l'autre costé de la riuere: les autres disent qu'il picqua l'escorce au bout d'un iauelot qu'il darda. Ceulx qui estoient sur l'autre riue ayans leu l'escripture de l'escorce, & par icelle entendu le danger pressant auquel estoit l'enfant, coupperent soudainement à la plus grande diligence qu'ilz peurent des arbres, qu'ilz lierent ensemble: & ainsi trauerferent la riuere. Celuy qui passa le premier, d'aduenture se nommoit Achilles, lequel prit l'enfant & le passa: les autres passerent semblablement les autres, selon qu'ilz se rencontrerent. Ainsi s'estans sauez & eschappez des mains de ceulx qui les poursuuyoyent, ilz feirent tant par leurs iournees, qu'ilz arriuerent deuers Glaucias le Roy d'Esclauonnie, lequel ilz trouuerent en sa maison assis aupres de sa femme: si meirent l'enfant à terre au milieu de la place deuant luy. Le Roy

demoura longuement pensif sans mot dire, consultant en soy mesme ce qu'il en deuoit faire, pource qu'il redoubtoit Cassander, qui estoit mortel ennemy de Æacides. Et ce-pendant l'enfant Pyrrus, se trainnant de luy mesme à quatre pieds, prit le bout de la robbe du Roy avec ses mains, & feit tant qu'il se leua sur ses pieds contre les genoux du Roy: ce qui l'ement à rire du commencement, & puis apres à pitié, pource qu'il sembloit un suppliant qui se fust uenu ietter entre ses bras en franchise: les autres disent que ce ne fut pas à Glaucias qu'il s'adressa, ains à l'autel des Dieux domestiques, au long duquel il se leua & l'embrassa de ses deux bras. Ce que Glaucias estimant estre fait par expresse ordonnance diuine, consacra sur l'heure mesme l'enfant entre les mains de sa femme, & luy commanda de le faire nourrir avec les siens. Peu de temps apres ses ennemis le luy enuoyerent demander: & qui plus est, Cassander luy feit offrir ^a deux cents talents, pour le luy liurer entre ses mains: ce qu'il ne uoulut onques faire, ains au contraire si tost qu'il fut arriué au douzieme an de son aage, le remena avec une armee en Epire, & l'en establit Roy. Or auoit Pyrrus au uisage une maiesté royale, laquelle tenoit plus du terrible que du uenerable, & si n'auoit point en la machouaire de dessus les dents distinguees l'une de l'autre, ains estoit un os conti-

^a Six
uings
mille e-
cus.

nuel marqué seulement un peu par dessus de petites coches aux endroits ou les dents deuoient estre diuisees: & auoit on opinion qu'il guarissoit ceulx qui estoient malades de la ratte en sacrifiant un coq blanc, & touchant avec son pied droit tout doucement à l'endroit de la ratte le flanc gauche des malades couchez à la renuerse:& n'y auoit si pauure, si basse, ne si uile personne qui le requist de ce remede, à qui il ne l'otroyast, prenant le coq qu'il auoit sacrifié pour son salaire, & luy en estoit le present tres-agreable. Lon dit que le gros ortueil de son pied droit auoit quelque uertu diuine, de sorte que apres sa mort quād on brusta le corps, tout le reste ayant esté consommé & reduit en cendres par le feu, on trouua ledit ortueil tout entier sans auoir esté en rien offensé: mais quant à cela nous en escrirons cy apres. Au reste comme il fut arriué à son dixseptieme an, cuidant desormais estre bien asseuré en la possession de son royaume, il luy aduint de faire un uoyage en Esclauonnie aux nopces de l'un des enfans de Glaucias, avec lequel il auoit esté nourry: & si tost qu'il eut le dos tourné, les Molossiens se rebellerent de rechef contre luy, chasserent ses seruiteurs & amis, pillerent tous ses biens, & se rendirent à son aduersaire Neoptolemus. Parquoy Pyrrus ayant ainsi perdu son estat, & se uoyant delaisné de tout le monde, se retira deuers Demetrius filz d'Antigonus qui auoit

espousé la sœur Deidamia, laquelle estât encore petite garce auoit esté accordée à Alexādre filz d'Alexādre le grād & de Roxane, & l'appelloit on sa femme: mais toute ceste race la ayant esté malheureusemēt esteincte, Demetrius l'espousa depuis quand elle fut en aage de marier. Et en celle grosse bataille qui fut donnée pres la uille d'Hipse, là ou tous les Roys combattirent, Pyrrus, encore qu'il fust bien ieune, y estant en personne à l'entour de Demetrius, tourna en fuitte ceulx qui se trouuerent en teste deuant luy, & y fut renommé pour l'un des meilleurs combatans: qui plus est, apres que Demetrius eut perdu la bataille, il ne l'abandonna point, ains luy garda fidelement les uilles de la Grece qu'il luy meit entre mains. Et depuis ayant esté accord traitté entre Demetrius & Ptolomæus, il alla pour luy en ostage au Royaume d'Ægypte, là ou il feit cognoistre à Ptolomæus tant à la chassé qu'à tous autres exercices de la personne, qu'il estoit fort & roide & patient de labeur: au reste uoyant que Berenice entre les femmes de Ptolomæus, estoit celle qui auoit plus de credit enuers son mary, comme celle qui estoit aussi la plus honeste & la plus sage, il se meit à luy faire la cour plus qu'à nulle des autres: car il estoit hōme qui scauoit fort bien s'humilier enuers les grans, dont il pouuoit tirer du profit, & s'insinuer en leur bonne grace, comme aussi estoit il grand mes-

prifeur de ceulx qui estoient au deffous de luy. Et au demourant, estant honeste & bien conditionné en ses meurs, il fut preferé à plusieurs autres ieunes princes, pour estre mary d'Antigone fille de la Royne Berenice, qu'elle auoit eüe de Philippus auât qu'elle fust mariee à Ptolomæus: & depuis ceste alliance de mariage estant de plus en plus estimé & fauorisé par le moyen d'Antigone, laquelle se monstra bonne & uertueuse enuers luy, il feit tât à la fin qu'il eut gens & argent pour s'en retourner au royaume d'Epire, & le reconquerir. Si y fut bien recueilly du peuple pour la haine qu'il portoit à Neoptolemus, à cause qu'il traittoit ses subiects durement & uiolentement. Ce neantmoins Pyrrus craignât qu'il ne se retirast deuers quelque un des autres Roys, pour en auoir secours contre luy, il aima mieulx appointer avec luy: & fut accordé entre eulx qu'ilz seroyent tous deux ensemble Roys d'Epire. Mais par traict de temps, il y eut de leys gens qui secrettemēt les irriterent, & les meirent en deffiance l'un de l'autre, dont la principale cause & celle qui plus irrita Pyrrus, à ce que lon dit, eut telle origine: Les Roys d'Epire auoyent accoustumé de toute ancienneté, apres un solennel sacrifice fait à Iupiter Martial, en un lieu de la prouince Molosside qui s'appelle Passaron, de receuoir & prester aussi le serment aux Epirotes, à sçauoir les Roys qu'ilz regneroyent bien & deuēment

ſelon les loix, ſtats & ordonnances du païs, & les ſubiects reciproquement qu'ilz les defendroyent & maintiendroyent en leur Royaume ſelon les loix auſſi. Ceste cerimonie fut faite preſens les deux Roys, qui ſ'entreueirent avec leurs amis, & ſe feirent pluſieurs preſens l'un à l'autre. A ceste entreueuë ſe trouua Gelon l'un des plus fideles ſeruiteurs & affectionnez amis de Neoptolemus, lequel oultre pluſieurs autres honneurs & ſemblans d'amitié qu'il feit à Pyrrus, luy donna deux paires de bœufs à labourer, leſquelz Myrtilus un des eſchançons de Pyrrus, qui d'aduenture ſe rencontra là, luy demanda en don: mais Pyrrus les luy refuſa, & les donna à un autre, dequoy Myrtilus fut fort marry: & Gelon qui ſ'en apperceut bien, le conuia d'aller ſoupper avec luy: aucuns ueulent dire d'auantage qu'il abuſa charnellemēt de luy, pour ce qu'il eſtoit beau & ieune, & apres ſoupper commença à le ſemondre de prendre party avec Neoptolemus, & d'empoisonner Pyrrus. Myrtilus ſeit ſemblant de uouloir entendre à ceste ſemonce, & d'en eſtre cōtent: mais ce pendant il alla deſcouurir le tout à ſon maĩſtre, par le commandement duquel il ſeit encore parler à Gelon ſur ceste pratrique Alexicrates premier eſchançon de Pyrrus, comme pour eſtre conſentant & participant de ceste entrepriſe: ce que Pyrrus faiſoit pour auoir pluſieurs reſmoings, par leſquelz il peult auerer & prouuer l'empoison-

sonnement que lon machinoit à l'encontre de luy . Ainsi estant Gelon abusé , & Neoptolemus aussi avec luy , cuidant l'un & l'autre que la trame de leur conspiration fust bien acheuue , Neoptolemus en fut si aise qu'il ne la peut contenir en soy , de ioye qu'il en auoit , ains s'en descouurit à quelques uns de ses amis . Et un iour estât allé passer son temps chez sa sœur , il ne se peut tenir d'en babiller avec elle , pensant n'estre entendu de personne que d'elle , pource qu'il n'y auoit ame pres d'eulx , sinon Phænareta femme d'un nommé Samon , qui estoit le superintendât des troupeaux de bestail du Roy , encore estoit elle couchee sur un petit liât & tournée deuers la muraille , de maniere qu'il sembloit qu'elle dormist : mais ayant ouy le tout , sans que les autres s'en doubtaissent , le lendemain elle s'en alla deuers la femme de Pyrrus Antigone , & luy compta au long tout ce qu'elle auoit ouy que Neoptolemus disoit à sa sœur . Ce que Pyrrus ayant entendu , ne fit pas semblant de rien sur l'heure : mais ayant fait un sacrifice aux Dieux , il conuia Neoptolemus à uenir soupper en son logis avec luy , là ou il le tua , estant bien aduertie de la bõne uolunté que luy portoyent les premiers & principaux personnages du Royaume , qui l'enhortoyét de se despescher de Neoptolemus , & ne se contenter pas de n'auoir qu'une portion de l'Epire seulement , ains de suyure l'inclinatiõ de sa nature ,

laquelle l'auoit fait naistre à plus grandes choses: à ceste cause, estant encore ceste suspicion suruenue, il preuint Neoptolemus, & le feit mourir le premier. Au demourant, se souuenant des plaisirs qu'il auoit receuz de Prolo-
meus & de Berenice, il nōma le premier filz qui luy nasquit de sa femme Antigone Ptolomæus, & ayant fondé une uille dedans la Presque-isle de l'Epire, il la nomma Berenicide. Cela fait, en discourant plusieurs grandes entreprises, qu'il mettoit en son entendement, & plus encore en son esperâce, il proposa en luy mesme d'entendre premieremēt à gagner ce qui estoit le plus pres de luy, & trouua moyen d'ancrer dedans les affaires de Macedoine par un tel moyen: Le filz aîné de Cassander, nommé Antipater, feit mourir sa propre mere Thessalonice, & chassa du païs son frere Alexandre, lequel enuoya deuers Demetrius pour en auoir du secours, & appella semblablement Pyrrus à son aide. Demetrius se trouuant empesché à autres affaires ny peut pas aller si promptement, & Pyrrus y estāt arriué, demanda pour son salaire la uille de Nymphæa avec toute la coste maritime de la Macedoine, & oultre cela encore des terres qui n'estoyēt point de l'anciē patrimoine des Roys de Macedoine, ains y auoyent esté adioustees par armes, l'Ambracie, l'Acarnanie & l'Amphilochie: ce que le ieune Roy Alexandre luy ayant abandonné, il s'en saisit tresbiē, en mettāt

de bonnes garnisons dedans les places en son propre nom, & conquerant le reste de la Macedoine au nom d'Alexandre pressoit de pres son frere Antipater. Ce p  dant le Roy Lyfimachus desiroit bien secourir par armes Antipater: mais estant empesch   en autres affaires, il n'en auoit pas le moyen : & s  achant bien que Pyrrus recognoissant les bienfaicts qu'il auoit receuz de Ptolom  us, ne luy refuseroit iamais rien, il s'aduvisa de luy escrire des lettres feintes soubz le nom de Ptolom  us, comme fil luy eust bien instamment pri   & command   qu'il se deportast de celle guerre qu'il faisoit    Antipater, en prenant de luy pour les frais qu'il pourroit auoir faits la somme ^a de trois cents talents. Pyrrus ouurant les lettres cogneut inc  tinent que c'estoit une ruze & tromperie de Lyfimachus, pource que la salutation ordinaire que Ptolom  us souloit mettre au commencement de ses lettres quand il luy escriuoit, n'y estoit point: A mon filz Pyrrus salut: ains y auoit, le Roy Ptolom  us au Roy Pyrrus salut. Si dit sur l'heure que Lyfimachus estoit un meschant, & neantmoins depuis fait paix avec Antipater, & se trouuerent ensemble    iour assign   pour iurer sur les sacrifices les articles de leur appointement. Lon amena trois hosties pour immoler, un bouc, un taureau & un belier, desquelz le belier tumba tout roide mort de luy mesme auant qu'on luy touchast, dequoy les autres assist  s ne

Cent
uatre
ingts
mille e-
sus.

feirent que rire: mais il y eut un deuin mommé Theodotus qui dissuada à Pyrrus de iurer , disant que ce signe des Dieux menaçoit l'un des trois Roys de mort soudaine . ainsi se departit Pyrrus de ceste paix . Au reste estans ia les affaires d'Alexandre composez , Demetrius neantmoins arriua deuers luy & cogneut bien incontinent à son arriuee que Alexandre n'auoit plus besoing de son secours, & qu'il luy faisoit peur . Si n'eurent pas esté gueres de iours ensemble qu'ilz entrèrent en deffiance l'un de l'autre , & commencerent à espier tous moyens de se surprendre l'un l'autre : mais Demetrius embrasant la premiere occasion qui s'en presenta , gaigna le deuant & tua Alexandre qui n'estoit encore qu'un ieune homme , au lieu duquel il se feit declarer Roy de Macedoine . Or auoit il ia des au parauant quelques querelles à l'encontre de Pyrrus , à cause qu'il luy auoit couru le pais de Thessalie , & oultre cela la conuoitise de plus auoir , qui est le uice ordinaire des princes & grands seigneurs , faisoit que pour estre si proches uoisins , ilz s'entrecraignoient & se deffioient l'un de l'autre , encore plus mesmement apres la mort de Deidamia: mais quād ilz eurent occupé chascun partie de la Macedoine , & qu'ilz eurent à departir une mesme chose entre eulx , adonc fut bien plus grande la matiere & occasion de leur different . Au moyé dequoy , Demetrius s'en alla avec armee courir sus aux

Ætoliens, & ayant conquis le païs, y laissa son lieutenant Pantauchus avec grosse puissance: & luy ce pendant en personne marcha à l'encôtre de Pyrrus, & Pyrrus de l'autre part cōtre luy. Ilz faillirent à s'entrecouter, & tirans oultre, Demetrius d'un costé entra dedans le royaume d'Epire, dont il emmena grand butin, & Pyrrus de l'autre costé penetrant iusques là ou estoit Pantauchus, luy donna la bataille, de laquelle la meslee fut fort aspre entre les soudars d'une part & d'autre, mais encore plus entre les deux Chefs: car sans point de doute Pantauchus estoit le plus hardy Capitaine, le plus robuste de sa personne, & le plus adroit aux armes qu'eust Demetrius. Au moyé de quoy se fiât en sa force & en son courage, il alloit appellât Pyrrus au cōbat d'homme à homme: & Pyrrus de l'autre costé, ne cedant à nul des Roys en prouësse ny en desir de se faire honneur, comme celuy qui se uouloit approprier la gloire d'Achilles plus par imitation de sa uertu, que pour estre issu de son sang, passa à trauers la bataille iusques au premier reng pour s'attacher à Pantauchus: si s'entrecatcherent à coups de iauelines premierement, puis en se ioignant de plus pres, combattirent à coups d'espee, non seulement avec art, mais aussi avec force grande, iusques à ce que Pyrrus y fut blecé en un lieu, & blecea son ennemy en deux, l'un aupres de la gorge, & l'autre en la cuisse, de

maniere qu'il luy feit à la fin tourner le dos , & l'abbatit en terre: mais toutefois il ne le tua pas, pource que soudain qu'il fut tumbé, ses gens le rauirent & l'enleuerent . Mais les Epirotes encouragez par la uictoire de leur Roy & admiration de sa uertu, feirent tel effort qu'ilz rompirent à la fin la bataille des gens de pied Macedoniens : & les ayans tournez en fuitte , les poursuyuirent si uiuement qu'ilz en tuerent un grand nombre, & en prirent cinq mille prisonniers . Ceste desfaitte ne remplit pas tant de courroux les cueurs des Macedoniens pour la perte qu'ilz en receurent, ny de haine à l'encontre de Pyrrus , comme elle luy apporta de gloire, & donna matiere de parler de son excellente & admirable uertu à ceulx qui l'auoyent ueu en besongne , & qui s'estoyent trouuez deuant luy en ceste bataille : car il leur estoit aduis qu'ilz auoyent apperceu en luy le uisage, la uistesse & le mouuement d'Alexandre le grand, & qu'ilz auoyent ueu comme une ombre & une representation de la uehemence & de la force & uiolence dont il combatoit: là ou les autres Roys ne le contrefaisoyent sinon en habits de pourpre, en nombre de gardes autour de leurs personnes, en une façon de ployer un peu le col, & de parler haultainement : & Pyrrus seul le representoit en exploits d'armes, & en actes de prouesse . Au demourant, quant à sa suffisance en l'art militaire, pour sçauoir dresser

batailles & bien mener gens à la guerre, on en
 peult tirer preuue suffisante des liures qu'il
 en a escriz. Et oultre ce lon dit que le Roy An-
 tigonus interrogué, qui luy sembloit le plus
 » grâd Capitaine, respōdit Pyrrus, pourueu qu'il
 » uieillisse, parlant des Capitaines de son temps
 seulement: mais Hannibal le prononcea le pre-
 mier de tous uniuersellemēt en experiēce & suf-
 fisance au mestier de la guerre, Scipion le se-
 cond, & soy le troisieme, ainsi que nous auons
 escrit en la uie de Scipion. Aussi semble il que
 Pyrrus ne feit iamais autre chose en toute sa
 uie, que uacquer & estudier à ceste science, com-
 me à celle qui estoit ueritablement royale, sans
 faire compte de toutes autres sciences gentilles
 à sçauoir. Auquel propos on recite, que quel-
 que iour en un festin on luy demanda, qui luy
 sembloit le meilleur ioueur de flustes de Pythō
 » ou de Cephesias, & il respondit, que Polyper-
 » chon à son aduis estoit le meilleur Capitaine:
 comme s'il eust uoulu dire, que c'estoit la chose
 seule dont un prince se doibt enquerir, & qu'il
 doibt apprēdre & sçauoir. Il estoit doux & pri-
 ué avec ses familiers & amis, facile à pardonner
 quand on l'auoit courroucé: & neantmoins ar-
 dent & uehemēt à rendre les plaisirs qu'il auoit
 receuz. Ce qui fut cause qu'il porta fort impa-
 tiemment la mort d'Æropus, non qu'il ne dist
 bien qu'il ne luy estoit riē aduenü qui ne fust or-
 dinaire à la nature humaine: mais se reprenant
 & se

& se blasmant soy mesme, de ce qu'il auoit tant dilayé & tant differé, qu'à la fin il auoit perdu tout moyen de recognoistre enuers luy les plaisirs qu'il en auoit receuz : car il est bié uray, que un argent presté se peult bien rendre aux heritiers de ceulx qui l'ont presté, mais il fait mal à un homme de bonne & droitte nature, quand il ne peult faire sentir la recompense des plaisirs qu'il a receuz, à celuy mesme qui les luy a faits. Vne autre fois comme il estoit en la uille d'Ambracie, il y eut quelques uns de ses amis qui luy conseillèrent, qu'il chassast de la uille un mesdisant, qui ne cessoit de mal parler de luy :

» mais il leur respondit, Il uault mieux, qu'en de-

» mourant icy il mesdise de nous entre peu de

» gens, qu'en le chassant le faire aller ça & là par

» tout le monde semer sa mesdisance cōtre nous.

On luy amena un iour quelques ieunes hommes, qui en beuuant ensemble auoyent dit tout plein de paroles outrageuses de luy: il leur demanda sil estoit uray qu'ilz les eussent dittes.

» Ouy, respondit l'un, Sire, nous les auons dittes

» uoirement, & en eussions bié dit encore dauā-

» tage si le uin ne no⁹ eust failly. Il s'en prit à rire, & leur pardonna. Apres la mort d'Antigone il espousa plusieurs femmes pour le bien de ses affaires, & pour en estre plus fort d'alliances. Car il espousa la fille de Autoleon Roy de Pæonie, & Bircenna fille de Bardillis Roy d'Esclauonnie, & Lanassa fille d'Agarthocles tyran

de Syracuse, laquelle luy apporta pour son douaire l'isle de Corfou, que son pere auoit prise. Si eut de sa premiere femme Antigone un filz qu'il nōma Prolomæus, de Lanassa un autre qui eut nō Alexādre, & de Bircēna un autre le plus ieune de tous, qui fut nommé Helenus, lesquels tous, encore que de race & d'inclination de nature ilz fussent Martiaux, furent encores par luy nourriz aux armes, & des leur naissance aguisez & acharnez à cela. Auquel propos on raconte, que l'un d'eux estant encores ieune enfant luy demāda un iour auquel d'eulx il laisseroit son Royaume: Il luy respondit, A celuy qui aura l'espee la mieulx trenchante. Cela ressemble proprement à ceste malediction Tragique, dont Oedipus maudit ses enfans,

Qu'au fer trenchant facent ilz le partage,
De leur maison & de leur heritage.

Tant est malfociable, cruelle & bestiale la nature de l'ambition, & la conuoitise de dominer. Mais apres ceste bataille, Pyrrus s'en retourna en son païs plein de gloire, le cueur hault eleué, avec grand contentement de son esprit. Et comme à son retour les Epirotes ses subiects le surnommaient Aigle, il leur respondit: Si ie suis Aigle, c'est par ueus que ie le suis, car uoz armes sont les ailes qui m'ont eleué. Peu de temps apres estant aduertty que Demetrius estoit tumbé en une griefue maladie en tres-grand danger de sa personne, il se ietta sou-

dainement dedans la Macedoine, comme pour
la courir & piller seulement : mais il s'en fallut
bien peu, qu'il ne la prist toute, & qu'il ne s'em-
paraſt du Royaume entier ſans coup frapper :
car il penetra iuſques à la uille d'Edeſſa ſans
trouuer aucune reſiſtence , ains au contraire,
plusieurs du païs ſe rengooyent uoluntaire-
ment à luy, & ſe uenoyent rendre en ſon camp.
Si feit le danger mouuoir Demetrius, plus que
l'eſtat & la diſpoſition de ſa perſonne ne por-
toit : & d'autre part ſes amis, ſeruiteurs & Capi-
taines en peu de temps ayans mis enſemble bõ
nombre de gens de guerre , marcherent à toute
diligence , & avec bonne intention de bien
faire à l'encontre de Pyrrus , lequel n'eſtant
uenu qu'en equippage de coureur ſeulement,
ne les uolul pas attendre , ains ſ'en fouit, & en
ſ'enfuyant perdit une partie de ſes gens, pource
que les Macedoniens allerent apres , & le
chargerent par le chemin : mais pour l'auoir
ainſi facilement & toſt dechaffé hors de la Ma-
cedoine , Demetrius ne le contemna pas pour-
tant , ains pretendant à plus haultes entrepiſes,
& au recouurement des terres & ſeigneuries ,
que ſon pere auoit tenues, avec une puisſan-
ce de cent mille combatans, & de cinq cẽts uoi-
les qu'il meit ſus , il ne ſe uolul pas amuſer à
faire la guerre à Pyrrus , ny auſſi laiſſer aux
Macedoniens , pendant qu'il ſeroit abſent, un
ſi dangereux uoiſin , & ſi malaiſé à manier. Au

moyé dequoy n'ayant pas loisir de luy faire la guerre, il feit paix & accord avec luy, à fin de pouuoir plus à son aise courir sus aux autres Roys. Estant donques pour ceste cause l'appointement fait entr'eux, les autres princes & Roys commencerent à descouurir l'intention pour laquelle il faisoit ce grand appareil: & en ayàs peur feirét entédre par lettres & ambassadeurs à Pyrrus, qu'ils s'esbahissoyent cōment il laissoit ainsi eschapper le poinct de son occasiō en attendant que Demetrius luy feist la guerre à son bō poinct & aiscement, & comment, ueu qu'il le pouuoit ietter hors de la Macedoine, lors qu'il entreprenoit tant de choses, & estoit empesché ailleurs, il aimoit mieux attendre à s'attacher à combattre contre luy pour les autrelz, tēples & sepultures de la Molosside, quand il se seroit ia faict grand & puissant, & qu'il ne auroit plus d'autres affaires, attendu mesmemēt que de fresche datter il luy auoit osté l'une de ses femmes avec la uille de Corfou. Car Lanassa se plaignant, & estant mal contente de ce que il traittoit mieulx, & faisoit plus de compte de ses autres femmes, qui estoient de natiōs Barbares, que d'elle, s'estoit retiree à Corfou: & uoulant estre remariee à quelque Roy, auoit appelé Demetrius, scachant tresbien que c'estoit celuy de tous les Roys, qui estoit le plus aisé à induire à faire nopces. Demetrius ne faillit pas d'y aller, & l'ayāt espousee, meit garnison dedās

la uille de Courfou . Or ne laisserent pas les autres Roys , en escriuant ces aduertissemens à Pyrrus , de trauailler ce pendant eulx mesmes Demetrius , qui dilayoit tousiours , & estoit encore apres à dresser son equippage . Car d'un costé Ptolomeus avec une grosse armee de mer uint en la Grece , là ou il fait tourner & rebeller les uilles contre luy . De l'autre costé , Lyfimachus entrant dedans la haulte Macedoine par le pais de la Thrace , la courut & pilla toute . Parquoy Pyrrus s'armant aussi quand & eulx , s'en alla deuât la uille de Berrœe , pensant bien ce qui aduint , q̃ Demetrius uolât aller à l'encontre de Lyfimachus , laisseroit la basse Macedoine sans defense : & la nuit mesme qu'il partit , il luy fut aduis , que le Roy Alexandre le grand l'appella , & qu'il s'en alla uers luy , lequel il trouua malade en son liât , & neantmoins eut bon recueil & bonnes paroles de luy , car il luy fit promesse de le secourir à bon esciant : &

Pyrrus prit la hardiesse de luy dire , Mais comment , Sire , me pourras tu secourir , ueu que tu es malade au liât ? Alexandre luy respondit , De mon nom seulement : & que tout aussi tost il mōta dessus un cheual de Nisœe , & se meit deuant pour luy monstrier le chemin . Ceste uision qu'il eut en songe l'asseura , & l'encouragea dauâtage à poursuyure son entreprise . Au moyen dequoy , marchant en toute diligence , il eut en peu de iours fait le chemin qu'il y auoit ius-

ques à la uille de Berroe , & la surprenant d'arriuee , y logea en garnison la pluspart de son armee , puis enuoya le reste soubz la conduite de ses Capitaines ça & là , pour conquerir les enuironz . Ce que Demetrius entendant , & aussi sentant un mauuais bruit qui couroit en son camp parmy les Macedoniens , il n'osa les mener plus auant , de peur que quād ilz seroyent pres de Lyfimachus Roy Macedonien de nation , & qui auoit grande reputation d'estre homme de guerre , ilz ne se rengeassent de son costé , & ne se rendissent à luy . A ceste cause il tournatout court à l'encôtre de Pyrrus , comme contre un Prince estranger maloulu des Macedoniens . Mais quand il se fut campé assez pres de luy , plusieurs uenans de Berroe en son camp y allerent preschans les louanges de Pyrrus , disans que c'estoit un Prince magnanime , inuincible en guerre , & qui traittoit doucement & humainement ceulx qu'il prenoit : & parmy ceux là il y en auoit d'autres qui n'estoyent pas naturelz Macedoniens , ains estans attiréz par Pyrrus faignoyēt l'estre , & alloient disans que l'occasion estoit uenue de se tirer hors de la superbe domination de Demetrius , en se tournāt du costé de Pyrrus Prince doux & gracieux , qui aimoit les souldards & les gés de guerre . Ces paroles emeurēt & esbrālerent la plus part de l'armee de Demetrius , de maniere que les Macedoniens regardoyent

par tout, filz pourroyent choisir & trouuer à l'œil Pyrrus pour s'aller rendre à luy, car il auoit osté son armet de sa teste : mais s'estant aperceu que cela le faisoit descognoistre, il le remeit, & lors il fut recogneu de tout loing, à cause du beau & grand pennache, & des cornes de bouc qu'il portoit pour cimier dessus son armet. Si y eut adonc grand nombre de Macedoniens, qui accoururent à luy, & luy demanderent le mot du guet, comme à leur souuerain Prince & à leur Roy : les autres meirent à l'entour de leurs testes des chapeaux de brâches de chesne, pource qu'ilz ueoyent que les gens en estoient aussi couronnez, & y en eut quelques uns qui prirent bien la hardiesse d'aller dire à Demetrius mesme qu'il feroit, à leur aduis, sagement & bien, s'il cedit à la fortune, & abandonnoit tout à Pyrrus : tellement que Demetrius uoyant l'esmeute de son camp respondete à ces paroles, s'en effroya de sorte, qu'il ne sceut autre party prendre que de s'en fouir secretement, en s'affublant d'un pauvre petit manteau, & d'un chapeau qu'il meit sur sa teste, pour n'estre point cogneu. Là dessus arriua Pyrrus en son camp, qui prit & gaigna tout ce qui y estoit, & fut sur le chap déclaré Roy des Macedoniës. De l'autre costé y suruint aussi tantost apres Lysimachus, lequel disant auoir aidé à chasser & desfaire Demetrius, uouloit semblablement auoir sa part du Royaume de Macedoine : par-

quoy Pyrrus ne se fiant encore pas trop aux Macedoniés, ains estant en doubte de leur foy, accorda à Lyfimachus ce qu'il luy demandoit : & ainsi departirent entre eulx les uilles & provinces du Royaume de Macedoine . Cela leur profita sur l'heure & seruit à appaiser la guerre qui estoit pour en soudre promptement entre eulx:mais peu de temps apres ilz apperceurent bié, que ce partage n'estoit point amortissemēt d'inimitié, ains plus tost cōmencement de querelles & de dissensions entre eulx : car ceulx de qui la mer, les mōtagnes & les deserts inhabitables ne peuuent arrester l'auarice, ny les bornes qui separent l'Asie de l'Europe, ne peuuent terminer l'insatiable conuoitise d'auoir, comment se contenteroyent ilz du leur, sans uouloir usurper l'autrui, quand leurs confins uiēdroyēt à se toucher, & à se ioindre de si pres qu'il n'y auroit riē entre deux ? Il n'est aucunemēt possible: car à la uerité ilz s'entrefont tousiours la guerre de uolunté, ayans ces deux maledictions enracinees en eulx, qu'ilz espient continuellemēt les moyens de se surprendre l'un l'autre, & portent enuie chacun à son uoisin : mais en apparence ilz usent de ces deux termes de paix & de guerre, comme d'une monnoye, selon qu'il leur uient mieulx à propos, non pour le deuoir ny pour la raison & iustice, ains pour leur profit : & sont plus gens de bien quand ilz confessent rondement qu'ilz font la guerre, que quand

ilz desguisent la cessation ou surseance de l'exécution de leur mauuaise uoulunté par le sainct nom de iustice ou d'amitié . Ce que Pyrrus tesmoigna bien alors : car uoulant empescher que Demetrius ne se remeist sus une autre fois , & qu'il ne se reuinist comme d'une longue & perilleuse maladie , il alla secourir les Grecs contre luy , & fut à Athenes , ou il entra dedans le chasteau , & y sacrifia à la Deesse Minerue : puis en sortit & descendit le mesme iour , disant qu'il auoit fort agreable l'amitié & la cōfiance que les Atheniens monstroyent auoir en luy : mais qu'en recompense il leur conseilloit qu'ilz ne laissassent plus entrer pas un Prince ne Roy dedans leur uille filz estoient sages , & qu'ilz ne leur ouurissent point leurs portes . Cela fait , il appointa avec Demetrius , lequel peu de iours apres s'en estant allé faire la guerre en Asie , Pyrrus de rechef à la suscitation de Lyfimachus feit soubleuer & rebeller la Theffalie contre luy , & alla guerroyer les garnisons qu'il auoit laissées dedans les uilles Grecques , se trouuant mieulx des Macedoniens en les tenant continuellement en exercice de guerre , qu'en les laissant en repos , avec ce que luy mesme estoit de telle nature qu'il n'eust sceu demourer en paix . A la fin Demetrius ayant esté entierement desfaict & ruiné en Syrie , Lyfimachus se uoyant deliuré de toute crainte quant à ce costé la , & se trouuant de loisir au demourant , & non distrait

d'autres affaires, s'en alla incontinent faire la guerre à Pyrrus, lequel estoit pour lors de sejour pres la uille d'Edeffa, & rencontrant en son chemin des uiures qu'on luy portoit, chargea ceulx qui les conduisoient, & les destrouffa: au moyen dequoy il meit premierement Pyrrus à destroit de uiures, & puis par lettres & par messagers, il corrompit les principaux hommes de la Macedoine, en leur remonstrant que c'estoit une grande honte à eulx d'auoir choisy pour leur Prince & seigneur souuerain un estranger, duquel les predecesseurs auoyent tousiours esté subiects & uassaux des Macedoniens, & ce pendant uouloir ietter hors de la Macedoine ceulx qui auoyent esté familiers & amis du Roy Alexandre le grand: ausquelles remonstrances plusieurs des Macedoniens presterent l'oreille, dont Pyrrus festonna tellement qu'il se retira avec ce qu'il auoit de gens de guerre, Epirotes, & autres siens alliez, en perdant la Macedoine de la mesme sorte & maniere qu'il l'auoit gaignee. Pourtant ne fault il point que les Princes & Roys blasment les hommes priuez, si quelquefois ilz se tournent selon qu'il leur uient à propos pour leur profit: car en ce faisant ilz ne font que les imiter & ensuyure, eulx qui leur sont maistres de toute desloyauté, trahison & infidelité, estimans que celuy fait mieulx ses besongnes, qui moins obserue ce que ueulent le droit & la iustice. S'estât donques Pyrrus alors

retiré au Royaume d'Epire en abandonnant la Macedoine, la fortune luy donnoit bien occasion & moyen de uiure en paix & en repos sans plus se trauailler, fil eust uoulu se contenter de regner sur ses subiects & uassaux naturelz seulement : mais luy estimant que fil ne faisoit du mal à quelqu'un, ou que quelqu'un ne luy en feist, il ne sçauoit à quoy passer son temps, & qu'il languiroit d'ennuy, ne pouuoit demourer en paix, ains comme dit Homere d'Achilles,

» Il languissoit d'estre tant de seiour,

» Ne demandant que la guerre & l'estour.

Parquoy ainsi comme il cherchoit matiere de nouveaux affaires, la fortune luy en presenta une telle: Enuiron ce tēps la les Romains d'adventure auoyent la guerre contre les Tarētins, qui ne la pouoyent soustenir, ny ne sçauoyent trouuer moyen de la pacifier pour la temerité, folie & meschanceté de leurs gouuerneurs, qui leur mettoient en teste de faire Pyrrus leur Capitaine, & l'appeller pour la conduite de ceste guerre, pource que lors il estoit moins empesché que nul des autres Roys, & estoit par tout estimé grand homme de guerre & fort bon Capitaine. Or les plus uieux & les plus sages bourgeois de la uille resisterent tout ouuertement à ce conseil la: mais les uns estoient rebouttez par les crieries & la uiolence de la commune qui demandoit la guerre, les autres uoyans ces rabrouēmens qu'on leur faisoit, se deportoyent

de plus se trouuer es assemblees de uille . Mais un entre les autres, nommé Meton, homme de bien & d'honneur, estant le iour escheut, auquel ceste matiere se deuoit resoudre au conseil, & le decret s'en passer & ratifier, quand tout le peuple de Tarente fut assemblé & assis au theatre, meit sur sa teste un chapeau de fleurs tout fené, & prit en sa main une torche, comme s'il eust esté yure, & ayant une menestriere iouant de la fluste, qui marchoit deuant luy, s'en alla en tel equipage dansant iusques au beau milieu de l'assemblee du peuple, là ou, ainsi que coustumierement il aduient en une tourbe de peuple maistre de foy, ou il y a assez mauuais ordre, les uns se prirent à battre des mains, les autres à rire, & n'y eut personne qui l'empeschast de faire ce qu'il uoulut, ains crièrent tous à la menestriere qu'elle iouast hardiment, & à luy qu'il chantast, se tirant en auant. Si feir semblant de se preparer pour ce faire: & comme on luy eut fait silence pour l'ouir chanter, il se prit

à dire tout hault & clair: Vous faitres bien, seigneurs Tarentins, de ne defendre point de iouer & se resiouir à ceulx qui en ont enuie, pendant qu'il leur est encore loisible de ce faire: & si uous mesmes estes sages, uous iouirez aussi tous, tant que uous estes, de uostre liberté, tandis qu'elle uous dure: car quand le Roy Pyrrus fera en ceste uille, ie uous aduise qu'il uous fauldra uiure tout autrement, & prendre

23 toute autre façon de faire . Ces paroles de Meton emeurent plusieurs des assistens , & courut soudain un bruit par toute celle assemblée, qu'il disoit la uerité : mais ceulx qui auoyent offensé les Romains, craignans que si la paix se faisoit, ilz ne fussent liurez entre leurs mains, alloient rensans le peuple, en demandant comment ilz estoient si bestes, que d'endurer que lon se moquast & se iouast ainsi licencieusement d'eulx, & en disant cela, ilz se benderēt ensemble, & chasserēt Meton hors du theatre. Ainsi fut le decret passé & autorisé par les uoix du peuple, & enuoya lō des ambassadeurs en Epire qui porterēt des presens à Pyrrus, non seulement de la part des Tarentins, mais aussi des autres peuples Grecs habitans en Italie, disans qu'ilz auoyent besoing d'un Capitaine aduisé & experimenté, & qui eust reputation au faict de la guerre seulement, pource qu'au demourant, quant au nombre de bons combatans ilz en auoyent assez en Italie mesme, & qu'ilz pourroyent mettre ensemble des Lucaniens, Messapiens, Samnites & Tarentins, iusques au nōbre de uingt mille cheuaux, & de gens de pied, quand ilz seroyent tous assemblez, iusques à trois cents mille combatans . Ces propos des ambassadeurs, non seulement eleuerent le cuer à Pyrrus, mais aussi imprimerent es cueurs des Epirotes une grande uoulunté & grande affection de faire ce uoyage . Mais il y auoit en la cour de Pyr-

rus un personnage Theſſalien nommé Cineas ; homme de bon entendement, & qui ayant ouy l'orateur Demosthenes , sembloit seul entre tous ceulx qui estoient tenuz de ce temps la pour eloquents, renouueller en la memoire des escoutans comme une image & une ombre de la uehemenſe & uiuacité de son eloquence : Pyrrus le tenoit aupres de soy , & ſ'en ſeruoit à l'enuoyer ça & là en ambassades uers les peuples & les uilles , là ou il confirmoit ce que dit Euripide en un passage ,

- „ Tout ce que peult force mettre à effect
 „ Par ſer trenchant, Eloquence le fait .
 „ Pourtant ſouloit dire Pyrrus, que Cineas auoit
 „ pris & gaigné plus de uilles avec ſon eloquen-
 „ ce , que luy avec ſes armes:à l'occasion dequoy
 „ il luy faiſoit tresgrand honneur, & l'employoit
 „ en ſes principaux affaires. Iceluy donques uoyāt
 „ que Pyrrus estoit fort affectionné à ceſte guer-
 „ re d'Italie, le trouuant un iour de loĩſir , le meit
 „ en telz propos : Lon dit, Sire, que les Romains
 „ ſont fort bons hōmes de guerre, & qu'ilz com-
 „ mandent à pluſieurs uaillantes & belliqueuſes
 „ nations: Si donques les Dieux nous ſont la gra-
 „ ce d'en uenir au deſſus , à quoy nous ſeruira ce-
 „ ſte uictoire ? Pyrrus luy reſpondit , Tu me de-
 „ mandes une choſe qui eſt de ſoy meſme toute
 „ euidente : car quand nous aurons dompré les
 „ Romains , il n'y aura plus en tout le paĩs cité
 „ Grecque ny Barbare qui nous puiſſe reſiſter ,

ains conquerrons incontinent sans difficulté
tout le reste de l'Italie, la grandeur, bonté, ri-
chesse & puissance de laquelle personne ne doit
mieulx sçauoir ny cognoistre que toy mesme.
Cineas faisant un peu de pause, luy repliqua: Et
quand nous aurōs pris l'Italie, que ferons nous
puis apres? Pyrrus ne s'apperceuant pas encore
ou il uouloit uenir, luy dit: La Sicile, comme tu
sçais, est tout ioignant, qui nous tend les mains,
par maniere de dire, & est une isle riche, puissan-
te, & abondante de peuple, laquelle nous sera
tresfacile à prendre, pource que toutes les uil-
les y sont en dissension les unes contre les au-
tres, n'ayans point de Chef qui leur commande
depuis que Agathocles est decedé, & n'y a que
des orateurs qui preschent le peuple, lesquelz
seront fort faciles à gagner. Il y a grande appa-
rence en ce que tu dis, respondit Cineas: mais
quand nous aurons gagné la Sicile, fera ce la
fin de nostre guerre? Dieu nous face la grace,
respondit Pyrrus, que nous puissions atteindre
à ceste uictoire, & uenir à bout de ceste entre-
prise: pource, ce nous sera une entree pour par-
uenir à bien plus grâdes choses. Car qui se tien-
droit de passer puis apres en Afrique & à Car-
thage, qui serōt consequēment en si belle prise,
ueu que Agathocles s'en estant secrettement
fouy de Syracuse, & ayant trauersé la mer avec
biē peu de uaisseaux, fut bien pres de la prédre?
& quand nous aurons conquis & gagné tout

» cela , il est bien certain qu'il n'y aura plus pas
» un des ennemis , qui nous faschent & qui nous
» harcellent maintenant , qui oze leuer la teste
» contre nous. Non certes, respondit Cineas: car
» il est tout manifeste , qu'avec si grosse puissan-
» ce , nous pourrons facilement recouurer le
» royaume de la Macedoine, & commander sans
» cōtradiction à toute la Grece: mais quand nous
» aurons tout en nostre puissance , que ferons
» nous à la fin ? Pyrrus adonc se prenant à rire ,
» Nous nous reposerons, dit il, à nostre aise, mon
» amy, & ne ferons plus autre chose que faire fe-
» stins tous les iours , & nous entretenir de plai-
» sans deuis les uns avec les autres, le plus ioyeu-
» sement , & en la meilleure chere qui nous sera
» possible . Cineas adonc l'ayant amené à ce
» poinct, luy dit, Et qui nous empesche , Sire, de
» nous reposer des maintenant, & de faire bonne
» chere ensemble, puis que nous auons tout pre-
» sentemēt, sans plus nous trauailler, ce que nous
» uoulons aller chercher , avec tant d'effusion de
» sang humain, & tant de dangers? encore ne sca-
» uons nous si nous y paruiendrons iamais, apres
» que nous aurons souffert, & fait souffrir à d'au-
» tres des maux & trauaux infinis. Ces dernieres
» paroles de Cineas offenserent plustost Pyrrus ,
» qu'elles ne luy feirent changer de uolunté: car
» il entendoit bien quel heur & quelle felicité il
» abandonnoit , mais il ne pouuoit oster de son
» entendement l'esperance de ce qu'il desiroit. Si
» enuoya

enuoya deuant aux Tarentins Cineas avec trois mille hommes de pied, puis luy estans uenus de Tarente force uaisseaux plats, force galeres, & de toutes sortes de batteaux passagers, il embarqua dessus uingt elephans, trois mille hommes de cheual, & uingt & deux mille de pied, avec cinq cens archers & tireurs de fonde. Puis quand toutes choses furent prestes, il feit uoile, mais il ne fut pas plus tost en haulte mer, qu'il se leua un uent de Nort, impetueux, hors de saison, qui l'emporta malgré luy: toutefois le uaisseau auquel il estoit, moyenant la bonne diligence & l'effort que feirent les pilotes & mariniers, se reuint, & gaigna la coste de l'Italie à toute peine, & avec un tresgrand peril: mais le demourant de sa flotte fut forcé, & les uaisseaux escartez ça & là, dont les uns ayans failly la route d'Italie, furent iettez en la mer de Libye & de Sicile: les autres n'ayans peu monter la poincte de l'Apouille, furēt surpris de la nuit, & la mer qui estoit haulte & courroucée, les ietta à grands coups de uagues contre la coste en lieux aspres & pierreux, de maniere qu'elle les brisa tous, excepté la nauire capitaineſſe, laquelle pendant que les uagues luy donnerent en flanc, resista aux coups de mer, pource qu'elle estoit grande & forte: mais depuis le uent se tourna du costé de la terre, & luy commença à donner par deuant, tellement qu'il y auoit danger que la prouë estant

uiolentement batue des undes, le uaiſſeau ne uinſt à la fin à ſouurir, & de relascher en haulte mer, ueu qu'elle eſtoit ainſi furieuſe, & ſe remettre de rechef à la mercy des uents qui ſe tournoyent à toute heure, ſembloit encore le plus effroyable danger de tous : parquoy Pyrrus tout cōſideré, aima mieux ſe ietter en l'eau. Si furent auſſi toſt ſes gardes & ſes plus priuez ſeruiteurs & amis en la mer, qui feirent tout leur effort & deuoir de le ſecourir : mais l'obſcurité de la nuit & la uiolence des uagues que la coſte rompoit & rebatoit avec un grand bruit, leur donnoyent tant d'empeschement, qu'il fut iour auant que iamais ilz peuſſent gagner la terre à toute peine, encore fut ce par le moyen de ce, que la force du uent commençoit deſia à ſe laſcher : & quant à ſon corps il eſtoit ſi las & ſi rompu, qu'il n'en pouuoit plus : mais il auoit le cuer ſi grand, & une ſi grande hardieſſe, qu'il uenoit au deſſus de toute difficulté, avec ce que les Meſſapiens, contre la coſte deſquelz la tourmente l'auoit ietté, accoururent au ſecours, & feirent diligemment tout ce qu'il leur fut poſſible pour le ſauuer, & recueillirent auſſi quelques unes des nauires qui feſtoient ſauuees, dedans leſquelles y auoit peu de gens de cheual, & enuiron deux mille hommes de pied, & deux elephants : avec leſquelles forces Pyrrus ſe meit en chemin pour aller par terre à Tarente, & Cineas eſtant aduertie de ſa

uénue, luy alla au deuant avec ses gens. Or estant arriué à Tarente, il n'y uoulut du commencement rien faire par force ny malgré les habitans, iusques à ce que ses uaisseaux, qui auroyent eschappé le péril de la mer, fussent tous arriuez, & la plus grande partie de son armée rassemblée. Mais lors quand il eut tout ce qu'il attendoit, uoyant que le peuple de Tarente ne pouuoit ny se sauuer de luy mesme, ny estre sauué par autruy sans une estroite contrainte, pource qu'ils faisoient leur compte que Pyrrus combatroit pour eulx, & ce pendant ilz ne uoloyent bouger de leurs maisons à se baigner, estauer, banquetter & faire grand chere : il feit premierement fermer tous les parcs, ou ilz souloyent aller se promener & s'esbatre aux exercices du corps, & en se promenant, par maniere de passetemps discourir ensemble des affaires de la guerre, & combattre de parolles sans mettre la main à l'œuvre, & defendit toutes assemblees de festins, mommeries, & toutes autres telles ioyeusetez qui lors estoient hors de saison, les ramenant à l'exercice des armes, & se monstrant seuer sans pardonner aux monstres de ceulx qui estoient enrollez & tenuz d'aller à la guerre, de maniere qu'il y en eut plusieurs, qui n'ayans pas accoustumé d'estre ainsi rigoureusement traittez & commandez, abandonnerent de tout poinct la uille, appellans seruitude de le non auoir pleine licence de pouuoir uiure

entierement à leur plaisir. Au demourant estant aduerty, que le Consul de Rome Læuinus s'en uenoit contre luy, avec une grosse & puissante armee, & qu'il estoit ia dedans la prouince de la Lucanie, là ou il gastoit & pilloir tout le pais, combien que le secours de leurs alliez ne fust pas encore uenu, il pensa que ce luy seroit une honte, d'endurer que les ennemis approchassent si pres de luy, & sortit en campagne avec ce peu qu'il auoit de gens : mais il enuoya deuant un herault uers les Romains, pour entendre d'eulx, filz uouldroyent premier que d'entrer plus auant en la guerre, uider par uoye de iustice les differents qu'ilz auoyent avec tous les Grecs habitas en Italie, en se remettant à ce qu'il en arbitreroit, & qu'il trouueroit moyen de les appointer: à quoy le Cōsul Læuinus feit response, que les Romains ne le uouloyēt point pour arbitre, ny ne le craignoyent point pour ennemy. Parquoy Pyrrus tirant oultre, s'alla loger en la plaine qui est entre les uilles de Pandosie & de Heraclee, & ayant nouuelles que les Romains estoient bien pres de luy campez au dela de la riuere de Siris, il monta à cheual, & alla iusques sur le bord de la riuere pour uoir leur camp, & en ayant bien consideré la forme, l'assiette & l'ordonnance, la maniere d'asseoir leur guet, & toutes leurs façons de faire, il s'en esmerueillla fort, & adressant sa parole à l'un de ses familiers qui se trouua lors pres de luy: Ceste or-

20 donnance, dit il, Megacles, encore qu'elle soit
20 d'hommes Barbares, n'est point barbare pour-
20 tant : mais nous uerrons à l'esprouue que c'est
20 qu'ilz sçauēt faire. Et depuis ceste ueuē la se sou-
ciant plus, qu'il n'auoit fait, de l'aduenir, il pro-
posa d'attendre que le secours des alliez fust du
tout arriué, en laissant gens sur le bord de la ri-
uiere pour defendre le passage, si d'adventure
les ennemis se mettoient en effort de la passer
deuant, comme ilz feirent : car ilz se hasterent
pour tascher à preuenir le renfort que Pyrrus
attendoit, & passerēt les gens de pied dessus un
pont, & les gens de cheual à guay en plusieurs
endroits, de maniere que les Grecs craignans
qu'ilz ne fussent enueloppez par derriere, se re-
tirerent. Ce que Pyrrus entendant se trouua un
peu estonné, & cōmanda soudain aux Capitai-
nes des gens de pied qu'ilz rengaissent inconti-
nent leurs bendes en bataille, & qu'ilz attendis-
sent de pied coy ce qu'il leur manderoit, & luy
ce pendant avec ses gens de cheual, qui estoient
trois mille, marcha oultre, pensant qu'il trouue-
roit les Romains sur le bord de la riuiere enco-
re tous desbendez, & qu'il les surprendroit en
desarroy : mais quand il apperceut de loing au
deça de la riuiere grād nombre de gens de pied
avec leurs pauois en bataille, & qu'il ueit la che-
ualerie en bonne ordonnance marcher droit
à luy, adonc feit il aussi serrer ses gens, & luy
mesme commença la charge le premier, estant

bien aisé à cognoistre entre les autres, quand ce
 n'eust esté qu'à la beaulté & sumptuosité de ses
 armes qui estoient magnifiquement estoiffées.
 Ioinct aussi qu'il uouloit faire uoir par effect,
 que sa uaillance n'estoit de rien moindre à l'e-
 spreuve que la renommee qu'il en auoit, mes-
 mement en ce que combien qu'il employast ses
 propres mains & sa propre personne à comba-
 tre & repoulsier uertueusement ceulx qu'il ren-
 controit deuant luy, il ne s'en oublioit point
 neantmoins ny n'en perdoit point le sens ny la
 prouoyance que doit auoir un Chef d'armee,
 pour cela:ains tout aussi rassisement comme s'il
 eust esté hors de l'affaire, il donnoit ordre &
 prouuoit à tout, courant ça & là pour souste-
 nir & secourir ses gens aux endroits ou il luy
 sembloit qu'ilz estoient plus pressez. Mais au
 fort de la meslee, Leonnatus Macedonië apper-
 ceut un homme d'armes Italien, qui ne talschoit
 qu'à s'attacher à Pyrrus, & picquoit tousiours
 droit à luy, en se remuant au pris qu'il se remuoit,
 & se trouuant par tout ou il alloit, si luy dit, Si-
 re, uois tu point ce Barbare là, qui est monté sur
 un cheual moreau aux pieds blancs, il semble
 qu'il ait enuie de faire quelque grande chose &
 quelque mauvais coup de sa main: car il te re-
 garde ferme, & ne uise qu'à toy seul, soufflant
 d'ardeur de courage, s'as en uouloir à autre qu'à
 toy, pourtant donne toy garde de luy. Pyrrus
 luy respōdit, Il est impossible à l'homme, Leon-

35 natus, d'euitier sa destinee: mais ny luy, ny autre
35 Italien qui qu'il soit, ne s'esioiura ia de s'estre at-
35 taché à moy. Ainsi comme ilz tenoyent ces pro-
pos, l'Italien tenant sa iaueline par le milieu, &
donnant des esperons à son cheual, courut sus à
Pyrrus, au cheual duquel il donna un coup de
iaueline à trauers le corps, & au mesme instant
Leonnatus aussi en donna autant à celuy de l'I-
talien, de maniere que les cheuaux tumberent
tous deux sur la place: mais les gens de Pyrrus,
qui estoient autour de sa personne, le sauue-
rent incontinent, & occirent l'Italien sur le
champ, quelque deuoir qu'il feist de bien com-
batre. Il estoit natif de la uille de Ferente, &
auoit nom Oplacus, Capitaine d'une compa-
gnie d'hommes d'armes. Cest inconuenient ad-
uertit Pyrrus de se garder miculx à l'aduenir, &
uoyant que ses gens de cheual reculoyent, il
enuoya soudain haster ses gens de pied qu'il
meit aussi tost en bataille: & baillant ses armes
& son manteau à l'un de ses familiers qui se
nommoit Megacles, & s'estant, par maniere
de dire, caché dedans celles de Megacles, il re-
tourna en la meslee contre les Romains, qui le
receurent & le sousteindrent uaillamment, de
forte que la bataille dura fort longuement en
doubte. Car lon dit, que les uns & les autres
fouyrent & chasserent par sept fois, pource
que l'eschange d'armes que feit le Roy, fut bien
à propos pour la seureté de sa personne, mais

il s'en fallut bien peu qu'il ne luy gastaſt tout, & ne luy feiſt perdre la bataille, à cauſe que pluſieurs des ennemis ſe ruerent enſemble ſur ce Megacles qui portoit les armes du Roy : & le premier qui l'aſſena au uiſ, & le porta par terre mort, ayant nom Dexius, luy oſta ſoudainemēt l'armet de la teſte, & prit ſon manteau, & ſ'en courut à tout uers Læuinus, criant tout hault qu'il auoit occis Pyrrus, en monſtrant les deſpouilles qu'il luy pēſoit auoir oſtees. Leſquelles eſtans portees au long des bendes, & mōſtrees de main en main par tout, apporterent aux Romains une reſiouiffance merueilleuſe: & au cōtraire un eſtonnement & triſteſſe grande aux Grecs, iuſques à ce que Pyrrus en eſtāt aduert y ſ'en alla paſſer la teſte nue & le uiſage deſcouuert au long de toutes ſes troupes, tendant la main aux ſoudards, & leur donnant à entendre à uiue uoix que c'eſtoit luy. A la fin les elephās furent ceulx qui deciderent la bataille, & qui principalemēt forcerent les Romains: car leurs cheuaux de tout loing qu'ilz les ſentoient ſ'en effroyoyent & ne pouuoient arreſter, ains emportoient leurs maiſtres malgré eux en arriere. Quoy uoyāt Pyrrus les feit en ce deſarroy charger par la gendarmerie de la Theſſalie, ſi uiuement qu'il les tourna tous en fuite, avec grand meurtre: car Dionyſius eſcrit qu'il ne mourut pas gueres moins de quinze mille Romains en ceſte iournee, mais Hieronymus n'en met que

sept mille seulement: & du costé de Pyrrus Dionysius en met treze mille de morts, & Hieronymus moins de quatre mille: mais c'estoyét tous les plus gens de bien de son armée, & ceulx de qui plus il se seruoit, & en qui plus il se fioit: toutefois il prit aussi tout d'une suite le camp des Romains qui l'abandonnerent, & retira plusieurs uilles de leur alliance, courut & pill beaucoup de leur païs, iusques à approcher de la uille de Rome, enuiron de dixhuit lieues, & si luy arriua encore de renfort le secours des alliez Lucaniens & Samnites, lesquelz il tenfa de paroles, pource qu'ilz estoient arriuez trop tard apres la bataille donnée: mais si estoit il aisé à lire en son uisage, qu'il s'esioiissoit fort, & festimoit beaucoup de ce qu'il auoit desfait une si grosse puissance des Romains avec ses gens, & avec le secours des Tarentins seulement. De l'autre costé les Romains eurent le cueur si grand, qu'ilz ne deposerent point Lævinus de sa charge, quelque perte qu'il eust faite, encore que Caius Fabricius dist publiquement, que ce n'estoyent point les Epirotes qui auoyent uaincu les Romains, mais que c'estoit Pyrrus qui auoit uaincu Lævinus: uoulant dire, que ceste route leur estoit aduenue plus par la ruse & bõne conduite du Chef, que par la uaillance & prouesse de son armée. Si remplirent en diligence les legions qui estoient diminuées en mettant d'autres soudards au lieu des morts, & en leuerent

encore de nouuelles, en parlant brauement & fierement de ceste guerre, comme gens qui n'auoyent point le cueur abbatu, tellement que Pyrrus s'en trouuant estonné prit aduis d'enuoyer le premier uers eulx, pour les sonder filz uoudroyent point entendre à quelque appoinctement, pensant bien que ce n'estoit pas chose facile à faire, ne dont il peust uenir à bout, que de subiuguer & prendre la uille de Rome avec les forces qu'il auoit, & que fil pouuoit faire accord & amitié avec eux apres sa uictoire, ce luy seroit chose grandement honorable & glorieuse. Si y enuoya Cineas, qui parla aux principaux de la uille, & leur enuoya à eulx & à leurs femmes des presens du Roy son maistre: mais il n'y en eut pas un ny pas une, qui en uoulust rececevoir, ains respondirent tous & toutes, que si la paix se faisoit publiquement, ilz seroyent en particulier au commandement du Roy, & auroyent son amitié pour agreable. Et comme en audience publique deuant le Senat Cineas eust tenu plusieurs honestes propos, & fait plusieurs auantageuses ouuertes de paix, ilz n'en accepterent pas une, ny ne monstrent aucune affection d'y uoloir entendre, combien qu'il offrist de leur rendre les prisonniers qui auoyent esté pris en la bataille sans payer récon, & qu'il promist de leur aider à cōquerir l'Italie, ne leur demandant en recompense que leur amitié seulement pour luy, & assurance pour les Taren-

tins , qu'on ne leur demanderoit rien à raison du passé, sans rien dauantage: toutefois à la fin ces offres ouyes , il y eut plusieurs des Senateurs qui flescirent, inclinans à uouloir faire la paix , alleguans qu'ilz auoyent ia perdu une grosse bataille, & qu'ilz en attendoyent une autre encore plus grosse, quand les forces des peuples confederez de l'Italie seroyent cōioinctes avec celles de Pyrrus . Mais Appius Claudius personnage notable, qui en partie pour sa uieillesse , & en partie pour auoir perdu la ueuë , ne uenoit plus au Senat, ny ne s'entremettoit plus des affaires publiques, quand il entendit les offres que faisoit le Roy Pyrrus , & comment le bruit couroit par la uille, que le Senat luy accorderoit les articles de paix qu'il auoit proposez, il ne se peut contenir , ains se fait porter par ses seruiteurs dedans une litiere à bras iusques au Senat, à trauers la grande place de Rome, là ou comme il fut arriué à la porte, ses gendres & ses enfans le prenans par desloubz les bras , & se mettans à l'entour de luy le cōduisirent au dedans. Le Senat feit silence par honneur à l'arriuee d'un si notable & si uenerable personnage, & luy, si tost qu'on l'eut posé en sa place , commença à parler en ceste maniere: Par cy deuât,
Seigneurs Romains, ie portois fort impatiemment la perte de ma ueuë, mais maintenant ie uoudrois encore estre sourd, aussi bien comme aueugle, quand i'oy dire les lasches & des-

» honnestes conclusions que uous arrestez en
» uoz conseils, qui sont pour renuerſer toute la
» gloire & la reputation de Rome . Car ou sont à
» ceste heure les auātageux propos que uous fai-
» siez nagueres courir par tout le monde , Que si
» Alexandre le grand fust luy mesme uenu en Ita-
» lie du temps que noz peres estoyent en la fleur
» de leur aage, & nous en nostre premiere ieunes-
» se, on ne le chanteroit pas par tout inuincible,
» comme lon fait maintenant, ains seroit demou-
» ré par deça mort en bataille, ou bien auroit esté
» cōtrainct de ſ'en fouir, & par sa mort ou sa fuit-
» te auroit augmenté la renomme & la gloire de
» Rome ? Vous monstrez bien maintenant que
» tous ces propos la n'estoyent que uaine uante-
» rie & folle arrogance, ueu que uous craignez
» les Molossiens & Chaoniens, qui tousiours ont
» esté proye des Macedoniens , & redoubtez un
» Pyrrus, qui toute sa uie a seruy & fait la cour à
» l'un des satellites & gardes du corps d'Alexādre
» le grand, & qui maintenant est uenu faire la
» guerre par deça, nō tant pour secourir les Grecs
» habitans en Italie, que pour fouir les ennemis
» qu'il a par dela, uous offrant de uous conquerir
» tout le reste de l'Italie avec une armee, laquelle
» n'a pas esté suffisante pour luy cōseruer une pe-
» tite portion de la Macedoine seulement: pour-
» tant ne fault il pas que uous estimiez, qu'en fai-
» sant paix avec luy, uous uous depeſtrerez de
» luy , ains plus tost que uous en attirerez d'au-

« cres à uous uenir courir sus: car ilz uous auront
« en mespris quād ilz uous sentirōt si faciles à dō-
« pter, si uous laissez eschapper Pyrrus, sans luy
« faire payer l'amende de l'outrage qu'il uous a
« ozé faire, emportant encore pour son salaire
« cest auantage sur uous, qu'il aura donné aux
« Samnites & Tarētins dequoy cy apres se moc-
« quer des Romains. Depuis que ces remonstran-
ces d'Appius eurent esté ouyes au Senat, il n'y
« eut celuy en toute l'assemblee qui n'aimast
« mieulx la guerre que la paix: & renuoya lon Ci-
« neas avec ceste response, Que si Pyrrus desiroit
« l'amitié & alliance des Romains, il falloit qu'il
« fortist premierement de l'Italie, & puis qu'alors
« il les enuoyast rechercher de paix: mais que
« tant comme il seroit dedans l'Italie en armes,
« les Romains luy feroient la guerre de toute
« leur puissance, quand bien il auroit baru & des-
« fait dix mille telz Capitaines comme Læuinus.
« Lon dit que Cineas, pendant qu'il fut à Rome
« pour tascher à traiter cest appointment, s'estu-
« dia & meit peine à considerer & cognoistre les
« meurs & maniere de uiure des Romains, & l'or-
« dre de leur chose publique, en deuisant & con-
« ferant avec les principaulx hommes de la uille,
« dont il feit puis apres son raport à Pyrrus bien
« au long, & luy dit entre autres choses, que le
« Senat luy auoit proprement semblé un consi-
« stoire de plusieurs Roys. Et au demourant
« quād au nombre du peuple, qu'il craignoit fort

qu'ilz n'eussent à combatre contre un tel serpent, comme celuy qui iadis estoit es marets de Lerne, auquel quand on auoit couppé une teste, il en reuenoit sept, pource que desia le Consul Lauinus auoit remis sus un autre exercite deux fois aussi gros comme auoit esté le premier : oultre lesquelz, encore laissoit il à Rome plusieurs fois autant de bons hommes idoinés à porter les armes. Depuis furent enuoyez deuers Pyrrus des ambassadeurs de Rome, & entre autres Caius Fabricius touchant le faict des prisonniers : si aduertit Cineas le Roy son maistre, que ce personnage estoit celuy, duquel on faisoit plus de compte à Rome, comme d'un grand homme de bien, bon Capitaine & uaillât homme de sa personne, mais qu'il estoit extremement pauvre : parquoy Pyrrus le tirant à part, luy feit en priué plusieurs grandes caresses, & entre autres luy offrit de l'or & de l'argent en don, le priant d'en uouloir prendre, non pour aucun seruice deshonesté qu'il en pretendist de luy, mais seulement pour une arre d'amitié & d'hospitalité qu'ilz auroient ensemble. Fabricius le renuoya bien loing avec son present : & Pyrrus ne feit autre chose pour l'heure : mais le lendemain le cuidant espouuenter, pource qu'il n'auoit iamais ueu d'Elephant, cōmanda à ses gens, que quand ilz seroyent eulx deux ensemble à deuiser, on amenast aupres d'eulx le plus grand de ses Ele-

phans derriere une tapisserie : ce qui fut fait , & à un certain signe qu'il auoit ordonné fut soudainement la tapisserie retiree , & se trouua l'Elephant avec sa trompe au dessus de la teste de Fabricius , & ietta un cry effroyable & horrible à merueilles . Adonc Fabricius se retournant tout doulcemēt , sans autrement s'en esmouuoir , se prit à rire , & dit à Pyrrus en soubriāt , Ny ton or ne m'esmeut hier , Sire , ny tō Elephant aujourd'hui . Au demourāt durāt le soupper , festās mis plusieurs propos en auāt , la plupart touchant les choses de la Grece , & mesmement touchāt les philosophes , Cineas d'adventure fait mention d'Epicurus , & recita les opinions que tenoyent les Epicuriens quand au Dieux & au gouuernement de la chose publique , & comment ilz mettoient le souuerain bien de l'homme en la uolupté , comment ilz fuyoyent toute charge & toute administration publique , cōme chose qui trouble & empesche la fruition de la uraye felicité , & comment ilz maintenoyent que les Dieux sont impassibles , ne se mouuans ny de pitié ny de courroux , & que sans se mesler ny se soucier du faict des hommes , ilz les mettoient à part en une uie oiseuse , pleine de tous plaisirs & de toutes delices . Mais ainsi qu'il poursuyuoit encore ce propos , Fabricius fescriant tout hault , se prit à dire , Pleust
aux Dieux , que Pyrrus & les Sānites tant qu'ilz
auront la guerre contre nous , eussent de tel-

les opinions en la teste . A raison dequoy Pyrrus s'esmerueillant de la constance & magnanimité de ce personnage , desira encore plus que iamais auoir paix au lieu de guerre avec les Romains: si feist particulièrement instance à Fabricius qu'il uoulust moyener appointemēt, pour puis apres le uenir suyure & se tenir avec luy, & qu'il luy donneroit le premier lieu d'honneur & de credit autour de luy entre tous ses amis . A quoy Fabricius luy respondit tout bas:

Cela, Sire, ne te feroit pas expedient à toy mesme, pource que tes gens, qui maintenant t'honorent & t'estiment, filz m'auoyent une fois cogneu à l'espreuue, me uoudroyent plustost auoir pour leur Roy que toy . Tel estoit Fabricius: les paroles duquel Pyrrus ne prit point en mauuaise part, ny ne s'en courrouça point, comme eust fait un tyran, ains racompra luy mesme à ses plus familiers & priuez amis, la grandeur & haultesse de courage qu'il auoit cogneue en luy, & luy liura les prisonniers sur sa foy, afin que si le Senat ne uouloit accorder la paix, ilz peussent uisiter & saluer leurs parents & amis, & faire la feste de Saturne avec eulx, & que lon les luy réuoyast puis apres, comme aussi luy furent ilz renuoyez apres la feste, ayant le Senat proposé peine de mort à celuy qui faudroit à retourner . Depuis Fabricius fut eleu Consul, & cōme il estoit en son cāp, il uint à luy un hōme qui luy apporta une missiue escrete de la main

du me-

du medecin de Pyrrus , par laquelle le medecin
offroit de faire mourir son maistre par poison,
moyennāt qu'on luy promeist recōpense cōdi-
gne d'auoir terminē ceste guerre sans dāger. Fa-
bricius detestant la meschancetē de ce mede-
cin , & l'ayant fait trouuer aussi mauuaise à ce-
luy qui estoit son compaignon au Consulat , e-
scriuit une lettre à Pyrrus , par laquelle il l'ad-
monesta qu'il se dōnast de garde , pource qu'on
le uouloit empoisonner . Si fut la teneur de sa
20 lettre telle : Caius Fabricius , & Quintus Aemy-
20 lius Consulz des Romains , au Roy Pyrrus sa-
20 lut . Tu as fait malheureuse election d'amis
20 aussi bien que d'ennemis , ainsi que tu pourras
20 cognoistre en lisant la lettre qui nous a esté e-
20 scritte par un de tes gens : pource que tu fais la
20 guerre à hommes iustes & gens de bien , & te
20 fies à des desloyaulx & meschans: dequoy nous
20 t'auons bien uoulu aduertir , non pour te faire
20 plaisir , mais de peur que l'accident de ta mort
20 ne nous face calumnier , & que lon n'estime
20 que nous ayons cherché de terminer ceste guer-
20 re par un tour de trahison , comme si nous n'en
20 peussions uenir à bout par uertu . Pyrrus ayant
leu ceste lettre , & adueré le contenu en icel-
le , chastia le medecin ainsi qu'il auoit meritē ,
& pour loyer de ceste descouuerture renuoya
à Fabricius & aux Romains leurs prisonniers
sans payer rençon , & despescha de rechef Ci-
neas uers eulx pour uoir fil pourroit traiter

quelque appointment : mais les Romains ne uoulans pas receuoir plaisir de leur ennemy, & moins encore loyer de n'auoir pas uolu consentir à une meschanceté, ne receurent pas en pur don leurs prisonniers, ains luy en renuoyèrent tout autant de Samnites & de Tarentins, & au reste quant à traitter de paix & d'amitié, ilz n'en uoulurent pas seulement ouir parler, que premierement il n'eust emporté les armes hors de l'Italie, & remené son armee dela la mer en son Royaume d'Epire. Parquoy ses affaires requerans qu'il dōnast une autre bataille, apres auoir un peu refreschy son armee, il tira deuers la uille d'Asculum, là ou il s'attacha pour la seconde fois aux Romains, & fut acculé en lieux malaisez pour gens de cheual, au long d'une riuiera aspre, & dont les riuages estoient pleins de mares, tellement que ses Elephans ne peurent auoir espace pour se ioindre à la bataille de ses gens de pied : au moyen dequoy y eut grand nombre de blecez & de morts, tant d'une part que d'autre. Et en fin le combat ayant duré tout le long du iour, ilz se separerent sur la nuict : mais le lendemain pour gaigner cest auantage de pouuoir combattre en pais plain, ou il se peust seruir de la force de ses Elephans, il enuoya le premier quelques troupes de ses gens pour saisir les endroits malaisez, ou il auoit combatu le iour de deuant. Et ainsi ayant attiré l'ennemy en plaine campagne, il entre-

meſſa parmy ſes Elephans force gens de traict,
& combatans avec armes de ieſt, puis ſeit mar-
cher de grâde impetuoſité & fureur ſon armee
bien ioincte & ſerree enſemble contre celle
des Romains, leſquelz n'ayans pas les deſtours
& retraittes qu'ilz auoyent eües le iour prece-
dent, furent cōtraints de uenir au combat tout
de front par païs uny & plain, & taſchās à rom-
pre le bataillon des gens de pied de Pyrrus a-
uant que les Elephans attruaſſent, feirent de
merueilleux efforts avec leurs eſpees contre les
picques des ennemis, n'eſpargnans aucune-
ment leurs perſonnes, ains regardās ſeulement
à aſſener & abbatre leurs ennemis, ſans ſe ſou-
cier d'eſtre eulx meſmes attraints : à la fin tou-
teſois, apres que la bataille eut duré bien long
temps, les Romains la perdirent, & commen-
cea leur route & leur fuitte à l'endroit ou eſtoit
Pyrrus pour le grand effort qu'il y ſeit, & plus
encore pour la force & la uiolēce des Elephās,
contre leſquelz ne ſe pouuoient les Romains
ſeruir de leur uertu ne uailance, ains eſtoient
contraints de leur ceder, ne plus ne moins qu'à
l'impetuoſité d'une groſſe uague de mer, ou
d'un trēblement de terre, pluſtoſt que d'attēdre
qu'ilz fuſſent foulez aux piedz & accablez par
eulx, ſans auoir moyen de leur rien faire, &
qu'ilz ſouffriſſent tous les plus griez martyres
du mōde, ſans que leurs affaires en ualuſſent de
rien mieulx. La chaſſe ne fut pas longue, pource

qu'ilz ne fouirent que iusques en leur camp:& dit l'historien Hieronymus, qu'il y mourut six mille hommes du costé des Romains, & du costé de Pyrrus enuiron trois mille cinq cents & cinq, ainsi qu'il estoit porté par les registres mesmes du Roy. Toutefois Dionysius n'escriit point qu'il y ait eu deux batailles donnees pres ceste uille d'Asculū, ny q̄ les Romains y ayent esté certainement desfaicts: mais bien dit il, qu'il y eut une seule bataille qui dura iusques au Soleil couchant, & qu'encore à peine se separerēt ilz quād la nuit fut uenue, ayant Pyrrus esté blecé d'un coup d'espieu dedans le bras, & luy ayant esté son bagage pillé par les Samnites, & qu'il mourut en ceste bataille plus de quinze mille hommes, tant du costé de Pyrrus, que du costé des Romains, mais qu'ilz se retirerēt à tant les uns & les autres. Et dit on que ce fut là ou Pyrrus respōdit à un qui se resiouissoit auec luy de la uictoire qu'il auoit gaignee,

» Si nous en gagnons encore une autre pour le

» pris, nous sommes ruinez de tout poinct, pour-
 autant qu'il auoit ia perdu la pluspart de l'armée qu'il auoit amenee de son royaume quand & luy, & ses amis & Capitaines presque tous entierement, au moins bien peu s'en falloit, & si n'auoit pas moyen d'en faire uenir d'autres, & qui plus est, il apperceuoit que les alliez & confederez qu'il auoit en Italie se refroidissoient fort: là ou, au cōtraire, les Romains rem-

plissoient facilement leur armee de nouueaux combatans, qu'ilz faisoient uenir de leur uille, quand il en estoit besoing, ne plus ne moins que d'une uiue fontaine dōt ilz auoyēt la source en leur maison : & si ne s'affoiblistoyēt point de cueur pour quelques pertes qu'ilz receussent, ains de tāt plus s'en efforceoyent ilz, & s'en opiniastroyent par cholere de tant plus obstinēment à la continuation de ceste guerre. Ainsi donques comme Pyrrus se trouuoit en telles difficultez, se presenterent de rechef à luy nouuelles entreprises & nouuelles esperances, qui meirent son entendement en doubte : car tout à un coup uindrent ambassadeurs de la Sicile, qui luy offrirent de mettre entre ses mains les uilles de Syracuse, d'Angrigente & des Leontins, le prians de leur uouloir aider à dechasser les Carthaginois hors de l'isle, & la deliurer toute de tyrans : & d'autre costé luy uindrent nouuelles de la Grece, cōme Ptolomæus, celuy qui fut surnommé la Foudre, auoit esté tué, & toute son armee desfaitte en une bataille cōtre les Galates, & que lors il suruiendroit tout à poinct aux Macedoniens, qui ne demandoient qu'un Roy. Si maudit adonc asprement la fortune, qui luy presentoit ainsi tout à un coup & en un mesme temps, diuerses matieres pour faire de grandes choses : & comme si toutes les deux entreprises eussent esté en sa main, il faisoit son cōpte qu'il falloit necessairement qu'il

en perdist l'une. Si fut long temps à resoudre en son entendement, à laquelle plus tost il deuoit entendre : mais finablement il luy sembla que es affaires de la Sicile y auoit moyen & matiere de faire de plus grandes choses, attendu que l'Afrique n'en estoit pas gueres loing: parquoy se tournant de ce costé là, il despescha incontinent Cineas pour s'y en aller deuant parler aux uilles & citez du païs, comme il auoit accoustumé : & luy ce pendant meit grosse garnison dedans la uille de Tarente pour la tenir en sa deuotion, dequoy les Tarentins furent tresmal contens : car ilz luy disoyent ou qu'il demourast en leur païs pour soustenir la guerre cōtre les Romains avec eulx, qui estoit l'intention pour laquelle ilz l'auoyēt fait uenir, ou biē fil s'en uouloit aller, qu'il leur laissast au moins leur uille en l'estat qu'il l'auoit trouuee : mais il leur respondit bien rudement, qu'ilz ne luy en parlassent plus, & qu'il falloit qu'ilz attendissent son occasion : & avec ceste response se meit à la uoile uers la Sicile, là ou si tost qu'il fut arriué, il trouua tout ce qu'il auoit esperé, car les uilles se meirent bien uoluntiers entre ses mains. Et là ou il fut besoing de combattre & d'employer la force des armes, rien n'arrestoit deuant luy du commencement : car avec trente mille hommes de pied, & deux mille cinq cents de cheual, & deux cents uoiles qu'il y mena, il chassoit deuant luy les Carthaginois,

& alloit conquerant toute la prouince qui estoit soubz leur obeïssance. Or estoit pour lors la uille d'Eryx la plus forte place qu'ilz eussent, & y auoit dedans bon nombre de gens de guerre pour la defendre : il delibera d'essayer à la forcer, & quād son armee fut preste pour donner l'assault, il se fait armer de toutes pieces, & en s'approchant de la uille, fait uœu à Hercules de luy payer un solēnel sacrifice avec une feste de ieux publiques, moyennant qu'il luy feist la grace de se monstrier aux Grecs habitans en la Sicile digne des nobles ancestres dont il estoit descendu, & des grands moyens qu'il auoit entre ses mains. Ce uœu acheué, il fait incontinent sonner les trompettes, & à coups de traitt retirer les Barbares qui estoient sur les murailles : puis quand les eschelles furent plantees, il mōta tout le premier sur la muraille, ou il trouua plusieurs des Barbares qui luy firent teste : mais il en ietta les uns du hault en bas d'un costé & d'autre de la muraille, & à coups d'espee en abbatit plusieurs morts à l'étour de luy, sans qu'il y fust aucunement blecé, pource q̄ les Barbares n'auoyent pas la hardiessē de le regarder seulement au uisage tant son regard estoit terrible. Ce qui tesmoigne que Homere parla sagement & en hōme bien experimenté, quād il dit que la prouësse seule entre toutes les uertus morales est celle, qui aucunefois a des saillies de mouuemens inspirez diuinemēt & de certaines

fureurs qui transportent l'hōme hors de soy-
mesme. La uille dōques ayant esté prise, il paya
magnifiquement le sacrifice uoué à Hercules,
& feit une feste de toutes sortes de ieux & de
toutes sortes de cōbats. Or y auoit il alors quel-
ques Barbares habitās à l'entour de Messine qui
se nōmoient les Mamertins, & faisoient beau-
coup d'ennuy aux peuples Grecs d'alenuiron,
iusques à leur faire payer taille & tribut, au
moins à quelques uns, pource qu'ilz estoÿēt en
grād nōbre, tous hōmes de guerre & bons com-
batans, aussi en auoyent ilz le nom de Mars, à
cause qu'ilz estoÿēt ainsi Martiaux. Pyrrus me-
na son armee contre eulx & les desfeit en ba-
taille renee, feit mourir leurs collecteurs qui
leuoÿēt & exigeoyent la taille, & rasa plusieurs
de leurs forteresses: & cōme les Carthaginois le
recherchassent de paix & d'amitié, en luy offrāt
uaissaux & argent, pretendans à plus grandes
choses, il leur feit une courte responce, qu'il n'y
auoit qu'un seul moyē de paix & d'amitié entre
eux, qui estoit qu'en abādonnant toute la Sicile
entierement, ilz eussent pour borne entre les
Grecs & eulx la mer de Libye. Car la prosperité
de ses affaires & les forces qu'il se uoyoit entre
mains, luy eleuoÿent le cueur, & l'incitoÿent à
poursuyure l'esperance, sous laquelle il estoit
passé en la Sicile, aspirant en premier lieu à la
conqueste de la Libye: pour à laquelle aller il
auoit biē assez de uaissaux, mais de forsaïres &

de gens de rame, non : & quand il en uoulut amasser, alors il commença à se porter rudement enuers les uilles de la Sicile, les traittant fort rigoureusement, les forçant en courroux, & chastiant aigrement ceulx qui faisoient faulte à ses commandemens, ce qu'il n'auoit pas fait à son arriuee du commencement, ains au contraire auoit gagné la bonne grace de tout le monde, en parlant plus gracieusement que nul autre, en monstrant de se fier du tout à eulx, & ne les molestant de chose quelconque. Et tout soudain estant ainsi deuenu de prince populaire tyran uiolent, il en fut estimé non seulement rude & rigoureux, mais qui pis est, desloyal & ingrat : & toutefois, encore qu'il leur en feist grand mal, si l'enduroient ilz neantmoins, & luy concedoyent ce qu'il demandoit comme chose necessaire. Mais quand on apperceut qu'il commença à soy deffier de Thœnon & de Sostratus, qui estoient les deux principaux Capitaines de Syracuse, qui l'auoyent les premiers fait uenir en la Sicile, & qui luy auoyent, aussi tost comme il y fut arriué, mis la uille de Syracuse entre mains, & luy auoyent aidé à faire la plus part de ce qu'il auoit fait en toute la Sicile, par ce qu'il ne uouloit plus ny les mener quand & luy, ny les laisser derriere, pour la deffiance qu'il auoit d'eulx : & que lon ueit que Sostratus craignât qu'il ne luy feist quelque mauuais tour, festoit absenté & retiré d'aupres de luy,

& que luy se doubtant que Thænon en uou-
lust autant faire, l'eut fait mourir : alors se re-
tournerent toutes choses à l'encontre de luy,
non point l'une apres l'autre ny petit à petit,
ains tout à un coup, & conceurent toutes les
uilles ensemble une haine mortelle contre luy,
en falliant les unes des Carthaginois, les autres
des Mamertins pour luy courir sus. Mais sur le
poinct que toute la Sicile se bendoit & conspi-
roit ainsi contre luy, il receut lettres des Samni-
tes & des Tarentins, par lesquelles ilz luy fai-
soyent entédre, qu'ilz auoyent beaucoup à faire
à se defendre dedás les uilles & fortes places, &
que de la campagne ilz en estoient entieremēt
dechassez, à raison dequoy ilz le supplioyent de
les uenir secourir. Ceste nouuelle luy uint tout
à poinct pour couvrir sa fuitte, & pour pouoir
dire que ce n'estoit point par desespoir de pou-
oir bien faire ses besongnes en la Sicile, qu'il
en departoit : mais à la uerité, uoyant qu'il ne la
pouoit tenir non plus qu'une nauire agitee de
la tourmēte, il cherchoit quelque couleur hone-
ste pour en sortir, & fut la cause ueritable pour
laquelle il se reietta en Italie: toutefois au partir
de la Sicile, on dit qu'il tourna ses yeux uers l'is-
le, & dit à ceulx qui estoient autour de luy : O
» quel beau champ de bataille nous laissons, mes
» amis, aux Romains & aux Carthaginois, pour
» y lucter & combattre les uns contre les autres !
Cela aduint peu de temps apres tout ainsi com-

me il l'auoit predict. Mais ayans les Barbares fait ligue ensemble à l'encontre de luy, les Carthaginois d'un costé l'attendans au passage, luy donnerent la bataille par mer dedans le destroit mesme de Messine, là ou il perdit plusieurs de ses uaisseaux, & avec le demourant s'en fouit en la coste de l'Italie : là ou les Mamertins de l'autre costé, estans passez deuant en nombre de bien dixhuit mille combatans, ne luy ozerent pas presenter la bataille en pleine campagne, ains l'attendirent à certains pas de montagne, & en lieux malaisez, ou ilz le chargerent sur la cueuë, & meirent toute son armee en grand trouble: car ilz y tuerent deux Elephans & bon nombre de ceulx de son arrieregarde, tellement qu'il fut contrainct d'y uenir luy mesme en personne de son auantgarde, pour les secourir contre ces Barbares, qui estoient hommes courageux & hardiz, & qui plus est, fort bien aguerris: & y fut en grand danger de sa personne pour un coup d'espee qu'il y receut en la teste, de sorte qu'il luy fut force de se retirer un peu arriere de la presse, ce qui augmenta le courage encore plus à ses ennemis: entre lesquelz y eut un plus aduenteux que les autres, homme de haulte taille, & tout armé à blanc, qui se ietta bien loing deuant sa troupe, & d'une uoix audacieuse & fiere appella le Roy & le desfia au combat d'homme à homme, sil estoit encore uiuant. Pyrrus irrité de ceste brauerie,

malgré ses gens tourna uisage, tout blecé qu'il estoit, avec sa garde:& oultre ce qu'il estoit enflammé de cholere, ayant la face toute souillée de sang & hydeuse à uoir, il se ietta à trauers ses gens, & feit tant qu'il approcha du Barbare qui l'auoit desfié, auquel il donna de toute sa puissance un si grand coup d'espee sur la teste, que tant pour la force du bras, que pour la bonté de la trempe de l'acier, le coup descendit iusques à bas, de sorte qu'en un moment les parties du corps diuisé en deux tumberent, l'une deça, l'autre delà. Cela arresta tout court les Barbares, & les garda de passer oultre, tant ilz furent estonnez & effroyez de uoir un si grand coup de main, qui leur feit estimer que Pyrrus estoit quelque chose dauantage qu'un homme: si le laisserent aller depuis, sans plus luy dōner d'empeschement. Et luy continuant son chemin feit tant par ses iournees, qu'il arriua en la uille de Tarente, avec uingt mille hommes de pied & trois mille de cheual: avec lesquelz, ioinct ce qu'il peut tirer de bons hommes de guerre de Tarente, il se meit incontinent aux chāps pour aller trouuer les Romains, qui auoyent leur camp dedans les terres des Samnites, desquelz les affaires se portoyent tresmal: car ilz auoyent les cueurs faillis pour auoir esté en plusieurs bairailles & rencontres tousiours batus par les Romains, & si estoient mal contents de Pyrrus, à cause qu'il les auoit abandonnez pour aller à

son uoyage de la Sicile , à raison dequoy il n'en uint pas grád nombre deuers luy en son camp: mais nonobstant il diuisa toutes ses forces en deux , dont il enuoya une partie en la Lucanie pour amuser l'un des Consuls de Rome , qui y estoit , à fin qu'il ne peust uenir au secours de son compagnon , & luy avec l'autre partie s'en alla contre Manius Curius , qui s'estoit logé en lieu fort & auantageux pres la uille de Beneuente, attendant le secours qui luy deuoit uenir de la Lucanie , ioinct que les deuins par les signes des oiseaux & des sacrifices , luy conseilloyent de ne bouger de là : & Pyrrus au contraire desirant le pouuoir combattre auant que le renfort qu'il attendoit luy fust arriué , prit avec luy les meilleurs combatans qu'il eust en tout son ost , & les plus belliqueux Elephans , & se partit une nuict pour le cuider aller assaillir au desprouueu iusques dedans son camp. Or auoit il long circuit de chemin à faire & par un pais couuert de bois , tellement que leurs torches & lumieres leur faillirent : au moyen dequoy plusieurs des souldards s'esgarerent , & se perdit quelque téps deuant qu'on les peust rallier tous ensemble , de maniere que ce pendant la nuict se passa : & au poinct du iour les ennemis l'apperceurent clairement ainsi comme il deualloit des montagnes . Cela les emeut de prime face, & les effroya un petit : mais neantmoins Manius ayant eu les signes des sacrifices

heureux, & uoyant que l'occasion le pressoit, sortit hors de son camp, & chargeant les premiers qu'il rencontra des ennemis les tourna en fuite: ce qui espouuenta tout le reste, de sorte qu'il en demoura grád nombre de morts sur le champ, & y eut quelques Elephans pris. Ceste uictoire feit sortir Manius hors de son fort en pleine campagne, ou il y eut baraille renee, en laquelle il rompit ses ennemis à uiue force en un endroit, mais en l'autre il fut repoullé par la uiolence des Elephans, & contraint de reculer iusques aupres de son camp, dedans lequel il auoit laissé bon nombre de gés pour le garder: & les uoyant sur le rempar du camp tous armez & en poinct de combatre, il les appella: & eulx uenans tous frais de lieux auantageux à charger sur les Elephans, les contraignirent en peu d'heure à monstrier le dos & s'enfouir à trauers leurs gens mesmes, lesquels ilz meirent en grád trouble & en grand desordre, dont finablement s'en ensuyuit la uictoire totale pour les Romains, & de celle uictoire consequemment la grandeur & puissance de leur empire: pource qu'estans deuenus plus courageux par ceste bataille, & en ayans accru leurs forces, & acquis la reputation d'hommes inuincibles, ilz conquerirent incontinent le reste de l'Italie, & tantost apres toute la Sicile. Voila comment Pyrrus decheut entierement de l'esperance qu'il auoit de conquerir l'Italie & la Sicile, apres y

auoir consumé six ans à faire continuellement la guerre, durant lesquels il empira bien ses affaires, & diminua ses forces : mais la hautesse de son courage demoura tousiours inuincible quelques pertes qu'il eust faittes, & si fut tousiours estimé tant qu'il uescut, le premier des Roys & princes de son temps, tant en experience & suffisance au faict de la guerre, comme en hardiesse & prouesse de sa personne : mais ce qu'il acquerroit par effects, il le perdoit par esperances, appetant si fort ce qu'il n'auoit pas, qu'il en oublioit à mettre en seure garde ce qu'il auoit : à raison dequoy Antigonus le comparoit à un ioueur de dez, à qui les dez disent fort bien, mais qui ne se sçait seruir des chances qui luy uienent. Ayant donques remené en Épire huit mille hommes de pied, & cinq cens cheuaux, & ne se trouuant point d'argent pour les soudoyer, il alloit cherchant quelque nouuelle guerre pour auoir moyen de les entretenir. Parquoy luy estant encore uenu un renfort de quelque nombre de Galates, il entra dedans le royaume de Macedoine, que tenoit alors Antigonus le filz de Demetrius, en intention de courir & piller le plat païs seulement : mais quand il ueit qu'il y eut pris plusieurs places, & que dauantage deux mille hommes de guerre du païs se uindrent d'eulx mesmes rendre à luy, il commença adonc à esperer quelque chose de plus qu'il ne festoit promis au

commencement: si marcha contre le Roy mesme Antigonus qu'il rencontra en une uallee estroite, & d'arriuee chargea sur son arrieregarde si uiuement, qu'il meit toute l'armee en grād de serroy: car Antigonus auoir mis à la cueuë de son armee, pour la clorre, les Galates, qui estoient en assez bon nombre, lesquelz feirent deuoir de soustenir hardiment & uaillamment ceste premiere charge, & y fut la meslee si aspre, que la pluspart d'eulx y fut taillee en pieces. Apres ceulx la les conducteurs des Elephans se trouuans enueloppez de tous costez, se rendirēt eulx & toutes leurs bestes. Parquoy Pyrrus uoyant ses forces augmentees d'un tel renfort, se confiant plus à la faueur de fortune qu'au discours de la raison, il poulsa oultre contre le bataillon des Macedoniens, qui estoient tous troublez & effroyez pour la desfaitte de leur arrieregarde, tellement qu'ilz ne uoulurent point baisser les picques ne cōbatre contre luy: & luy de son costé leur tendant la main, & appellant les Capitaines & Chefs des bendes par leurs noms, fait tout à un coup tourner de sa part tous les gens de pied d'Antigonus, lequel se sauua de uistesse avec quelques gens de cheual, & reteint aucunes des uilles maritimes de son royaume. Mais Pyrrus, entre tant de prosperitez, estimant n'y auoir rien qui plus tournaist à sa gloire, que la desfaitte des Galates, fait mettre à part leurs plus belles & plus riches despouilles,

pouilles, dont il feit une offrande au temple de Minerue Itonide, avec une telle inscription :

- 20 Pyrrus ayant en bataille desfait
- 20 Les fiers Gaulois, de leur despouille a fait
- 20 Ces forts escus à Minerue icy pendre ,
- 20 Apres auoir d'Antigonius fait rendre
- 20 L'armee toute : & fil les a uaincus
- 20 Merueille n'est: car au sang d'Æacus
- 20 De tout temps est prouësse militaire ,
- 20 Et à iamais sera hereditaire .

Incontinent apres ceste bataille toutes les uilles du royaume se rendirent à luy : mais quand il eut celle d'Æges en sa puissance, il en traitta rudement les habitans, mesmement en ce qu'il y laissa une grosse garnison des Gaulois qu'il auoit à sa soude. Or est ce une nation insatiablement auaricieuse, comme ilz monstrent bien alors : car ilz se meirent à fouiller les sepultures des Roys de Macedoine, qui y sont enterrez, & rauirent ce qu'ilz y trouuerent d'or ou d'argent : & puis ietterent par grande insolence les ossemens au uent . Pyrrus en fut aduerty , mais il le passa legerement sans en faire compte ny demonstration quelconque: soit, ou qu'il le differast à autre temps pour les affaires qu'il auoit alors, ou que du tout il n'ozast entreprendre de chastier ces Barbares: mais quoy que ce soit, les Macedoniens luy en sceurent fort mauuais gré, & l'en blasmerent fort. Au demourant n'estans pas encore ses affaires bien assurez en la

Macedoine, & n'y ayans point de pied ferme, son cerueau commença incontinent à s'eleuer en nouuelles esperances, & se mocquant d'Antigonus, il disoit qu'il estoit bien effronté d'aller encore uestu de pourpre comme un Roy, là ou il se deust habiller d'une simple cappe, comme personne priuee. Et l'estant Cleonymus Roy de Sparte uenu solliciter de mener son armee au pais de Lacedæmone, il y entendit fort uoluntiers. Cestuy Cleonymus estoit bien du sang royal de Sparte, mais pour ce qu'il estoit homme uiolent, & qui uouloit faire toutes choses d'autorité souueraine, on ne l'aimoit point à Sparte, & ne se fioit on point en luy, ains y estoit Areus Roy paisible: cela estoit la plus uieille querelle qu'il eust contre le corps total de la chose publique, mais outre celle là, il en auoit une autre particuliere pour telle occasion: Il auoit sur ses uieux ans espousé une belle ieune dame nommee Chelidonide, qui estoit aussi de la race Royale, fille de Leotychides, & estant deuenue extrememēt amoureuse du filz du Roy Areus, qui s'appelloit Acrotatus, beau ieune homme en la fleur de son aage, elle tourmenta & deshónora grandement son mary Cleonymus, qui en estoit passionné de ialousie & d'amour: car il n'y auoit celuy en toute Sparte qui ne cogneust clairement que sa femme ne faisoit compte de luy. Ainsi estans ces douleurs & desplaisirs domesti-

quès conioincts avec les publiques, en intèrion de s'en uèger il alla par despit en courroux solliciter Pyrrus de uenir à Sparte, pour le remettre en sa Royaulté : & de faict l'y mena avec uingt & cinq mille hommes de pied, deux mille cheualx, & uingt & quatre Elephans : de maniere qu'il estoit aisé à cognoistre à ce grād equipage seulement, qu'il n'alloit pas en uoulunté de remettre Cleonymus en Sparte, ains en deliberation de subiuguer & conquerir pour soy mesme tout le pais du Peloponèse, sil eust peu . Car de paroles il le nioit tresbien aux Lacedæmoniens mesmes, qui luy enuoyerent des ambassadeurs ainsi qu'il estoit en la uille de Megalipolis, là ou il leur dit qu'il estoit uenu au Peloponèse pour affranchir les uilles & citez qu'Antigonus y tenoit en seruitude, & que urayement il estoit en uoulunté d'enuoyer ses petits enfans à Sparte, moyenāt qu'on luy permeist, à fin qu'ilz fussent nourris à la discipline Laconique, & qu'ilz eussent des leur enfance cest aduantage par dessus tous les autres Roys d'auoir esté bien nourris . Mais en faignant ces choses, & en abusant ceulx qui uenoyent au deuant de luy sur le chemin, on ne se donna garde qu'il fut dedans le pais de la Laconie, là ou il ne fut pas plus tost entré qu'il commença à courir & piller le plat pais . Et comme les ambassadeurs de Sparte luy reprochassent & se plaignissent de ce qu'il leur faisoit ainsi la guerre sans la leur auoir

premierement denoncee , il leur respondit :

» Vous n'avez pas non plus uous mesmes accou-

» stumé d'enuoyer denoncer & signifier ce que

» uous avez en pensee de faire aux autres. Adonc

l'un des ambassadeurs , qui auoit nom Mandricidas , luy repliqua en son langage Laconique : Si tu es un Dieu , tu ne nous feras point

» de mal , pource que nous ne t'auons point of-

» fense : & si tu es un homme , tu en trouueras

» quelqu'autre qui uaudra mieulx que toy . Depuis il tira droit à Sparte, là ou Cleonymus fut d'aduis , que de primfault il la feit assaillir: mais il ne le uoulut pas faire, craignant , comme lon dit, que s'il faisoit donner l'assault de nuict , ses soudards ne saccageassent la uille , & dit qu'il seroit tout à temps de le donner en plein iour le lendemain , pource qu'il y auoit fort peu de gens dedans la uille , & encore mal prouueuz : car , qui plus est , le Roy mesme Arcus n'y estoit pas , ains estoit allé en Candie au secours des Gortyniens , qui auoyent la guerre en leur païs: mais ce fut ce qui sans doubte sauua la uille d'estre prise , que lon ne fait pas compte de l'assaillir chaudement , pource que lon estima qu'elle ne fust pas pour resister , & qu'il n'y eust ame dedans pour la defendre : car Pyrrus se campa deuant en ferme opinion qu'il n'y trouueroit personne pour le combattre , & les seruiteurs & amis de Cleonymus y preparerent son logis , comme si pour certain Pyrrus y eust

deu uenir soupper & loger. Mais quand la nuit fut uenue, les Lacedamoniens teindrent conseil entre eulx, ou ilz furent d'aduis d'enuoyer secrettement leurs femmes & petits enfans en Candie: à quoy elles mesmes s'opposerent, & y en eut une entre les autres nommee Archidamia, qui s'en alla en plein conseil avec une espee porter la parole au nom des autres Dames, remonstrant que les hommes leur faisoient grand tort, filz estimoyent qu'elles eussent le cueur si lasche, que de uouloir suruiure apres que Sparte seroit destruite: puis fut arresté en ce conseil, que lon tireroit une trenchee à l'opposite du camp de l'ennemy, aux deux bouts de laquelle ilz mettroient des chariots qu'ilz enterreroient iusques à la moirié des rouës, à fin qu'ayans ainsi le pied ferme, ilz peussent arrester les Elephans & les engarder de passer: & comme ilz commenceoyent à mettre la main à l'œuure, y suruindrent les filles & les femmes, aucunes ceintes par dessus leurs cottes trouffees, & les autres routes en chemises pour besongner à ceste trenchee avec les hōmes uieux, adinonestans les ieunes qui deuoient combattre le iour ensuyuant, qu'ilz se reposassent ce pendant. Si prirent la tierce partie de la trenchee à faire, qui auoit six couldees de largeur, & quatre de profondeur, & duroit huit cents pieds de long, ainsi que dit Phylarchus, ou un peu moins comme dit Hieronymus: puis quād

ce uint au poinct du iour que les ennemis commencerent à se remuer pour uenir à l'assault, elles mesmes allerent querir les armes qu'elles meirent entre les mains des ieunes hommes, & leur rendirent la tasche qu'elles auoyent prise à faire de la trenchee toute faite, en les priant de la uouloir uaillamment garder & defendre, leur remonstrans le grand plaisir que cest de uaincre les ennemis en combatant à la ueuë de tout son pais, & le grand heur & grand honneur qu'il y a à mourir entre les bras de sa mere & de sa femme, apres auoir fait le deuoir d'homme de bien & digne de la magnanimité de Sparte. Mais Chelidonide s'estant retiree à part auoit attaché un las courant à son col toute preste à se pendre & estrangler, plus tost que de tumber entre les mains de Cleonymus, si d'adventure la uille uenoit à estre prise. Pyrrus donques en personne avec la bataille de ses gens de pied marcha de front contre les Spartiates, qui l'attendoyent aussi en bon nombre sur l'autre bord de la trenchee, laquelle oultre ce qu'elle estoit mal aisee à trauciser, empeschoit les soldards de combattre à pied ferme, à cause que la terre freschement remuee fondoit sous eulx. Parquoy Ptolomaus filz de Pyrrus avec deux mille Gaulois & toute l'eslite des Chaoniens, coustoyant le long de la trenchee essaya de passer de l'autre costé par l'un des bouts ou estoyent les chariots : lesquelz estans fort auant enfon-

cez dedans la terre, & entrelacez les uns dedans les autres, empeschoyent non seulement les assaillans, mais aussi les defendans: toutefois à la fin les Gaulois commenceoyent ia à deschauffer les rouës de ces chariots & à les tirer dedans la riuere, quand Acrotatus ieune homme uoyant le danger, s'encourut à trauers la uille avec une troupe de trois cents autres ieunes hommes, & alla enuelopper Ptolomæus par derriere sans estre apperceu, à cause qu'il alla par chemin creux & bas, iusques à ce qu'il uint à les charger par derriere, & les cōtraignit de tourner uisage deuers luy, en s'entreheurtâs les uns les autres, & s'entrepoulsans dedans la trenchee & deffoubs les chariots, en grand desarroy, tant que finablement à grâde peine, & avec grande effusion de sang, ilz furent rembarrez & repoulsez. Or estoient les femmes & les uieillards de l'autre costé de la trenchee, qui uoyoyent clairement à l'œil les grandes armes que faisoit Acrotatus. Parquoy apres que son execution fut faite, il s'en retourna à trauers la uille, au lieu ou il estoit parauant, tout souillé de sang, ioyeux & eleué en courage pour la uictoire qu'il uenoit de gagner. Les dames Spartaines le trouuerent plus grand & plus beau que iamais, tellement qu'il n'y eut celle qui ne reputast Chelidonide bien heureuse d'auoir un tel amy: & y eut quelques uns des uieillards qui le suyans allerent crians apres luy,

33 Va, gentil Acrotatus, besongne bien Chelido-
32 nide, & engendre de bons enfans à Sparte. Le combat fut aussi fort aspre à l'endroit ou estoit Pyrrus, & y eut plusieurs Spartains qui y combattirent fort uaillement: mais entre les autres un nommé Phyllius, apres auoir fait teste longuement, & tué de sa main plusieurs des ennemis, qui s'efforceoyent de passer la trenchee, quand il sentit que le cueur luy defailloit pour le grand nombre des bleceures qu'il auoit, il appella l'un de ceulx qui estoient au renc de derriere luy, & luy cedât sa place, alla tumber tout roide mort entre les armes des siens, à fin que les ennemis ne peussent auoir son corps. A la fin le combat ayant duré toute la iournee, la nuict suruint qui les separa, & Pyrrus estant couché en son liât, en dormant eut une telle uision: Il luy fut aduis qu'il frappoit de la foudre la uille de Lacedemone & la brusloit toute, dont il estoit si ioyeux, que la ioye l'en esueilla. Parquoy esueillé qu'il fut, il commanda à ses Capitaines, qu'ilz teinsent leurs gës tous prests pour recommencer l'assault, & racompta à ses familiers son songe, estimant que cela luy predisoit que sans point de doubte il prendroit la uille d'assault. A quoy tous les autres assistans s'accordoyent merueilleusement, excepté un nommé Lysimachus, qui au contraire disoit, que ceste uision ne luy plaisoit point, pource que les lieux frappez de la foudre sont sacrez,

& est defendu d'y entrer : à raison dequoy il auoit aussi peur, que les Dieux ne luy signifiasent, qu'il n'entreroit point dedans la uille de
» Sparte . Pyrrus luy respondit : Cela, dit il, sont
» propos pour disputer pour & contre en une as-
» semblee de peuple, car il n'y a certitude quel-
» conque . Mais au demourant il fault que chas-
» cun prenant les armes en main se propose ceste
» sentence deuant les yeux,

» Il n'est meilleur presage, que de prendre

» Armes en main pour son maistre defendre.

faisant allusion aux uers d'Homere, ou il y a, pour son païs defendre . En disant cela, il se leua, & des la poincte du iour mena son armee à l'assault . De l'autre costé aussi les Lacedæmoniens d'une hardiesse & magnanimité plus grande que leurs forces, feirent merueilleux deuoir de se defendre, ayans leurs femmes aupres d'eulx, qui leur tendoyent les bastons, dont ilz combatoyent, bailloyent à boire & à manger à ceulx qui en auoyét besoing, & retiroyent ceux qui estoient blecez pour les penser. Les Macedoniens aussi de leur costé faisoient tout ce qu'ilz pouuoient pour combler la trenchee avec force bois & autre matiere, qu'ilz iettoyent par dessus les corps morts & les armes estants au fond du fossé: & à l'opposite les Lacedæmoniens faisoient aussi tout leur effort pour l'empescher: mais en ces entrefaittes on apperceut Pyrrus à cheual, qui ayant ia passé la trenchee

& le rempar des chariots, s'efforceoit d'entrer en la uille. Ceux qui estoient ordonnez à la defense de cest endroit la, s'escrierent incontinent, & les femmes se prirent à courir, & à crier comme si tout eust esté perdu: & comme il passoit desia oultre, renuerfant à coups de main ceulx qu'il trouuoit en teste deuât luy, il luy fut tiré un coup de traict Candiot, qui donna droit à trauers les flans de son cheual, lequel pour la douleur qu'il sentit, faulta hors de la presse, & en mourant l'emporta & le uersa sur le pendant d'un coustau fort droit, & ou il estoit en grand danger de tumber du hault en bas. Cela effroya les seruiteurs & amis qu'il auoit autour de luy, & quand & quand les Lacedæmoniens les aduisans en cest effroy, coururent incontinent celle part, & à coups de traict les repoulsèrent & rechassèrent tous au dehors de la trenchée. Parquoy depuis ceste retraitte Pyrrus feit par tout ailleurs cesser aussi l'assault, esperât que les Lacedæmoniés à la fin se redroyét, attédu qu'il y en auoit eu en ces deux iours beaucoup de tuez, & les autres presque tous blecez: mais la bõne fortune de la uille, soit qu'elle uoulust en soy mesme esproouuer la uertu des habitâs ou bié môstrer cõbien elle a de puissance es cas desesperéz des affaires du monde, sur le poinct que les Lacedæmoniens cõmenceoyét à auoir mauuaise esperâce de leur faict, feit uenir de Corinthe Aminias Phocié l'un des Capitaines d'An-

Antigonus avec bonne troupe de gés de guerre, & le meit dedans la uille pour la secourir : & puis il ne fut pas plustost entré que leur Roy Areus y arriua aussi d'un autre costé, uenant de Cádiz, dont il ramenoit quád & luy deux mille combatans. Adonc les femmes se retirerent en leurs maisons, faisans leur compte qu'il n'estoit plus besoing qu'elles s'empeschassent des affaires de la guerre. Aussi donna lon congé de s'en aller reposer aux hōmes uieux, qui pour la necessité auoyent esté contraincts de prendre encore les armes oultre les forces de leur aage, & se régerēt les nouueaux uenus au lieu d'eulx en bataille. Pyrrus entendant ce secours s'opiniastra, & s'efforcez encore plus q̄ iamais pour tascher à les emporter d'assault: routefois à la fin quand il eut cogneu à ses despens qu'il n'y gaignoit rien que des coups, il s'en deporta, & alla piller & gaster tout le plat païs, delibérant y passer son hyuer: mais il ne peut euitier sa destinee: car il se leua en la uille d'Argos une sedition entre deux des principaux citoyens, Aristas & Aristippus: & pource qu'il sembla à Aristas, que le Roy Antigonus fauorisoit son aduerfaire, il se hastia d'enuoyer le premier deuers Pyrrus, lequel estoit de telle nature, qu'il amassoit & enuelopoit cōtinuellemēt esperāces sur esperances, en prenant tousiours les prosperitez qui luy aduenoyēt pour occasiō d'en esperer de plus grandes: & si d'adventure il perdoit,

il taschoit à se recouurer, & remplir ses pertes par autres nouuelles entreprises: de maniere que pour estre ne uaincu ne uainqueur, il ne pouuoit iamais reposer qu'il ne trauaillast tousiours quelqu'un, & qu'il ne fust aussi luy mesme trauaillé: au moyen dequoy il se partit incontinent pour s'en aller en Argos: mais Areus luy ayant dressé embusches en plusieurs lieux, & ayant occupé les plus malaisez passages par ou il auoit à passer, chargea sur les Gaulois & Molossiens, qui estoient à la cueuë de son armee. Or auoit il esté ce iour la predict à Pyrrus par son deuin, qui auoit trouué en sacrifiant le foye defectueux de l'hostie immolee, que cela luy denonceoit la perte de quelqu'un de ceulx qui luy tenoyent de plus pres: mais sur le poinct qu'il ouit le bruit de la charge, il ne pensa point à la prediction de son deuin, & commāda à son filz qu'il y allast avec les gens de sa maison, & luy ce pendant à la plus grande haste qu'il peut, fait marcher le demourant de son armee pour la tirer uistement hors de ce mauuais pas. Si fut la meslee fort aspre à l'entour de Ptolomæus: car c'estoyent tous les meilleurs hommes des Lacedæmoniens à qui il auoit affaire, conduicts par un uaillāt Capitaine nommé Eualcus: mais ainsi comme il combatoit fort courageusement contre ceulx qu'il auoit en teste, il y eut un soudard Candiote nommé Oræsus natif de la uille d'Aptera, homme prompt à la main, & leger du

pied, qui en courant au long de luy, luy donna un coup dedans le flanc donc il le porta mort par terre. Ce prince abbatu, toute sa troupe se print incontinent à fouir, & les Lacedæmoniës à les pourfuyure si chaudemët, qu'ilz ne se donnerent garde qu'ilz se trouuerët en pleine campagne bien fort esloignez de leurs gës de pied: parquoy Pyrr^o, qui uenoit tout à l'heure d'ouir la mort de son filz, passionné d'ire & de douleur, tourna tout court contre eulx avec ses hōmes d'armes Molossiens, & donnant le premier dedans, en feit une merueilleuse boucherie. Car combien que par tout ailleurs il fust terrible & inuincible ayāt les armes au poing, il feit neantmoins alors plus grande preuue de sa prouësse, force & hardiesse, que iamais il n'auoit fait auparavant: & comme il eust lâcé son cheual contre Eualcus pour le choquer, Eualcus se ietta à costé, & luy tira un coup d'espee, duquel il faillit à luy couper la main dont il tenoit la bride, mais il n'asëna que les renes qu'il couppa: & Pyrrus tout aussi tost luy tira un coup de iaueline, dont il le percea d'oultre en oultre à trauers le corps, & mettant pied à terre tailla en pieces toute celle troupe de Lacedæmoniens, tous hommes choisis, à l'entour du corps d'Eualcus. Ainsi fut l'ambirion des Capitaines cause de celle perte à leur païs pour neant, attendu que la guerre contre eulx estoit finie: mais Pyrrus ayant par maniere de dire, fait sacrifice de ces

paüres Lacedæmoniens à l'ame de son filz, & faict ce merueilleux cōbat pour honorer ses funeraïlles, en conuertissant grande partie de la douleur de sa mort en ire & courroux cōtre les ennemis, tira puis apres oultre le droit chemin d'Argos. Et entédant comme Antigonus auoit desia saisi les coustaux qui sont au dessus de la plaine, il se logea pres la uille de Nauplia, & le lendemain enuoya un herault deuers Antigonus, par lequel il luy feit dire oultrage, en l'appellant meschant, & le desfiant à descendre en la plaine pour combattre à qui d'eulx demoureroit Roy. Antigonus luy feit responce, qu'il faisoit la guerre autāt avec le temps, comme avec les armes, & au demourant, que si Pyrrus se faisoit de uiure, il auoit assez de chemins ouuerts pour aller à la mort. Ceulx d'Argos enuoyerēt aussi ambassadeurs deuers l'un & l'autre, les prier qu'ilz se retirassent, attendu qu'ilz scauoÿēt bien qu'ilz n'auoyēt que uoir sur la uille d'Argos, & qu'ilz la laissassent neutre & amie de tous les deux. Antigonus sy accorda, & leur bailla son filz pour ostage: & Pyrrus promet biē qu'il le feroit aussi, mais pource qu'il ne donnoit point de caution & d'assurance de ce faire, on se deffioit plus de luy. Si aduindrent lors plusieurs grands & merucilleux presages, tant à Pyrrus comme aux Argiens. Car ayant Pyrrus sacrifié des bœufs, les testes toutes coupees & separees des corps tirerent les lāgues dehors &

licherēt leur propre sang: & dedās la uille d'Argos la religieuse du tēple d'Apollo Lyceiē nommee Apollonide, s'en courut parmy les rues, criāt qu'elle ueoit la uille toute pleine de meurtre & de sang espandu, & un Aigle qui uenoit à la meslee, mais qu'elle s'esuanouissoit incontinent, & ne sçauoit on qu'elle deuenoit. Si arriua Pyrrus ioignant les murailles d'Argos qu'il estoit ia nuict toute noire, & trouuant la porte que lon appelle Diamperes ouuerte par Aristeas, meit dedans ses Gaulois, lesquelz se faisirent de la place auant que ceulx de la uille en sentissent rien: mais à cause que la porte se trouua trop basse pour passer les Elephans avec leurs tours sur le dos, il les leur fallut oster, & puis quand ilz furent au dedans, les remettre en tenebres & en tumulte, à quoy il se perdit du temps beaucoup, de maniere que ceulx de la uille à la fin s'en apperceurent, qui s'en coururent incontinent au chasteau de l'Aspide & autres endroits forts de la uille: mais quand & quand ilz enuoyerent en diligence deuers Antigonus, le prier qu'il les uinst secourir: ce qu'il feit: & arriué qu'il fut ioignant les murailles, il demoura dehors aux escoutes, & cependant enuoya son filz avec ses principaulx Capitaines dedans, qui menoyent un bon & gros nombre de gens de guerre. Au mesme temps y arriua aussi Areus Roy de Sparte avec mille Cāditors, & les plus dispos Spartiates, lesquelz tous en-

semble uenàs à charger les Gaulois qui estoient sur la place, les meirent en grand trouble & en grand effroy: & Pyrrus entrât par le quartier qui s'appelle Cylabaris avec grands cris & fieres clameurs, quand il entendit que les Gaulois ne luy respondoient point fermement ny audacieusement, il se doubta bien incontinent que c'estoit la uoix de gens pressez, & qui auoyent beaucoup d'affaires: au moyen dequoy il se uoulut haster de les aller secourir, poulsant les gens de cheual qui marchoyent deuant luy à grande peine & à grand danger, à cause des trous des esgouts soubterrains, & des conduits d'eaux, dont la uille est toute pleine. Si y auoit une grande confusion, comme lon peult imaginer en un combat de nuict, là ou personne ne ueoit ce qu'il auoit à faire, ny n'entendoit pour le grand bruit ce que lon commandoit, & s'esgaroit on, en s'escartant les uns des autres parmy les rues, ny ne pouuoient les Capitaines rien ordonner à leurs gens, tant pour l'obscurité de la nuict, comme pour la confusion du tumulte qui estoit par toute la uille, & pource que les rues estoient fort estroittes: à raison dequoy ilz demouroient les uns & les autres sans rien faire, attendans que le iour fust uenu, à la poincte duquel Pyrrus aduifa le chasteau de l'Aspide tout plein des armes de ses ennemis: & dauantage, soudain qu'il fut entré iusques sur la place, entre plusieurs autres beaux ouurages publics qui y estoient

estoyent pour ornement du lieu, il apperceut les images d'un loup & d'un taureau de cuyure, qui combatoyent ensemble. Ceste rencontre l'estonna, pource que sur l'heure il luy souuint d'une prophetie, qui autrefois luy auoit esté respondue, que la destinee de sa mort seroit uenue lors qu'il uerroit un loup & un taureau combattre l'un contre l'autre. Si comptent les Argiens que ces images ont esté mises sur leur place pour memoire d'un accidēt qui iadis aduint en leur païs, pource que quand Danaus y entra premieremēt par le chemin qui s'appelle Pyramia, comme qui diroit terres à blez, en la contrée Thyreatide, il rencōtra en sa uoye un loup qui combatoit contre un taureau. si s'arresta pour uoir quelle seroit l'issue de leur combat, prenant le cas & supposant en soy mesme que le loup fust de son costé, pource qu'estant estrange comme luy, il uenoit courir sus aux naturelz habitans du païs. Le loup demoura finablement uainqueur: parquoy Danaus faisant sa priere à Apollo Lycien, poursuyuit son entreprise, & feit si bien qu'il chassa d'Argos Gelanor, qui pour lors estoit Roy des Argiens. Voila pourquoy lon dit que ces images du loup & du taureau ont esté mises sur la place d'Argos. Pyrrus dōques se sentāt tout descouragé pour les auoir ueuës, & aussi pource que rien de ce qu'il auoit esperé ne luy succedoit à biē, pensa de se retirer: & pourtant qu'il craignoit les portes de la uille,

qui estoient trop estroittes, il enuoya deuers son filz Helenus, qu'il auoit laissé hors la uille avec la plus grāde partie de son armee, luy mādant qu'il demolist un pan de la muraille par ou ses gens peussent plus commodemēt sortir, & qu'il les recueillist si d'aduēture les ennemis leur donnoient de l'affaire au sortir: mais celuy qu'il y enuoya, fut si hatif & si estourdy, avec ce que le tumulte l'empeschoit, qu'il n'entendit pas bien ce que Pyrrus luy dit, ains fait son rapport tout au contraire. Au moyen dequoy le ieune prince Helenus prenant avec luy les meilleurs combatans qu'il eust, & le reste des Elephans, entra dedans la uille pour aller secourir son pere, lequel commenceoit desia à se retirer: & tant que la largeur de la place luy donna espace de combatre à son aise, en se retirant il repoulsa tresbien ceulx qui luy couroyent sus, en leur mōstrant uisage par boutees: mais quād il fut rengé dedans la rue qui alloit de la place à la porte de la uille, il s'embarassa dedans ses gēs mesmes, qui luy uenoyēt à l'encōtre de deuers la porte pour le cuider secourir: mais ilz n'entendoyent pas pour le bruit ce qu'il leur crioit qu'ilz reculassent en arriere, & quād bien les premiers l'eussent entendu, & uoulu faire, ceulx de derriere qui se couloyēt tousiours dedans à la foule, les en eussent empeschez, avec ce que le plus grand des Elephans, par cas d'adventure, estoit cheut de trauers tout au beau

milieu de la porte, ou il bramoit & empeschoit de sortir ceulx qui uouloyent reculer en arriere. Vn autre de ceulx qui estoient deuant entrez au dedans de la uille, nommé Nicon, qui uault autant à dire cōme, uictorieux, cherchant son gouuerneur, lequel auoit esté abbattu en terre de dessus luy à force de coups, se rua contre ceulx qui reculoient sur luy, réuersant amis & ennemis pesse mesle, iusques à ce que ayant trouué le corps de son maistre mort, il l'enleua de terre avec sa trompe, & le portant dessus ses deux dents, s'en retourna arriere comme furieux, foulant aux piedz tout ce qu'il trouuoit en son chemin. Parquoy estans ainsi serrez & pressez les uns contre les autres, il n'y auoit personne qui se peust aider à par soy: car il sembloit que ce fust une seule masse de toute la multitude, & un seul corps cloué ensemble, qui tantost poulast en auant, & tantost reculast en arriere: si ne combatoyent guere contre les ennemis qui les arrestoyēt à tous coups & leur donnoient sur la cueuë, ains se faisoient entre eulx mesmes plus de mal que ne leur en faisoient les ennemis: car si aucun desguainnoit l'espee, ou baissoit la picque, il ne pouuoit plus rengainer, ny releuer sa picque, ains en donnoit à quelqu'un de ses gens mesmes qui se rencōtroit à l'endroit, & se tuoyent en s'entreheurtant ainsi les uns les autres. Parquoy Pyrrus uoyāt ce trouble & ceste tourmente de ses gēs,

osta la couronne qu'il auoit dessus son armet, laquelle le faisoit paroïr de loing entre les autres, & la dōna à l'un de ses familiers qui se trouua le plus pres de luy: puis se fiant en la bōté de son cheual, se ietta sur les ennemis qui le poursuyuoÿēt: si y en eut un qui luy donna un coup de iaueline à trauers sa cuirace, toute fois la bleceure n'en fut pas dangereuse ny grande avec. Parquoy il s'adressa à celuy qui luy auoit tiré le coup, qui estoit un Argien, homme de petite qualité, & filz d'une pauvre uieille femme, laquelle à l'heure mesme estoit mōtee sur les couuertures des maisons, comme toutes les autres femmes de la uille, pour uoir le combat, & aperceuant que c'estoit son filz que Pyrrus uouloit choquer, elle eut si grāde frayeur de le uoir en ce peril, qu'elle prit à deux mains une tuyle & la ietta dessus Pyrrus: la tuyle tumbant au lōg de la teste à la faulte de l'armet, luy donna droit sur le chaignō du col, & luy en brisa les iointures, dont il luy prit soudain une pasmoïson telle, qu'il en perdit la ueüe sur l'heure: les renes luy cheurent des mains: & luy tumba de dessus son cheual en terre, ioignant la sepulture de Lycymnius, sans que lon sceust qui il estoit, au moins la commune, iusques à ce qu'un Zopyrus qui estoit à la soude d'Antigonus, & deux ou trois autres soudars accoururent uistement celle part, & l'ayās recogneu le trainnerēt au dedans d'une porte ainsi qu'il commenceoit à se

reuenir de la pafmoifon . Si defguainna ce Zopyrus une efpee efclauonne qu'il portoit , pour luy en couper la teſte : mais Pyrrus le regarda entre deux yeux d'un regard ſi terrible, qu'il l'ef froya, & luy feit tellement trembler la main de peur, que en ce trouble & c'eſt effroy , il ne luy dōna pas droit ou il falloit pour luy couper le col, ains l'aſſena au deſſoubs de la bouche, à l'en droit du menton , de ſorte qu'il demoura long temps à luy acheuer de trencher la teſte. Le cas fut incontinent ſceu de pluſieurs : parquoy Alcyoneus y courant en demanda la teſte, comme pour la recognoiſtre : mais auſſi toſt qu'il la teint, il ſ'en courut deuers ſon pere, qu'il trouua deuſant avec quelques ſiens familiers , & luy ietta deuant luy la teſte . Antigonus l'ayant regardée & recogneue , chaſſa ſon filz à coups de baſton, en l'appellant cruel meurtrier & barbare inhumain , & ſe couurant les yeux avec ſon manteau, ſe prit à plorer par compaſſion , en ſe ſouuenant de la fortune de ſon ayeul Antigonus & de ſon pere Demetrius: puis feit honorablement bruſler & inhumer la teſte & le corps de Pyrrus. Depuis Alcyoneus rencōtra ſon filz Helenus en bien pauure eſtat, affublē d'un petit manteau ſimple, & le recueillant humainement avec paroles doulces & gracieuſes , le mena deuers ſon pere. Quoy uoyant Antigonus, luy dit:

» C'eſt acte , mon filz , uault miculx , & me plaïſt

» plus que le premier : mais encore n'aſ tu pas

» faict du tout comme tu deuois, en ce que tu
» n'as pas osté à Helenus ce meschant manteau
» qu'il a sur les espaules, lequel fait plus de honte
» à nous qui auons gaigné, qu'à luy qui a perdu.

Ces paroles dittes, il embrassa Helenus, & l'ayāt remis en honeste equippage, le renuoya en son Royaume d'Epire, & au demourāt s'estant faisy du cāp & de l'armee entiere de Pyrrus, il traita humainement tous ses seruiteurs & amis.



CAIVS MARIVS.



N ne sçait quel estoit le troisieme nom de Caius Marius, non plus que de Quintus Sertorius, qui teint un temps les Hespagnes en sa main, ny de Lucius Mummius celuy qui destruisit la uille de Corinthe: car ce nom de Achaicus qui fut donné à Mummius, & de Africanus à Scipion, & de Numidicus à Metellus, estoient tous surnoms qui leur auoyent esté imposez, à raison des conquestes par eulx faictes. C'est un argument, par lequel Posidonius cuide bien conuaincre ceux qui disent que le troisieme nom des Romains est leur propre nom, comme Camillus, Marcellus, Caton: car si ainsi estoit, ce dit il, il sensuyuroit que ceulx qui n'ont que deux noms n'en auroient point de propre: mais d'un autre costé aussi, il ne s'aduisoit pas, que par ceste mesme raison il faudroit

dire, que les femmes n'auroyēt point de noms: car il n'y a pas une femme Romaine qui ait le premier nō, que Posidonius estime estre le propre des Romains: & que des autres deux, l'un soit le nom commun de toute la famille, cōme des Pompeiens, des Manliens, des Corneliens, ne plus ne moins que sont entre les Grecs les Heraclides, & les Pelopides: & l'autre soit un surnom pris & imposé des faicts, ou de la nature, ou de la forme & figure du corps, ou de quel que autre semblable accidēt, cōme sont ces surnōs, Macrinus, Torquat⁹, Sylla: tout ainsi qu'entre les Grecs, Mnemō, qui signifie ayāt bōne memoire: Grypos, c'est à dire, ayāt nez aquilin: Calliconicos, uictorieux: mais quant à cela la diuersité de l'usage donneroit assez matiere de faire des oppositions au contraire qui uoudroit. Au demourant, quant à la forme du uisage de Marius, nous auons ueu une siene image de marbre qui est à Rauenne, uille de la Gaule, laquelle represente fort naïfvement celle rigueur & austerité de nature & de meurs que lon dit auoir esté en luy: car estant né robuste de sa personne, enclin aux armes, & ayant esté nourry à la guerre en discipline militaire plus que es ciuilitéz de la uille, quand il uint à auoir authorité il ne peult pas retenir ny moderer son courroux, Et dir on qu'il n'apprit iamais les lettres Grecques, & qu'il ne se seruit iamais de celle langue en affaire quelconque de consequence,

comme si c'eust esté chose digne de mocquerie, que se trauailler pour apprendre une langue dont les maistres estoyent en seruitude d'autrui : & apres son second triumphe, il feit un iour à la dedicace de quelque temple, iouer des ieux à la Grecque pour donner passeremps au peuple Romain, & entra dedans le theatre, mais il ne feit que s'asseoir seulement, & en sortit tout incontinent. Parquoy il me semble, que comme Platon souloit dire souuent au philosophe Xenocrates, qui estoit d'une nature reuesche, chagrine & par trop seuer : O Xenocrates mon amy, ie te prie sacrifie aux Graces : aussi si quelqu'un eust peu persuader à Marius qu'il eust sacrifié aux Muses & aux Graces Grecques, c'est à dire, qu'il eust appris les lettres & les sciences des Grecs, il n'eust pas adiousté à tant de haults & glorieux faicts de paix & de guerre, une si laide & si malheureuse fin comme il feit, par une cholere & une ambition importune en tel aage, & par une auarice insatiable, qui comme uents impetueux le ietterent en une uieillesse sanglante, cruelle & inhumaine. Ce que lon pourra bien promptement cognoistre en lisant le discours de ses faicts. Premièrement il estoit de fort petit lieu, né de pere & mere pauures, qui gaignoyent leur uie à la sueur de leur corps. Son pere auoit nom comme luy, & sa mere s'appelloit Fulcinia. Cela fut cause qu'il commença bien tard à hanter en la

uille & à gouster les façons de faire de Rome, se tenant tout le reste du temps au parauant en un petit uillage qui s'appelloit Cirræaton, dedans le territoire de la uille d'Arpos, là ou il menoit une uie qui estoit bien dure & champestre, à comparaison de la ciuilité & elegance de ceux qui uiuoient dedans les uilles, mais au demourant bien reformee & plus semblable aux meurs des anciens Romains. Le premier uoyage qu'il feit à la guerre, fut contre les Celtiberiens en Hespagne, sous Scipion l'Africain, quand il alla assieger la uille de Numance: là ou ses Capitaines en peu de temps apperceurent bien qu'il estoit plus homme de guerre, que nul autre de ses compagnons: car il receut fort aisement la reformation des meurs & de la discipline militaire, que Scipion remeit sus entre les gens de guerre, qui parauant estoient tous desordonnez & corrompus de uoluptez & de delices. Et si dit on que à la ueuë de son Capitaine il combatit teste à teste contre un des ennemis, & le desfeit: à raison de quoy, Scipion pour le rendre affectionné en son endroit, luy faisoit plusieurs autres honneurs & faveurs: & mesmement un iour l'ayant fait soupper avec luy à sa table, comme quelqu'un apres le soupper eust mis en auant un propos, touchant les Capitaines qui estoient pour lors à Rome, il y eut un des assistens qui demanda à Scipion, fust ou pource que ueritablement il en doub-

raist, ou qu'il uoulust en cela flatter Scipion, quel autre Capitaine pareil à luy auroit le peuple Romain apres son deces. Scipion ayant Marius au dessus de luy, luy frappa tout doucement sur l'espaule & respondit, A l'adventure
sera ce cestuy cy. Tant estoit l'un de ces deux personnages bien né, pour monstrier des sa ieu-
nesses qu'il seroit un iour grand: & l'autre, pour sagement coniecturer qu'elle seroit la fin par en uoir le commencement. Tant y a que ceste parole, plus que nulle autre chose, à ce que lon dit, eleua Marius en bonne esperance, ne plus ne moins que si c'eust esté l'oracle de quelque Dieu, & luy donna cueur de se ietter aux affaires de la chose publique: là ou par le moyen du port & de la faueur que luy feit Cecilius Metellus, la maison duquel son pere & luy auoyent de tout temps suyue & honoree, il obtint l'office de Tribun du peuple. Et en ce Tribunat il meit en auant une loy touchant la maniere de donner les uoix & suffrages aux elections des magistrats, laquelle sembloit oster aux nobles l'autorité qu'ilz auoyent es iugemens: & pourtant le Consul Cotta se formalisa alencontre, & persuada au Senat de s'opposer à ceste loy, & empescher qu'elle ne fust authorisee, & quand & quand de faire appeller Marius deuant culx pour leur rendre raison de son faict. La conclusion fut ainsi prise & arrestee au Senat, & Marius y entrant ne s'estonna

point, comme eust peu faire un autre ieune homme qui n'eust encore faict que commencer à uenir au monde, sans auoir autre qualité notable que sa uertu qui le recommandast: ains prenant de soy mesme telle assurance, que luy donnerent les haults faicts qu'il executa depuis, il menaça publiquement le Consul de le faire mener en prison, sil ne faisoit tout sur l'heure effacer la conclusion qu'il auoit faict arrester. Le Consul adonc se tourna deuers Cecilius Metellus, & luy en demanda son aduis, lequel se dressant en pieds parla en la defense du Consul: & lors Marius appellant de dehors un sergent, luy commanda qu'il faist Metellus luy mesme pour le mener en prison. Metellus en appella deuant les autres Tribuns, mais il n'y en eut pas un qui prist la cause pour luy, tellement que le Senat apres tout fut contrainct de faire effacer & reuoquer la conclusion qui auoit esté prise: & lors Marius retournant en grand honneur sur la place, en l'assemblée du peuple, feit passer & autoriser sa loy: & prit on opinion de luy qu'il seroit homme roide, qui ne fleschiroit iamais pour crainte, ny ne ployeroit point de honte, ains seroit teste au Senat en faueur du peuple. Toutefois il effaça bien tost apres ceste opinion par un autre acte qu'il feit: car comme quelque autre eust proposé une loy pour faire gratuitement, sans rien payer, distribuer du bled à chasque citoyen, il

ſy oppoſa fort roidement, & le gaigna : de maniere qu'il uint à eſtre egale-
ment honoré & eſtimé de l'une & de l'autre partie, comme celuy
qui ne uouloit gratifier ny aux uns ny aux autres, au preiudice du bien de la choſe publique.
Après le Tribunat il pourſuyuit l'office de l'Ædilité, celle qui eſt la plus honorable & la plus
grande : car il y a deux Ædilitez, l'une qui ſappelle Ædilitas Curulis, ainſi nommee à cauſe de
certaines chaires qui ont les pieds courbes, ſur
leſquelles ilz ſeient quand ilz donnent audience : l'autre eſt de moindre dignité, & l'appelle
lon Ædilitas Popularis : & quand on a eleu ces
premiers grands Ædiles à Rome, tout ſur le
champ on procede auſſi le meſme iour à l'ele-
ction des moindres. Marius donques cognoiſ-
ſant euidemment qu'il ſ'en alloit forclos & de-
bouté de la premiere, ſe tourna incontinent à
demander au moins la ſeconde : ce qui ne fut
pas trouué bon, ainſ l'en eſtima lon homme
preſumptueux, opiniaſtre & audacieux : de ſor-
te que en un meſme iour il ſouffrit deux refus,
ce que iamais homme n'auoit faiët au parauât :
& neantmoins pour tout cela il ne rabaiſſa rien
de ſon courage, ainſ peu de temps apres il de-
manda auſſi la Prature, & ſ'en fallut bien peu
qu'il n'en fuſt debouté : encore à la fin ayant e-
ſté eleu tout le dernier, il fut accuſé d'auoir cor-
rompu & achepté les uoix du peuple par argët :
dequoy donnoit grande preſumption, entre au-

tres arguments, ce que lon auoit ueu un ualeẽ de Cassius Sabacon, au dedans du pourpris ou se faict l'election, allant & uenant parmy ceux qui donnoient leurs uoix, pource que cestuy Sabacon estoit grand amy de Marius: si en fut appellé deuant les iuges, qui l'interroguerent sur ce faict: à quoy il respondit, que pour la grande chaleur qu'il faisoit, il auoit eu soif, & auoit demandé de l'eau fresche à boire, & que ce ualet luy en auoit apporté dedans un pot iusques là ou il estoit, mais qu'il en estoit sorty tout aussi tost comme il eut beu. Cestuy Sabacon fut depuis osté du Senat par les prochains Censeurs, & estima lon qu'il auoit bien merité ceste note d'infamie, ou pour s'estre pariuré en iugement, ou pour auoir esté si subiect à son plaisir. Caius Herennius fut aussi appellé pour porter tesmoignage alencontre de Marius, mais il allegua pour son essoine, que la loy & coustume dispensoit le patron de porter tesmoignage alencontre de son suyuant ou adherent, & en fut absouls par les iuges: car les Romains appellent Patrons ceux qui prennent en main la protection des moindres qu'eulx: disant que les predecesseurs de Marius, & Marius luy mesme, auoyent tousiours esté dependans de la maison des Herenniens. Les iuges receurent & approuuerent ces excuses, mais Marius sy opposa, alleguant que depuis qu'il auoit eu cest honneur que de tenir office de la chose publique, il estoit

forty de ceste bassesse de condition, d'estre plus
suyuant ne dependant de personne, ce qui n'e-
stoit pas du tout ueritable: car tout magistrat
n'exempte pas celuy qui le tient, ny sa race aus-
si, de demourer sous le patronnage d'autrui,
ny ne les deliure pas de l'obligation de les ho-
norer, ains fault necessairement que ce soit un
magistrat à qui la loy permette de seoir en chai-
re Curule, comme ilz l'appellent, c'est à dire,
qui se porte sur un chariot par la uille. Mais en-
core que es premiers iours que la cause fut plai-
dee, l'affaire de Marius allaist mal, & que les iu-
ges luy fussent rudes & contraires, à la fin tou-
tefois au dernier iour il fut absous à pur & à
plein contre l'opinion de tout le monde, par ce
que les sentences des iuges se trouuerent en
nombre pareil autant pour que contre luy. Si
se porta assez honestement en l'exercice de cest
estat de Præture, & apres l'an reuolu, quand ce
uint à departir les prouinces au sort, il luy es-
cheut l'Hespagne qui est au dela de la riuere de
Betis: là où lon dit qu'il nettoya de brigands &
de larrons tout le pais, lequel estoit encore
fort farouche & sauuage pour les barbares &
brutales meurs & façons de faire des habitans
d'iceluy: car les Hespagnolz estimoyent enco-
re lors, que c'estoit une belle chose que uiure
de brigandage. A son retour de ceste prouince
à Rome, quand il se uolut entremettre des
affaires, il trouua qu'il n'auoit ny eloquence ny

richesse, qui estoient les deux moyens, par lesquels quelz ceulx qui estoient lors en credit, menoyent le peuple à leur uoulunté : toutefois si faisoit on compte de la fermeté de courage que lon apperceuoit en luy, de sa perseuerance au trauail, & de la simplicité de son uiure, qui estoient causes de le faire honorer & auancer, tellement qu'il fut fort hautement marié: car il espousa Iulia, qui estoit de la noble & illustre maison des Cæsars, de laquelle fut nepueu Iulius Cæsar, qui depuis a esté le premier homme des Romains, & qui pour l'alliance & affinité qui estoit entre eulx, sembloit en quelque chose imiter Marius, ainsi comme nous auõs escrit en sa uie. Marius donques fut homme de grande continence, & aussi de grande patience, comme lon peut iuger par un acte qu'il feir, s'estant mis entre les mains des Chirurgiens : car il auoit les cuisses & les iambes pleines de grosses ueines eslargies, & s'en faschant pource que c'estoit chose laide à uoir, il resolut de se mettre entre les mains des medecins pour se faire penser : si bailla l'une de ses iambes au Chirurgien pour y besongner, sans uouloir estre lié, comme lon a accoustumé de faire en cas semblable, & endura patiemment toutes les extremes angoisses de douleur qu'il estoit force qu'il sentist quand on l'incisoit, sans remuer, sans gemir, ny soupirer, avec un uisage constant & asseuré, sans iamais dire un seul mot : mais quand
le Chi-

le Chirurgien ayant fait à la premiere cuisse uoulut aller à l'autre, il ne la luy uoulut pas bailler, disant, le uoy que l'amendement ne uault pas la douleur qu'il en fault endurer. Depuis Cecilius Metellus Consul estant designé pour aller en Afrique faire la guerre au Roy Iugurtha, mena quand & luy Marius pour l'un de ses lieutenans, là ou Marius uoyant qu'il y auoit matiere de faire de belles choses & de bien monstrier sa prouësse, il ne se proposa point pour son but en ce uoyage l'augmentation de l'honneur & de la reputation de Metellus, comme faisoient les autres lieutenans, & pensa que ce n'estoit point Metellus qui l'auoit appellé là pour son lieutenant, ains que c'estoit la fortune mesme qui luy presentoit une occasion fort à propos pour s'aggrandir, & par maniere de dire, le conduisoit par la main en un tresbeau champ, pour y faire uoir ce qu'il scauoit faire: & à ceste cause s'esuertua d'y monstrier toutes les preuues qu'il est possible de prouësse & de ualeur. Car y ayant tousiours beaucoup d'affaires & beaucoup de difficultez en la guerre, iamais il ne refouit par crainte pas une couruee pour danger ou peine qu'il y eust, ny n'en desdaigna aussi pas une pour petite qu'elle fust: ains surmontât ses egaulx & compagnons en bon sens & prouuoiance de ce qui estoit expedient à faire, & estriuant alencontre des priuez soudards en simplicité de uiure, & en souffrance

de labeur, il en alloit acquerant la bonne grace & bienueillance d'un chacun. Car, à dire la uerité, aussi est ce un grand reconfort à ceulx qui trauaillent, que d'auoir des compagnons qui trauaillent uoluntairement quand & eulx, pource qu'il leur semble que cela, ie ne sçay comment, leur oste la contrainte & la necessité: & est une chose qui plaist merueilleusement au soudard Romain, que de uoir son Capitaine mangeant publiquement en ueuë de tout le monde de mesme pain que luy, ou prenant son repos sur quelque meschante paillasse, ou mettant luymesme le premier la main à la besongne, quand il est question de tirer une trenchee, ou de remparer & fortifier le camp: car ilz n'estimēt pas tant les Capitaines qui les honorent ne qui leur donnent, comme ilz font ceulx qui trauaillent, & qui s'exposent aux dangers de la guerre quand & eulx: & y a bien dauantage, qu'ilz aiment plus ceulx qui trauaillent avec eulx, que ceulx qui leur permettent de demourer en oisueté. Marius donques faisant tout cela, & gagnant par ce moyen la bonne grace des soudards, emplit incontinent toute la Libye & toute la uille de Rome de sa renommee, tellement que lon ne parloit que de luy, pource que ceulx qui estoient au camp en Afrique escriuoient à ceulx qui estoient à la maison, que iamais on ne uerroit l'issue de la guerre contre ce Roy barbare, si on n'en donnoit la charge à

Marius, en l'elisant Consul. Ces choses desplai-
foient fort à Metellus, mais encore le fascha
plus l'inconuenient de Turpilius, lequel aduint
en ceste maniere: Il estoit de pere en filz amy &
hoste de Metellus, & l'auoit suyuy en ceste
guerre, ayant en son camp l'estat & la charge
de maistre des ouuriers. Metellus luy commeit
la garde de Vacca, grande & grosse uille: & luy,
pource qu'il traittoit doulcement & gracieuse-
ment les habitans d'icelle, se fiant en eulx, ne se
donna de garde, que par leur trahison il se trou-
ua entre les mains de ses ennemis: car ilz mei-
rent dedås leur uille Iugurtha, mais ilz ne feirēt
aucun desplaisir à Turpilius, ains le demande-
rent au Roy & le laisserent aller à sauueté. Il
fut pour ce faict accusé de trahison: & Marius
estant l'un de ses iuges au conseil, ne se conten-
ta pas de luy estre fort aigre, mais encore irrita
il plusieurs du conseil à l'encontre de luy, telle-
ment que Metellus en despit qu'il en eust, fut
contrainct à la pluralité des uoix, de le con-
damner comme traistre à mourir: & peu de
temps apres il fut trouué & auéré, qu'il auoit
esté accusé & condamné à tort. Si n'y eut ce-
luy du Conseil qui n'en fust fort marry avec
Metellus, qui portoit fort impatiemment la
mort de ce pauvre innocent: mais au contraire
Marius s'en esiouissant, & s'attribuant la pour-
suinte du faict, n'eut point de honte de se uan-
ter publiquement, qu'il auoit attaché au col de

Metellus une furie uengeresse du sang de son
hoste qu'il auoit fait mourir à tort. Depuis cela
ilz furent ennemis declarez , & dit on que un
iour Metellus, comme par maniere de mocque-
rie, luy dit : Tu nous ueux donques laisser, ô
homme de bien, & t'en retourner à Rome pour
briguer le Consulat, & ne te suffiroit pas d'at-
tendre à l'estre quand & mon filz. or ce filz là
estoit encore un ieune garson. Mais, quoy qu'il
y eust, Marius ne laissa point pour cela de pro-
chasser son congé à toute instance: & Metellus,
apres luy auoir usé de plusieurs delais & remi-
ses, finalement luy donna congé douze iours
seulement, auant celuy de l'election des Con-
suls. Parquoy Marius avec une extreme dili-
gence feit en deux iours & une nuict, le chemin
qui estoit fort long depuis le camp iusques à
Vrique, qui est sur la mer, là ou auant que de
s'embarquer il sacrifia aux Dieux: & le deuin
luy dict, que les Dieux par les signes des sacrifi-
ces luy promettoyent une prosperité incroya-
ble, & si grande qu'il ne l'ozeroit esperer. Ces
paroles luy eleuerent le cueur encore dauanta-
ge. Si feit uoile incontinent, & ayant uent en
poupe trauerfa la mer en quatre iours, puis
s'en courut à Rome, là ou tout aussi tost qu'il
fut arriué il falla monstrier au peuple, qui
desiroit singulierement le uoir: & estant con-
duit par un des Tribuns du peuple sur la tribu-
ne aux harengues, apres plusieurs charges &

imputations qu'il proposa à l'encontre de Metellus, finablement il supplia le peuple de le uouloir elire Consul, promettât que dedans peu de iours il occiroit ou bien prendroit prisonnier le Roy Iugurtha. Si fut eleu sans contradiction quelconque, & aussi tost qu'il eut esté déclaré, commença incōtinent à leuer gens de guerre, faisant enroller contre les ordonnances & contre les coustumes anciennes, plusieurs pauvres hommes qui n'auoyent rien, & plusieurs esclaves: là ou les autres Capitaines au parauant luy, n'y receuoient point de telles personnes, & ne mettoient point les armes, non plus que les autres charges honorables de la chose publique, sinon entre les mains de gens qui en fussent dignes: en quoy faisant chacun de ceulx qui estoÿēt enregistrez laissoit ses biens cōme gages, pour asseurāce de bien faire son deuoir à la guerre: toutefois si n'estoit-ce pas ce qui le faisoit le plus haïr, ains estoÿēt ses fieres & insolentes paroles, pleines de mespris des autres, qui offensoient les principaux hōmes de la uille: pource qu'il alloit criant, par maniere de dire, publiquement par tout, que son Consulat estoit une despouille qu'il auoit par sa uertu gaignee sur la lacheté & sur les delices des riches & des nobles, & que ce qui le recommādoit au peuple, & de quoy il se fortifioit, estoient les bleceures qu'il auoit receues en son propre corps, pour le seruice de la chose publique, non point les monu-

ments des morts, ny les images & statues d'autrui : & souuentefois nommant par leurs propres noms tantost Albinus, & tantost Bestia, rous deux de maisons grandes & nobles, qui estans Capitaines de l'armee Romaine auoyent eu mauuaise fortune au pais de la Libye, les appellant lasches & ignorans le mestier de la guerre, en demandant à ceulx qui estoient autour de luy, filz n'estimoyēt pas que leurs ancestres eussent plus tost souhaitté laisser des descendās d'eulx semblables à luy, que telz cōme estoient ceulx la, attendu que eulx mesmes auoyent acquis hōneur & gloire, non pour estre extraictz & issus de noble sang, mais par le merite de leur uertu & de leurs haults faictz. Si ne disoit pas Marius ces paroles en uain par une brauerie & uaine gloire seulement, cherchant à se mettre en malegrace de la noblesse pour neant: mais le commun peuple estant bien aise de uoir faire honte & despit au Senat, & mesurant tousiours la grandeur du courage à la haultaineté & fierté des paroles, l'incitoit à n'espargner point la noblesse, & à picquer ainsi les personnes d'estat, pourueu qu'il agreast à la commune. Au demourant quand il fut repassé en Afrique, Metellus espris d'enuie & aussi de despit, pource que luy ayant acheué toute la guerre, de sorte qu'il ne restoit plus rien à prendre ny à gagner presque, sinon la personne seule de Iugurtha, Marius luy en uenoit ainsi enleuer & oster la

gloire & le triumphe d'entre les mains , ayant
cherché de s'accroïstre & augmenter par ingra-
titude enuers luy , ne se uolut point trouuer
auec luy , ains s'en alla d'un autre costé , & laissa
l'armee à l'un de ses lieutenans Rutilius pour la
luy deliurer : toutefois la uengeance de ceste
ingratitude , à la fin retourna sur Marius mes-
me . Car Sylla luy osta d'entre les mains l'hon-
neur du paracheuement de ceste guerre , tout
ne plus ne moins que luy l'auoit osté à Metel-
lus : mais comment & en quelle sorte , ie le re-
peteray en peu de paroles , pource que nous en
auons escrit les particularitez plus au long en
la uie de Sylla : Bocchus Roy de la haulte Nu-
midie estoit beaupere de Iugurtha , auquel il ne
fit pas grand secours , pendant qu'il eut la guer-
re contre les Romains , pource qu'il haïssoit sa
desloyauté , & auoit peur qu'il ne se feist plus
grand qu'il n'estoit : mais à la fin , apres auoir
bien fouy & erré ça & là , il fut contraint par ex-
treme necessité de mettre sa derniere esperance
en luy , & se retirer pour son dernier refuge par
deuers luy . Bocchus le receut plus tost par honte
de ne l'ozer chasser , que pour amitié qu'il luy
portast , ne pour bien qu'il luy uoulust : & l'ayât
entre ses mains , il faisoit semblant en public
d'interceder pour luy enuers Marius , & de luy
escrite rondement qu'il ne le rendroit point :
mais ce pendant il luy tramoit sous main une
trahison , & enuoya secrettement querir Lucius

Sylla, qui estoit lors Quæsteur, c'est à dire, tresorier general soubs Marius, & de qui il auoit receu quelques plaisirs en ceste guerre la. Sylla se commettant à la foy du Barbare, sy en alla à son mandement : mais quand il y fut arriué, le Barbare se repentit de ce qu'il auoit promis, & mua de uolunté, demourant plusieurs iours à consulter en luy mesme, fil deuoit rendre Iugurtha, ou bien retenir Sylla mesme: toutefois à la fin il executa la trahison qu'il auoit propensée la premiere, & deliura Iugurtha uif entre les mains de Sylla. Voila la source premiere de celle pestilente & mortelle inimitié, qui depuis fut tousiours entre Marius & Sylla, laquelle cuida perdre & ruiner la uille de Rome & son empire de fond en comble: pource que plusieurs portans enuie à la gloire de Marius, alloient disans, que cest acte de la prise de Iugurtha appartenoit à Sylla: & luy mesme fait faire un anneau qu'il portoit ordinairement, sur la pierre duquel il auoit fait engrauer, comme Bocchus luy deliuroit Iugurtha entre ses mains: & depuis il en fit tousiours son cachet pour faire despit à Marius, qui estoit homme ambitieux, opiniastre, & qui ne pouuoit endurer qu'on luy baillast un compagnon à la gloire de ses faicts: & le faisoit Sylla principalement à la suscitation des ennemis & maluueillans de Marius, lesquelz attribuoyent le commencement & les principaux exploits de ceste guerre à

Metellus, & les derniers avec la consummation finale à Sylla, afin que le peuple ne l'eust plus en si grande estime, ny en telle recommandatiõ qu'il l'auoit eu au parauant. Mais toutes ces enuies, toutes ces haines & detractions alencontre de Marius, furent bien tost apres esteinctes & amorties par le grand danger qui suruint à toute l'Italie du costé du Ponent, & ne s'en parla plus depuis que lon cogneur que la chose publique auoit besoing d'un bõ Capitaine, & que lon commença à regarder qui seroit le sage pilotte qui la pourroit sauuer d'une si grosse & si dâgereuse tourmête de guerre: car il n'y eut pas un des nobles & anciennes maisons de Rome, qui l'ozast entreprendre, ne qui se presentast pour demander le Consulat, ains fut Marius absent eleu Consul pour la deuxieme fois. Car Iugurtha ne fut pas plus tost pris, que les nouuelles uindrent à Rome de la descente des Teutons & des Cimbres, lesquelles ne furent pas creuës du commencement, pour le nombre infiny de combatans, qu'on disoit y auoir, & pour la puissance incroyable des armées que ló affermoit uenir: mais depuis on cogneur, que le bruit qui en auoit couru estoit moindre que la uerité: car ilz estoient trois cents mille combatans tous armez, qui menoyent quand & eulx une autre encore bien plus grâde multitude de femmes & d'enfans, & alloient cherchans des terres qui fussent suffisantes pour les soustenir

& nourrir, & des uilles ou ilz se peussent habi-
tuer & arrester pour uiure, ne plus ne moins
qu'ilz entendoÿét dire, que les Gaulois ancien-
nement estâs partis de leur païs, auoyét occupé
la meilleure partie de l'Italie, qu'ilz auoyent
ostee aux Thoscâs. Or ne sçauoit on à la uerité
quelle natiō c'estoit, ny dōt elle estoit partie, tāt
pource qu'ilz n'auoyent aucune cōmunication
auec autres peuples, que pource qu'ilz uenoyét
de païs fort loingtain, cōme une nuee de peuple
qui s'espandoit dessus la Gaule & dessus l'Italie:
biē se doubtoit on que c'estoit une natiō d'Al-
lemagne, qui habitoit le lōg de l'Ocean Seprē-
trional, & le coniecturoit on à uoir la grandeur
de leurs corps, & aussi qu'ilz auoyent tous les
yeux chastains & roux, auec ce que les Allemās
en leur langage appellent les brigans Cimbres.
Les autres disent que la Celtique, pour la gran-
de & profonde estendue du païs du costé de la
grande mer Oceane & des parties Septentri-
onales, en tirant uers les maretz Mæotides, &
le Soleil leuant, s'estend iusques à la Scythie
ou Tartarie Pontique, & que pour le uoisi-
nage, ces deux nations se messerent ensemble,
& sortirent de leurs païs, non qu'ilz feissent ce
grād uoyage tout d'une tire, mais à plusieurs
reprises, marchâs tous les ans sur le temps nou-
veau plus auant en païs, de sorte que par long
traict de temps ilz trauerferēt ainsi à force d'ar-
mes toute la terre ferme de l'Europe, & que

pour ceste cause, encore qu'ilz eussent plusieurs nōs particuliers selon la diuersité de leurs nations, toute la masse ensemble neantmoins s'appelloit l'armee des Celtoſcythes, cōme qui diroit des Celtotartares. Les autres tienēt, que de la natiō des Cimmeriens, qui iadis ont esté cogneuz des anciens Grecs, il y eut une partie non gueres grande au regard du total, qui s'en estant fouye, ou par quelque sedition ciuile estant chassée du païs, fut contraincte par les Tartares de passer oultre les maretz Mæotides es regiōs de l'Asie soubz la conduirte d'un Capitaine nommé Lygdamis : mais le demourant, qui estoit en beaucoup plus grand nombre, & de plus belliqueux hommes, habitoit es extremes parties de la terre, ioignāt la grande mer Oceane, en païs umbrageux & couuers pour les forestz cōtinuelles qui y sont si fortes & si espesses, que le Soleil ne peult penetrer iusques à la terre, & si lōgues & profondes au dedans de la terre, qu'elles uienēt à se conioindre iusques à la grāde forest Hercynie, & sont au demourant soubz tel endroit du ciel, ou le Pole est si fort eleué pour l'inclinatiou des cercles equidistās, que lon nōme paralleles, qu'il est biē peu distant du poinct qui respond droit à plomb sur la teste des habitans, & y estans les iours en espace de duree egaulx aux nuit̃s, mespartissent tout le temps en deux : ce qui donna matiere & occasion à Homere de ſeindre, que

En l'un-
zieme de
l'Odyſſee.

quand Vlyſſes uoulut euocquer les morts, il alla au païs des Cimmeriens comme en la region des enfers. Voila d'ou lon dit que partirét pour uenir en Italie ces peuples Barbares, qui du commencement ſ'appelloyent Cimmeriens, & depuis, ce dit on, non ſans quelque apparence, furent ſurnommez Cimbres: toutefois cela ſe dit pluſtoſt par coniecture uray-ſemblable que par aſſurance de uerité hiſtoriale: mais quant à la multitude des hommes, la pluſpart des hiſtoriés eſcrit qu'il y en auoit pluſtoſt dauantage que moins, que ce que nous auons dit, & qu'ilz eſtoyent ſi courageux & ſi hardis, que rien ne pouuoit durer deuât eulx, tant ilz faiſoyét de grâds efforts de leurs mains, là ou ilz trouuoýét à combattre, ſi uiolentemét & ſi ſoudainement, qu'ilz ſembloyent un feu foudroyant tout par ou ilz paſſoyent. Au moyen dequoy ilz ne trouuoýent plus perſonne qui leur ozaſt faire reſiſtence, ains racloyent & emmenoyent tout ce qu'ilz trouuoýent en leur chemin, & y auoit ia eu pluſieurs Capitaines Romains commis à gouuerner & garder ce que les Romains tenoyent en la Gaule de dela les monts, qui avec groſſes armées auoyent eſté honteuſement emportez par eulx. La laſcheté deſquelz fut cauſe principale de leur faire dreſſer leur chemin à Rome: car ayâs deſfait les premiers qu'ilz auoyent rencôtrez, & y ayâs gaigné beaucoup de biés, ilz en furét ſi bien amorchez, qu'ilz reſolu-

rent de ne s'arrester nulle part que premier ilz n'eussét ruiné Rome, & saccagé l'Italie. Ce que les Romains entendans de plusieurs costez, appellerent Marius pour luy donner la conduite de ceste guerre, & l'eleurent Consul pour la seconde fois, encore que les loix fussent au contraire, lesquelles defendoyent d'elire un personnage absent, & que certain téps, qui estoit prefix, ne fust escheu entre deux, premier qu'on le peust elire pour la deuxieme fois au mesme magistrat. Si y eut quelques uns qui alleguerent ces ordonnances pour cuider l'empescher: mais le peuple les renuoya biē, discourant à l'encontre que ce n'estoit pas la premiere fois que les loix auoyent cedé à l'utilité publique, & que l'occasion de deroger aux loix qui se presentoit alors, n'estoit pas moindre que celle pour laquelle ilz auoyent eleu Scipion Consul contre la permission & prefixion des loix, par ce que ce n'estoit pas pour crainte qu'ilz eussent de perdre leur païs, mais pour enuie de ruiner & destruire celuy des Carthaginois, à raison dequoy le peuple passa oultre. Et Marius ramenāt son armee de la Libye en Italie, prit possession du Consulat le premier iour de Ianuier, auquel les Romains commencent leur annee, & quād & quand entra en triumphe dedans la uille de Rome, monstrant aux Romains ce qu'ilz n'auoyent cuidé iamais uoir: C'estoit le Roy Iugurtha prisonnier, lequel estoit homme si cault.

qui ſçauoit ſi bien ſ'accommoder à la fortune,
& qui auoit parmy ſon aſtuce & fineſſe le cou-
rage ſi grand, que perſonne de ſes ennemis ne
penſoit que lon le deuſt iamais auoir uiſ. Mais
on dit qu'apres auoir eſté mené en ce trium-
phe, il perdit l'entendement incontinent: & la
pompe du triumphe finie, il fut mené en pri-
ſon, là ou les ſergens de haſte qu'ilz eurent d'a-
uoir ſa deſpouille luy deſchirerēt à force toute
ſa robbe, & luy uoulans oſter des bagues d'or
qu'il auoit pēdues aux oreilles, luy arracherent
quand & quand le bout de l'oreille, puis le iet-
terēt ainſi tout nud au fond d'une foſſe profon-
de, ayant le ſens tout troublé: toutefois ainſi
⁂ qu'on l'y iettoit, en ſoubriant il dit, O Hercu-
⁂ les, que uoz eſtuues ſont froides! Si ueſcut en-
core là ſix iours combatant contre la faim, &
deſirant touſiours prolonger ſa miſerable uie
iuſques à la derniere heure, qui luy fut une
punition digne des meſchancetez qu'il auoit
commiſes en ſon uiuant. En ce triumphe fu-
rent portées, comme lon dit, trois mille ſept
liures d'or peſant, & d'argent non monnoyé
cinq mille ſept cents ſeptante & cinq: & oultre
cela en or & argent monnoyé uingt & huiſt
mille ſept cents eſcus. Apres ce triumphe Ma-
rius ſeit aſſembler le Senat dedans le Capitole,
ou il entra en la cōpagnie avec ſa robbe trium-
phale, ſoit qu'il le feiſt par oubliance, ou par
une trop inciuite & groſſiere arrogance: mais

cognoissant q̄ toute l'assemblée le trouuoit fort mauuais, il se leua soudain & alla prendre sa robbe longue Consulaire, puis s'en retourna tout aussi tost en sa place. Au demourant, se par-tāt pour aller à la guerre, il pensa d'aguerrir son armee par le chemin, & endurcir ses gens à la peine, les faisant courir en toutes sortes, faire de grandes & longues traittes, & contrain-gnant chascun soudard à porter luymesme ses hardes, & à se preparer ce qui luy estoit neces-saire pour son uiure: de sorte que depuis on a tousiours appellé en commun prouerbe les hommes laborieux, qui sont uoluntiers, sans
» mot dire, ce qui leur est commandé, les Mulets
» de Marius. Toutefois aucuns alleguent une au-tre cause & origine de ce prouerbe: car ilz di-sent que Scipion estant au siege deuant la uille de Numance uoulut uoir & uisiter non seule-ment les armes & les cheuaulx de seruice qui e-stoyēt en son ost, mais aussi les mulets & autres bestes de uoiture, pour sçauoir comment chas-cun les tenoit bien en poinct & en bon equip-page. Si amena Marius à la monstre son che-uail qu'il pensoit luymesme, fort bien nourry, & ensemble son mulet beaucoup plus gras, plus doux à manier, & plus fort que nul des autres. Scipion prit grand plaisir à uoir ces bestes en si bon poinct & si bien pensees, de sorte que souuent depuis il en faisoit mention: au moyen dequoy ceste maniere de parler en uint,

qui depuis est demouree en commun prouerbe, quand on se ueult moquer de quelqu'un qui est perseuerât à la peine, & qui traueille continuellement, en faisant semblant de le louer, on l'appelle Mulet de Marius. Au reste il me semble que ce fut un grand heur à Marius, que les Barbares, ne plus ne moins qu'un reflux de mer, tournerent premierement leur impetuosité deuers l'Hespagne: car ce pendant il eut temps & loisir d'exerciter & agguerrir ses gens & de les asseurer, &, qui plus est, encore de se faire cognoistre à eulx. Car quand il les eut accoustumez peu à peu à ne faillir plus, & à ne desobeïr point, ilz trouuerent adonc son austerité de commander, & sa seuerité de ne point pardonner à ceulx qui oubloient leur deuoir, utile & salutaire, oultre ce qu'elle estoit iuste & raisonnable. Dauantage la uiolence de sa cholere, l'aspreté de sa parole, & la fierté de son regard, quand ilz eurent esté quelque temps nourriz auec luy, commença petit à petit à ne leur sembler plus effroyable pour eulx, ains pour leurs ennemis. Mais ce qui plaisoit encore plus que tout cela aux foudards, estoit sa droiture en iustice, de laquelle il se recite un tel exemple: Il y auoit un sien nepueu nommé Caius Lusius, lequel auoit quelque charge de gens en l'armee: il n'estoit point tenu pour homme meschant au demourant, sinon qu'il auoit ce vice qu'il deuenoit incontinent amoureux des beaux garçons:

sons: comme il se meit lors à aimer un beau ieune iouuenceau nommé Trebonius, qui estoit de sa compagnie, & l'ayant par plusieurs fois sollicité sans en auoir iamais peu rien obtenir, finablement il l'enuoya une nuict querir par un sien ualet. Le ieune homme ne pouuant desobeir au mandement de son Capitaine, s'y en alla, & comme il fut dedans sa tente, uoyant qu'il faisoit tout son effort pour le uioler à force, il desgainna son espee, & le tua tout roide. Cela fut fait que Marius n'estoit pas en son camp, lequel si tost qu'il fut de retour, feit incontri- nent appeller le ieune homme en iustice. Plusieurs se presenterent soudain pour l'accuser, & personne pour le defendre: parquoy luy mesme commença à deduire asseuremēt son faict, & à nommer plusieurs tesmoins qui auoyēt ueu & sceu cōme le mort l'auoit par plusieurs fois pressé de son deshonneur, & comment il luy auoit tousiours constamment résisté, sans luy uouloir aucunement abandonner sa personne, quelques dons & presens qu'il luy sceust offrir: dequoy Marius le louant & en estant bien aise, se feit sur l'heure apporter une courōne de celles, que lon a accoustumé de donner à ceulx qui ont fait en un iour de bataille quelque grande preuue de uaillance, & en couronna luy mesme Trebonius, comme ayant fait un tresuertueux acte, & en temps qui auoit besoing de beaux & bōs exemples. Ce iugemēt de Marius

estant rapporté & publié dedans Rome, luy ser-
uit beaucoup à obtenir son troisieme Consulat,
avec ce que lon attendoit le retour des Barba-
res sur le temps nouveau, ausquelz les soudards
Romains ne uouloyent point donner la batail-
le soubz autre Capitaine que soubz Marius :
routefois ilz ne uindrent pas si tost comme on
les attendoit , ains se passa encore l'annee du
troisieme Consulat de Marius . Parquoy ap-
prochant le temps que se deuoit faire l'election
des nouveaux Consuls, & son cōpagnon estant
decedé, il luy fut force de s'en aller luy mesme à
Rome, laissant la superintendence de son camp
en son absence à Manius Acilius . Or y auoit il
lors plusieurs gens d'honneur qui briguoyent
le Consulat: mais Lucius Saturninus , l'un des
Tribuns du peuple qui manioit mieux la com-
mune à sa uolunté que nul autre, ayant esté
soubz main gaigné par Marius, faisoit plusieurs
harengues , esquelles il suadoit au peuple d'e-
lire Marius Consul pour la quatrieme fois. Ma-
rius à l'opposite faisoit semblant de n'en uou-
loir point, disant qu'il le refuzeroit si le peuple
l'elisoit : & Saturninus l'appelloit traistre, en
criânt que cela seroit ueritablemēt trahir la cho-
se publique, que de refuser la charge de Capi-
taine souuerain en un tel danger, & si grand
besoing. Lon cognoissoit assez que c'estoit une
seincte & un ieu qu'ilz iouoyēt assez grossemēt
luy & Marius, car on ueoit le iour à trauers

mais toutefois le peuple considerant que les affaires auoyent besoing de sa suffisance & de sa bonne fortune en la guerre, l'eleut Cōsul pour la quatrieme fois, & luy donna pour compagnon Catulus Luctatius, homme qui estoit honoré de la noblesse, & si n'estoit point defagreable au commun peuple. Marius donques ayant nouuelles que les Barbares approchoyent, passa les monts en diligence, & fortifiant son camp au long de la riuiera du Rosne, y mieit dedans grande prouision de tous uiures, à fin qu'il ne peust estre contrainct à faulte de uiures de uenir à la bataille, sinon à son bon poinct quand il luy sembleroit expedient: & là ou auparavant la uoitture des uiures en son camp par la mer estoit longue, dangereuse & de grande despense, il la rēdit aisee & courte par tel moyē: La bouche de la riuiera du Rosne auoit accueilly tant de uase & si grande quātité de sable, que les undes de la mer y amassoyent & entassoyēt, avec la fange haulte & profonde, que les bancs rendoyent l'entree de la riuiera estroite, difficile & dangereuse pour les grands uaisseaux de charge, qui uenoyēt de la mer. Quoy cōsiderant Marius, employa là son armee pēdant qu'elle ne faisoit rien, & luy fait cauer une grande trēchee & canal, dedans laquelle il destourna bōne partie de l'eau de la riuiera, & la tira iusques à un endroit opportun de la coste, là ou l'eau s'escouloit en la mer par une emboucheure profon-

de & capable des plus grandes nauires , & auec cela tranquille & platte, sans estre tourmentee des uents ny des uagues de la mer . Celle fosse retient encore auiourdhuy son nom , s'appellât la FOSSE MARIANE. Or se diuiferent les Barbares en deux armées pour passer en Italie, dont il escheut à l'une qui estoit celle des Cimbres , d'aller par les haultes Allemagnes, & forcer ce passage la que defendoit Catulus:& à l'autre, qui estoit celle des Teutons & Ambrons, de passer par le païs des Geneuois le long de la marine contre Marius. Or les Cimbres ayans plus grand circuit à faire , arresterent dauantage & demourerēt derriere : mais les Teutons & Ambrōs partans les premiers, eurent en peu de iours fait le chemin qu'ilz auoyēt à faire iusque là ou estoit le camp des Romains , auquelz ilz se presenterent en nombre infiny , les uisages hideux à uoir , & la uoix & le cry tout different des autres hōmes: si embrasserent grande estendue de la cāpagne d'alentour pour se cāper , & uindrēt desfier Marius & le prouoquer à sortir en chāp de bataille . Marius ne feir compte de toutes leurs desfiances, ains teint ses gens serrez & enfermez dedans son camp , tensant bien asprement ceulx qui fingeroient de parler temerairement au contraire , & qui par impatience de cholere , uouloyent à toute force sortir pour
» cōbatre, les appellant traistres à leur païs, pour-
» autant , disoit il , qu'il n'est pas icy question

20 de combattre pour nostre gloire particuliere,
20 ny pour gaigner des triúphes & uictiores pour
20 nous, ains nous fault essayer par tout moyen de
20 destourner ce grand orage de guerre, & ceste
20 foudre & tempeste, qu'elle ne faille esandre
20 sur toute l'Italie. Or faisoit il ces remonstrances
aux Capitaines particuliers qui estoient soubz
luy, & aux personnes de sa qualite: mais quant
aux soudards priuez, il les faisoit tenir dessus
les rempars de son camp, les uns apres les au-
tres, pour regarder les ennemis, & s'accoustu-
mer à uoir leurs uisages, leur cōtenance & leur
marcher, & ne s'estonner point d'ouir leur uoix
& leur parole, qui estoit merueilleusement e-
strange & bestiale, & aussi pour cognoistre la
façon de leurs armes, & leur maniere de les ma-
nier. En quoy faisant, il rendit à ses gens auéc le
temps, les choses qui de prime face leur auoyēt
semblé effroyables, si familiares à leur enten-
dement, par le moyen de ceste ueuē ordinaire,
qu'ilz ne s'en emouuoient plus: car il estimoit,
ce qui est ueritable, que la nouueauté fait que
l'on trouue par erreur de iugement, les choses
non accoustumees plus horribles & plus espou-
uentables qu'elles ne sont: & au cōtraire, que
l'accoustumance oste beaucoup de la frayeur
& terreur aux choses, qui de leur nature sont
ueritablement effroyables. Ce qui se ueit lors
par experience: car l'accoustumance de uoir
tous les iours ordinairement les Barbares, non

seulement diminua quelque chose de la frayeur premiere des souldards Romains : mais d'auantage leur aguissant la cholere pour les fieres menaces & la brauerie insupportable des Barbares , leur emflamma les courages d'un ardent desir de les combattre , pource que non seulement ilz pilloyent , gastyoyent & saccageoyent tout ce qui estoit alenuiron, ains uenoyent encore donner des assaults à leur camp , avec une telle audace , que les souldards Romains ne le pouuoient plus endurer , & laissoyent aller de telles parolles iusques aux oreilles de Marius :

- 22 Quelle lascheté a iamais cogneue Marius en
 22 nous, qu'il nous engarde de combattre , & nous
 22 tiét enfermez soubz la clef & soubz la garde de
 22 portiers , comme si nous fussions des femmes ?
 22 Monstrons nous donques hommes, & luy allôs
 22 demander s'il attend d'autres gens de guerre
 22 que nous, pour defendre l'Italie, & s'il a delibe-
 22 ré de se seruir de nous comme de pionniers seu-
 22 lement, quand il uoudra creuser un fossé , net-
 22 toyer quelque bourbier , ou destourner une ri-
 22 uiere . Car c'est à quoy il nous a employez en
 22 grand trauail iusques icy , & sont les beaux ou-
 22 urages qu'il a faits en ses deux Consulats, dont
 22 il se ua uanter à ceulx de Rome . A il peur qu'il
 22 ne luy en prenne, comme il a fait à Carbon & à
 22 Cæpion , que les ennemis ont desconfits ? Il ne
 22 fault point qu'il craigne cela : car, & luy est Ca-
 22 pitaine de bien autre ualeur & autre reputa-

tion que n'estoyent ceux la, & son armee beau-
coup meilleure que les leurs : mais comment
que ce soit, encore uaudroit il mieulx perdre en
essayant de faire quelque chose, que de demou-
rer oysieux, en souffrant deuât noz yeux destrui-
re & saccager noz amis & noz alliez. Marius
estoit bien aise d'ouir ces plaintes & doleances
de ses gens, & les reconfortoit, en leur remon-
strant, qu'il n'auoit aucune deffiance de leur uer-
tu : mais que par aduertissement de quelques
prophetes & oracles des Dieux, il attendoit le
temps & le lieu propre pour la uictoire : car il
faisoit mener quand & luy dedans une litiere
en grâde reuerence une femme de Syrie nom-
mee Marthe, que lon disoit auoir l'esprit de
prophetie, & sacrifioit Marius aux Dieux par
son ordonnance, au tēps & en la maniere qu'elle
luy commandoit. Ceste femme Syriene s'es-
toit premierement addressée au Senat pour
parler de ces affaires, & predict des choses à adue-
nir : mais le Senat ne l'auoit point uolu ouir,
& l'auoit fait chasser : au moyen dequoy elle se
tourna deuers les femmes, ausquelles elle feit
uoir quelque preuue de ce, dont elle se uantoit,
mesmement à la femme de Marius, aux pieds
de laquelle elle se trouua un iour assise en une
assemblee de ieux publiques, à uoir combatre
des escrimeurs à oultrance : car elle luy predict
là certainement celuy qui uainquit : à l'occasion
dequoy ceste Dame l'enuoya deuers son ma-

ry:lequel en fait cas, & la fait mener par tout apres luy dedàs une litiere.Elle se trouuoit aux sacrifices que faisoit Marius, estant uestue d'une robe de pourpre double qui se fermoit avec des boucles, & tenant en sa main une lance enveloppee tout à l'entour de banderoles, de festons & de chapeaux de fleurs.Ceste maniere de farce a mis plusieurs en doubte, si Marius monstroït en public ceste femme, croyant qu'elle eust ueritablement le don de prophetie, ou si sciemment il faisoit bonne mine de le croire pour aider à la feinte. Mais ce qu'Alexandre le Myndien a escrit touchant des uaultours, est bien digne d'admiration: car il dit qu'il y en auoit deux qui le suyuoient à la guerre,& qui ne failloyent iamais à comparoir & à se monstrier quand il deuoit gagner quelque grosse bataille, & que lon les recognoissoit à des coliers de leton,qu'ilz portoyent à l'entour du col,que les soudards leur auoyent attachez, & puis les auoyét laissez aller:à raison dequoy ilz recognoïssoyent les soudards, & sembloit qu'ilz les saluassent,& eulx aussi estoient bien aises quand ilz les apperceuoient, & se promettoient que c'estoit signe de quelque bonne rencontre qui leur deuoit aduenir. Or y eut il plusieurs signes & presages, qui escheurent auant la bataille: mais tous les autres estoient assez ordinaires, excepté que lon rapporta de Tudertum & d'Amelia deux uilles de l'Italie, que l'on auoit ueu la

nuiſt au ciel des lances & eſcus ardents qui auoyent premierement uagué ça & là, puis feſtoient entrechocquez en la meſme forme & maniere, & avec les meſmes mouuemens que font les hommes qui combattent, iuſques à ce que finalement les uns reculans, & les autres pourſuyuans, ilz allerent tous fondre du coſté du Soleil couchant. Enuiron ce meſme temps auſſi, uint de la uille de Peſſinunte Batabaces le preſbtre de la grande mere des Dieux, lequel apporta nouuelles, que la Deeſſe auoit parlé à luy du dedans de ſon ſanctuaire, & luy auoit dit que la uictoire de ceſte guerre demoureroit aux Romains. Le Senat y adiouſta foy; & ordonna que lon edificeroit un temple à celle Deeſſe, pour luy rendre graces de la uictoire qu'elle leur promettoit. Batabaces ſe uolur preſenter auſſi au peuple en aſſemblee publique pour luy en dire autant, mais il y eut un des Tribuns du peuple nommé Aulus Pompeius, qui l'en engarda, en l'appellant triacleur ou baſteteur, & le repoulſa oultrageuſement arriere de la tribune aux harengues, & l'inconuenient qui luy en aduint, feit que lon adiouſta encore plus de foy aux paroles de Batabaces: car le Tribun ne fut pas plus toſt de retour en ſa maiſon apres l'aſſemblee, qu'une groſſe ſiebure le ſaiſit, dont il mourut le ſeptieme iour apres, au ueu & ſceu de tout le monde. Au demourant les Teutons uoyans comme Marius ne bou-

geoit aucunement de son camp, essayèrent de luy donner assault, mais ilz se trouuerent tellement accueillis de coups de traict, que apres y auoir fait perte de quelque nombre de leurs gēs, ilz s'en deporterent, & resolurent de tirer oultre, se promettans qu'ils passeroient facilement les Alpes sans danger : parquoy troussans leur bagage ilz passerent tout le long du camp des Romains, là ou lon cogneut plus certainement que iamais, qu'ilz estoient en merueilleusement grand nombre, pour la longueur du tēps qu'ilz demourerent à passer : car on dit qu'ilz demourerent six iours entiers à passer continuellement. Et passans assez pres du camp des Romains, ilz leur demandoient par maniere de moquerie, s'ilz uouloyent point escrire ou mander quelque chose à leurs femmes, pource qu'ilz seroyent bien tost avec elles : quand ilz furent tous passez, & qu'ilz continuerent de tirer tousiours oultre leur droit chemin, Marius adonc partant aussi, se meit à les suyure tout bellement à la trace, se logeant tousiours à leur cueuē le plus pres qu'il pouuoit, fortifiant tresbien son camp, & choisissant tousiours lieu fort & auantageux d'assiette pour se loger, à fin de pouuoir passer les nuicts en seureté. Si marcherent en telle sorte iusques à ce qu'ilz arriuerent à la uille d'Aix, de là ou il ne leur restoit plus gueres de chemin à faire qu'ilz ne fussent dedans les montagnes des Alpes, à raison dequoy

Marius se prepara là pour les combattre. Si choisit un lieu qui estoit bien fort d'affiette pour loger son camp, mais il y auoit faulte d'eaux: & le feit expressement, à ce que lon dit, à fin d'aguifer encore plus le courage de ses gens par ce moyen. Plusieurs le trouuoient mauuais, luy remonstrans qu'ilz seroyent en danger d'endurer grande soif, filz se logeoyent là, ausquelz il respondit, en leur monstrant une riuiera qui couroit tout au lōg du camp des ennemis, qu'il falloit aller là achepter à boire avec son sang.

- » Les soudards luy repliquoyent, Que ne nous
- » y meines tu donques, pendant que nous a-
- » uons encore le sang humide? Et il leur re-
- » spondit tout doucement, Pource qu'il fault
- » auant toute autre chose fortifier nostre camp.

Les soudards, quelque mescontentement qu'ilz eussent, luy obeïrent: mais les ualets n'ayans à boire ny pour eulx ny pour leurs bestes, s'amasserent en grosse trouppes, & s'en allerent deuers la riuiera, portans les uns des congnees, les autres des haches, les autres des espees & des lances, avec leurs cruches pour apporter de l'eau, en deliberation de combattre les Barbares, si autrement ilz n'en pouuoient auoir. Il y eut quelque petit nombre des Barbares, qui s'attacha à eulx du commencement, pource que la plus part estoit à table à disner apres s'estre lauez, & les autres estoyent encore dedans les baings à se lauer, pource qu'en ce lieu la y a force sources

de baings naturelz d'eaulx chaudes : & trouuerent les Romains une partie de ces Barbares faifans grande chere , & se donnans du bon temps à l'entour de ces baings , pour le grand plaisir qu'ilz prenoient à confiderer la beaulté du lieu : mais quand ilz ouirent le bruit de ceulx qui combatoyent, ilz se prirent à courir à la file la part dont il uenoit . Au moyen dequoy, il estoit bien malaisé à Marius de plus retenir les foudards Romains qu'ilz n'y allassent , pource qu'ilz craignoyent que leurs ualets n'y demourassent , oultre ce que les plus belliqueux des ennemis qui se nommoient les Ambrons, ceulx qui parauant auoyent desfait Manlius & Cæpion, deux Capitaines Romains, avec leurs exercites, & qui faisoient eulx seuls plus de trente mille combatans , couroyent à grande haste aux armes, estans bien appesantis de leurs corps pour auoir mangé à panse pleine : mais au demourant bien deliberez en leurs courages , & plus guays que de coustume, pour le uin qu'ilz auoyent beu . Si ne uindrent point courans furieusement au combat sans garder ordre, ny ne ietterent point un cry confus, ains faifans brui- re leurs armes par mesures , & marchans tous ensemble à la cadence , alloient souuent repe- tans leur propre nom , Ambrons , Ambrons , Ambrons , soit que ce fust pour s'entreappeller les uns les autres, ou pour estoñner leurs enne- mis par cest aduertissement . De l'autre costé

aussi les premiers des Italiens, qui descendirent en bataille contre eulx, furent les Lyguriens, qui sont ceulx de la coste de Genes, lesquelz leur oyans ietter ce cry, & l'entendans distinctement, leur respondirent aussi le mesme cry, pource qu'ilz disoyent que c'estoit le uray surnom general de toute leur nation, de sorte que premier qu'ilz s'entrechocquaissent, ce cry fut d'une part & d'autre redoublé par plusieurs fois, & le faisoient les Capitaines tant deça que dela, crier à leurs gens tous ensemble, s'efforceans à l'enuy les uns des autres à qui le crierait le plus hault. Ceste contention de crier eschauffa & aguisa les courages des souldards encore dauantage : mais les Ambrons auoyent la riuere à passer, qui fut cause de rompre leur ordonnance, & auant qu'ilz se peussent remettre en bataille depuis qu'ilz furent passez, les Lyguriens coururent de grand roideur les charger les premiers, & puis les naturelz Romains pour secourir les Lyguriens qui auoyent commencé la charge, se ruerent aussi quand & quand descendans de lieux auantageux sur ces Barbares, & les contraignirent par ce moyen de se tourner en fuitte, là ou le plus grand meurtre qui en fut fait, fut sur le bord de la riuere, dedans laquelle ilz s'entrepoulsèrent les uns les autres, tellement qu'ilz emplirent de sang & de corps morts tout le cours de la riuere. Et ceulx qui peurent repasser de l'autre costé n'eurent pas la

hardiesse de se rallier pour faire teste, de maniere que les Romains les menerent tuans & batans iusques en leur camp & à leur charroy : là ou les femmes avec des espees & des haches en leurs mains leur uindrent au deuant en grinçant les dents & hurlant de douleur & de courroux, & chargeant tant sur les fuyans que sur les pourfuyans, les uns comme traistres, & les autres comme ennemis : mais, qui plus est, elles se ietterent au milieu des combatans en s'esforçant d'arracher les pauois aux Romains, & empoignant leurs espees avec les mains toutes nues, iusques à endurer d'un courage inuincible qu'on les naurast & les trenchast en pieces à coups d'espee. Voila comment on dit que la premiere bataille fut donnee au long de la riuiere plus tost par cas d'aduenture que de propos deliberé, ny par le conseil du Capitaine en chef. Mais les Romains apres auoir desfait la pluspart des Ambrons s'estans retirez arriere, à cause que la nuict suruint, ne se meirent pas comme lon a accoustumé de faire en une telle prosperité, à chanter chansons de uictoire & de triumphe, ny à faire bonne chere dedans leurs tentes, les uns avec les autres, & moins encores à dormir, qui est le plus doux & le plus agreable refreschissement, que sçauroient prendre gens qui ont heureusement combatu : ains au contraire passerent toute celle nuict en grande frayeur & grande crainte, à cause que leur camp

n'estoit point clos ny fortifié, & qu'ilz scauoyē tresbien qu'il estoit demouré preſque innu-
rables milliers de Barbares qui n'auoyent point
combattu, avec ce que ceulx qui estoient elchap-
pez de la desfaitte des Ambrons, ne feirent au-
tre chose toute la nuit, que hurler à haults cris,
qui n'estoyent point semblables aux ſouſpirs
& gemiſſemens des hommes, mais plus toſt aux
hurlemens des beſtes ſauuages, de maniere que
le mugiſſement d'une ſi grande multitude
d'hommes beſtiaux meſlé de menaces & de la-
mentations, faiſoit retentir les montagnes d'a-
lenuiron, & le canal de la riuere : au moyen
dequoy toute la plaine, qui estoit entre deux,
reſonnoit d'un fremiſſement horrible & e-
ſpouuentable à ouïr : ce qui tenoit les ſoudards
Romains en effroy, & Marius meſme en quel-
que crainte, pource qu'ilz ſ'attendoient d'a-
uoir celle nuit la bataille en trouble & en deſ-
arroy : toutefois les Barbares ne les aſſailli-
rent point ny celle nuit, ny le iour enſuy-
uant, ains ne feirent autre chose que ſe prepa-
rer à la bataille. Et ce pendant Marius ſachant
qu'il y auoit au deſſus du lieu ou ilz estoient
campez, quelques cauains, & quelques uallees
couuertes de bois, y enuoya ſecrettement Clau-
dius Marcellus avec trois mille hōmes de pied
bien armez, luy enioignāt qu'il ſe teiſt coy en
embuſche iuſques à ce qu'il uerroit les Barbares
attachez au combat avec luy, & que lors il les

uinſt charger par derriere: les autres ſouppẽ-
rent quand il en fut heure, & apres ſoupper ſe
repoſerent. Le lendemain au poinct du iour
Marius les tira aux champs hors de ſon fort, de-
uant lequel il les renga en bataille, enuoyant
deuant ſa cheualerie pour tirer les ennemis à
l'eſcarmouche: ce que uoyans les Teutons, ilz
n'eurent pas la patience d'attendre que les Ro-
mains fuſſent deſcendus en plaine campagne
pour les combatre ſans auantage, ains ſarmans
à la haſte en chaude chole, les allerent trouuer
iuſques à la motte, ſur laquelle ilz eſtoient en
bataille: quoy conſiderant Marius, enuoya ça
& là aux particuliers Capitaines, les aduertir
qu'ilz ne bougeaſſent, & qu'ilz temporifaſſent
iuſques à ce que les ennemis approchaſſent
d'eulx d'un ieſt de main, & que lors ilz lanceaſ-
ſent leurs iauelots, & puis tiraſſent leurs eſpees
& heurtaſſent & repoulaſſent les Barbares a-
uec leurs eſcus, à cauſe que quand ilz monte-
royent contremont la motte, ſur le pendant de
laquelle eſtoient les Romains en bataille, il
preueoit bien que leurs coups n'auroyẽt point
de force, ny leur ordonnance ſerrec, uertu ny
efficace quelconque, pource qu'ilz ne pour-
royent auoir le pied ferme ny la marche aſſeu-
ree, ains ſeroyent facilement renuerſez en ar-
riere pour peu qu'on les repoulaſt, à cauſe du
pendant de la coſte. Marius donnoit telz aduer-
tiſſemens à ſes gens, mais quand & quand il les
mettoit

mettoit le premier en execution : car il estoit
autant adroit aux armes qu'homme qui fust en
route son armee, & si n'y en auoit pas un qui
fust si hardy ne si asseuré que luy. Quand don-
ques les Romains faisans teste, les eurent arre-
stez tout court, ainsi qu'ilz cuidoyent furieuse-
ment monter contremont, alors se sentans re-
poussez & pressez, ilz reculerent petit à petit en
arriere iusques en la campagne, & là commen-
ceoyent ia les premiers à se rallier & renger en
bataille sur la plaine, quand on ouit soudain le
bruit & la distraction de ceulx qui estoient à la
cueue de leur armee, pource que Marcellus ne
faillit pas à bien prendre l'occasion quand il en
fut temps, à cause que le bruit de la premiere
charge montant contremont les coustaux d'a-
lenuiron, au dessoubs desquelz il estoit en em-
busche, luy en donna aduis : si feit incontinent
leuer ses gens, & courant auec grands cris alla
ruer sur ceulx qui estoient à la cueue des Barba-
res mettant les derniers en pieces. Ceulx la fei-
rent tourner uisage à ceulx qui estoient les plus
prochains deuant eulx, & ainsi des autres de
main en main iusques à ce qu'en peu d'heure,
toute leur bataille commença à branler en
desarroy, & ne feirent pas grande resistance,
quand ilz se sentirent ainsi chargez par deuant
& par derriere, ains se meirent tantost à fouir à
ual de rouverte, & les Romains les poursuyuans
de pres en tuerent ou prirent de prisonniers

plus de cent mille, & prirent dauantage leurs chariots, leurs tentes & tout leur bagage, dont ilz ordonnerent du commun consentement de toute l'armee, qu'il en seroit fait un present à Marius, sans en rien excepter, sinon ce qui auroit esté furtiuement soubstraiect & desrobé: & combien que ce fust un present treshonorable & tresmagnifique, si estima lon qu'il n'auoit pas encore la recompense qu'il meritoit, pour le bon deuoir d'excellent Capitaine, qu'il auoit monstré en la conduirte de celle bataille & de toute celle guerre, tant ilz se sentoient tous heureux d'estre eschappez d'un si grand danger: toutefois il y a des historiens qui n'accordent pas que la despouille de ces Barbares ait esté donnée à Marius, ny aussi qu'il y ait eu si grand nombre de morts comme nous auons dit: mais bien dit on, que depuis ceste bataille les Massiliens fermerent leurs uignes de hayes faittes d'os de morts, & que les corps estans pourris & consumez dessus leurs champs, par les grandes pluyes qui tumberent dessus l'Hyuer ensuyuât, les terres en deuindrent si grasses, & en penetra la gresse si profondement au dedans, que l'Esté ensuyuant elles rapporterent une quantité incroyable de toutes sortes de fruiçts: & fut par ce moyen uerifié ce que dit Archilocus, que les terres labourables s'engressent de telles pourritures: aussi dit on que ordinairement apres les grandes batailles, il tombe de grosses pluyes,

soit ou pource qu'il y ait quelque Dieu, qui purifie, laue & nettoye la terre souillee & polluee de sang humain avec les eaux pures & celestes, ou bien que cela se face par cause naturelle, pource que la desconfiture de tant de corps morts & de sang espendu rend une moirte, grosse & pesante uapeur, laquelle espeffit l'air, qui de sa nature est muable & facile à changer de bien petit commencement en alteration tresgrande. Apres ceste bataille Marius feit mettre à part les harnois & despouilles des Barbares, qui estoient demourees entieres & belles à uoir, pour embellir & enrichir la pompe de son triumphe: puis feit amasser le demourant en un grand monceau sur un bucher de bois, pour en faire un magnifique sacrifice aux Dieux, estant tout son exercite en armes alenuiron couronné de chapeaux de triumphe, & luy uestu d'une grande robe de pourpre comme le porte la coustume des Romains en tel cas, & tenant une torche ardente à deux mains, laquelle il haulsa premiere-ment contre le ciel: & sur le point qu'il la baissa pour mettre le feu dedans le monceau, lon apperceut de loing quelques uns de ses amis qui uenoyent à cheual courans à bride abbatue: si se feit soudain un grand silence de toute l'assemblee, desirant un chacun entendre, ce qu'ilz apportoyent de nouueau. Et quand ilz furent arriuez & descendus de cheual, ilz

coururent incontinent embrasser & saluer Marius, luy apportans la nouuelle, comme il auoit esté eleu Consul pour la cinquieme fois, & luy en baillerent des lettres, par lesquelles on le luy mandoit de Rome. Ainsi ceste nouuelle ioye suruenue par dessus l'aise de la uictoire, les priuez soudards tesmoignerent le plaisir qu'ilz en auoyent avec grands cris & batemens de leurs armes : & les Capitaines couronnerent encore de rechef Marius avec nouueaux chapeaux de laurier qu'ilz luy meirent à l'entour de la teste : puis cela fait il meit adonc le feu dedans le bucher, & paracheua son sacrifice. Mais celle qui ne laisse iamais les hommes iouir de l'aise d'une grande prosperité purement & simplement, ains entremesle tousiours en la uie de l'homme du mal parmy du bien, soit ou la fortune, ou l'enue de la destinee, ou bien la necessité de la nature des choses terrienes, peu de iours apres ceste grâde resiouissance enuoya à Marius la nouuelle de Catulus son compagnon au Consulat, qui fut comme une nuce en un beau iour clair & ferein, & qui reietta de rechef la uille de Rome en nouuelle frayeur & nouuelle tourmente. Car Catulus qui estoit ordonné pour faire teste aux Cimbres, estima qu'il ne falloit point qu'il s'amusast à garder les pas des montagnes pour cuider empescher les Barbares de passer, à cause que pour ce faire il eust esté contrainct de diuiser son armee en plusieurs parcelles, &

se fust en ce faisant trouué foible : parquoy se tirant un peu arriere des Alpes , au dedans de l'Italie , il se couurit de la riuere d'Athesis, dessus laquelle il bastit un pont pour pouuoir passer & repasser quand il uoudroit , & en garnit les deux bouts de deux forts bien munis & bien fortifiez , à fin de pouuoir commodément aller secourir les places qui estoient audela de la riuere , si d'adventure les Barbares , quand ilz seroyent sortis hors des destroits des montagnes , les uouloyent aller forcer . Or estoient ces Barbares si oultreuidez , & auoyent leurs ennemis en si grand mespris , que pour monstrier leur force & leur audace plus tost que pour besoing qu'il en fust , ne pour profit qu'il y eust , ilz enduroyent qu'il negeast sur eulx tous nuds , & montoient iusques aux cymes des montagnes à trauers les grands monceaux de glaces & de neiges : puis quand ilz estoient arriuez au plus hault, ilz estendoyent leurs targes longues & larges dessoubs leurs corps, & se laissoyent glisser dessus au long des rochers droits & coupez qui auoyent des pentes de hauteur infinie . A la fin festans uenus camper aupres des Romains le long de la riuere , ilz considererent comment ilz la pourroyent passer, & commencerent à la combler, rompans les grosses butes de terre qu'ilz trouuoient à l'entour , ne plus ne moins que les Geans , & y apportans les grands arbres , avec les racines tou-

tes entieres, de grosses pieces des rochers qu'ils
brisoyent, & des tureaux de terre qu'ils y poul-
loyent pour serrer & estraindre le cours de la
riuere: mais oultre cela ilz iettoient à ual l'eau
de grosses tronches de bois, que le fil de la riuie-
re tiroit de roideur contrebas, lesquelles à force
de coups de l'impetuosité qu'elles descendoient
à ual, esbranloyent les poultries qui souste-
noient le pont des Romains. A raison dequoy
plusieurs des soudards du grand camp seston-
nerent, & en l'abandonnant commencerent à
se retirer, là ou Catulus mōstra (ainsi qu'il fault
qu'un bon & parfaict Capitaine face) qu'il a-
uoit son honneur & sa gloire particuliere en
moindre recommandation que la publique de
ses citoyens: car uoyant qu'il ne pouuoit tant
alleguer de raisons à ses gens, qu'ils uoulussent
demourer, & qu'ils deslogeoyent malgré luy en
effroy, il commanda luy mesme à celuy qui por-
toit l'enseigne de l'aigle, qu'il marchast, & s'en
courut deuers les premiers qui s'en alloient, se
mettant à marcher deuant, à fin que la honte de
ceste retraite tumbast toute sur luy, non pas
sur son pais, & qu'il semblast que les Romains
suyussent leur Capitaine, & qu'ils ne fouys-
sent pas. Les Barbares donques assaillans le
fort qui estoit au bout du pont dela la riuere
d'Athesis, le prirent avec tous les hommes qui
estoyent dedans: & pource qu'ils sy estoyent
portez en gens de bien, & auoyent exposé uer-

reueusement leur uie au peril de la mort, pour la defense de leur païs, les Barbares les laisserent aller par composition, laquelle ilz iurerent leur garder loyaument par leur taureau de cuyure. Ce taureau depuis fut pris quand ilz eurent perdu la bataille, & fut porté, ainsi que lon dit, en la maison de Catulus comme les primices de la uictoire. Au demourant, les Barbares trouuans le païs ouuert sans defense quelconque, s'espandirent ça & là, & le pillerent tout. A l'occasion dequoy Marius fut mandé uenir à Rome pour leur faire teste: & arriué qu'il y fut, chacun pensa qu'il y deust entrer en triumphe, pourautant mesmement que le Senat le luy otroya bien uoluntairement: mais il ne le uoluit pas faire, soit qu'il le feist, ou pour ne uouloir priuer ses souldards & les Capitaines qui auoyent combatu sous luy, estans pour lors absens, de la part d'honneur qui leur estoit deu, ou que ce fust pour asseurer le peuple au danger present, comme depasant la gloire de ses premieres uictoires entre les mains de la bonne fortune de Rome, en esperance certaine de la reprendre puis apres plus claire & plus illustre par l'adionction des secondes. Parquoy apres auoir remonstré au peuple & au Senat ce qui luy sembla à propos selon le temps, il se partit incontinent pour aller trouuer Catulus, le quel il reconforta bien de sa uenue, & feic aussi uenir son armee, laquelle estoit encore

en la Gaule de dela les monts : puis aussi tost qu'elle fut arriuee, il passa la riuere du Po pour engarder les Barbares qu'ils n'endommageassent l'Italie qui est au deça du Po. Or quant aux Barbares ilz differoyent tousiours à donner la bataille, pource qu'ils attendoient les Teutons, & disoyent qu'ils s'esmerueilloient grandement de ce qu'ils demouroient tant à uenir, soit ou que ueritablement ilz ne sceussent rien de leur desconfiture, ou qu'ils feissent semblant de n'en rien sçauoir: car ilz batoyent oultrageusement ceulx qui leur en disoyent la nouuelle. A la fin ilz enuoyerent deuers Marius, luy demander des terres & des uilles suffisantes pour nourrir & loger eulx & leurs freres. Marius demanda à leurs ambassadeurs quelz freres ilz entendoient: ilz respondirent que c'estoyent les Teutons: dequoy les autres assistens se prirent à rire, & Marius se mocquant d'eulx leur dit,

Ne uous souciez point de ces freres la, car ilz
ont de la terre que nous leur auõs baillee qu'ils
garderont à tousiours & à iamais. Ces ambassadeurs entendirent incontinent que uouloit dire ce traict de mocquerie, & se prirent à luy dire des paroles oultrageuses, en le menaçant, que les Cimbres tout presentement l'en feroient repentir, & les Teutons bien tost apres, quand ilz seroyent tous arriuez. Comment, leur repliqua Marius, ilz sont arriuez, & ne seroit pas honnestement fait à uous, de uous en aller sans les

saluer, ueu qu'ilz sont uoz freres . Ayant dit ces paroles , il commâda que lon amenast les Roys des Teutons liez & enchainez , qui auoyēt esté pris dedans les montagnes des Alpes par ceulx de la Bourgongne . Ce que les Cimbres ayans entēdu par le rapport de leurs ambassadeurs, se meirent incontinent sans plus dilayer en chemin pour aller trouuer Marius , qui ne se bougeoit point , ains entendoit à fortifier & garder son camp seulemēt. Lon dit que ce fut pour ceste bataille, que Marius inuenta premieremēt la nouueauté qu'il introduisit au iaelot ou corseque , que les Romains auoyent accoustumé de lancer tousiours contre l'ennemy à la premiere charge : car auparauant la hampe du iaelot estoit attachee au fer , & le fer à la hampe avec deux petites cheuilles de fer qui passoyent à trauers le bois : & lors Marius en feit laisser l'une ainsi comme elle souloit estre: mais il feit oster l'autre, au lieu de laquelle il feit mettre une petite cheuille de bois biē mince & fort aisée à rompre, le faisant par ruze, à fin que quād le iaelot lancé , uiendroit à se ficher dedans la targe de l'ennemy , il ne demourast pas tout droit , ains se pliaist à l'endroit du fer , & que la cheuille de bois uenant à se rompre, la hampe en pendist contrebas , tenant encore de trauers au fer fiché par la poincte. Bœorix dōques le Roy des Cimbres approchant du camp de Marius avec petit nōbre de gēs de cheual, l'en-

uoia desfier à prendre iour & lieu de bataille, pour cōbatre à qui demoureroit le país: à quoy Marius fait responce, que ce n'estoit point la coustume des Romains de prendre conseil de leurs ennemis pour sçauoir le temps ou le lieu ou ilz deuoyent donner bataille: mais neantmoins qu'il estoit content de gratifier en cela aux Cimbres. Ainsi arresterent ilz entre eulx, que ce seroit le troisieme iour ensuyuant en la plaine de Verselles, laquelle estoit cōmode aux Romains pour se seruir de leur cheualerie: & aux Barbares pour estendre à leur aise le grand nombre de leurs cōbatans: si ne faillirent point les deux parties à l'assignation, ains comparurent en bataille rengee les uns deuant les autres. Catulus auoit en son camp uingt mille trois cents hōmes de guerre, & Marius trēte & deux mille au sien, qu'il disposa aux deux poinctes de la bataille, enfermant Catulus avec ses gens au milieu, ainsi comme l'escrit Sylla, qui fut present à ceste bataille, disant, que Marius le fait malicieusement pour l'esperance qu'il auoit de rompre les ennemis avec les deux poinctes de la bataille, à fin que la uictoire totale fust à ses gens, & que Catulus ny les siens qui seroyent au milieu n'y eussent point de part, & ne peussent pas seulement affronter l'ennemy, pour autant qu'ordinairement, quand le front d'une bataille est ainsi de grande estendue, les deux poinctes ont accoustumé de se iet-

ter en auant, & se fait cōme un croissant de Lune, là ou le milieu est plus enfoncé : & treuue lon en d'autres historiens, que Catulus mesme accusant la malignité de Marius en ce faict, le disoit ainsi pour la descharge de son honneur. Quant aux Cimbres, les troupes de leurs gens de pied sortans hors de leurs forts à loisir, se rangerent en bataille quarree aussi longue que large, car en chascue sens elles occupoyent pres de deux lieues de païs : mais leur gendarmerie qui estoit de quinze mille cheuaux, marcha deuant en superbe equippage : car ilz auoyent en leurs testes des armers faits en forme de gueules de bestes sauuages, & de meufles estranges, sur lesq̃lz ilz porroyent de grands & haults pennaches qui sembloient des ailes, & les faisoÿēt trouuer à l'œil encore plus haults & plus grands hommes qu'ilz n'estoyent. Au demourant ilz auoyent les corps couuerts de cuiraces de fer, & portoyent deuant eulx de grandes targes blanches, & pour armes offensives chascun auoit en main deux iauelots à darder de loing, puis quand ilz uenoyēt aux coups de main, ilz auoyent de grandes & pesantes espees dont ilz combatoyent de pres. Mais ceste fois la ilz ne marcherent pas de droit fil contre l'armee des Romains, ains destournerent un petit à main droite, à fin de les enfermer entre eulx & leurs gēs de pied qui estoient à la main gauche. Les Capitaines des Romains sap-

perceurent bien incontinent de leur ruze, mais ilz ne peurent retenir leurs soudards: car il y en eut un qui s'escria que les ennemis s'enfuyoyēt, & incontinent tous les autres se meirent à courir apres. Ce pendant les gens de pied des Barbares qui sembloient une mer infinie, marchoyent tousiours en auant: & adonc Marius, ayant leuē ses mains en les haulsant deuers le ciel, promet & uoua aux Dieux un solennel sacrifice de cent bœufs. Aussi uoua Catulus, leuāt semblablement les mains contre le ciel, qu'il edificeroit un temple à la fortune de ce iour là:& dit on que Marius ayant sacrifié, quand on luy mōstra les entrailles des hosties immolees s'escria tout hault, La uictoire est miene. Mais quand ce uint à charger, il arriua à Marius un accident d'expresse uengeance diuine, laquelle feit retourner sa finesse contre luy mesme, ainsi comme Sylla l'escriit: car il se leua, comme lon peult penser, un si grand poulcier que les deux armées se perdirent de ueuē l'une l'autre: au moyen dequoy Marius festant mis à courir le premier pour aller commencer la charge, & ayant attiré ses gens apres luy, faillit à rencontrer les ennemis: & ayant passé oultre leur bataille, fut long temps errant ça & là par la campagne, pendant que les Barbares combatoyent à l'encontre de Catulus. Tellement que le plus fort de toute la meslée fut à l'endroit de luy & de son armée: en laq̃lle Sylla escrit qu'il estoit,

ou il dit que la chaleur & le Soleil qui donnoit au uisage des Cimbres seruit de beaucoup aux Romains: car les Barbares estâs bien durs pour souffrir & endurer les froidures, à cause qu'ilz auoyent esté nez & nourriz en païs froids, couuerts & umbrageux, comme nous auons dit, au contraire estoient molz à l'encontre de la chaleur, & fondoyent en sueur au Soleil, & estoÿer incontinent à la grosse halene, mettans leurs pa uois au deuât de leurs uisages, pourautant mesmement que c'estoit au cueur de l'Esté, enuiron le uingt & septieme iour du mois de Iuillet, que fut donnee ceste bataille: & seruit aussi la poulciere aux Romains à les asseurer, pource qu'elle les engarda de uoir de loing la multitude innombrable de leurs ennemis. Et estant chascun allé courant charger ceulx qu'ilz auoyent en teste deuant eulx, ilz se trouuerent attachez au combat auât que la ueuë leur eust peu apporter aucune frayeur: oultre ce qu'ilz estoient tant endurcis au trauail, & si bien aguerriz, que pour quelque chaleur excessiue qu'il feist, iamais on n'en ueit un qui suast, ne qui soufflast, encore que le premier choc eust esté fait en courant: ce que Catulus mesme a laissé par escript à la louange de ses souldards. Si fut la plus grâde partie des Barbares, mesmement des plus belliqueux, taillee en pieces sur le champ: car à fin que lon ne peust ouurir ny rompre leur ordonnance, ceulx des premiers rengs estoient tous

liez ensemble par leurs ceintures & baudriers avec lōgues chaines de fer, & ceux qui s'en fouirent furent chassēz & poursuyviz iusques dedans leur camp, là ou les poursuyuans rencontrerent des choses horribles & espouuētables à uoir: car leurs femmes estās mōtees dessus leurs chariots uestues de robbes noires en dueil, tuoyēt ceux qui fuyoyēt sans differēce quelconque, les unes leurs peres, les autres leurs maris ou leurs freres, & estrāglans leurs petits enfans avec leurs propres mains, les iettoyēt soubz les rouēs des chariots & entre les iambes des cheuaux, puis se tuoyēt aussi elles mesmes apres: & dit on qu'il s'en trouua une pendue au bout du timon d'un chariot, ayāt attachē par le col à ses deux talōs deux de ses enfans, & que les hōmes à faulte d'arbre pour se pēdre, attachoyēt des las courāts, qu'ilz se mettoyēt au col, aux cornes & aux iābes des bœufs, & qu'ils les picquoyēt puis apres avec des aguillons, pour les faire courir & faulter, tant que les trainnās ainsi par tout, & les foulans aux pieds, ilz les faisoient à la fin mourir: & neantmoins quoy qu'il y en eust par ces moyens grand nombre de morts, encore en fut il pris de prisonniers bien soixante mille, & le nombre des morts en monta deux fois autant. Si pillerēt les soudards de Marius le camp des Barbares: mais les despouilles des morts en la bataille, les enseignes & les trompettes furēt toutes apportees au camp de Catulus, comme

lon dit , qui estoit l'argument , que Catulus alleguoit pour monstrier que c'estoit luy & ses gens qui auoyent gaigné la bataille : surquoy l'estant emeu debat & different entre les soudards des deux camps, pour le decider amiablement ilz eleurent arbitres les ambassadeurs des Parmesans , qui d'aduenture se rencontrerent lors en l'armee . Les soudards de Catulus les menerent au lieu ou auoit esté faite la desconfiture , leur monstrans les corps des ennemis percez de part en part avec leurs iauclots , qui estoient faciles à recognoistre, pource que Catulus leur auoit faict engrauer son nom dessus la hampe . Ce nonobstant toute la gloire de ce grand faict d'armes fut attribuee à Marius , tant pour la premiere uictoire qu'il auoit gaignee seul cōtre les Barbares, que pour la dignité des magistrats qu'il auoit euz . Qui plus est, le commun peuple le surnōma Troisieme fondateur de la uille de Rome , n'estimant pas moindre le peril , dont il les auoit deliurez, qu'auoit anciennement esté celuy des Gaulois : & faisans bonne chere chascun d'eulx en son priué avec sa femme & ses enfans , ilz offroyent aux Dieux & à Marius ensemble les primices de leur soupper : & si uouloyent à toute force qu'il triomphast seul des deux triumphes : ce que toutefois il ne uoulut pas faire, ains entra avec Catulus dedans la uille en triumphe , se uoulant monstrier courtois & moderé

en si grande prosperité, & aussi craignant à l'ad-
uétude les soudards de Catulus, lesquelz estoient
prests & appareillez, si lon uouloit priuer leur
Capitaine de cest honneur, d'empescher aussi
que Marius ne triomphast. Voila comment se
passa son cinquieme Consulat: apres lequel en-
core prochassa il le sixieme plus chaudement
& de plus ardente affection, que iamais autre
ne feit son premier, cherchant la bonne grace
du menu peuple par tous moyens de caresses
qu'il leur pouuoit faire pour leur gratifier, en
s'humiliant & abbaisant enuers eulx, non seu-
lement contre la dignité du lieu qu'il tenoit,
mais aussi contre sa propre nature, contrefai-
sant le doux, le gracieux & populaire, encore
que de son naturel il ne fust rien moins que ce-
la. Mais son ambition le rendoit fort craintif &
fort retenu, en matiere de gouuernement & de
brigues & menees de uille: car celle hardiesse &
constance asseuree qu'il auoit en bataille con-
tre l'ennemy, l'abandonnoit incontinent qu'il
se trouuoit en une assemblee de peuple en la
uille, & sortoit facilement hors de soy au pre-
mier blasme ou à la premiere louage qu'il oyoit
que lon luy donnoit, encore que lon compte
que quelquefois comme il eust donné droit de
bourgeoisie Romaine à mille hommes Came-
rins tout à un coup, pource qu'ilz festoyent
fort bié & uailamment portez en une guerre,
il y eut quelques uns qui l'en accuserent, disans
que

que c'estoit chose faite cōtre toutes les loix. Il leur respondit, que pour le bruit des armes il n'auoit pas peu ouir les loix : toutefois si sem-ble il que ueritablement il craignoit & redoub-toit fort le bruit & la crierie du peuple en une assemblée de uille : car en temps de guerre, il retenoit bien sa dignité & son autorité pour le besoing que lon auoit de sa suffisance : mais en temps de paix & en matiere de gouuerne-ment ciuil, luy estant le premier lieu de credit mis en dispute, il chercha de se couler en la bō-ne grace du commun populaire, & à acquerir par tous moyens sa bienueillance, aimant mieulx estre le plus grand, que le plus homme de bien. Si encourut par ces deportemens la haine de toute la noblesse generalement : mais il n'y en auoit pas un de qui il se doubtaſt, ne de qui il se deffiaſt tant comme il faisoit de Metel-lus, pour le tour de grande ingratitude qu'il se souuenoit luy auoir fait, & aussi pource qu'e-stant homme de nature droit, entier & uerita-ble, il en uouloit ordinairement à ceulx qui par uoyes obliques falloyent glissans en la bonne grace du peuple, & festudioyent à fai-re toutes choses pour le flatter & luy complai-re : au moyen dequoy Marius espioit tous moyens pour le chasser hors de Rome : pour à quoy paruenir il fallia d'un Glaucias & d'un Saturninus, les deux plus audacieux, plus ef-frontez & plus temeraires hommes qui fussent

en toute la uille, qui auoyent à leur commandement toute la tourbe des souffreteux, necessiteux, & telle maniere de gens qui ne demandent que troubles & tumultes, par l'entremise desquelz il mettoit en auant de nouuelles loix populaires, & faisoit uenir des champs les gens de guerre, & les mesloit parmy le peuple de la uille aux assemblees publiques pour faire de la fascherie à Metellus. Dauantage l'historien Rutilius, homme de bien au demourant & ueritable, mais particulierement ennemy de Marius, escrit qu'il obtint son sixieme Consulat, moyennant de l'argent qu'il feit distribuer par chascune lignee du peuple, & qu'il l'achepta à deniers comptans, à fin d'en pouuoir debouter Metellus, & auoir Valerius Flaccus, nō ia pour pair & compagnon au Consulat, mais plustost pour ministre de sa uoulunté. Il n'y auoit iamais eu Romain à qui le peuple eust conferé six fois le Consulat, excepté Valerius Coruinus seul: mais à celuy la, on dit qu'il y eut quarante cinq ans entre son premier Consulat & son dernier: là ou Marius depuis son premier continua les cinq autres de reng tout d'une tire de la faueur de fortune: mais au dernier il excita grande haine & enuie contre soy, à cause des lourdes fautes qu'il commeit à l'appetit de cestuy Saturninus, entre lesquelles fut la mort de Nonius que tua Saturninus, pource qu'il estoit son cōcurrent en la brigue du Tribunat. Puis quād

il eut esté eleu Tribun du peuple, il meit en auât une loy pour faire repartager les terres, en laquelle loy il auoit notamment adiousté un article, Que tous les Seigneurs du Senat uien-

» droyent iurer publiquement, qu'ilz obserue-

» roient & garderoient de poinct en poinct ce

» que le peuple par ses suffrages auroit arresté, &

» n'y contreuendroyent en chose quelconque.

Marius en plein Senat fait semblant de uouloir oppugner cest article, disant que ny luy ny autre homme de bon sens, à son aduis, ne feroit

» ce serment: car si la loy estoit mauuaise, on

» feroit, ce disoit il, tort au Senat, de le contrain-

» dre à conceder cela par force, & non de sa fran-

» che uolunté: mais il disoit cela, nō pource qu'il eust intention de le faire ainsi qu'il disoit, ains estoit un aguët qu'il dresseoit à Metellus bien mal aisé à eschapper. Car estimant, que sçauoir bien mentir fust une partie de uertu & de bon esprit, il auoit tresbien resolu en soy mesme, de ne se soucier ny souuenir aucunement de chose qu'il eust ditte au Senat: & au contraire, sachant bien aussi que Metellus estoit homme graue & sage, qui reputoit que l'estre ueritable, comme dit Pindarus, soit le commencement & le fondement d'une grande uertu, il le uouloit surprendre, en luy faisant affermer deuant le Senat qu'il ne iureroit point, sachant bien que le peuple luy en uoudroit mal de mort, quand puis apres il refuseroit à iurer: comme il en ad-

uint : pource que Metellus ayant lors asseuré qu'il ne iureroit point, le Senat se leua. Et peu de iours apres Saturninus appellant les Senateurs à la Tribune aux harengues pour les contraindre de iurer deuant le peuple, Marius s'y alla presenter : & là toute l'assistéce feit un grád silence, & eut les oreilles bien ouuertes pour ouir ce qu'il diroit : mais luy ne faisant compte de ce qu'il auoit si uaillamment promis de la langue deuât le Senat, dit alors qu'il n'auoit pas le col si large, qu'il uoulust faire preiudice en chose de si gráde consequence, & qu'il iureroit & obeiroit à la loy, si c'estoit loy : car y il adiouta ceste belle cautelle, cōme une couuerture, pour cacher & couurir sa honte. Cela dit, il iura : le peuple l'ayât ueu iurer, en fut fort ioyeux, & le haultloua avec gráds batemens de mains : mais les gens de bien & d'honneur baissans les testes en furent fort desplaisans, & luy uoulurent grand mal en leurs cueurs de ce qu'il fesoit ainsi laschement & uillainnement changé. Si iurerent tous les autres Senateurs les uns apres les autres, malgré eulx, pour la crainte qu'ilz auoyent du peuple, iusques à Metellus, lequel pour prieres, ne pour remōstrances que ses parents & amis luy sceussent faire pour l'induire à uoloir iurer, à fin de n'encourir point les peines capitales que Saturninus imposoit à ceulx qui refuseroyent à iurer, ne flechit point, ny ne feit onques le serment, ains demoura fer-

me en son naturel , estant prest & appareillé de
 souffrir toutes les peines du monde plustost
 que de cōmettre chose aucune indigne de luy:
 & à tant s'en alla de l'assemblee deuissant avec
 » ceulx qui l'accompagnoient, Que c'estoit cho-
 » se trop facile & trop lasche, que de mal faire : &
 » que de faire bien là ou il n'y eust point de dan-
 » ger , c'estoit chose commune : mais que faire
 » bien là ou il eust danger , c'estoit le propre
 » office d'un homme d'honneur & de uertu .

Saturninus adonc fait commander aux Con-
 sulz par edict du peuple , qu'ilz eussent à ban-
 nir Metellus à son de trompe , avec defense de
 luy dōner ne feu ne eau, ne le loger & receuoir
 à couuert: & estoient les plus basses personnes
 du peuple toutes prestes à luy courir sus pour le
 tuer: mais les gens de bien estans desplaisans du
 tort qu'on luy faisoit, se régerent autour de luy
 pour le garder si on luy uouloit faire uiolence:
 mais luy mesme fut si bon , qu'il ne uoulut pas
 que sedition ciuile se feist pour l'amour de luy,
 ains s'absenta de la uille de Rome , en quoy il
 » fait sagement: car ou les choses, disoit il, s'amen-
 » deront, & lors le peuple se repentant de son er-
 » reur me r'appellera: ou si les affaires demeurent
 » en tel estat qu'ilz sont à present, le meilleur sera
 » de s'en tenir bien loing . Mais quant au uoyage
 qu'il fait en cestuy sien exil, cōbien il y fut aimé
 & honoré , comment il passa doucement son
 temps à estudier en la philosophie en la uille de

Rhodes, il se dira plus à propos en sa uie . Au demourant, Marius estant contraint, en recompense de ce plaisir que luy auoit fait Saturninus, de luy laisser entreprendre & faire toutes choses à sa uoulunté, ne se dōna garde qu'il feist une playe insupportable à la chose publique, lachant la bride à un homme desesperé, qui par toutes uoyes de faict, par armes & par meurtres, tendoit euidentement à usurper une domination tyrannique, & à la ruine uniuerselle de toute la chose publique. Ainsi portant d'un costé reuerence à la noblesse, & de l'autre costé desirant gratifier au commun populaire, il feist un acte lasche, & un tour d'homme à deux uisages : car un soir les principaux hommes & plus gens de bien de la uille, estans allez en son logis, pour luy remonstrer qu'il deuoit refrener l'audace & l'insolence de ce Saturninus : & au mesme tēps y estant aussi allé Saturninus pour parler à luy, il le feist entrer par une autre porte, sans que les nobles en sceussent rien : & donnant à entendre aux uns & aux autres, qu'il auoit le flux de uentre, soubz ceste couleur alloit courant tantost à l'un & tantost aux autres, sans faire autre chose que les aigrir & irriter encore plus qu'ilz n'estoyent les uns contre les autres. Toutefois le Senat ayant à bon esciant pris l'affaire à cuer, & s'estant l'ordre des cheualiers bendé avec ceulx du Senat, Marius à la fin fut contraint de faire porter armes en la place pour

reprimer les seditieux , & les rengea dedans le Capitole , là ou ilz furent contraints de se rendre à faulte d'eau , à cause qu'il feit trencher les conduits par lesquelz l'eau y alloit : à l'occasion dequoy ne pouuans plus tenir, ilz l'appellerent & se rendirent à luy soubz assurance de la foy publique : mais quoy qu'il se tournast en tous les sens qu'il luy fut possible pour les cuider sauuer, il ne leur seruit neantmoins de rien, pource qu'ilz ne furent pas plus tost descendus en la place , qu'ilz furent tous mis à mort. Au moyen dequoy, ayant encouru la male grace & du peuple & de la noblesse , quand uint le temps que son deuoir elire de nouveaux Censeurs , chacun s'attédoit biē qu'il deust estre l'un des pretendans: toutefois il ne le demāda point, pour la doubte qu'il eut d'en estre refusé, & en souffrit elire d'autres de beaucoup moindre dignité que luy : en quoy neantmoins il mettoit le plus beau de son costé, disant qu'il n'auoit pas uoulu prochasser ce magistrat, pource qu'il ne se uouloit point mettre en la male grace de plusieurs, en allant seuerement rechercher & contreroller leurs uies & leurs meurs . Dauantage ayant esté mis en auant un decret de r'appeller Metellus de son exil , Marius feit & de parole & d'effect tout ce qui luy fut possible pour l'empescher : mais finablement uoyant qu'il n'y gaignoit riē, il s'en deporta. Ainsi ayāt le peuple receu & authorisé biē uoluntiers ce decret de la

reuocation de Metellus, luy n'ayāt pas le cueur de le uoir reuenir en despit qu'il en eust, monta sur mer pour s'en aller en la Cappadocie & en la Galatie, soubz couleur d'aller payer à la mere des Dieux quelques sacrifices qu'il luy auoit uouez, ce qui n'estoit pas l'occasion ueritable qui luy faisoit entreprendre ce uoyage, ains y en auoit une autre secrette, pource que n'estant pas de sa nature propre à uiure en paix, ny à manier affaires politiques, comme celuy qui auoit acquis sa grandeur par les armes, & pensant que sa gloire & son autorité s'alloit petit à petit aneantissant & amortissant par trop demourer en paix sans rien faire, il cherchoit matiere de nouvelles guerres, esperāt que fil pouuoit embrouiller & irriter ces Roys de l'Asie, mesmement Mithridates, leql sans cela on attēdoit biē qu'il deust un iour prendre les armes contre les Romains, il seroit incontinent sans doubte ny contradiction aucune eleu Capitaine pour luy aller faire la guerre, & consequemment, que ce luy seroit matiere & moyen d'emplir la uille de Rome de nouueaux triumphes, & sa maison des despouilles de ce grand Royaume de Pont, & des richesses du Roy. Pourtant Mithridates s'estant mis en deuoir de luy faire tout l'honneur, tout le bon traitement, & amiable recueil qui luy fut possible, iamaïs pour tout cela il n'en plia iusques à luy monstrier un bon uisage, ny à luy user de gracieuse parolle, ains luy

20 dit brusquement en se partant d'auec luy : Il
30 fault que tu te deliberes de faire l'un des deux ,
20 Roy Mithridates, ou que tu tasches à estre plus
30 fort & plus puissant que les Romains , ou que
30 tu faces , sans rien repliquer à l'encontre , tout
20 ce qu'ilz te commanderont. Ce propos estonna
Mithridates, lequel auoit bien ouy dire que les
Romains parloyent ainsi franchement , mais il
ne l'auoit iamais esprouué ny ouy que ceste
fois la. Retourné qu'il fut à Rome, il feit bastir
une maison assez pres de la place , pource qu'il
ne uouloit pas, ainsi qu'il disoit , que ceulx qui
luy uenoyent faire la cour se trouuassent, ayās
à faire grand chemin pour le conuoyer iusques
en sa maison , ou pource qu'il estimoit que cela
estoit cause que plus de gens ne le uenoyent
pas saluer en sa maison , & luy faire la cour, que
les autres Senateurs : mais cela n'en estoit pas
la ueritable cause, ains estoit , pource qu'il n'a-
uoit pas de nature la grace de recueillir & en-
tretenir amiablement les personnes , & qu'il a-
uoit faulte des parties & qualitez requises aux
affaires de uille : au moyen dequoy , en temps
de paix on n'en tenoit compte , non plus que
d'un uieil harnois & d'un util , qui n'estoit bon
qu'à la guerre tant seulement. Et quant aux au-
tres qui estoient de sa qualité, il ne luy faschoit
pas tant qu'ilz eussent la uogue deuāt luy, com-
me il faisoit de Sylla : car il creuoit de despit ,
uoyant que les nobles faisoient tout ce qu'ilz

pouuoient à le poulsér en auant pour l'enuie qu'ilz auoyent contre luy, & que le commencement & le plus grand moyen de son auancement estoient les querelles & differents qu'il auoit avec luy. Mesmement quand Bocchus le Roy de Numidie, ayant esté aduoué & déclaré par le Senat amy & allié du peuple Romain, offrit au temple du Capitole des statues de uictoires qui portoyēt des trophées, & aupres d'elles posa aussi en images d'or un Roy Iugurtha, que luy deliuroit & consignoit entre les mains de Sylla : car cela feit sortir Marius hors de foy de despit & de ialousie qu'il en eut, ne pouuāt supporter qu'un autre s'attribuast la gloire de ses faicts, tellemēt qu'il estoit bien resolu d'abbatre ces images la, & les oster par force. Sylla aussi de l'autre costé s'opiniastroit à les uoloir main tenir au lieu ou elles auoyent esté mises, de sorte que ceste sedition ciuile fust bien tost sortie en euidence, n'eust esté la guerre des allies qui suruint là dessus, & la restraignit pour un tēps : car les plus puissans peuples, & les plus belliqueuses nations de l'Italie, se soubleuerent ensemble à l'encontre des Romains, & s'en fallut bien peu qu'ilz ne meissent sans dessus dessous tout leur empire, pour autant qu'ilz n'auoyent pas seulement la force des armes & le nombre des hommes, mais aussi les Capitaines en hardiesse & en suffisance excellents à merueilles & à peu pres egaux aux Romains. Si fut ceste

guerre merueilleuse pour la diuersité des accidens qui y aduindrent, & pour la uarieté de la fortune en icelle : mais elle adiousta autant de gloire & de reputation à Sylla, comme elle en osta à Marius : car il se monstra froid & lent en toutes ses entreprises, ne cherchant qu'à dilayer & à reculer tousiours, fust, ou pource que la uieillesse eust desia esteinct celle chaleur active, & celle prompte uiuacité qui souloit estre en luy, à cause qu'il auoit ia passé le soixante & cinquieme an de son aage, ou pource que, comme luy mesme disoit, il estoit deuenu goutteux & trauaillé de maladie de nerfs, de sorte qu'il ne se pouuoit pas bien aider de sa personne, & faisoit pour la honte qu'il auoit de demourer en arriere en la conduite de ceste guerre, plus que sa puissance ne portoit. Ce neantmoins tout tel qu'il estoit, encore gaigna il une grosse bataille, en laquelle il demoura sur le champ six mille des ennemis morts, & tant comme la guerre dura, ne leur donna iamais prise sur luy, ains endura patiemment qu'ilz l'enfermassent quelquefois de trenchees, qu'ilz luy dissent des iniures & paroles de mocquerie, & qu'ilz le desfiaissent à uenir au combat, sans iamais pour tout cela se laisser transporter à la chole-re. Auquel propos on compte que Pompédius Silo, qui estoit le Capitaine de plus grande reputation & de plus grande autorité que les ennemis eussent, luy dit une fois: Si tu es si grād

25 Capitaine, comme lon dit, Marius, fors de ton
30 camp & uiens à la bataille. Mais toymesme, luy
35 respondit Marius, si tu es grand Capitaine, con-
40 trains moy d'en sortir, & de uenir à la bataille
45 malgré moy. Vne autre fois cōme les ennemis
eussent donné une occasion de leur faire quel-
que grande charge avec auantage, les Romains
eurent faulte de cueur, & ne les ozerent aller
assaillir. Parquoy apres que les uns & les autres
se furent retirez, Marius feir assembler les siés,
50 & parla à eulx en ceste maniere : Je ne sçay les-
55 quelz ie doy appeller plus couards, ou uous, ou
60 uoz ennemis : car eulx n'ont pas eu la hardiesse
65 de uous regarder au dos, ny uous eulx à la nu-
que. Toutefois à la fin il fut contraint de quit-
ter la charge, n'y pouuant plus fournir pour la
debilité & foiblesse de sa personne. Au demou-
rant estans ia les peuples coniuerez de l'Italie re-
duits fort au bas, plusieurs à Rome par le moyé
des harengueurs briguoyent d'auoir la charge
de la guerre contre le Roy Mithridates, & y
eut un Tribun du peuple nommé Sulpitius,
homme fort audacieux & temeraire, qui contre
l'opinion & l'esperance de tout le monde meit
en auant Marius, & suada que lon luy donnast
la superintendence de ceste guerre avec tiltre
& autorité de Viceconsul. Le peuple adonc se
diuisa en deux parts, pource que les uns uou-
loyent elire Marius, les autres appelloyent Syl-
la à ceste charge, disans que Marius ne deuoit

plus penser que de se retirer aux baings chauds à Baies, pour y traitter son corps affoibly de reumes & de uieillesse, ainsi que luy mesme disoit. Car Marius auoit en ce quartier la pres du mont de Misene une fort belle & magnifique maison, ou il y auoit des moyens de delices plus tendres & plus effeminees, qu'il ne sembloit estre conuenable à homme qui s'estoit trouué en personne en tant de batailles & en tant de dangers. Lon dit que Cornelia depuis l'eut pour la somme de sept mille cinq cents escus, & peu de temps apres Luculus l'achepta deux cets cinquante mille, tant les delices, la superfluité & la sumptuosité s'allèrent multipliant en peu de temps à Rome. Ce nonobstant Marius combatant trop ambitieusement, & en ieune homme passionné, contre sa foiblesse, & contre la debilité de sa uieillesse, ne faillloit point à se trouuer tous les iours au champ de Mars, & à sy exercer avec les ieunes hommes, monstrant son corps encore dispos & leger pour manier toutes sortes d'armes, & picquer cheuaulx, quoy que sur ses derniers ans il ne fust pas fort aisé de sa personne, pource qu'il deuint fort replet & pesant. Il y en auoit qui trouuoient cela le meilleur du monde, & qui alloient expressement sur le champ pour uoir la peine qu'il prenoit à se monstrier & à s'efforcer de faire mieulx que les autres: mais les gens de bien qui uoyoyent cela, auoyent compassion de son aua-

rice & de son ambition, attendu mesmement qu'estant deuenu de pauvre trefriche, & de petit trefgrand, il ne sçauoit pas ficher un but au cours de sa prosperité, & ne se contentoit pas d'estre estimé & honoré, iouïssant en paix & en repos de ce qu'il auoit ia tout acquis & present, ains tout ainsi que fil eust esté necessiteux & indigent de toutes choses, apres auoir eu tant d'honneurs & tant de triumphes, il uouloit encore aller porter sa uieillesse si grande iusques en la Cappadocie, & au royaume de Pont, pour y combattre à l'encontre d'un Archelaus & un Neoptolemus lieutenans du Roy Mithridates. Il est uray qu'il alleguoit quelques raisons pour se iustifier de cela, mais elles estoient totalement uaines : car il disoit qu'il desiroit luy mesme en personne instruire son filz en l'exercice des armes, & luy enseigner le mestier de la guerre. Cela descouurit la maladie cachee & secrette, qui de long temps se couuoit en la uille de Rome, ayant mesmement Marius rencontré un ministre & instrument fort propre à la ruine de la chose publique, que l'insolence & la temerité de Sulpicius, lequel en tout & par tout alloit ensuyuant les faicts de Saturninus, excepté qu'il le reprenoit encore d'auoir esté trop couard & trop lasche en ses entreprises : mais luy ne uoulant point dilayer, auoit tousiours à l'entour de sa personne six cents ieunes hommes de l'ordre des cheualiers,

desquelz il se seruoit comme de satellites , les appellant le Contre-Scnat. Et un iour ainsi que les Consulz tenoyēt assemblee publique dessus la place , Sulpicius y entrant en armes les feit tous deux fouir , & en ceste fuitte le filz de l'un des Consulz estant attrapé , y fut occis : & Sylla , qui estoit l'autre Consul , se sentant aussi pourfuyuy de pres iusques deuant la maison de Marius , se ietta dedans , contre l'opinion de tout le mōde : dequoy ne s'estās point apperceuz ceulx qui couroyent apres luy , passerent oultre : & dit on que Marius luy mesme , le feit sortir à sauueté par une autre porte , & qu'estant ainsi eschappé , il s'en alla en son camp. Toutefois Sylla mesme en ses commentaires ne dit point , qu'il se fust sauué en ceste fuitte dedans la maison de Marius , ains dit qu'il y fut mené pour decider & resouldre l'affaire , auquel Sulpicius le uouloit contraindre , & le luy faire accorder malgré luy , en luy presentant espees nues de tous costez : & escrit qu'ayant esté ainsi trainné chez Marius , il y fut detenu en ces frayeurs iusques à ce , que retournant sur la place il fut contrainct de reuoyer la cessation de la iustice & des affaires , que luy & son compagnon auoyent par edict commandee . Quoy fait , Sulpicius adonc estant le plus fort , feit decerner à Marius par les uoix du peuple la commission & charge de la guerre contre Mithridates . Parquoy Marius se mettant en ordre pour partir , enuoya deuant

deux de ses coulounelz pour prendre l'armee des mains de Sylla, lequel ayant le premier gagné les cueurs des soudards , & les ayant irritez à l'encontre de Marius , les remena droit à Rome, n'estans pas moins de trentecinq mille hommes en armes , qui se iettans sur les Capitaines que Marius leur auoit enuoyez, les occirent sur le champ : en reuenche dequoy Marius dedans Rome feit mourir plusieurs des amis & adhe-rens de Sylla , & à son de trompe offrit publiquement liberté aux serfs & esclauues qui uoudroyent prendre les armes pour luy, mais il n'y en eut iamais que trois qui se presentassent : au moyen dequoy, ayant un peu fait de resis-tence à Sylla , quand il entra dedans Rome , il fut bien tost contraint de prendre la fuitte: si ne fut pas plus tost hors de la uille que ceulx qui estoient en sa compagnie l'abandonnans, s'escarterent les uns ça, les autres là, estant nuict toute noire, & luy se retira en une siene maison des champs nommee Salonium, & enuoya son filz en des maisons de son beaupere Mutius , qui n'estoyent pas gueres loing de là , pour y prendre quelques prouisions necessaires à uiure : mais ce pendant luy s'en alla deuant à Hostie, là ou l'un de ses amis Numerius luy auoit fait ap-prester un uaisseau , sur lequel il s'embarqua tout incontinent sans attendre son filz , & feit uoile, ayant seulement avec luy Granius le filz de sa femme . Ce pendât le ieune Marius estant
es pos-

es possessions de son beaupere Mutius, famu-
soit à prendre quelques prouisions & à les em-
pacqueter pour les emporter, tant que le iour
s'vint qui le cuida deceler: car les ennemis eu-
rent aduertissement qu'il estoit allé là, & y uin-
drent quelques gens de cheual cuidans l'y trou-
uer: mais le concierge de la maison en ayant
senty le uent, & les ayant preueuz auant qu'ilz
arriuaissent, attella uistement des bœufs à un
chariot, sur lequel il chargea des febues, & ca-
cha deffoubs le ieune Marius, & touchant ses
bœufs s'en alla au deuant d'eulx uers la uille, &
le conduisit en ceste sorte iusques en la maison
de sa femme, là ou il prit ce qui luy faisoit be-
soing, puis quand la nuit ensuyuant fut uenue,
il s'en alla uers la mer, là ou il s'embarqua sur
une nauire qui passoit en Afrique. Mais le uieil
Marius s'estant mis à la uoile, eut le uent à pro-
pos pour cingler le long de la coste d'Italie: tou-
tefois ayant crainte d'un personnage nommé
Geminus, qui estoit l'un des principaux hom-
mes de Terracine, lequel luy uouloit mal de
mort, il aduertit de bonne heure ses mariniers
qu'ilz se gardassent d'aborder à Terracine. Les
mariniers luy uouloyent bien obeïr, mais le
uent se tourna du costé de la pleine mer, qui e-
meut une grosse tourmente, & craignoyent les
mariniers que leur uaisseau, qui n'estoit qu'un
bateau, ne peust pas resister à la uiolence des ua-
gues, avec ce que luy mesme se portoit fort mal

de son estomac, & estoit fort trauaillé de la mer-
rine : toutefois à la fin avec toute la peine du
monde, ilz feirent tant qu'ilz gaignerent la co-
ste à l'endroit de la uille de Circees. Cependant
la tourmente alloit tousiours augmentant, &
leur estans les uiures faillis, ilz furent cōtraints
de descendre en terre, là ou ilz allerent errans
ça & là sans auoir aucun but certain de ce qu'ilz
deuoient faire, ou là ou ilz deuoient rendre :
mais ainsi qu'il aduiant ordinairement en telles
extremitez de destresse, il leur sembloit tous-
iours le plus seur de fouir du lieu ou ilz se trou-
uoient, & auoir esperance en ce que point ilz
ne uoyoyent : car si la mer leur estoit ennemie,
si estoit bien la terre. Ilz craignoient de ren-
contrer des hommes, & si auoyent peur de n'en
rencontrer point pour la grande faulte & ne-
cessité qu'ilz auoyent de uiures : toutefois à la
fin ilz trouuerent des bouuiers, qui ne leur peu-
rent rien donner à manger, mais ayans reco-
gneu Marius l'admonesterent de foster de là le
plus tost qu'il luy seroit possible, pource qu'il
n'y auoit gueres qu'il estoit passé par là un bon
nombre de gens de cheual qui le cherchoient
par tout. Ainsi estant reduit à telle perplexité
qu'il ne sçauoit plus qu'il deuoit faire, mesme-
ment pource que les gens qu'il auoit en sa com-
pagnie ne se pouuoient plus soustenir, tant ilz
enduroient de faim, il se retira toutefois hors
du chemin, & se ietta dedans un bois fort espez,

là où il passa toute la nuict en grande angoisse : & le lendemain estant contraint par la necessité, il delibera d'employer encore son corps & sa personne deuant que toute force entiere-ment luy defaillist : si se remeit en chemin le long du riuage de la mer, recōfortant le mieulx qu'il pouuoit, ceulx qui le suyuoient, en les priant de ne se desesperer point, ains se reseruer avec luy à la derniere esperance, se confiant en quelques predictions que les deuins long temps au parauant luy auoyent prophetisees. Car estant encore fort ieune, & demourant aux champs, il recueillit dedans un pan de sa robbe l'aire d'une aigle, dedans laquelle y auoit sept petits aiglets, dequoy ses pere & mere furent bien esbahis : si demanderent aux deuins que cela uouloit signifier: qui leur respondirent que leur enfant seroit un iour l'un des plus grands & des plus renommez hommes du monde, & que sans nulle faulte il obtiendroir par sept fois en sa uie le magistrat de souueraine authorité en son pais. Toutefois quand à cela, il y en a qui disent que ueritablement il aduint ainsi à Marius : les autres tiennent que ceulx qui se trouuerent lors à l'entour de luy, en ce lieu là & ailleurs, tant comme il fut en fuitte, luy ayans ouy reciter ce compte, le creurent, & depuis le meirent par escript, comme chose ueritable, combien qu'elle soit faulse & cōtrouuee, pour ce qu'ilz disent que l'aigle ne fait iamais plus

de deux petits : au moyen dequoy ilz soustien-
nent encore que le poëte Musæus a menty en
ce qu'il escrit en ces uers,

26 Trois œufs pont l'aigle, en escloft une paire,

29 Et n'en nourrit qu'un tout seul en son aire.

Comment que ce soit, il est bien certain que
Marius par plusieurs fois, durant le temps de sa
fuite, dit & assura qu'il paruiendroit iusques
au septieme Consulat. Quand donques ilz fu-
rent pres de la uille de Minturnes d'environ
cinq quarts de lieuë, ilz apperceurent uenir de
loing une troupe de gens de cheual le long de
la marine, & en la mer deux nauires qui cin-
gloyent assez pres de la coste, de bonne aduen-
ture : si se meirent tous à courir tant comme ilz
eurent de force & d'halene uers la mer, dedans
laquelle ilz se ietterent, & gaignerent à nage
l'une des nauires, dedans laquelle estoit Gra-
nius, & trauerferent en l'isle qui est uis à uis, ap-
pellee Enaria. Quant à Marius qui estoit pesant
& mal aisé de sa personne, deux de ses seruiteurs
luy aiderent à le soubfleuer tousiours sur l'eau
avec toute la peine & toute la difficulté du mô-
de, & feirent tant qu'à la fin ilz le meirent de-
dans l'autre nauire à l'instât mesme que les gens
de cheual arriuerent à l'endroit du riuage, qui
crierent aux mariniers qu'ilz eussent à aborder,
ou bien à ietter Marius hors de leur nauire, &
qu'ilz s'en allassent puis apres là ou bon leur
sembleroit. Marius de l'autre costé les supplia

humblement les larmes aux yeux qu'ilz ne le uoulussent pas faire: de sorte que les maistres de la nauire furēt en peu d'heure plusieurs fois en uolunté de le faire, & puis de non le faire: à la fin toutefois ilz respondirent à ces gens de cheual qu'ilz ne le ietteroyent point hors de leur uaisseau, tellement que les gens de cheual se partirent de là en cholere: mais si tost qu'ilz furent partis, ceulx de la nauire changeans de uolunté, en approchant de terre, ietterent leur ancre pres de la bouche de la riuere de Liris, là ou elle s'espend hors de riue, & fait un grand marets, & dirent à Marius qu'il ualoit mieulx qu'il descendist en terre pour prendre sa refectiō, & refreschir un peu sa personne qui estoit fort rompue & fort trauaillee de la marine, iusques à ce que le uent leur fust bon pour faire uoile, ce qui seroit sans nulle doubte à une certaine heure que le uent de mer auoit tousiours accoustumé de s'assopir, & qu'il se leuoit un petit uent de terre, engendré des uapeurs du marrets, qui leur suffiroit pour s'eslargir en haulte mer. Marius pensant qu'ilz luy dissent uerité, fait ce qu'ilz luy conseillerent, & les mariniers le descendirent sur le riuage, là ou il se coucha tout de son long dessus l'herbe, ne pēsant à rien moins qu'à ce qui luy deuoit aduenir: car ces mariniers remontans incontinent en leur uaisseau & leuans les ancrs, se meirent à la uoile pour foudir, estimans qu'il ne leur eust esté ny

honeste de liurer Marius entre les mains de ses ennemis, ny seur aussi de le uouloir sauuer. Ainsi Marius se trouuant seul abandonné de tout le monde, demoura longuement estendu sur le riuage sans mot dire: toutefois à la fin ayant repris un peu de courage, encore se re-meit il à cheminer en grande peine par lieux ou il n'y auoit chemin ny sentier quelconque, à trauers des marets profonds & de grands fosses pleins d'eaux & de bourbe, iusques à ce qu'il arriua en la petite cabane d'un pauvre bon homme uieillard qui se tenoit en ce marets, & se iettant à ses pieds le supplia de uouloir secourir & sauuer un personnage affligé, qui luy en rendroit un iour recompense plus grande qu'il ne l'oseroit esperer, s'il pouuoit une fois eschapper du present danger ou il se trouuoit. Le uieillard, soit qu'il cogneust de longue main Marius, ou qu'à le uoir seulement au uisage, il iugeast bien par coniecture, que ce deuoit estre quelque grand personnage, luy dit, que s'il ne uouloit que se reposer, la petite cabanne estoit suffisante pour ce faire: mais si d'aduenture il alloit ainsi errant pour fouir quelques siens ennemis qui le poursuyussent, il le meneroit bien cacher en un autre lieu plus secret & plus hors de bruit. Marius le pria de ce faire: & le bon homme le mena au dedans du marets en un endroit bas au long du cours de la riuere, là ou il le feit coucher, & puis ietta dessus luy force

cannes, rouseaux & autre telle matiere legere pour le couvrir sans luy faire mal. Il n'y eut pas gueres esté qu'il entendit un grand bruit ueuant de deuers la cabanne du pauvre uieillard, pource que Geminius de Terracine auoit enuoyé gens ça & là en queste pour le chercher, desquelz les uns par cas d'aduenture s'adresserent là, & effroyerent le pauvre bon homme, crians à l'encontre de luy, qu'il auoit recueilly & qu'il receloit un ennemy du peuple Romain. Ce qu'entendant Marius, se leua du lieu ou le bon homme l'auoit mis, & s'estant despouillé entra en un endroit du maret ou l'eau estoit fort boueuse & fangeuse, & là fut trouué par ceulx qui le cherchoyent: lesquelz l'ayans tiré tout nud hors de celle fange, le menerent en l'estat qu'il estoit dedans la uille de Minturnes, là ou ilz le consignerent entre les mains des officiers de la uille, pource que le mandement du Senat auoit esté ia publié par toutes les uilles d'Italie, par lequel il estoit commandé que lon eust à poursuyure publiquement & à courir sus à Marius, & à le tuer en quelque part que lon le peust trouuer: toutefois les officiers de Minturnes furent d'aduis d'en consulter premierement entre eulx, & ce pendant le firent mettre en garde chez une femme de la uille nommé Fannia, que lon pensoit luy estre grande ennemie à cause d'une ancienne querelle, qui estoit telle: Elle auoit eu autrefois un mary nommé

Tinnius, duquel elle se uouloit departir, & luy redemandoit son douaire, qui estoit grand. Le mary au contraire luy mettoit sus qu'elle estoit adultere: & de ce different Marius en son sixieme Consulat auoit esté iuge. Les parties ouyes, par le discours du proces il fut trouué que ceste Fannia s'estoit mal gouueree, & que le mary l'ayant bien sceu auant que de l'espouser, l'auoit neantmoins prise toute telle, & auoit longuement uescu avec elle: parquoy Marius blasmat l'une & l'autre, condāna le mary à restituer le douaire, & nota d'infamie la femme, la condānant par ignominie en amēde de quatre quatrins: toutefois Fannia pour cela ne se monstra point lors femme offensee, & ne pensa à rien moins qu'à se uenger quand elle ueit Marius entre ses mains, ains au contraire le traitta de ses biens, & le reconforta au mieulx qu'il luy fut possible: dequoy Marius la remercia grandement, & luy dit qu'elle eust bonne esperance, pource qu'en entrant chez elle il auoit eu une rencontre de bon presage, qui fut telle: Ainsi qu'on le menoit, quand il fut pres du logis de ceste Fannia, estant la porte toute ouuerte, il en estoit sorty un asne courant pour aller boire en une fontaine qui couloit pres de là, & trouuant en son chemin Marius, le regarda d'une façon toute gaye & eniouee, s'arrestant premierement tout court deuant luy, & puis se prenant à braire fort hault, & à saul-

ter & regiber au long de luy . Sur quoy Marius fondant sa coniecture , disoit , que les Dieux luy signifioyent , qu'il se sauueroit plus tost par eau-que par terre , pource que l'asne au partir d'aupres de luy s'en estoit allé boire, sans se soucier de mager . Ayant dit ce propos à Fannia, il uoulut reposer, & cōmāda qu'on le laissast seul, & qu'on fermast la chambre sur luy : mais les officiers de la uille ayans bien consulté sur ce faict, furent en fin d'aduis, qu'il ne falloit point differer, ains le faire promptement mourir. Ceste resolution prise , il ne se trouua personne de ceux de la uille qui l'ozast aller executer , & y eut un hōme d'armes Gaulois ou Cimbre de nation (car l'un & l'autre se treuue par escript) qui sy en alla l'espee nue en la main . Or estoit l'endroit de la chambre, auquel Marius se repositoit, fort trouble & obscur , & dit on qu'il sembla à l'homme d'armes qu'il ueit sortir des yeux de Marius deux flammes ardentes, & entendit une uoix sortant de ce coing la tenebreux , qui luy
dit , Ozes tu bien, homme , uenir pour occire
Caius Marius ? Le Barbare ayant ouy ces paroles, s'en sortit incontinent de la chambre, iettāt son espee emmy la place, & criant ces mots seulement, Je ne sçauois tuer Caius Marius . Cela estonna premierement ceulx de la uille , puis apres les eueut à compassion , de sorte qu'ilz se blasmerent eulx mesmes , & se repentirent d'auoir pris une si cruelle resolutiō en leur cōseil,

& si ingrate à l'encontre d'un personnage qui auoit preserué toute l'Italie, auquel refuser secours en un si extreme besoing, estoit un grand
20 peché. Laissons le dôques aller (ce dirēt ils entre
30 eulx) là ou il uouldra, pour endurer ailleurs ce
30 que sa destinee luy apportera, & prions aux
20 Dieux qu'ilz nous pardōnent ceste offense, d'a-
20 uoir seulemēt ietté Marius indigēt & nud hors
20 de nostre uille. Pour ces considerations s'en al-
lerent les Minturniens tous à la foule là ou il e-
stoit, & l'enuironnerent en propos de le cōdui-
re & accōpagner à sauueté, iusques sur le bord
de la mer : & combien qu'ilz se hastassent de le
secourir de bonne affection, l'un d'une chose,
l'autre d'une autre, & qu'ilz feissent la meilleu-
re diligence qu'il leur estoit possible, si passa il
quelque espace de tēps, pource q̄ le bois de Ma-
rica qu'ilz appellēt, & qu'ils ont en singuliere re-
uerence, tellemēt qu'ilz obseruēt fort religieu-
sement de n'emporter rien de tout ce qui a une
fois esté porté dedans : Ce bosage, dis-ie, e-
stoit entre leur uille & la coste de la mer, &
leur empeschoit le droit chemin pour y aller, &
filz uouloyēt faire le circuit tout alētour, il fal-
loit beaucoup demourer : à raison dequoy cōme
ilz fussent en doubte, il y eut un des plus uieux
de la uille, qui dit tout haut, qu'il n'y auoit point
de chemin prohibé ny defendu à ceulx qui al-
loyent pour sauuer la uie à Marius, & luy mes-
me le premier, prenant quelqu'une des hardes

que lon portoit pour l'accommoder en la nauire, passa à trauers le bois. Et luy estant tout autre chose promptement fournie de pareille affection, mesmement la nauire que luy presta un nômé Belleus, il feit depuis peindre tout le discours de ceste histoire au lóg en un tableau, qu'il donna au temple dont il sortit quand il s'embarqua. Party qu'il fut, le uent, de bonne fortune, le porta en l'isle d'Enarie, là ou il trouua Granius & quelques autres de ses amis, avec lesquelz il se remeit à la uoile prenant la route de l'Afrique: mais ayans faulte d'eau, ilz furent contrains d'aborder en la Sicile au territoire de la uille d'Erix, là ou d'aduenture se trouua un Questeur Romain qui gardoit celle coste, & s'en fallut bien peu qu'il ne prist Marius mesme qui estoit descendu en terre, car il rua seize de ses gés qui estoýét sortis avec luy pour prendre de l'eau: parquoy Marius se partant de là à grande haste, trauersa la mer, tant qu'il arriua en l'isle de Menynge, là ou il entendit premiere-ment, que son filz s'estoit sauué avec Cethegus, & qu'ilz s'en estoýent allez ensemble deuers le Roy des Numides Hiempfal, le supplier de leur uouloir estre en aide: cela luy feit reprendre un peu de courage, & luy donna hardiesse de passer de celle isle en la coste de Carthage. Or estoit lors gouuerneur de l'Afrique un Præteur Romain nommé Sextilius, auquel Marius n'auoit iamais fait ne mal ne bien, & à

ceste cause esperoit , que par pitié seulement il
luy pourroit faire quelque secours : mais il ne
fut pas plustost descendu en terre avec peu de
ses gens, qu'il luy uint audeuant un sergent , le-
quel s'adressant à luy mesme luy dit , Sextilius
Præteur & gouuerneur de la Libye te defend
de mettre le pied en toute sa prouince , autre-
ment il te declare qu'il obeïra aux mandemens
du Senat, & te poursuyura comme ennemy du
peuple Romain. Marius ayant ouy ceste defen-
se eut le cueur si serré de courroux & de dou-
leur, qu'il ne sceut que respondre promptemēt,
& demoura une espace de temps sans dire mot,
regardant le sergent de mauuais œil , iusques à
ce qu'il luy demanda qu'il uouloit respondre à
la defense du Præteur : & alors Marius luy re-
spondit avec un soupir trenchant , tiré du pro-
fond du cueur , Tu diras à Sextilius , que tu as
ueu Caius Marius banny de son païs, assis entre
les ruines de la uille de Carthage . par laquelle
responſe il mettoit sagemēt au deuant des yeux
de ce Sextilius , l'exemple de la ruine de celle
puissante cité, & la mutation de sa fortune, pour
l'aduertir qu'il luy en pouuoit bien autant ad-
uenir. Ce pēdant Hiempſal Roy des Numides,
ne sachant à quoy se refoudre, faisoit bien hon-
neur & bon traitement au ieune Marius , & à
ceulx de sa compagnie, mais quand ilz s'en uou-
loyent aller , il controuuoit tousiours quelque
nouuelle occasion pour les retenir, & estoit aisē

à uoir qu'il ne reculoit point ainſi pour occaſion quelconque qui fuſt bõne : toutefois il aduint une choſe qui leur ſeruit à eux ſauuer: C'eſt que le ieune Marius eſtant beau de uiſage, feit pitié à l'une des cõcubines de ce Roy, le uoyant en tel eſtat. Ceſte pitié fut un commencement & une couuerture de l'amour qu'elle luy portoit : mais le ieune homme à ſes premieres approches ne uouloit point entendre à elle, & la reboutoit : toutefois à la fin uoyãt qu'il n'auoit point d'autre moyen d'eſchapper de là, & conſiderant qu'elle faiſoit toutes choſes à leur auantage plus diligemment & plus affectueuſement qu'elle n'eũt fait, ſi elle n'eũt rendu à autre fin qu'à iouir ſeulement de ſon plaifir, il commença à la fin à accepter ſes careſſes, tant que finalement elle luy donna moyen de ſ'en fouir & de ſe ſauuer luy & ſes amis. Si ſe retira deuers ſon pere, & apres qu'ilz ſe furent entr'embraſſez & ſaluez, en cheminant le long de la marine ilz rencontrerent deux Scorpions, qui ſe combatoyent l'un contre l'autre. Cela ſembla un mauuais preſage à Marius, à l'occaſion dequoy ilz monterent uiſtement ſur un batteau de peſcheur, & paſſerent en l'isle de Cercina, qui n'eſt gueres diſtante de la coſte de terre ferme. Ilz n'eurent pas plus toſt leuë l'ancre qu'ilz apperçurēt des gens de cheual que le Roy Hiempſal auoit enuoyez au lieu dont ilz eſtoient partiz, & fut celuy là l'un des plus grandz dâgers qu'il

eust point eschappez. Ce pēdant on auoit nou^uelles à Rome cōme Sylla faisoit la guerre contre le lieutenant de Mithridates au païs de la Bœoce, & à Rome les Cōsuls estās entrez en dissension l'un cōtre l'autre, iusques à prendre ouuertemēt les armes, Octavius y auoit gaigné la bataille, & estāt demouré le plus fort auoit chassé Cinna, lequel taschoit à usurper une domination tyrānique, & au lieu de luy auoit esté substitué Cōsul Cornelius Merula: de l'autre costé Cinna amassoit gens du reste de l'Italie, & faisoit la guerre à ceulx qui estoient en la uille. Dequoy Marius estant aduerty, fut d'aduis de s'en retourner au plus tost qu'il seroit possible en Italie, & assemblant quelques gēs de cheual de la natiō des Maurusiēs en Afrique, & quelques Italiēs qui festoyent sauuez là, iusques au nombre de mille hōmes en tout, il monta sur mer & uint aborder en un port de la Thoscane, qui se nomme Telamon, là ou si tost qu'il fut descendu en terre, il feit publier à son de trompe, qu'il dōneroit liberté aux esclau^es, qui se uiendroyēt rendre à luy. Dauantage les laboureurs, bergers & pasteurs de toute celle marche, pour la reputation du nom de Marius, accoururent de toutes parts uers la marine, dont il choisit les plus roides & les mieulx dispos, & les gaigna par belles parolles, de maniere qu'ē peu de iours en ayant mis ensemble une bonne troupe, il en chargea quarāte nauires. Au demourant sachāt

que Octavius estoit un grand homme de bien, qui ne uouloit auoir d'autorité sinon tant que les loix & la raison luy en donnoyent: & au contraire, que Cinna estoit suspect à Sylla, & qu'il combattoit pour remuer & faire des innouations en l'estat de la chose publique, il resolut de s'aller ioindre à luy avec ses forces. Si enuoya premierement deuers luy pour luy faire entendre qu'il luy obeïroit comme au Consul, & feroit tout ce qui luy seroit enioinct & commandé par luy. Cinna le receut, & luy donna tiltre & autorité de Viceconsul, luy enuoyant des sergens pour porter les haches & les uerges deuant luy avec toutes autres enseignes d'autorité publique. Ce que Marius ne uolut point accepter, disant que ces ornemens la n'estoyent point conuenables à la misere de sa fortune, ains se uestit tousiours d'une pauvre meschante robbe, & laissa croistre ses cheueux depuis qu'il fut banny, estât aagé de plus de soixante & dix ans, cheminât lentement & pesamment pour faire plus de compassion à ceulx qui le uoyoyent: mais parmy toute celle pitoyable apparence, il retenoit neantmoins tousiours lenaturel de son regard & de son uisage, qui estoit plus effroyable & terrible qu'autrement: & ce qu'il parloit peu, & qu'il s'en alloit triste, morne & pensif, monstroït plus tost un courage enuenimé au dedans, que non pas humilié par son bânissement. Apres dōques auoir salué

Cinna & parlé aux foudards, il commença incontinēt à mettre la main à l'œuure, là ou il feit en peu de iours un grand chāgement aux affaires: car premierement en trenchant les uiures par mē avec ses uaisseaux, & pillant les marchands qui portoyent bledz & autres uiures à Rome, il fut en peu de temps maistre des prouisiōs necessaires pour uiure: puis il alla le long de la coste prenant toutes les uilles maritimes, tant que finablement il prit iusques à celle d'Hofie par trahison, là ou il tua la plus part de ceulx qui estoient dedans, & pilla leurs biens: puis faisant un pont sur la riuiera du Tibre, il osta entierement à ses ennemis l'esperance & le moyen d'auoir aucunes prouisions par la mer. Cela fait, il tira droit uers la uille avec son armee, là ou il se saisit premierement du mōt que lon appelle Ianiculum, par la faulte d'Octauius, lequel ruina ses affaires non tant par faute d'entendre ce que le besoing de la guerre requeroit, comme par une importune bonté & iustice de uouloir trop exactement obseruer les droits contre l'utilité: car comme plusieurs l'admonestassent de proposer liberté aux esclaués pour leur faire prédre les armes à la defense de la chose publique, il respondit qu'il ne donneroit iamais loy ny priuilege de bourgeoisie Romaine aux esclaués, de laquelle il deboutoit Caius Marius pour maintenir l'autorité des loix. Mais estant arriué à Rome Cecilius Metellus,

rellus, filz de celuy Metellus Numidicus, qui ayant commencé la guerre en la Libye contre Iugurtha en fut debouté par Marius, les gens de guerre abandonnerent incontinent Octavius, & se rengerent à luy, pource qu'il leur sembla mieulx entendant la charge de Capitaine, uou-lans auoir un Chef qui leur sceust bien commander pour sauuer la uille & la chose publique: car ilz promettoient de combattre uaillamment, & fasseroient qu'ilz uiendroyent au dessus des ennemis, pourueu qu'ilz eussent un Capitaine hōme d'execution qui les sceust bien mettre en besongne. Metellus ne trouua pas cela bon, & leur commanda en courroux qu'ilz s'en retournassent au Consul: & eux, par despit, s'en allerent rendre aux ennemis. Metellus aussi uoyant qu'il y auoit mauuais ordre en la uille pour faire teste aux ennemis, en sortit: mais Octavius à la persuation de quelques deuins & de quelques sacrificateurs Chaldæiens, qui luy promettoient que toutes choses iroyent bien pour luy, demoura dedans Rome. Car ce personnage la estant au reste d'aussi bon entendement que nul autre Romain de son temps, & qui maintenoit la dignité Cōsulaire en son entier, sans se laisser gaigner par flatteries, suyuant les ordonnances & coustumes anciennes comme un formulaire immuable, sans en omettre ny trespasser un seul poinct, me semble auoir eu ceste imperfection, qu'il hantoit plus

souuent avec des deuins, pronostiqueurs, & diseurs de bonne aduventure, que non pas avec gens entendus au faict des armes & de gouuernement: au moyen dequoy auât mesme que Marius entraist dedás la uille, il fut tiré à force hors de la tribune aux harengues, & tué sur la place par aucuns satellites que Marius enuoya deuant. Encore dit on que quand il fut tué on luy trouua en son seing une figure de diuination Chaldaïque: en quoy fait à noter une grande contrarieté: c'est que de ces deux grands personnages, l'un, à sçauoir Marius, s'est soustenu & remis sus pour n'auoir point mesprisé l'art de deuiner: & l'autre, Octavius, s'est perdu & ruiné pour s'y estre fié. Estans donques les affaires de Rome en tel estat, le Senat s'assemblant enuoya des ambassadeurs deuers Cinna & deuers Marius, les requerant qu'ilz uoulussent entrer en la uille pacifiquement, sans souiller leurs mains du sang de leurs citoyens. Cinna seant en son siege, comme Consul, leur donna audience, & leur feit assez douce & humaine responce, & Marius estoit aupres tout debout, qui ne disoit mot: mais il monstroit bien à l'austerité de son uisage & à la fierté de son regard, qu'il empliroit incontinent la uille de meurtre & de sang: au partir de laquelle audience, Cinna entra dedans Rome bien accompagné & enuironné de gens de guerre: mais Marius sarresta tout court à la porte, disant par une maniere de moc

querie meslée de courroux, qu'il estoit banny;
& qu'il auoit iudiciellement, & suyuant la forme des loix esté chassé de son païs: parquoy si lon uouloit qu'il y r'entrast, qu'il falloit que par un cōtraire decret on abolist le premier de son bannissement, comme s'il eust esté quelque religieux obseruateur des loix, & comme si la liberté eust alors eu lieu dedans Rome. Si feit assembler le peuple sur la place pour proceder à l'enterinemēt de son rappel: mais auāt que trois ou quatre des liguees eussent donné leurs uoix, leuant le masque, & ostant toute ceste feinte de faire à croire qu'il uouloit estre legitimement rappellé de son exil, il entra dedās ayant autour de luy pour ses satellites une trouppe des plus dissolus & plus audacieux esclaués, qui s'estoyēt uenuz rēdre à luy, qu'il appelloit les Bardiāiēs, lesquelz à une seule parole qu'il leur disoit, ou à un seul clin d'œil, ou signe de la teste qu'il leur faisoit, tuoyent beaucoup de gens par son commandement, iusques à tant qu'ilz occirent à coups d'espee aux pieds de Marius un Sénateur nōmé Ancharius, lequel auoit esté Præteur, pource que Marius ne le resalua pas quād il uint un iour parler à luy: depuis lequel meurtre ilz continuerent à occire aussi tous ceulx à qui Marius ne rédoit point de salut, & ausquelz il ne respondoit point: car c'estoit le signe qu'il leur auoit baillé pour les tuer, uoire en pleine rue deuant tout le monde, de maniere que

ses amis mesmes estoient en grande frayeur toutes les fois qu'ilz s'approchoyēt de luy pour le saluer. Ainsi ayant esté ia tué grand nombre de gens, Cinna à la fin commença à s'en souler & à appaiser son courroux : mais celuy de Marius falloit tous les iours aigrissant & enflam-mant de plus en plus, & luy croissoit la soif de se uenger, tellement qu'il n'espargnoit per-sonne quelconque de ceux qu'il auoit tant soit peu en souspeçon, & n'y auoit ne uille ne grād che-min qui ne fust pleine de chasseurs & d'espieurs qui alloient cherchans & poursuyuans ceulx qui se cachoyent ou qui s'esfuyoyent. Là ou lon cogneut bien par experience qu'il n'y a foy d'a-mitié ny d'hospitalité asseuree, ny en qui lon se doye fier, quand on a la fortune contraire : car il se trouua bien peu d'hostes & d'amis qui ne trahissent & ne decelassent leurs hostes & leurs amis, qui fussent recourus à eulx. A raison de- quoy, de tant plus sont à louer les seruiteurs de Cornutus, lesquelz ayans caché secrettement leur maistre en sa maison, pendirēt par le col le corps mort de quelque hōme populaire, & luy ayans mis au doigt un anneau d'or, le monstre-rēt aux satellites de Marius, & l'enseuelissans ne plus ne moins que si c'eust esté leur propre mai-istre, l'inhumerēt sans que personne se doubtaſt que ce fust une feincte : & ainsi Cornutus recelé par ses seruiteurs se retira à sauueté au païs de la Gaule. Marcus Antonius l'orateur auoit bien

aussi trouué un fidele amy, toutefois il y fut malheureux. Ce fidele amy estoit un pauvre hōme populaire, lequel ayāt receu en sa maison l'un des principaux personnages de Rome pour le cacher, & luy uoulāt faire la meilleure chere qu'il pouuoit de ce peu qu'il auoit, enuoya un sien ualet en une tauerne prochaine de son logis querir du uin, & comme le ualet tastast & goustast le uin plus songneusement qu'il n'auoit accoustumé, & en demanda de meilleur, le tauernier luy demanda pourquoy il n'en prenoit du nouveau & du commun, ains en uouloit du meilleur & du plus cler: le ualet luy respondit simplement comme à son familier & amy, que son maistre festoyoit Marcus Antonius, lequel s'estoit allé cacher en son logis. Le ualet n'eut pas plustost le dos tourné, que le tauernier traistre, malheureux & meschant, s'en alla courant chez Marius, lequel estoit desia à table, ou il souppoit. On le feit parler à luy, & il luy promet de luy liurer Antonius entre ses mains: quoy entendant Marius, en fut si aise qu'il s'escria tout hault, & frappa des mains l'une contre l'autre, tant il fut ioyeux, & s'en fallut bien peu qu'il ne se leuast de table pour aller luy mesme en personne iusques sur le lieu, & l'eust fait si ses amis ne l'eussent retenu: mais il y enuoya un de ses Capitaines nommé Annius avec quelque nōbre de soudards, ausquelz il cōmanda qu'ilz luy en apportassent tout prom-

ptement la teste : ilz y allerēt, & quād ilz furent arriuez au logis ou le tauernier les guida , Annius demoura à l'huis, & les soudards monterent en la chambre haulte par les degrez , & là trouuans Antonius se prirent à encourager l'un l'autre de le tuer , n'ayant personne d'eulx le cuer d'y mettre le premier la main, pource que le langage d'Antonius estoit une si doulce Sirene, & auoit une si bonne grace en son parler, que quand il commença à les prescher, & à les prier qu'ilz luy uoulussent sauuer la uie, il n'y eut celuy d'eux qui eust le cuer si dur, que de luy toucher ny de le regarder seulement au uisage, ains tenans tous les yeux contre bas, se prirent à plorer: parquoy Annius uoyant qu'ilz demouroient tant à retourner, monta luy mesme en la chambre, ou il trouua Antonius preschant ses soudards, & eulx tous esblouis & attêdri par la doulceur de son eloquēce: si leur dit à to⁹ uillanie, & luy courāt sus luy mesme en fureur, luy couppa la teste de sa propre main. Semblablement aussi Catulus Luctatius, celuy qui auoit esté Consul avec Marius, & qui auoit triumphe des Cimbres quand & luy, se uoyant en ce peril, meit des gens apres pour interceder & prier pour luy, ausquelz Marius, ne feit jamais autre responce, sinon: Il fault qu'il meure. Parquoy il s'enferma en une petite chambre, là ou il feit allumer beaucoup de charbō, & avec la uapeur d'iceluy festouffa. Or

après que les testes estoient coupees on iettoit les corps tous nuds emmy les rues & les fouloit on aux pieds : ce qui ne faisoit pas pitié seulement, ains frayeur & horreur à ceulx qui les regardoyent. Mais apres tout, encore n'y auoit il rien qui tant despleust & greuast au peuple, que l'oultrageuse & dissolue luxure & insolence de ces satellites, que lon appelloit Bardiaxiens, lesquels entrans à force dedans les maisons, apres en auoir tué les maistres, uioloyét leurs ieunes enfans, & prenoyent à force les femmes & maistresses, sans qu'il y eust personne qui reprimast leur cruaulté, luxure & auarice insatiable, iusques à ce que Cinna & Sertorius à la fin leur coururent sus, ainsi cōme ilz dormoyét en leur camp, & les defeirent tous. Mais sur ces entre-faittes, comme si la châce tout à un coup se fust tournee, nouuelles uindrent de tous costez à Rome, que Sylla ayant mis fin à la guerre contre le Roy Mithridates, & recouuré les prouinces qu'il auoit usurpees, s'en retournoit en Italie avec une trefgrosse puissâce. Ce qui feit surseoir & cesser un petit ces maulx & miseres si grâdes qu'il n'est possible de les exprimer, pour ce q̄ ceulx qui les faisoýét, s'attendirét biē qu'ilz auroyét incōtinēt la guerre sur les bras. A l'occasion dequoy Marius fut eleu Consul pour la septieme fois : & sortant de son logis en public le premier iour de Ianuier, qui est le commencement de l'annee, pour prēdre possession

de son Consulat, il feit precipiter du hault en bas du roc Tarpeïen un Sextus Lucinus, ce qui semble auoir esté un grand signe & certain presage des maulx & miseres qui aduindrent puis apres l'annee mesme à ceulx de leur party, & à toute la uille aussi. Mais luy ayant ia le corps tout rôpu des trauaux passez, & l'esprit surchargé & accablé d'ennuy & de soucy, ne se peult à ce dernier besoing ressourdre ny plus esuertuer, quand il uint à penser au discours de ceste nouvelle guerre, qui le menaçoit, & aux dangers, aux peines & trauaux, ou il luy conuenoit entrer plus grans & plus grieus que iamais: car par l'experiéce qu'il auoit de la guerre, il trembloit de frayeur quand il se mettoit à y penser, cōsiderant qu'il auroit à combattre, non un Octauius, ny un Merula Capitaines d'une tourbe seditieuse de gēs ramassez, ains à un Sylla, qui estoit celuy qui l'auoit parauāt chassé de son pais, & qui uenoit de rembarrer le puissant Roy Mithridates iusques au fond du Royaume de Pont & de la mer Euxine. Ainsi ployant soubz le faix de telles considerations, mesmement quand il se ramenoit deuant les yeux le long temps qu'il auoit esté bāny, uagabond & errant ça & là par le monde, les grandes fortunes qu'il auoit passees, & les dāgers ou il auoit esté tant de fois, estāt poursuyuy & par mer & par terre, il se trouuoit en merueilleuse destresse & angoisse d'esprit qui luy causoyēt une inquietude telle, qu'il

ne pouuoit reposer la nuit, ou sil s'endormoit, il luy uenoit des songes turbulents en la fantasie, & luy estoit aduis qu'il oyoit une uoix qui tous iours luy cornoit à l'oreille,

22 Du fier lion le giste espouuentable,

22 Quoy qu'il n'y soit, est tousiours redoutable.

Et sur tout craignant encore plus le non pouoir reposer & dormir, il se meit à faire des banquets importuns, & à boire oultre ce que son aage ne comportoit, taschant à gagner le sommeil par ces moyens la, pour euitier le soucy : mais à la fin il arriua quelqu'un uenât de la mer, qui luy donna certain aduertissement de tout : ce qui luy fut comme une surcharge de nouvelle frayeur. Ainsi estant desia extremement affligé, partie pour la crainte de l'aduenir, & partie pour le faix & le comble du malheur present, il luy fallut bien peu de rengregemēt pour le faire tumber en la maladie dont il mourut, qui fut une pleuresie, ainsi comme escrit le philosophe Posidonius, lequel dit notamment qu'il entra en sa chambre ainsi qu'il estoit desia malade, & parla à luy des affaires, pour lesquelz il estoit uenu en ambassade à Rome. Toutefois un autre historien Caius Piso escrit, qu'un iour apres soupper Marius se promenant avec ses amis, entra en propos de ses aduentures, commençant des le commencement de sa uie, & qu'il leur compta tout du long, combien de fois la fortune s'estoit tournée & pour & contre luy,

concluant à la fin, que ce ne seroit pas fait en sage homme de se plus fier en elle. Apres lequel discours acheué il prit congé d'eulx, & se meit au lict, ou il fut sept iours entiers malade, au bout desquelz il mourut. Il y en a qui mettent que son ambition se descouurit fort euidement par une estrange resuerie qui luy monta au cerueau durant ceste maladie: car il luy fut aduis qu'il faisoit la guerre à Mithridates, & representoit en son lict tous les mesmes gestes & les mesmes mouuemens de la personne, comme sil eust esté en une bataille, criant à pleine teste les mesmes cris qu'il souloit crier, quand il estoit au plus fort d'un faict d'armes: tant il auoit l'affection & l'enuie de ceste charge profondement emprinse en son entendement, pour l'ambition extreme & la ialousie, dont il estoit espris si excessiuelement, qu'en l'age de soixante & dix ans, apres auoir esté le premier qui fut onques à Rome par sept fois eleu Consul, & apres auoir amassé des richesses & des biens qui eussent peu suffire à plusieurs Roys ensemble, encore neantmoins mouroit il à regret, se plaignant & lamentant de sa fortune, comme sil fust mort auant terme, premier que d'acheuer & accomplir ce qu'il auoit desiré. C'est bien au contraire de ce que le sage Platon feit quand il approcha de son trespas: car il loua & remercia le Dieu de sa fatale destinee, & sa bonne fortune, de ce que premieremēt il auoit

esté homme raisonnable, & non pas beste brute, & puis Grec, non pas Barbare, & oultre tout cela, de ce que sa naissance s'estoit rencontrée au temps de Socrates. Semblablement aussi dit on qu'Antipater natif de la uille de Tarse, un peu auât que mourir, rappelant en sa memoire les heurs qu'il auoit euz en sa uie, n'oublia pas à compter entre les autres choses, l'heureuse nauigation qu'il auoit eue à uenir de son païs à Athenes: ce qui tesmoignoît qu'il mettoit en ligne de compte pour une grande grace toute faueur de la fortune, & qu'il la conseruoit en perpetuelle memoire, cōme en celle qui est le plus assésuré trefor que l'homme sçauroit auoir pour garder les biens que la nature ou la fortune luy donnent. Mais à l'opposite les folz ingrats enuers Dieu & nature laissent avec le tēps escouler la memoire de leurs prosperitez passées, & ne retenans rien ny le conseruans en perpetuelle memoire, demeurēt tousiours uides de biens & pleins d'esperance, haletans tousiours apres l'aduenir, & laissant ce pendant aller le present: combien que la raison uoudroit qu'ilz feissent plustost au contraire, pource que la fortune leur peut bien empescher l'aduenir, & ne leur peult oster le passé, & neantmoins ilz iettent & chassent hors de leur memoire ce benefice certain de la fortune, comme s'il ne leur appartenoit plus en rien, & uont tousiours resuât apres ce qui est incertain: ce qui ne leur aduient

pas sans raison, pour autant que ferrans & amassans des biens extérieurs, auant que d'auoir basty un bon fondement & un ferme soubastement de raison par bonne doctrine, ilz ne peuvent puis apres assouuir ne remplir la conuoitise insatiable de leur ame. Ainsi donques trespassa Marius le dixseptieme iour de son septieme Consulat, dequoy toute la uille de Rome sur l'heure fut bien aise, & reprit un peu de cueur, cuidât bien estre deliuree d'une sanglante & cruelle tyrannie : mais peu de iours apres ilz cogneurent, à leurs despens, qu'ilz auoyent chagé un uieil maistre qui s'en alloit de ce monde, à un ieune qui ne faisoit que uenir, tant son filz le ieune Marius feit de cruaultez & d'inhumanitez depuis la mort de son pere, faisant mourir tous les plus apparents & plus notables personnages de la uille. On le teint du commencement pour homme aduenteux & hardy, à l'occasion dequoy on le surnōma Filz de Mars : mais bien tost apres ses effects monstrent bien le contraire : tellement qu'il en fut surnommé Filz de Venus. A la fin il fut enfermé & assiegé par Sylla dedans la uille de Peruse, ou il feit tout ce qu'il peut pour cuider sauuer sa uie, mais ce fut en uain : & finablement uoyant qu'il n'y auoit ordre ny moyen aucun d'eschapper, la uille s'en allant prise, il se tua luy mesme de sa propre main.



LYSANDER.

Ly a au tresor des Acanthiës, qui est au temple de Apollo en la uille de Delphes, une telle inscriptiõ: Brasidas & les Acanthiës de la despouille des Atheniens: cela fait q̃ plusieurs estiment que l'image de pierre qui est pres de la porte au dedans de la châtre, soit l'image de Brasidas: mais c'est l'image de Lysander faite au naturel, ayât une grosse perruque, & la barbe fort espesse & fort lōgue, à la façon des anciens. Car ce que aucuns disent, que les Argiens apres auoir esté desconfits & desfaits en une grosse bataille, se feirent rous raire, en demonstration & signe de ducil publique, & au contraire que les Lacedæmoniens pour tesmoigner & monstrier l'aise de leur uictoire laisserēt croistre leurs cheueux, cela n'est pas ueritable, non plus que ce que d'autres alleguent, que les Bacchiades s'en estans fouis de

Corinthe en Lacedæmone, les Lacedæmonienſ les trouuerent ſi laids & ſi difformes, pource qu'ilz auoyent les teſtes toutes rafeſ, que cela leur feit uenir enuie de laiſſer croiſtre leurs barbes & leurs cheueux: car cela eſt une des ordonnances de Lycurgus, lequel diſoit que la perraque rend ceulx qui ſont naturellement beaux, plus agreables à uoir, & lès laids, plus eſpouuentables à regarder. Au demourant lon dit que Ariſtoclitus pere de Lyſander n'eſtoit pas de la maiſon des Roys de Sparte, combien qu'il fuſt de la race des Heraclides: mais ſon filz Lyſander fut nourry en fort eſtroitte pauureté ſe rendant obeïſſant aux ſtatuts & ordonnances du païs autant que nul autre, en ſe mōſtrant ferme de cuer à l'encontre de toutes delices & de toute uolupté, ſinon de celle qui procede de l'honneur que lon fait à ceulx qui ſont bien: car lon ne tient pas pour choſe deſhoneſte ny mauuaïſe à Sparte, que les ieunes hommes ſe laiſſent uaincre à ce plaïſir la, pource qu'ilz ueulēt que leurs enfans des leur premiere ieuneſſe, commencent à ſentir les aguillons de la gloire, prenans plaïſir d'eſtre louez, & ayans regret de ſe ſentir blaſmez: car ilz ne font compte de celuy qui ne ſe paſſionne point ny de l'un ny de l'autre, ains le tienent pour homme de uil & laſche cuer, qui n'a pas uolunté de bien faire. Ainſi fault il penſer que l'ambition & l'oſtination qui eſtoit en Lyſander luy procedoit de

la discipline & nourriture Laconique, & n'en doibt on point trop accuser son naturel : bien est il uray qu'il estoit de sa nature homme cour-
tifan qui sçauoit entretenir & flatter les grands & puissans plus que ne portoit l'ordinaire des naturelz Spartiates, & si estoit patient à supporter aiseement l'arrogance de ceulx qui auoyent plus de puissance & d'autorité que luy quand il en uenoit du profit, ce que aucuns estiment estre une grande partie de la science de bien sçauoir manier affaires d'estat. Aristote en un lieu ou il dit que les grandes natures sont ordinairement subiectes à la melancholie, comme celle de Socrates, de Platon & de Hercules, escript que Lysander aussi, non pas du commencement, mais sur sa uieillesse tumba en la maladie de melancholie : mais bien a il eu ceste qualité propre & peculièrre à luy entre toutes autres, que s'estant tousiours porté treshonestement en sa pauureté, sans iamais auoir esté uaincu ne corrompu par or ny par argent, il emplit neantmoins son païs de richesse & de conuoitise d'auoir, & luy feit perdre la bonne reputation qu'il auoit pour n'estimer point la richesse ny l'auoir, en y introduisant quantité grande d'or & d'argent apres auoir uaincu & dompté les Atheniens, sans que toutefois il en reteinst pour soy une seule drachme. Suyuant lequel propos, comme Dionysius le tyran de Syracuse eust un iour enuoyé à ses

filles des robbes de la Sicile fort belles & fort riches, il ne les uoluit pas receuoir, disant qu'il auoit peur que telles robes ne les feissent trouuer plus laides : toutefois peu de temps apres luy mesme estant enuoyé de son pais ambassadeur uers le mesme tyran, comme il luy eust enuoyé deux robes, luy mandant qu'il en choisist, laquelle il uoudroit pour la porter à sa fille, il respōdit qu'elle mesme sçauroit mieulx choisir laquelle luy seroit la plus propre, & les emporta toutes deux. Mais pour uenir à ses faicts d'armes, la guerre Peloponesiaque alloit en grande longueur, pource que depuis la desfaitte de l'armee que les Atheniens auoyent enuoyee en la Sicile, lors que lon pensoit qu'ilz eussent entierement perdu toute la domination de la mer, & que consequemment ilz deussent bien tost apres donner de tout poinct en terre, Alcibiades retournant de son exil au maniement des affaires y feit une tresgrande mutation : car il rendit les Atheniens de rechef aussi forts par mer que les Lacedæmoniens, lesquels à ceste cause rentrerēt en nouuelle peur, & recommencerēt à entendre de rechef à bon esciant au faict de ceste guerre, uoyans qu'ilz auoyent besoing de plus grande puissance & de plus suffisant Capitaine que iamais. Si y enuoyerent Lyfander pour Admiral, lequel arriuant en la uille d'Ephese, la trouua fort bien affectionnee enuers luy, & fauorisant de uolunté tres-

te tres affectueusement au party des Lacedemoniens : mais au demourant fort pauvre, mal accoustree, & bien pres de prendre totalement les meurs & façons barbares des Perse, pour la grande frequentation qu'ilz y auoyent, attendu que le pais de la Lydie l'environne tout à l'entour, & que les Capitaines du Roy de Perse n'en bougeoient le plus du temps : parquoy y ayant assis son camp, il y attira de toutes parts des nauires marchands, & y dressa un arsenal ou attelier à bastir galeres, de maniere qu'en peu de temps il remeit leurs ports en ualeur par la frequentation des marchands qui recommencerent à les hanter, & leur place & estappe par le traffic de la marchandise, & remplit les maisons particulieres & les gens de mestier de manufactures & de moyens de gagner, tellement que depuis ce temps la elle s'achemina en l'esperance de paruenir à celle grandeur & magnificence ou nous la uoyons maintenant. Au reste estant Lysander aduertty comme Cyrus l'un des enfans du grand Roy de Perse estoit arriué en la uille de Sardis, il s'y en alla pour parler à luy, & se plaindre de Tisaphernes, lequel ayant commandement du Roy de secourir les Lacedæmoniens, & les aider à debouter les Atheniens, & les chasser hors de la marine, sembloit aller trop laschement & froidement en besongne pour la faueur qu'il portoit à Alcibiades : car en fournissant argent escharse-

ment, il estoit cause que toute leur armee de-
 mer s'en alloit en ruine. Cyrus de son costé es-
 toit bien aise qu'il y eust des plaintes de Tisa-
 phernes, & que lon parlast contre luy, pource
 qu'il estoit meschant, & aussi pource qu'il auoit
 quelque particulier differét avec luy: au moyen
 dequoy il aima fort Lysander tant pour ces do-
 leances qu'il proposoit à l'encontre de Tisapher-
 nes, comme aussi pour le plaisir qu'il luy don-
 noit de sa conuersation, à cause qu'il estoit hom-
 me qui sçauoit fort bien complaire & faire la
 cour aux grands: par lesquelz moyens ayant gai-
 gné la bonne grace de ce ieune prince, il le soli-
 cita & encouragea fort à poursuyure ceste guer-
 re. Et comme il fut prest à se departir d'avec
 luy, Cyrus luy feit un festin, apres lequel il le
 pria de ne refuser point l'offre de sa liberalité,
 c'estoit qu'il luy demandast franchement tout
 ce qu'il uoudroit, l'asseyurant qu'il ne seroit es-
 conduit de chose quelcōque. À quoy Lysander
 luy respondit: Puis que ie uoy que tu as si bon-

^a Obole ne uolunté enuers nous, ie te prie, Cyrus, & te
 estoit une conseilie que tu augmentes la paye ordinaire de
 petite pie noz mariniers d'une ^a obole par iour, à fin que
 ce d'ar- au lieu de trois oboles qu'ilz reçoient mainte-
 gent, qui nant, ilz en reçoient doreseuauât quatre. Cy-
 pouoit rus fut bien aise d'entendre ceste largesse que
 ualoi ren- uouloit faire Lysander, & luy feit deliurer dix
 uirō. sept mille Dariques, par le moyen desquelz il adiou-
 deniers sta une obole de plus à la soude ordinaire des
 de nostre mōnoye.

mariniers. Ceste liberalité feit qu'en peu de temps les galeres des ennemis demourerent uides, pource que la plus part des galiots & mattelots se retira là ou on leur donnoit dauantage, & encore ceulx qui demourerent, deuindrent paresseux, descouragez & seditieux, faisant tous les iours beaucoup de peine à leurs superieurs & Capitaines: mais tourefois combien que Lysander eust ainsi soubstraiect les hommes à ses ennemis, & leur eust fait un tel dommage, si n'ozoit il encore uenir à la bataille nauale, redoubtant la ualeur d'Alcibiades, qui estoit homme d'execution, ayant plus grand nombre de uaisseaux que luy, & qui iusques à ce iour la n'auoit iamais esté uaincu ny par terre ny par mer, en bataille quelconque ou il eust esté Chef. Mais il aduint qu'il passa de l'isle de Samos en la uille de Phocce, qui est en la terre ferme uis à uis, laissant la charge & superintendence de toute la flotte de ses uaisseaux en son absence, à son pilote nommé Antiochus, lequel faisant du hardy, par une maniere de mocquerie & de mespris de Lysander, s'en alla iusques dedans le port des Ephesiens avec deux galeres seulement, & passa audacieusement & superbemēt tout au long de l'arcenal où estoient leurs uaisseaux en chantier, avec grandes rises & grand bruit. Cela irrita Lysander, de maniere qu'il feit premieremēt deualer en mer quelque nombre de galeres, avec lesquelles il luy

donna la chasse: mais uoyant que les autres Capitaines Atheniens uenoyent à la file au secours, il en feit armer encore d'autres, tellement que se renforceans ainsi d'un costé & d'autre, petit à petit ilz uindrent à la bataille entiere: laquelle Lysander gaigna, & ayant pris quinze galeres sur ses ennemis, en dressa un trophée en signe de uictoire. Le peuple d'Athenes ouye la nouuelle de ceste desfaite, en fut si aigrement courroucé contre Alcibiades, qu'il le deposa promptement de sa charge: & les gens de guerre semblablement, qui estoient au camp à Samos l'en desestimerent, & commencerent à parler mal de luy: à l'occasion dequoy il se retira du camp, & s'en alla au païs de la Cherronese en Thrace. Ceste bataille fut de plus grand renom que de grand effect, pour la reputation d'Alcibiades: & au demourant, Lysander faisant uenir deuers luy en Ephese ceulx qu'il uoyoit en chasque uille plus hardis & de cueur plus grand & plus eleué que le commun des autres citoyens, alloit bastissant les fondemens de grandes mutations & grandes nouuelletez, qu'il establit depuis es gouuernemēs des citez, admonestant ces particuliers & les sollicitant de faire des ligues entre eulx, de gaigner amis, & faire des menées pour auoir les affaires de leurs uilles en main, leur promettant que si tost que les Atheniens seroyent desfaicts, eulx aussi seroyent deliurez de la subiection de leurs

peuples, & auroyent chacun en son païs l'autorité souueraine : ce qu'il leur confirmoit, & en faisoit preuue à chacun d'eulx par effect, par ce qu'il auançoit à tous honneurs, charges & preeminences es affaires tous ceulx qui de longue main estoient ses hostes & ses amis, ne se souciant point de faire contre le droit & contre la raison, prouueu que cela seruiſt à leur auancement, tellement que pour ces occasions chacun se rengoit de son costé, chacun le desiroit, & cherchoit à luy gratifier & complaire, sous l'esperance qu'il n'y auoit chose si grande, qu'ilz ne fasseraſſent de l'obtenir de luy quand il auroit le maniement des affaires en main. Pourtant ne ueirent ilz pas uoluntiers Callicratidas à son arriuee, quand il uint pour luy succeder en l'office d'Admiral, ny depuis aussi quand ilz eurent cogneu par experience, que c'estoit l'un des plus droits, des plus iustes & plus hommes de bien du monde, ny n'eurent pour agreable sa maniere de gouuerner, laquelle estoit simple, droitturiere, sans fard ny artifice quelconque, ains louerent bien sa parfaite uertu, comme ilz euſſent fait l'image de quelque Demidieu faite à l'antique, qui eust esté de beaulté singuliere : mais ce pendant ilz regrettoient la chaulde affection que l'autre monstroït enuers ses amis, l'amour qu'il leur portoit, & l'utilité qu'ilz en tiroient, de maniere que quand il monta sur mer pour s'en re-

tourner, tous ceulx qui estoient au camp, en furent les plus desplaisans du monde, iusques à en plorer à chauldes larmes, & luy de son costé s'estudia de les rendre encore pirement affectonnez enuers Callicratidas. Car entre autres choses il r'enuoya à Sardis le reste de l'argent que Cyrus luy auoit baillé pour payer les marini-ers, disant que Callicratidas en allast luy mesme demander s'il en uouloit auoir, & qu'il trouuast le moyen d'entretenir ses gens: finalement quand il se uolut embarquer, il protesta deuant toute l'assistance, qu'il luy laissoit, liuroit & consignoit entre ses mains l'armee commandant à toute la marine: & Callicratidas pour conuaincre de faulseté son ambition, & sa uanterie de uanité mensongere, luy respondit, S'il est ainsi que tu le dis, uien donc me consigner les galeres en la uille de Miler en passant par deuant l'isle de Samos: car puis que tu commandes à toute la marine, il ne fault point que nous craignons les ennemis qui sont en Samos: à quoy Lyfander luy repliqua qu'il n'auoit plus de commandement sur l'armee, & que c'estoit luy, & à tant se partit prenant la droite route du Peloponese, & laissa Callicratidas en tresgrande perplexité: car il n'auoit point apporté d'argent du pais quand & luy, & ne uouloit point contraindre les uilles de luy en fournir, uoyant qu'elles estoient d'ailleurs assez foulees. Si ne luy restoit plus d'autre

moyen, sinon que de s'en aller deuers les lieutenans du Roy de Perse pour leur en demander, comme auoit fait Lyfander : mais il estoit le plus mal propre du monde, & le moins idoine pour ce faire, à cause que c'estoit un personnage libre de sa nature, & magnanime, qui estimoit estre moins ignominieux & moins reprochable aux Grecs d'estre batus & uaincus par autres Grecs, que d'aller faire la cour & requerir des Barbares, lesquelz auoyent bien de l'or & de l'argent, mais au demourant rien de bon ny d'honeste : à la fin toutefois contraint par la necessité, il se meit en chemin pour aller en Lydie, & tira droit au logis de Cyrus, là ou il dit au premier trouué, que lon feist entendre que c'estoit l'Admiral des Lacedæmoniens, Callicratidas, qui uouloit parler à luy. L'un des gardes de la porte luy respondit,

20 Estranger mon amy, Cyrus n'a pas maintenant
20 loisir, car il est à table. Callicratidas luy respon-
20 dit tout simplement : Il n'y a point de danger,
20 j'attendray bien icy iusques à ce qu'il ait ache-
ué. Quoy entendans les Barbares estimerent
que ce deuoit estre quelque lourdault, & pour
ceste premiere fois s'en alla mesprisé & mocqué
d'eulx. Mais à la seconde fois luy ayant esté
semblablement la porte refuzee, il se despita &
s'en retourna comme il estoit uenu en la uille
d'Ephese, maudissant & detestant ceulx qui les
premiers festoyent ainsi abbaissez & auilez

N iiii

que d'aller faire la cour aux Barbares, en leur enseignant de s'en orgueillir pour leurs biens & leurs richesses, iurant deuant toute l'assistance, que si tost qu'il seroit de retour à Sparte, il feroit tout ce qui seroit en luy pour pacifier les Grecs entre eulx & les mettre d'accord, à fin qu'ilz fussent redoutables aux Barbares, & qu'ilz n'eussent plus à faire d'eulx ny de leur aide pour se ruiner les uns les autres. Mais Callicratidas ayant le cueur digne de Sparte, & estant à comparer en iustice, uaillance & grandeur de courage aux plus excellents hommes Grecs qui furent onques, peu de temps apres mourut en une bataille nauale qu'il perdit auprès des isles Arginuses. Parquoy les alliez de Lacedæmone uoyans que les affaires alloient en empirant, despescherent ensemblement une ambassade à Sparte, par laquelle ilz requierent au conseil que lon renuoyast Lyfander pour Admiral, & qu'ilz feroient toutes choses de meilleur courage sous sa conduite, que sous autre Capitaine que lon y sceust enuoyer: autant leur en escriuit Cyrus. Mais pour autant qu'il y auoit une loy qui defendoit, qu'un mesme personnage ne fust deux fois Admiral, & que neantmoins ilz uouloyent gratifier à la requeste de leurs alliez, ilz donnerent le nom & le tiltre d'Admiral à un nommé Aracus, & à luy de Superintendant de la marine: mais en effect ilz luy baillerent la souueraine autorité

de toutes choses. Si fut sa uenue tres agreable, comme celle qui de lōg temps estoit fort attendue & fort desirée par ceulx qui s'entremettoient du gouuernement des uilles, & qui y auoyent autorité, pource qu'ilz esperoyent bien augmēter encore dauantage leur puissance par son moyen, & de tout poinct amortir celle du peuple. Mais ceux qui aimoyent une ronde simplicité & ouuerte magnanimité es meurs d'un Gouverneur & Capitaine general, quand ilz uenoyent à comparer Lysander à Callicratidas, le trouuoient fin & cauteleux, qui faisoit la plus part de ses faicts de guerre par tromperie & surprise plus tost qu'autrement, comme celuy qui faisoit compte de la iustice quand elle estoit utile, mais qui autrement prenoit l'utilité pour la iustice & pour l'honesteté, n'estimant point que le uray de nature fust plus fort ne plus puissant que le faulx, ains mesurant la ualeur de l'un & de l'autre au profit qui en sortoit, en se mocquant de ceulx qui disoyent, que les descendans de Hercules ne deuoyent point
 20 faire la guerre par ruzes ne cauteles : Car quād
 10 la peau de lion n'y peult fournir, disoit il, il y
 20 fault couldre aussi celle du regnard. A quoy se rapporte ce que lon escrit qu'il feit en la uille de Milet: car ses hostes & amis ausquelz il auoit promis de leur aider à ruiner l'autorité du peuple, & à chasser de la uille leurs aduersaires, ayans changé de conseil, & festans reconciliez

avec leurs contraires, il feit semblant en public d'en estre bien ioyeux, & de leur uouloir aider à faire leur appointment ensemble, mais à part en secret il les tenfa bien asprement, & leur remonstra qu'ilz estoient bien lasches de ce faire, & les sollicita au contraire de courir sus à la part du peuple: puis quand il entendit qu'il y auoit emeute entre les parts de la uille, il y accourut soudain comme pour l'appaiser: & entré qu'il fut dedás la uille, les premiers qu'il rencontra du party de ceux qui uouloyent remuer l'estat du gouuernement & oster l'autorité au peuple, il se courroucea à eulx, & les tenfa fort de paroles, leur commandant d'une façon rigoureuse, qu'ilz eussent à le suyure, comme s'il en eust deu faire quelque grosse punition: & à l'opposite, à ceulx qu'il trouuoit de l'autre party, il leur disoit qu'ilz n'eussent point de peur, & qu'ilz ne craignissent point qu'on leur feist aucun mal ny desplaisir là ou il seroit: mais il faignoit & leur faisoit malicieusement à croire cela, pour faire demourer les plus apparents & les plus affectionnez au party populaire, à fin de les faire puis tous ensemble mourir, cōme il feit: car tous ceux qui demourerent en la uille soubz la fiance de ses paroles, furent tous mis à mort. A ce propos aussi Androclidas a laissé par escript un mot que souloit dire Lysander, par ou il appert qu'il faisoit bié peu de cōpte de se pariurer: car il disoit qu'il

falloit tromper les enfans avec le ieu des offe-
lets, & les hommes avec les sermens, suyuant en
cela Polycrates le tyran de Samos, mais nō pas
avec raison : car luy estoit Capitaine legitime,
& l'autre uiolent usurpateur de domination
tyrannique : & si n'estoit point faict en uray La-
conien, de se porter enuers les Dieux ne plus
ne moins qu'enuers les ennemis, ou encore pi-
rement & plus iniurieusement : car celuy qui
trompe son ennemy, moyennant la foy qu'il
luy iure donne à cognoistre qu'il le craint, mais
qu'il ne se soucie point de Dieu. Cyrus dōques
ayāt fait uenir Lysander à Sardis, luy donna de
l'argent largemēt, & luy en promeit encore da-
uantage : & pour plus magnifiquement luy de-
clarer la uoulōté qu'il auoit de luy gratifier, luy
dit, que quād le Roy son pere ne luy uoudroit
rien fournir, il luy en donneroit plus tost du
sien propre : & quand tout autre moyen de re-
couurer argent luy defauldroit, qu'il feroit
plus tost fondre & monnoyer la propre chaire
sur laquelle il seoit quand il donnoit audien-
ce en iustice, laquelle estoit toute massiue d'or
& d'argent. Brief, quand il sen uoulut aller
en la Medie deuers le Roy son pere, il luy lais-
sa pouuoir de recueillir les tailles & tributs or-
dinaires des uilles de son gouuernement, & luy
donna entierement la superintendence de tout
son estat : & finablement en luy disant adieu,
il le pria qu'il ne donnast point de bataille

par mer aux Atheniens , iusques à ce qu'il fust retourné de la cour, pource qu'il ne reuiendrait point qu'il n'eust pouuoir de faire uenir beaucoup de uaisseaux, tant de la Phœnicie que de la Cilicie. Parquoy, ce pendât qu'il fut en ce uoyage, Lyfander ne pouuant combattre ses ennemis avec pareil nôbre de uaisseaux, ny aussi demourer oisif sans rien faire avec un si bõ nombre de galeres, s'en alla en cours , ou il prit quelques isles , & pilla celles d'Ægine & de Salamine , au partir desquelles il alla faire descente en la terre ferme de l'Attique , & y salua le Roy de Lacédamone Agis , lequel estoit expressement descendu du fort de Decelie iusques à la marine pour le uoir , à fin aussi que leur armee de terre ueist la puissance de celle de mer , & comment elle dominoit en la marine plus qu'elle ne uoloit: toutefois ayant nouuelles comme la flotte des Atheniens le suyuoit à la trace , il prit une autre route pour s'en refouir en Asie par les isles , & en s'en retournant il trouua tout le païs de l'Hellespont uuide de gens de guerre: si meit le siege deuant la uille de Lampsaque , & l'assailit avec ses galeres du costé de la mer, & Thorax y estant aussi arriué au mesme temps en toute diligence, avec son armee de terre , donna aussi l'assault de son costé, de maniere que la uille fut prise à force , que Lyfander abandonna à piller aux soudards. Or ce pendant la flotte des Atheniens , qui estoit de cent quatre uingts uoiles ,

estoit à l'ancre deuant la uille d'Eleunte au païs de la Cherronese, & les nouuelles ouyes que la uille de Lampsaque estoit perdue, s'en uindrent à toute diligence en celle de Sestos, là ou s'estas refreschis de uiures, ilz allerēt cinglans tout au long de la coste iusques à un endroit qui s'appelle la Riuiere de la cheure, uis à uis de la flotte des ennemis, qui estoient encore à l'ancre deuant la uille de Lampsaque. Or estoit lors Capitaine des Atheniens entre autres un nommé Philocles, celuy qui meit en auant & suada au peuple d'Athenes de faire couper aux prisonniers de guerre le poulce de la main droite, à fin qu'ilz ne peussent plus manier la picque, mais bien seruir à tirer la rame. Les uns & les autres se reposerent pour ce iour la, en esperāce que le lendemain ilz ne faudroyent pas d'auoir la bataille. Mais Lyfander ayant bien autre intention en son entendement, commāda neantmoins aux mariniers & pilotes, qu'ilz teinsent leurs galeres toutes prestes comme pour donner la bataille le lendemain au poinct du iour, à fin que chascun s'embarquast de bonne heure, & se teinst en ordonnance de bataille sans faire bruit quelconque, attendans ce qui leur seroit enioint & ordonné de sa part: & feit aussi tenir l'armee de terre en bataille le long du riuage de la mer. Le lendemain matin au Soleil leuant les Atheniens commēcerent à uoguer avec toutes leurs galeres régees en bataille toutes d'un frôt;

mais Lyſander, encore qu'il euſt ſes vaiſſeaux en ordre pour combattre, les prouës tourneés deuers les ennemis des deuât le iour, ne uogua point pourtât à l'encôtre, ains enuoyant de petits eſquifz aux premieres galeres, leur defendit tres eſtroitemēt qu'ilz n'euffent à bouger aucunemēt, ains qu'elles ſe teinſſent en ordōnance, ſans mener bruit ne uoguer à l'encôtre de l'ennemy: encore ſeſtās les Atheniens retirez ſur le ſoir, il ne dōna pas congé aux ſoudards de ſortir des galeres en terre, qu'il n'eufft premieremēt é-uoie deux ou trois galeres pour recognoiſtre la flotte des ennemis, leſq̃lles rapporterēt qu'elles auoyēt ueu les Atheniēs deſcēdus en terre. Le lendemain ilz en feirent tout autāt, & le troiſieme iour auſſi, & iuſques au quatrieme, de ſorte que les Atheniens en cōceurent une grāde confiance d'eulx meſmes, & un grand meſpris de leurs ennemis, eſtimās que ce fuſt pour crainte d'eulx, qu'ilz ſe tenoyent ainſi ferrez, & ne ſo-
zoyent tirer en auant. Sur ces entrefaittes Alcibiades, qui pour lors ſe tenoit au païs de la Cherroneſe, en quelques places qu'il y auoit conquiſes, ſ'en uint à cheual au camp des Atheniens, pour remōſtrer aux Capitaines & Chefz de l'armee les grādes faultes qu'ilz faiſoyēt, premierement en ce qu'ilz auoyent poſé l'ancre & tenoyent leurs vaiſſeaux en une coſte deſcouuerte, ou il n'y auoit abry quelconque pour ſe pouuoir retirer ſil fuſt ſuruenue quelque tour-

mête, & puis en ce qu'il leur falloit aller querir leurs uiures biē loing de là iusques en la uille de Sestos, au port de laquelle ilz se deuoyent plus tost retirer, attēdu qu'ilz auoyent peu de circuit à faire pour y arriuer, & auroyent la uille à leur doz qui les fourniroit de toutes choses necessaires, & si s'eloigneroient de leurs ennemis, qui estoient gouuernez par un seul Chef qui leur commandoit souuerainement, & si bien disciplinez, qu'à un seul sifflet ilz executoyent promptement tout ce qui leur estoit enioinct & ordonné. Ces remonstrances que faisoit Alcibiades, non seulement ne furent point receuës par les Capitaines Atheniens : mais, qui plus est, y en eut un nommé Tydeus, qui luy respondit oultrageusement, que ce n'estoit pas à luy à commander, & qu'il y en auoit d'autres à qui appartenoit ceste charge. Parquoy Alcibiades se doubtant qu'il y auoit encore là dessoubz quelque trahison, se retira. Le cinquieme iour, les Atheniens ayans fait la mesme contenance d'aller presenter la bataille à leurs ennemis, & se festsans sur le soir retirez comme de coustume fort nonchalamment, en mauuais ordre, & en gens qui ne comptoyēt leurs ennemis pour riē, Lysander enuoya apres eulx quelques galiotes pour les recognoistre, commandant aux Capitaines d'icelles, que quand ilz apperceuroyent que les Atheniēns seroyēt issus hors de leurs galees, ilz tournassēt arriere en la plus extreme di-

ligence qui leur seroit possible, & quand ilz seroyent au milieu du destroit, qu'ilz eleuassent en l'air au bout d'une picque sur la prouë un bouclier de cuyure, pour signe de faire uoguer toute la flotte en bataille: & ce pëdant luy-mesme en personne alla de galere en galere aduertissant & admōnestât chasque Capitaine, qu'ilz eussent à tenir leurs galiots, mariniers & souldards tous prests, à fin que quand le signe leur seroit leué ilz uoguassent de toute leur puissance en bataille cōtre les ennemis. Parquoy si tost que le bouclier de cuyure eust esté leué en l'air, & que Lyfander de sa galere capitaineſſe eut fait sonner la trompette pour le signe de desmarer, incontinent les galeres commēcerent à uoguer à l'enuy les unes de autres, & les gens de pied qui estoient sur terre, s'en coururent aussi gagner un hault rocher, qui respondoit sur la mer, pour uoir quelle seroit l'issue de ce combat, pource que la distance d'une coste à l'autre en cest endroit la n'est que d'environ une petite lieuë, laquelle ilz eurent trauersee en peu d'heure, pour la diligence & l'effort que feirent les uogueurs de ramer. Or le premier des Capitaines Atheniens, qui apperceut de la terre ceste grosse flotte qui uenoit à pleine uogue pour les inuestir, ce fut Conō, lequel cria incōtinēt aux souldards que chascun courust s'embarquer, & se passionnant de uoir les choses en tel danger, appelloit les uns par leurs noms, en sup-
plioit

plioit aucuns, & cōtraignoit les autres à entrer en leurs galeres : mais toute sa diligence ne seruoit de rien, pource que les soudards estoient escartez ça & là : car aussi tost qu'ilz furēt à leur retour sortis des galeres, les uns s'en allerent acheter des prouisions, les autres s'allerent promener par les champs, & y en auoit aucuns qui festoyent mis à soupper dedans leurs tentes, & autres à reposer & dormir, ne se doubtais de riē moins que de ce qui leur deuoit aduenir, pour l'ignorāce & faulte d'experience de leurs Chefz. Mais comme les ennemis estoient ia prests à chocquer avec grands cris & grand bruit de rames, Conon ayāt huit galeres, se coula secrettement hors de la meslee, & prenāt la fuitte se sauua en l'isle de Cypre deuers Euagoras : ce pendant les Peloponesiens se ruans sur les autres galeres en prirent les unes toutes uuides, & en froisserent les autres, ainsi comme les soudards commenceoyent à sembarquer dessus. Et quāt aux hōmes, les uns furent occis aupres de leurs uaisseaux, ainsi comme ilz y accoururēt en desordre tous nuds & sans armes, pour les cuider secourir, les autres furēt tuez en la fuitte, pource que les ennemis descendirent en terre, qui leur donnerent la chasse, & y en eut de prisonniers trois mille avec les Capitaines. Et prit Lysander dauantage toute la flotte des uaisseaux entierement, exceptee la galere sacree que lon nōme Paralos, & les huit qui s'en fouirēt avec

Conon, & apres auoir pillé tout le camp des Atheniés, attacha leurs galeres captiues aux poupes des sienes, & s'en retourna avec chants de triūphe au son des flustes & haultsbois deuers la uille de Lampsaque, ayant fait avec bien peu de trauail un tresgrád exploit, & couppé en peu d'heure la longue duree d'une guerre la plus diuerse qui eust onques esté auparauant en ce monde, & qui auoit produit tant & de si uariables & si estranges accidents de la fortune qu'il n'est pas croyable : car il y auoit eu infinies batailles par mer & par terre : les affaires y auoyét uarié infinies fois : il y estoit mort plus de Capitaines qu'en toutes les autres guerres de la Grece ensemble : & tout cela fut à la fin lors acheué & terminé par le bō sens & la bōne conduite d'un seul homme. Pourtāt y en eut il qui estimerent que ce grand coup fust un acte des Dieux, & qui dirent que au partir du port de Lāpsaque, pour aller inuestir la flotte des ennemis, ilz apperceurent sur la galere de Lysander les deux feus que lon appelle les estoiles de Castor & de Pollux, l'une d'un costé, & l'autre de l'autre. Il y en a aussi qui disent que la cheute de la pierre fut un presage, qui pronostiquoit ceste grande desfaitte. Car il tumba du ciel enuiron ce temps la, ainsi que plusieurs le tiennent, une fort grande & grosse pierre en la coste que lō appelle la Riuiere de la cheure, laquelle pierre se monstre encores auiourd'hui, tenuë en

grande reuerence par les habitans du païs de la Cherronése. Et dit on que le philosophe Anaxagoras auoit predict, que l'un des corps attachez à la uolte du ciel en seroit arraché, & tomberoit en terre par un glissement & un esbranlement qui deuoit aduenir: car il disoit que les astres n'estoyent pas au propre lieu où ilz auoyent esté nez, attendu que c'estoyent corps pesans & de nature de pierre: mais qu'ilz reluisoyent par l'objectiō & reflexiō du feu elementaire, & auoyēt esté tirez là sus à force, là où ilz estoyent retenus par l'impetuosité & uiolence du mouuement circulaire du ciel, ainsi comme au commencement du monde ilz y auoyēt esté arrestez, & empeschez de retumber icy bas, lors que se feit la separation des corps froids & pesans d'auec les autres substances de l'uniuers. Il y a une autre opinion d'aucuns philosophes, où il y a plus d'apparence qu'en celle là: car ilz disent que ce que nous appellons estoiles tombantes ou coulantes, ne sont point fluxions ny deriuations du feu elementaire, qui s'esteignent en l'air presque aussi tost comme elles y sont allumees, ny aussi une inflammation ou combustion de quelque partie de l'air qui pour sa trop grande quantité se respande contremont, ains sont des corps celestes, qui par quelque relaschement de la roideur ou deuoyement du cours ordinaire du ciel, sont elancez & iettez icy bas, non pas tousiours en quelque endroit

de la terre habitable , mais le plus souuent dehors en la grande mer Oceane , qui est cause que l'on ne les uoit point. Toutesfois le dire d'Anaxagoras a un tesmoing qui le cōfirme , c'est Damachus , lequel en son traitté de la religion escrit , quel'espace de soixante & quinze iours durant , auant que celle pierre tumbast , lon ueit continuellement en l'air un fort grand corps de feu comme une nuee enflammee , laquelle n'arestoit point en un lieu , ains alloit & uenoit se mouuant de diuers & rompus mouuemens , par l'agitation desquelz il en issait des lambeaux de feu qui tumboient en plusieurs lieux , & reluisoyent en tumbant , ne plus ne moins que font les estoilles tumbantes. A la fin quand ce grand corps de feu se fut posé en cest endroit là de la terre , les habitans du païs apres s'estre un peu asseurez de leur peur & estonnement , s'assemblerent au lieu pour uoir que c'estoit , & n'y trouuerent aucun effect ny aucune apparence de feu , ains seulement une pierre gisante sur la terre bien grande , mais non pas à comparaison de la moindre partie de ce que monstroit le pourpris de ce grand corps de feu , s'il le faultrainsi nōmer. Or est il bien cerraïn que le dire de Damachus en cela a besoing de fauorables auditeurs : mais aussi s'il est ueritable , il refute entierement le discours de ceulx qui maintiennent que ce fut une poincte de rocher , que la violence d'un estourbillon de uent arracha de

la cyme dē quelque montagne, & le porta par l'air tant que le tournoyemēt de l'estourbillon dura : mais aussi tost cōme il faillit, & qu'il uint à se lascher, elle tumba . Si nous ne difons que ce corps lumineux qui apparut ainsi par plusieurs iours en l'air, estoit ueritablement feu, lequel uenant à se resoudre & esteindre, engendra en l'air ce uiolent orage & uent si impetueux, qu'il eut bien la force d'arracher & ietter la pierre en bas. Toutefois c'est à une autre sorte de traitté à determiner plus amplement & plus resoluēment de ceste matiere. Au demourāt, cōme les trois mille prisonniers Atheniens que lō auoit saiziz en ceste surprise, eussent esté condānez par le cōseil à mourir, Lysander appellāt Philocles l'un des Capitaines, luy demanda de quelle peine il se iugeoit digne pour auoir cōseillé à ses citoyēs une chose si meschāte & si cruelle. Philocles ne flechisāt en riē pour quelque calamité ou il se ueist, luy respōdit. N'accuse point ceux qui n'ont point de iuge pour cognoistre de leur faict : mais puis que les Dieux t'ont fait la grace d'estre uainqueur, fais de nous ce q̄ nous eussions fait de toy, si nous t'eussions uaincu. Cela dit, il s'en alla lauer & estuuer, puis uestit un beau manteau, comme s'il eust deu aller à quelque festin, & s'en alla franchement le premier à la boucherie, mōstrāt le chemin à ses citoyens, ainsi comme le recite Theophrastus. Ces choses faites, Lysander avec sa flotte s'en

alla par les uilles maritimes, là ou autant qu'il y trouuoit d'Atheniens, il leur commâdoit qu'ilz se retirassent à Athenes, en leur faisant entendre, qu'il n'en pardonneroit à pas un, ains feroit mourir tous ceulx qu'il trouueroit hors de la uille: ce qu'il faisoit à cautelle, à fin de les réger tous au dedans de l'enceinte des murailles d'Athenes, pour tant plus tost les pouuoir affamer à faulte de uiures: car autremêr ilz luy eussent bien donné de l'affaire, filz eussent eu dequoy soustenir le siege lôguement. Mais en toutes les uilles ou il passoit, si elles estoient gouuernees par autorité du peuple, ou qu'il y eust quelque autre sorte de gouuernemêt, il y laissoit en chacune un Capitaine ou gouuerneur Lacedamonien, avec un cōseil de dix officiers de ceulx qui parauant auoyent eu amitié & intelligēce avec luy: ce qu'il faisoit autât es uilles allies & cōfederées de tout temps aux Lacedamoniés, cōme en celles qui nagueres leur auoyent esté ennemies. Si alloit ainsi nauiguant au long des costes lentement sans se haster, en se bastissant & establistant cōme une principaulté sur toute la Grece uniuersellement, à cause qu'il ne choisiroit pas pour officiers ceulx qui estoient les plus riches, ny les plus nobles, ou les plus gēs de biē, ains prenoit ceulx qui estoient des ligues qu'il auoit luy mesme mises sus en chascque uille, en leur dōnant autorité de punir & recompenser ceulz que bon leur sembloit, iusques à se trou-

uer luy mesme present, & assister en personne à la mort de ceux qu'ilz faisoient mourir, ou qu'ilz chassoyent & bannissoient de leur pais, ce qui donna aux Grecs mauuaise esperance de doulx & gracieux gouuernemēt soubz la domination des Lacedæmoniés. A raison dequoy il me semble que le poëte Theopompus resuoit quand il accompagnoit les Lacedæmoniens aux tauernieres, disant qu'ilz auoyent donné à taster aux Grecs du doulx breuuage de la liberté, & puis y auoyent meslé du uinaigre : car des le commencement le goust de leur gouuernemēt & l'essay qu'ilz en donnerent aux Grecs, leur fut fort aigre, à cause que Lysander estoit par tout l'autorité du gouuernement aux peuples, & la mettoit entre les mains d'un petit nombre des plus uiolents, & plus audacieux, & plus seditieux, qui fussent en chasque uille: & apres auoir demouré quelque tēps en ce uoyage à faire ces changemens, il enuoya deuant à Lacedæmone porter nouuelles, comme il s'en uenoit avec deux cēts uoiles, & parla en la coste de l'Attique aux Roys Agis & Pausanias, se promettant bien qu'il emporteroit la uille d'Athenes tout de prinsault : mais quand il ueit qu'au rebours de son esperance, les Atheniens luy faisoient teste à bon esciant, il s'en retourna une autre fois avec sa flotte en Asie, là ou il acheua de changer & remuer en toutes les uilles egale-
ment la maniere du gouuernement, establis-

fant en chascune un conseil de dix officiers seulement, & faisant par tout mourir plusieurs des citoyens, & en bannissant aussi plusieurs, comme entre les autres il chassa tous les Samiens hors de leur pais, & y remeit tous les bannis qui parauant en auoyent esté dechassez, & estât encore la uille de Sestos entre les mains des Atheniens, il la leur osta: mais, qui plus est, il ne uolut pas que les naturelz Sestiens y demourassent, ains les en chassa, & donna leur uille, leurs maisons & leurs terres aux pilotes, comites & galiots, qui auoyent esté à la guerre soubz luy: à quoy toutefois les Lacedæmoniens luy contredirēt, & fut la premiere chose, en laquelle il fut par eulx desdit: car ilz remeirent, malgré luy, les Sestiens en leurs maisons & en leurs biens. Mais ainsi comme les Grecs estoient bien marries de uoir ces actes la de Lyfander, aussi furent ilz tous bien aises de uoir ces autres cy. C'est qu'il remeit les Æginetes en leurs maisons & en leurs terres, long temps apres qu'ilz en auoyent esté dechassez: autant en feit il semblablement des Meliens & des Scio-neiens, dont les Atheniens auoyent occupé les terres & les biens, qu'il en chassa, & les rendit aux proprietaires & naturelz habitans. Au demourant, ayant nouuelles, que ceulx qui estoient dedans la uille d'Athenes se trouuoient fort à destroit de uiures, il s'en retourna dedans le port de Piræe, de là ou il pressa la

uille de si pres, qu'il la contraignit de se r  dre   
relles conditions qu'il uoulut : toutefois il y a
des Laced  moniens qui disent, que Lysander
   escriuit aux Ephores, La uille d'Athenes est pri-
   se : & que les Ephores luy rescriuirent, Il suffit
   qu'elle soit prise : mais cela est un compte faict
      plaisir, pour faire trouuer la chose plus belle.

Car    la uerit   la capitulation que les Ephores
   enuoyerent, & les articles furent telz : Les sei-
   gneurs du conseil de Laced  mone ont ainsi ar-
   rest  , Que uous abbatiez la fortification du
   port de Pir  e, Que uous demolissiez les lon-
   gues murailles qui ioignent le port    la uille,
   Que uous laissiez & quittiez toutes les uilles
   que uous tenez, & uous contentiez de la uie &
   de uostre pais seulement: en ce faisant uous au-
   rez la paix, moyenant que uous baillerez enco-
   re ce qu'il faudra, que uous receurez les bannis,
   & quant au nombre des uaisseaux, uous en fe-
   rez ce qui sera aduis  . Les Atheniens accorde-
rent les articles contenus en ce billet, suyuant
le conseil de Theramenes filz d'Agnon, lequel
comme un ieune orateur nommi   Cleomenes,
luy demanda   publiquement en courroux, fil
estoit bien si oz   & si hardy de faire ou dire
chose contraire    ce qu'auoit iadis faict Themis-
tocles, en consentant aux Laced  moniens de
demolir par leur commandement les murailles
que luy auoit edifiees malgr   eulx, il luy respon-
   dit sur le champ : Je ne fais rien, ieune filz mon

amy, qui soit contraire aux faicts de Themistocles. Car ainsi comme luy feit iadis bastir ces murailles pour le salut de ses citoyens, qui lors estoient, aussi les faisons nous maintenant abbatre & demolir pour la mesme cause; & fil estoit uray que les murailles rendissent les citez bien heureuses, il s'ensuyuroit que celle de Sparthe, qui n'en eut oncques, seroit la plus malheureuse du monde. Lysander donques ayant receu tous les uaisseaux des Atheniens, exceptez douze, & les murailles de la uille aussi, pour en faire à sa discretiō, le seizieme iour du mois de Mars, auquel iour ilz auoyent ancienement gaigné la bataille nauale dedans le destroit de Salamine contre le Roy de Perse, il leur meit incontinent en auant, & leur conseilla qu'ilz changeassent la forme de leur gouuernement. Ce que le peuple entendit tresmaluouluntiers, & s'en courroucea fort asprement: à l'occasion dequoy Lysander leur enuoya denoncer, qu'ilz auoyent contreuenue aux capitulations & articles du traitté fait auç eulx, attendu que leurs murailles estoient encore debout, estant passé le terme de dix iours, dedans lesquels ilz auoyent promis de les abbatre, & pourtant qu'il remettrait une autre fois en deliberation du conseil, comment on les deuoit traiter apres auoir enfrainct les articles de la premiere paix. Les autres disent, que de faict il remeit en deliberation du conseil des allicz & confederez, à sçauoir filz de-

uoient de tout poinct ruiner la uille, & afferuir comme esclaués les habitans d'icelle: auquel conseil on dit qu'il y eut un Thebain nommé Erianthus, qui fut d'opinion que lon rasast entierement la uille, & que lon desertast le pais, de sorte qu'il ne scruiſt plus que de pascages pour les bestes: mais pendant ceste deliberation, il se feit un banquet, auquel estans tous les Chefz de l'armee conuiez, il y eut un chantre Phocien qui chanta l'entree du chorus de la tragœdie d'Electra, composee par le poëte Euripides, laquelle se commence ainsi,

- » Dame Electra, fille d'Agamemnon,
- » En uostre cour iadis de grand renom,
- » Ores champestre & deserte, ie uien.

Ces paroles emeurent à compassion les cueurs des assistens, de maniere qu'il fut aduis à la plupart, que ce seroit un trop grand peché, que de destruire & ruiner une si noble cité, qui portoit de si beaux esprits & de si grands personnages. Parquoy Lysander, comme les Atheniens se fussent soubmis en tout & par tout à sa discretion, feit uenir de la uille plusieurs menestrieres qui iouoyēt des flustes & des haults-bois, & assembla toutes celles qui estoient en son camp, & au son de leurs instruments feit demolir les murailles & fortifications de la uille d'Athenes iusques au rez de terre, & feit brusler toutes leurs galeres en la presence des alliez & confederéz de Lacedæmone, qui ce pendant

balloyent & iouoyent ayans des chapeaux de fleurs sur les testes, pour monstrier que ce iour la leur estoit un commencement de uraye & entiere liberté. Incontinent apres il changea aussi l'estat du gouuernement, establiſſant un conseil de trente officiers en la uille, & au port de Pirée, un autre de dix, qui auoyent toute l'autorité: & quand & quand mettant bonne garnison dedans la forteresse du chasteau, y laissa pour superintendant & ſouuerain gouuerneur un gentilhomme Spartiate nommé Callibius: lequel haulsa un iour un baſton qu'il tenoit en ſa main pour en donner à Autolycus homme diſpos & roide à la lucte, ſur lequel le philoſophe Xenophon compoſa iadis le liure qu'il appelle le Conuiue: mais luy qui entendoit les ruzes de la lucte le faiſit ſoudainement aux cuiſſes, & l'enleuant en l'air le ietta par terre à la renuerſe: dequoy Lyſander non ſeulement ne ſe courroucea point, mais reprit encore Callibius, diſant qu'il ſe deuoit ſouuenir, ſil euſt eſté ſage, qu'il auoit à gouuerner des hōmes libres, & non pas des eſclaués: toutefois peu de iours apres, les trente nouueaux reformateurs firent mourir ceſtuy Autolycus pour faire plaiſir à Callibius. Cela faiſt Lyſander remonta ſur mer, & ſ'en alla au païs de Thrace, & enuoya deuant à Sparte tout ce qui luy eſtoit demouré d'or & d'argent de reſte entre ſes mains, auec tous les preſens que lon luy auoit faits à luy

particulièrement, & les couronnes que lon luy auoit donnees, qui estoient en grand nombre, ainsi que lon peult penser, que plusieurs luy en presenterent, ueu la grande puissance qu'il auoit, & que par maniere de dire, il estoit comme un prince souuerain sur toute la Grece, & donna le tout à porter à Gylippus, qui auoit esté Capitaine des Syracusains en la Sicile. Cestuy Gylippus descousut par dessoubs les coustures des sacs ou l'argent estoit, & en tira de chaque sac une bonne somme, puis les recousut, ne se doubtant pas qu'il y auoit au dessus de chaque sac un bordereau, par lequel estoit déclaré le nombre & les especes d'or & d'argent qu'il y auoit. Arriué qu'il fut à Sparte, il cacha dessoubs les tuyles de sa maison l'argent qu'il auoit desrobé, & alla consigner & liurer entre les mains des Ephores les sacs qu'il auoit apportez, leur monstrant sur chacun le seau que Lysander y auoit fait apposer. Les Ephores ayans ouuert les sacs & compté l'argent, trouuerent que la somme ne s'accordoit pas avec les bordereaux, & ne scauoient dont procedoit la faulte: mais un seruiteur de Gylippus la leur descouurit sous paroles conuertes, disant, que sous les tuyles de la maison de son maistre couchoit un grand nombre de hibous, pource que la pluspart de l'or & de l'argent monnoyé qui couroit alors par la Grece, auoit pour marque un hibou ou une cheuesche, à cause des

Atheniens. Ainsi Gylippus apres tant de beaux & grands exploits d'armes qu'il auoit faits, fectant laissé aller à commettre un si lasche & si uillain cas, fut banny du païs de Lacedæmone : mais les plus sages bourgeois de Sparte, & qui uoyoyent de plus loing, redoubtans la puissance de l'or & de l'argent, laquelle ilz cognoissoyent euidemment par l'exemple de ce forfaict, attendu qu'il auoit eu tant de force, que de faire fouruoyer du droit chemin un de leurs principaux homnies, reprenoyent & blasmoÿent grandement Lysander, en protestant deuant les Ephores, qu'ilz deuoyent renuoyer hors de Sparte tout cest or & cest argent comme une peste, & un appast & amorche attrayante à mal faire, & qu'ilz ne deuoyent user que de leur monnoye seulement, de maniere que la chose fut mise en deliberation du conseil : & escrit Theopompus, que ce fut un nommé Sciraphidas qui le proposa, toutefois Ephorus le nomme Phlogidas, qui le premier opina en ce conseil, qu'il ne falloit point admettre ny receuoir en la uille de Sparte monnoye d'or ny d'argent, ains se seruir seulement de celle de leur païs, qui estoit de fer, lequel premierement auoit esté esteinct uenant du feu avec du uinagre, à fin que lon ne le peust plus forger ny l'employer à autre usage : car il deuenoit si aigre & si esclattant par le moyen de celle tremppe, que lon n'en pouuoit plus rien faire : &

puis il estoit pesant & lourd à remuer, attendu que une bien grosse masse ualoit bien peu de pris. Et à l'aduenture estoit il ainsi par tout anciennement, que lon uoit de petites brochettes de fer, & en quelques lieux de cuyure, au lieu de monnoye, dont est encore iusques au iourd'uy demouré le nom d'obole en usage, qui signifie en langage Grec broche, & sont de petites pieces de monnoye, dont les six font une drachme, laquelle semble auoir esté ainsi appelée, pource que c'estoit autant que la main pouuoit empoigner de ces brochettes, à cause que *Drattelea* signifie empoigner en langue Grecque: toutefois à l'instance des amis de *Lysander*, qui sy opposerent & teindrent la main à cela, il fut arresté au conseil, que l'argent demoureroit en la uille, & ordonné qu'il auroit cours seulement pour les affaires de la chose publique: & que sil estoit trouué que aucun particulier en ferraist & en possedast en son particulier, il en seroit puny de mort, comme si *Lycurgus* quand il feit ses loix eust craint l'or & l'argent, non pas la conuoitise & l'auarice que l'or & l'argent apportent quand & soy, laquelle n'estoit pas tant ostee par la defense aux particuliers d'en auoir en priué, comme elle estoit engendree par la permission d'en amasser en public, pource que l'utilité que lon ueit qu'il portoit avec soy, luy donna reputation, & le feit appeter: car il estoit impossible

qu'ilz mesprisassent en priué, comme chose inutile, ce dont ilz uoyoyent que lon faisoit compte en public, comme de chose necessaire, ne qu'ilz pensassent que cela particulierement ne peust de rien seruir à chacun en son priué, qui publiquement estoit tant requis & tant estimé. Ains fault penser que les façons de faire bonnes ou mauuaises publiques se coulent bié plus tost par cōtagion de l'accoustumance es meurs des particuliers, que les fautes & uices des particuliers n'emplissent les uilles & les choses publiques de mauuaises qualitez: & est plus uray-semblable que les parties se gastent & se corrompent avec la corruption du total quand il se tourne à mal, que non pas les parties corrompues tirent en corruption le total, pource qu'au contraire les fautes d'une partie gastee, qui pourroyent estre preiudiciables au total, sont souuent redressees & corrigees par les autres parties saines & entieres. Mais ceulx qui prirent alors ceste resolution en leur conseil, d'auoir de l'argent en public, meirent pour gardes aux maisons de leurs bourgeois la crainte de la peine & de la loy, à fin que l'argent n'y entraist point, & ce pendant ne donnerent pas ordre de tenir les entrees de leurs ames closes à toutes passions & à toutes affections & tous desirs d'argent, ains plus tost au contraire leur feirent uenir à tous l'enuie & la conuoitise de s'enrichir, comme d'une chose grande & honorable. Mais
quant

quant à cela nous en auons encore ailleurs repris & noté les Lacedæmoniens. Au demourant Lyfander feit faire, du butin qu'il auoit gagné sur les ennemis, une statue de bronze à sa semblance, pour mettre en la uille de Delphes, & à chaque particulier Capitaine de galeres aussi, & oultre cela les deux estoiles de Castor & de Pollux d'or, lesquelles un peu auant la journee de Leuctres disparurent, de sorte que lon ne sceust qu'elles deuindrent: & en la chambre du tresor de Brasidas & des Acanthiens y auoit aussi une galere faite d'or & d'yuoire de deux coudees de long, que Cyrus luy enuoya apres qu'il eut gagné la uictoire nauale contre les Atheniens. Dauantage Anaxandrides historien, natif de la uille de Delphes, escrit, que là mesme Lyfander auoit mis en depos^a un talent d'argent, cinquante & deux mines, & unze pieces d'or, qui s'appelloient Stateres: mais cela ne s'accorde pas avec ce que tous les autres historiens escriuent conformement de sa pauureté. Estant donques lors en autorité & puissance plus grande que n'auoit iamais esté hōme Grec auant luy, il monta en une presumption & une gloire encore plus grande que n'estoit sa puissance. Car, ainsi comme Doris escrit, ce fut le premier des Grecs à qui les uilles dresserent des autelz & offrirent des sacrifices comme à un Dieu, & en l'honneur de qui on chanta premierement des hymnes, & en est encore iusques

a Le tout ensemble fait enuiron unze cents trecent escus.

aujourdhuy memoire d'un qui se commenceoit
en ceste maniere :

- 35 Chantons le grand Capitaine
- 35 De sainte Grece diuine ,
- 35 Qui de la cité Spartaine
- 35 Iadis prit son origine .

Les Samiens ordonnerent par decret public ,
que les festes de Iuno, qui s'appelloyent en leur
uille Heræa, s'appelleroyent Lysandria: & luy a-
uoit en sa compagnie un de ses citoyés nommé
Chærilus , qu'il entretenoit autour de luy, à fin
qu'il ornaist & magnifiast ses faicts par sa poësie.
Vn autre poëte qui s'appelloit Antilochus , feit
un iour quelque nombre de uers en sa louange,
dont il fut si aise qu'il luy donna tout un plein
chapeau d'argent. Il y en eut deux autres, Anti-
machus Colophonien, & Niceratus natif d'He-
raclee, qui composerent à son honneur des poë-
mes à l'enuy l'un de l'autre : & Lysander en ad-
iugea la couronne & la uictoire à Niceratus ,
dont Antimachus fut si despit & si marry qu'il
effacea ce qu'il en auoit escript: mais Platon qui
lors estoit ieune, & aimoit Antimachus pour
son excellence en l'art poëtique, le reconforta,
en luy disant, que l'ignorance oste la ueuë de
l'entendement à ceulx qui en sont entachez, tout
ne plus ne moins que fait l'auuglement la ueuë
des yeux corporelz à ceulx qui sont auugles .
Et Aristonoüs excellent ioueur de cithre, com-
me celuy qui par six fois en auoit gaigné le pris

es ieuX Pythiques, se uoulant insinuer en la bonne grace de Lyfander, luy promet que s'il luy aduenoit iamais de gagner le pris de son art, il se feroit proclamer & nommer esclau de Lyfander. Si estoit ceste ambition de Lyfander odieuse & desplaisante seulement aux grands personnages & hommes de sa qualité : mais oultre son ambition, il deuint à la fin arrogant & cruel, pour les flatteries de ceulx qui le suyuoient & qui luy faisoient la cour, de sorte qu'il ne gardoit ne proportion ne mesure à recompenser ses amis, ny à punir ses ennemis. Car à ceulx qui auoyent eu amitié & hospitalité avec luy, il leur donnoit pour leur gratifier des seigneuries souueraines & puissances absolues de uie & de mort en leurs uilles & citez, & n'auoit que un seul moyen d'appaiser & assouir son courroux, c'estoit qu'il falloit que celuy qu'il auoit une fois pris en haine, mourust, & n'estoit pas possible de se sauuer de ses mains : comme il monstra bien depuis en la uille de Milet, là ou craignant que ceulx qui defendoient la partie populaire, ne s'enfouissent, & uoulant que ceulx qui estoient cachez, fortifissent, il promet & iura qu'il ne leur feroit mal ne desplaisir quelconque : à quoy les pauures gens se fierent, mais tout aussi tost qu'ilz furent fortis, il les liura entre les mains de leurs aduersaires qui estoient les chefs de la noblesse, pour les faire tous mourir, & si n'estoyent pas moins

de huiët cents hommes, les uns & les autres ensemble. Pareillement aussi se faisoit il es autres uilles du meurtre des populaires sans nombre: car il ne faisoit pas mourir seulement ceulx contre qui il auoit particulièrement quelque uieille dent: mais aussi gratifioit, & aidoit, & seruoit en cela aux inimitiez, auarices & cupiditez des amis qu'il auoit en chaque lieu. Pourtant fut trouué fort bien dit à propos un mot d'Ereocles Lacedæmonien, que la Grece n'eust sceu porter deux Lysandres. Ce que Theophrastus escrit auoir esté dit tout de mesme d'Alcibiades par un Archestratus: mais en Alcibiades il n'y auoit que l'insolence, les delices & la uaine gloire qui despleust aux hommes: mais en Lysander il y auoit une austerité de nature, & une aspreté de meurs qui rendoit sa puissance redoubtable & insupportable. Toutefois les Lacedæmoniens ne feirent pas grand compte de tous les autres qui fallerent plaindre de luy: mais quand ilz eurent entendu les doleances de Pharnabazus, qui leur enuoya des ambassadeurs expres pour se plaindre à eulx des torts & iniures qu'il luy faisoit, en pillant & fourrageant les pais de son gouuernement, alors les Ephores courrouceez contre luy, arresterent prisonnier Thorax l'un de ses amis qui auoit eu charge en l'armee quād & luy, & trouuans qu'il auoit de l'or & de l'argent particulièrement en sa maison contre les defenses, le feirent mourir,

& à luy meſme luy enuoyerent incontinent ce qu'ilz appellent la Scytale, comme qui diroit la courroye, par laquelle ilz luy manderent qu'il euſt à ſ'en retourner auſſi toſt comme il l'auroit receuë. Ceste Scytale eſt une telle choſe: quand les Ephores enuoyent à la guerre un General, ou un Admiral, ilz font accouſtrer deux petits baſtons ronds, & les fond entierement egaler en grandeur & en groſſeur, deſquelz deux baſtons ilz en retienent l'un par deuers culx, & donnent l'autre à celuy qu'ilz enuoyent. Ilz appellent ces deux petits baſtons Scytales, & quand ilz ueulent faire ſecretement entendre quelque choſe de conſequence à leurs Capitaines, ilz prennent un bandeau de parchemin long & eſtroit comme une courroye, qu'ilz entortillent à l'entour de leur baſton rond, ſans laiſſer rien d'eſpace uuide entre les bords du bandeau: puis quand ilz ſont ainſi bien ioincts, alors ilz eſcriuēt ſur le parchemin ainſi enrollé, ce qu'ilz ueulent: & quand ilz ont acheué d'eſcrire, ilz deſueloppēt le parchemin & l'enuoyent à leur Capitaine, lequel n'y ſçauroit autrement rien lire ny cognoiſtre, pource que les lettres n'ont point de ſuitte ny de liaiſon continuee, ains ſont eſcartees l'une ça, l'autre là, iuſques à ce que prenant le petit rouleau de bois qu'on luy a baillé à ſon partement, il eſtend la courroye de parchemin qu'il a receuë tout à l'entour, tellement que le tour & le ply du parchemin ue-

nant à se retrouver en la mesme couche qu'il auoit esté plié premierement, les lettres aussi uienent à se rencontrer en la suite continuee qu'elles doyuent estre. Ce petit rouleau de parchemin s'appelle aussi bien Scytale comme le rouleau de bois, ne plus ne moins que nous uoyons ailleurs ordinairement, que la chose mesurée s'appelle du mesme nom que fait celle qui mesure. Quand donques ceste bande ou courroye fut apportee à Lysander, qui estoit lors au pais de l'Hellespont, il s'en trouua tout estonné & tout troublé, craignant sur toutes autres choses les charges & accusations de Pharnabazus: si meit peine de parler à luy auant que partir, esperant faire sa paix par ce moyen. Quand ilz furent ensemble, Lysander le pria de uouloir escrire une autre lettre aux seigneurs de Sparte contenant tout le contraire de la premiere, comment il ne luy auoit fait tort ne desplaisir quelconque, & qu'il n'auoit point d'occasio de se plaindre de luy: mais il ne s'apperceuoit pas que c'estoit un Candiot, comme lon dit en commun prouerbe, qui uouloit affiner un autre Candiot: car Pharnabazus luy ayant promis qu'il feroit tout ce dequoy il le requeroit, escriuit bien en public à descouuert une missiue de telle substance que Lysander la demandoit: mais en derriere il en auoit une autre de substance toute cōtraire, laquelle estoit si semblable au demourant par le dehors, que lon n'eust sceu discerner

l'une de l'autre à les uoir par le dessus: & quand se uint à la cacheter & y apposer son seau, il supposa dextrement celle qu'il auoit escrite en derriere, & la luy bailla. Ainsi Lyfander arriué qu'il fut à Sparte, s'en alla droit, selon la coustume, au palais ou se tenoit le Senat, & bailla ses lettres aux Ephores, cuidant bien par icelles estre iustificié des principales & plus dangereuses charges que lon luy pourroit mettre sus, pour ce que Pharnabazus estoit fort aimé des seigneurs Lacedæmoniens, à cause que durant toute la guerre, il festoit tousiours mōstré fort prompt & fort affectionné à les secourir plus que nul autre des lieutenans du Roy de Perse. Les Ephores ayās leu ceste missiue la luy monstrent, & lors il cogneut euidemment, comme lon dit en commun langage, que

¶ Vlysses n'auoit pas seul esté cauteleux : si se retira sur l'heure en son logis fort confus : mais peu de iours apres retournant au palais pour parler aux seigneurs du conseil, il leur dit qu'il estoit necessaire qu'il feist un uoyage au temple de Iupiter Hammō pour s'acquitter envers luy de quelques sacrifices, qu'il luy auoit uouez & promis deuant les batailles qu'il auoit gaignees. Or y en a il qui disent que ueritablement Iupiter Hāmō s'apparut à luy en dormār, ainsi cōme il tenoit la uille des Aphytciens, qui est au païs de Thrace, assiegee: & q̄ par son cōmādemēt il se leua de deuāt, & chargea ceulx de la

uille qu'ilz remerciaſſent Iupiter Hammon & luy ſacrifiſſent: au moyen dequoy ilz eſtiment que c'eſtoit à bon eſciât qu'il pourſuyuoit ainſi ſon congé d'aller en ce uoyage de Libye pour acquiter les uœuz qu'il auoit faits. Mais la plupart tenoit pour tout certain, que ce uoyage qu'il prochaiſſoit, n'eſtoit qu'une couuerture pour auoir occaſion de ſ'abſenter, à cauſe qu'il craignoit les Ephores, & qu'il ne pouuoit endurer le ioug qu'il luy falloir porter quād il eſtoit à la maiſon, ny ne pouuoit plus ſouffrir qu'on luy commandaſt, qui fut la uraye occaſion de luy faire chercher ce pelerinage, ne plus ne moins qu'un cheual que lon oſte des paſcages libres & des prez ouuerts, pour le réger en une eſtable, & le remettre à ſon labour accouſtumé: toutefois Ephorus en eſcrit une autre cauſe, laquelle ie reciteray cy apres. A la fin ayant obtenu ſon congé à toute peine, il ſ'embarqua & ſe fit voile: mais durāt ſon abſence les Roys de Lacedamone ſ'eſtans aduiſez, que luy tenoit toutes les uilles en ſa deuotion par le moyen des amis qu'il auoit en chacune, auſquelz il auoit donné toute l'autorité du gouuernement d'icelles, & qu'il uenoit à eſtre par ce moyen cōme un prince abſolu & ſeigneur ſouuerain de toute la Grece, ilz entreprirent de remettre le gouuernement des uilles & citez entre les mains des peuples, & en debouter ſes amis qu'il y auoit eſtabliz. Surquoy il ſe leua incōtinēt un grād mou-

uement : car premierement les bannis d'Athenes ayans surpris le chasteau de Phyle, coururent ius de là aux trente gouuerneurs tyrans, & les desfeirēt en bataille : à l'occasiō dequoy Lysander retourna prōptement, & remonstra aux Lacedæmoniens qu'ilz deuoyent tenir la main au gouuernement du petit nombre, & chastier l'intolence des peuples. Parquoy à sa poursuite ilz enuoyerent premierement ² cent talēts aux trente tyrans pour leur aider à soustenir ceste guerre, & le designerent luy mesme pour Capitaine : mais les deux Roys luy portans enuie, & craignans qu'il ne reprist une autre fois la uille d'Athenes, resolurent que l'un d'eulx y iroit : & y alla de faict Pausanias, lequel en apparence fait bien semblant de soustenir les tyrans contre le peuple, mais en effect meit peine d'appaiser ceste guerre, de peur que Lysander par le moyen de ses amis & adherens ne uinst à auoir encore une autre fois la uille d'Athenes en sa puissance: ce qui luy fut facile à faire. Ainsi ayāt remis les Atheniens en bonne amitiē, union & concorde, les uns avec les autres, & esteinct les partialitez & seditions qui estoient entre eulx, il couppa par le pied l'ambition de Lysander. Mais peu de temps apres s'estans de rechef les Atheniens soubleuez & rebellez contre les Lacedæmoniens, Pausanias fut luy mesme blasēm d'auoir lasché trop la bride à l'audace & à l'insolence du peuple, qui parauant estoit retenue &

a Soixante mil escus.

refrence par l'autorité du petit nōbre de gou-
 uerneurs : & au contraire feit que lon donna à
 Lyfander l'honneur de Capitaine qui n'ordon-
 noit point les affaires à l'appetit d'autrui, ny à
 la pōpe de uaine gloire, ains roidement au pro-
 fit & à l'utilité de Sparte . Vray eft qu'il eftoit
 hault en paroles & terrible à ceulx qui luy refi-
 ſtoient, comme il respondit un iour aux Argiēs
 qui querelloient de leurs confins à l'encontre
 des Lacedæmoniens , & ſembloyent alleguer
 30 de meilleures raifons . Ceulx, dit il, qui ſeront
 30 les plus forts en cecy , en leur monſtrant ſon e-
 30 ſpee, ſerōt ceux qui plaiderōt le mieulx la cauſe
 30 de leurs cōfins. Vne autrefois en quelque aſſem-
 blee de cōſeil, cōme un Magariē euſt parlé aſſez
 30 hardiment & librement, il luy respondit. Tes pa-
 30 roles, mon bel amy, auroient beſoing d'une ci-
 ré, uoulant dire qu'il eftoit d'une uille trop foi-
 ble , pour tenir des propos ſi haultains . Et aux
 Bœotiēs qui eftoyent en branle de ſe declarer a-
 mis ou ennemis , il leur enuoya demander ſil
 paſſeroit par leur païs les picques leuees ou
 baiſſees. Et cōme les Corinthiens ſe fuſſent de-
 partis de leur alliance, il approcha ſon armee de
 leurs murailles: mais ainſi que ſes gēs eſtoyēt en
 doubte, & marchādoient ſilz iroyent à l'aſſault
 ou non ; il apperceut d'aduenture un lieure qui
 30 ſortit des ſoſſez de la uille, & leur dit adōc: N'a-
 30 uez uous point de honte de craindre d'aller aſ-
 30 ſaillir des ennemis qui ſont ſi laſches & ſi pareſ-

seux, que les lieures dorment à leur aise dedans
le pourpris de leurs murailles ? Au demourant,
le Roy Agis estant uenu à deceder, laissa son
frere Agefilaus, & son filz reputé Leotychides:
parquoy Lysander qui auoit esté autrefois a-
moureux d'Agefilaus, luy conseilla qu'il main-
teinst que la royaulté luy deuoit appartenir, cō-
me à l'hoir legitime le plus prochain descendāt
de la race de Hercules, à cause que lon souspe-
çonnoit Leotychides estre filz de Alcibiades,
lequel auoit secrettement entretenu Timæa
femme d'Agis, lors qu'estāt banny de son païs,
il festoit retiré à Sparte: & Agis mesme conclu-
ant par la raison du temps qu'il auoit esté ab-
sent, que sa femme ne pouuoit estre enceinte
de ses œuures, ne faisoit cōpte de Leotychides,
& auoit monsté ouuertement tout le reste du
temps, qu'il ne le recognoissoit point pour son
filz, iusques à ce qu'estāt tūbé malade de la mala-
die dōt il mourut, il se feit porter en la uille de
Heræa, là ou estant pres de mourir, partie à la
supplication de Leotychides mesme, & partie à
l'instance de ses amis, qui l'en presserent bien
fort, il le recogneut & l'aduoua pour son filz,
en presence de plusieurs tesmoins, lesquels
il requit de uouloir tesmoigner enuers les sei-
gneurs Lacedamoniens, ceste siene declara-
tiō de recognoissance, ce qu'ilz feirēt en faueur
de Leotychides: toutefois Agefilaus l'empor-
toit sur luy, principalement pour le port & la

faueur que luy faisoit Lysander, n'eust esté un Diopithes homme tenu & réputé sçauant en matiere d'anciennes propheties, qui nuisoit fort au party d'Agésilas, pour un ancié oracle qu'il alleguoit à l'encôtre d'un default qu'Agésilas auoit, qu'il estoit boitteux.

- 20 Regarde bien, ô nation Spartaine,
 20 Quoy que tu sois magnanime & hautaine,
 20 Que royaulté boitteuse ne se germe
 20 En toy qui as l'alleure droite & ferme:
 20 Car autrement des malheurs te uiendront,
 20 Non esperez, qui long temps te tiendront
 20 Enueloppee en tourmente de guerre,
 20 Dont les humains perissent sur la terre.

Plusieurs à l'occasion de cest oracle, se rendoyēt & se laissoient aller du costé de Leotychides: mais Lysander leur remonstra que Diopithes ne prenoit pas bien le droit sens de l'oracle, pource que Dieu ne se soucioit pas que quelqu'un estant offensé à un pied uinst à estre Roy de Lacedæmone: mais que bien la royaulté clocherait & seroit ueritablement boitteuse, si des bastards n'estans point nez de legitime mariage uenoyent à regner sur les urays naturelz descendants de Hercules. Par ces raisons & remonstrances Lysander, ioinct le grand credit & l'autorité qu'il auoit, tira tous les autres à son opinion, de sorte que Agésilas par ce moyen fut déclaré Roy de Lacedæmone. Si commença incôtinent Lysander à luy mettre en teste qu'il

entreprist d'aller faire la guerre en Asie, luy donnant esperance qu'il ruinerait l'empire de Perse, & qu'il se feroit le premier homme du monde. Dauantage il escriuit aux amis qu'il auoit es uilles de l'Asie, qu'ilz enuoyassent demander aux Lacedæmoniens le Roy Agefilaus pour leur Capitaine, à faire la guerre aux Barbares: ce qu'ilz feirent, & enuoyerent des ambassadeurs expres à Sparte pour le requerir: qui ne fut pas moins d'honneur procuré par Lysander à Agefilaus, q̄ de l'auoir fait elire Roy. Mais les hommes ambitieux de nature, n'estans pas au demourât mal propres ny mal idoines pour commander, ont ceste imperfection, que par la ialouzie de la gloire, ilz portent ordinairement enuie à leurs semblables, ce qui les empesche de faire beaucoup de belles choses: car ils tiennēt pour leurs aduersaires en la poursuite de la uertu, ceulx dont ilz se pourroyent & deuroient plus tost seruir & aider à faire de belles & grandes choses. Agefilaus donques estant eleu Chef de ceste entreprise, mena quand & luy en ce uoyage Lysander, entre les trente Conseillers, qui luy furēt baillez pour luy assister, & le choisit, comme celuy par le cōseil duquel il esperoit le plus se gouuerner & l'approcher le plus pres de soy, comme le principal de ses amis: mais quand ilz furēt arriuez en Asie, ceux du païs qui n'auoyēt point encore de familiarité & de cognoissance avec Agefilaus, parloyent peu & nō gueres sou-

uent à luy:& au contraire ayās cogneu & hanté de lōgue main Lyfander, ilz le fuyuoier, & luy alloyent faire la cour iufques en fon logis, les uns par honneur, pource qu'ils eſtoier les amis, les autres par crainte, pource qu'ilz ſe deffioier de luy, ne plus ne moins qu'il ſe fait & qu'il aduient ſouuent es theatres quand on y ioue des tragedies, que celuy qui iouera le personnage de quelque meſſager ou de quelque ſeruiteur, fera plus excellent ioueur, & qui ſe fera ouir entre tous les autres, & au contraire celuy qui a le bandeau royal à l'entour de la teſte, & le ſceptre en la main, à peine l'entend on parler: ainſi eſtoit il lors: car toute la dignité deuë à celuy qui commande eſtoit à l'entour du conſeiller, & ne demouroit au Roy que le nom de la royaulté ſeulement denué de toute puiffance. Si me ſemble biē que ceſte indiſcrette & importune ambition de Lyfander, meritoit biē à l'adventure quelque reprehēſion, iufques à le renger, & le faire contenter du ſecond lieu d'honneur apres le Roy: mais auſſi de reietter de tout poinct par une conuoitiſe & ialouzie de gloire, & uillipender ainſi un ſien amy & bienfaiteur, cela me ſemble auoir eſté choſe indigne d'Ageſilaus. Car tout premieremēt il ne luy donna iamais moyen de rien faire, ny ne luy cōmeit onques charge qui fuſt honorable: ains qui pis eſt, ſ'il ſentoit qu'il euſt pris en main les affaires de quelques uns, & qu'il leur fauoriſaſt, il les ren-

uoyoit rousiours esconduits en leurs maisons, sans qu'ilz peussent rien obtenir de ce qu'ilz poursuyuoient, moins que les plus basses personnes qui eussent sceu uenir, amortissant ainsi petit à petit le credit de Lysander, & luy ostant toute son autorité. Parquoy Lysander uoyant comme il estoit ainsi refusé & rebuté de toutes choses, & s'apperceuant que le port & faueur qu'il cuidoit faire à ses amis leur estoit nuisible, il se deporta de prendre plus leurs affaires en main, & les pria de ne s'adresser plus à luy, & de ne le suyure plus, ains de se retirer deuers le Roy, & deuers ceulx qui pouuoÿét miculx que luy faire plaisir à ceulx qui les honoroÿent. Cela entendu, plusieurs desisterent de luy rompre plus la teste d'affaires, mais non pas de luy faire honneur, ains se trouuoÿét à sa suite pour l'accompagner quand il se uouloit aller promener, ou s'esbatre aux exercices de la personne, & luy faisoÿent la cour, ce qui irritoit & aigrissoit encore dauantage Agesilaus contre luy, pour l'enuie qu'il portoit à sa gloire: de maniere que là ou il donnoit souuent à des simples souldards de belles & honorables commissions de la guerre à executer, ou des uilles à gouverner, il establit Lysander pour toute prouision, cōmissaire des uiures, & distributeur des chairs, & puis se mocquant des Ioniens qui luy faisoÿt tant d'honneur, Qu'ilz aillent maintenāt, disoit il, faire la cour à mon distributeur des

chairs . Parquoy Lyfander eftimant qu'il eftoit
befoing de luy en parler, f'adreffa à luy , & luy
dit en peu de paroles à la guife des Laconiens:
» Vrayement, Agefilaus, tu fçais fort bien abbaif-
» fer tes amis. Ouy bien, luy répondit Agefilaus,
» quand ilz ueulent eſtre plus grands que moy:&
» au contraire ceulx qui ſ'eſtudient à maintenir
» & augmenter mon autorité, c'eſt raiſon qu'ilz
» ſ'en ſentent . Voiremais , repliqua Lyfander , ie
» n'ay pas fait à l'aduenture ce que tu dis : mais
» quād ce ne ſeroit que pour le regard des eſtran-
» gers qui ont les yeux ſur nous , ie te prie mets
» moy en tel endroit de ta charge , ou ie te puiſſe
» eſtre moins odieux & plus utile . Depuis ces
propos Agefilaus l'enuoya ſon lieutenant au
païs de l'Helleſpont , là ou il garda bien en ſon
cœur le courroux qu'il auoit contre luy , mais
pour cela il ne laiſſa pas de faire tout ce qu'il
falloit pour le bien des affaires , comme entre
autres choſes , il pratiqua & feit rebeller con-
tre ſon maiſtre un Capitaine Perſien nommé
Spithridates, uaiſſant homme de ſa perſonne, &
qui eſtoit grand ennemy de Pharnabazus , & a-
uoit une armee qu'il mena à Agefilaus. c'eſt tout
ce qu'il feit quant à la guerre en ce uoyage là.
Parquoy quelque temps apres , il ſ'en retourna
à Sparte avec peu d'honneur, eſtant griefuemēt
picqué & indigné contre Agefilaus , & haïſſant
plus que iamais tout l'eſtat & gouuernemēt de
la uille de Sparte:à l'occafion dequoy il reſolut
adonc

adonc en luy mesme de mettre en auant ce qu'il auoit de lōg temps propensé & proiertté de faire, pour la mutation du gouuernement, qui estoit une telle entreprise: Entre les descendans de Hercules qui se meslerent parmy les Dorien, & retournerent au païs de Peloponese, le plus grand nombre & les plus apparens se logerent & habituerent en la uille de Sparte: mais tous ceulx qui estoient de la race, n'eurent pas droit de succeder au Royaume, ains y en eut deux maisons seulement, l'une qui s'appelloit des Eurytionides, & l'autre des Agiades: les autres maisons, encore qu'elles fussent extraites d'une mesme souche, pour la noblesse de leur sang n'auoyent point plus de part au royaume que le demourant du peuple: car les hōneurs qui s'acquierent par la uertu y estoient proposez à tous les habitās qui les pouuoient acquerir. Lysander dōques estāt un de ceux la, qui estoient descendus de la uraye race de Hercules, & qui neātmoins n'auoyent point de part à la royaulté, quād il se ueit eleué en grand honneur & grāde gloire par les merites de ses haults faictz, & qu'il eut acquis beaucoup d'amis, & beaucoup de credit & d'autorité au maniement des affaires, il luy feit grand mal de uoir que ceulx qui n'estoyent de rien plus nobles que luy, fussent Roys en la uille qu'il auoit accreue par sa uertu, & q̄ luy ne peust auoir tant de puissance, que de faire oster à ces deux maisons le pri-

uilege que les Roys deussent estre eleus d'elles
seulement, & le faire estédre à tous ceulx qui se-
royent issus de la race & du sang de Hercules.
Toutefois les autres disent, qu'il ne le uouloit
pas faire estendre aux descendans de Hercules
seulement, mais aussi à tous les naturelz Spar-
tiates, à celle fin que ce loyer d'honneur fust af-
fecté non à ceulx qui seroyent descendus de la
race de Hercules, mais à tous ceulx qui le res-
sembleroyent en uertu, laquelle l'auoit rendu
luy mesme egal aux Dieux en honneur: car il
esperoit bien que quand on iugeroit ainsi de la
royaulté, il n'y auroit homme en la uille de
Sparte qui plus tost fust eleu Roy que luy: au
moyen dequoy, il attenta premierement de le
suader à ses citoyens par uiues raisons, & à ces
fins apprit par cueur une harengue, que luy
composa Cleon Halicarnassien sur ce propos.
Mais depuis considerant en luy mesme, que la
grandeur d'un changement si estrange qu'il
uouloit innouer, auoit besoing d'un plus har-
dy & plus roide secours, il se meit à dresser une
machine, comme lon dit en commun prouer-
be, pour emouuoir ses citoyens, ne plus ne
moins que lon fait souuent es tragedies ou
lon dresse des engins pour faire descendre
quelque Dieu du ciel: & fut ceste feincte qu'il
se meit à controuuer des oracles & prophe-
ties, estimant que toute la Retorique de Cleon
ne luy seruiroit de riē, si premierement il n'em-

plissoit & n'esblouissoit lescueurs de ses citoyés de quelque superstition, & quelque crainte des Dieux, pour puis apres les amener plus facilement à la raison. Si dit Ephorus qu'il essaya premierement à corrompre par argent la religieuse qui rend les oracles au Temple d'Apollo en la uille de Delphes, & depuis celle du temple de Dodone par l'entremise d'un Pherecles, & que ayant esté refusé de l'une & de l'autre, il s'en alla finalement au temple de Iupiter Hammō, là ou il parla aux presbtres, & leur offrit beaucoup d'argent pour mesme effect, dont ilz se courroucerent tellement à luy qu'ilz enuoyerent des gens expres à Sparte pour le charger de les auoir uoulu corrompre: de laquelle accusation ayant esté absouls, par le conseil, ses accusateurs qui estoient des Libyens, en s'en allant dirent: Nous iugerons quelquefois plus iustement que uous n'avez faict, Seigneurs Lacedæmoniens, quand uous uiendrez un iour pour habiter en nostre païs de la Libye: supposans qu'il y auoit une ancienne prophetie, laquelle portoit que les Lacedæmoniens deuoyent une fois aller habiter au païs de la Libye. Mais il uault miculx que nous escriuions tout du lōg le discours entier de la menee & la ruse & malice de la feincte qui ne fut pas petite, ny bastie sur un fondement tel quel, ains comme en une proposition de Mathematique y eut plusieurs grandes presuppositiōs & plusieurs pre-

misses longues & bien emmeslees pour uenir à la conclusion, laquelle ie deduiray de poinct en poinct, suyuant ce qu'en a escrit un historien & philosophe tout ensemble: Il y auoit es marches du royaume de Pont une femme qui se disoit estre enceinte d'Apollo: ce que plusieurs, comme lon peult penser, ne uouloyent point croire & plusieurs aussi y adioustoyent foy, de maniere, que quand elle se fut deliuree d'un beau filz, plusieurs gens d'estat & de qualité prirent le soing de le faire nourrir & entretenir. Cest enfant, ne sçay pour quelle cause ny comment, fut nommé Silenus: & Lysander ayât ce commencement d'ailleurs, ourdit & acheua le demourant de la trame du sien: car il eut plusieurs, & non point petits personnages, qui luy aiderent à bastir, par maniere de dire, l'entree de ceste farce, en faisant courir le bruit de la naissance de cest enfant, sans que lon peust souspeçonner à quelle intention ilz le faisoÿent: & si apportèrent encore une autre nouuelle de Delphes qu'ilz semerent aussi par la uille de Sparte, sçauoir est, que les presbtres du temple y gardoyent des liures secrets, ou il y auoit de tres anciens oracles, ausquelz culx mesmes n'o-
zoyent pas toucher, ny n'estoit loisible à personne de les lire, sinō à un qui scroit né de la semence d'Apollo, lequel deuoit uenir apres un long espace de tēps, & faire apparoir de sa naissance aux presbtres qui gardoyent lesdicts pa-

pyers, & ce par quelque marque & enseigne qu'ilz auoyét secrette entre eulx : moyennât laquelle estant recogneu pour filz d'Apollo, il pourroit adóc prendre les papyrus & lire les anciennes reuelatiōs & propheties qui y estoient. Ces choses ainsi preparees, on auoit donné ordre que Silenus uiendroic à demander ces papyrus, comme estant filz d'Apollo, & que les presbtres qui aidoyent à conduire la menec, feroient semblant de s'enquerir diligemment de toutes choses & de s'informer commēt il estoit né, & que finablement apres qu'ilz auroient biē uerifié tout, alors ilz luy cōsigneroyēt entre ses mains les papyrus, cōme à celuy qui ueritablemēt seroit filz d'Apollo, & q̄ luy en presence de plusieurs tesmoings les liroit publiquemēt, & entre autres notamment celle pour laquelle ceste longue seincte estoit attiltree touchant la royaulté de Lacedamone: Qu'il estoit meilleur
 & plus expedient aux Spartiates qu'ilz eleus-
 sent pour leurs Roys ceulx qui se trouueroyent
 les plus gens de bien de tous leurs citoyens.
 Mais cōme ce Silenus fust desia paruenue à son adolescence, & fust expressement uenu en la Grece pour executer ce desseing, tout le mystere fut gasté par la couardise de l'un des ioueurs & des compagnons de Lysander qui luy aidoyent à conduire ce mystere, lequel quand ce uint au faict & au prendre eut peur, & se retira de l'entreprise : toutefois il n'en fut iamais rien

descouuert du uiuant de Lyfander, ains seulement apres sa mort : car il mourut premier que le Roy Agefilaus fust retourné de l'Asie, estant auant que mourir tumbé en la guerre Bœotique, ou plus tost y ayant luy mesme fait tumber la Grece: car il se dit en l'une & en l'autre sorte: & y en a qui en mettét la coulpe sur luy, les autres sur les Thebains, les autres sur tous deux: car ilz tournét en crime aux Thebains ce qu'ilz renuerferent sans dessus dessoubz, les sacrifices publiques que faisoit Agefilaus en la uille d'Aulide: & disent aussi qu'Androclides & Amphitheus estans gaignez & corrompus par argent du Roy de Perse, pour embrouiller les Lacedamoniens de guerres au dedás de la Grece, susciterent celle guerre entre les Grecs, & cōmencerent à courir & piller le païs des Phociens. Les autres disent que Lyfander estoit courroucé à eulx, pource que seuls entre tous les alliez & cōfederez, ilz demãdoient la dixieme partie de tout le butin qui auoit esté gaigné en la guerre contre les Atheniens, & qu'ilz auoyent esté malcontents de l'argent que Lyfander auoit enuoyé à Sparte. Mais sur tout leur uouloit Lyfander plus de mal, à cause qu'ilz auoyent les premiers donné moyen aux Atheniens de se deliurer de l'oppression des trente tyrans qu'il auoit establis pour gouuerneurs à Athenes, & pour lesq̃ls fauoriser & faire craindre, les Lacedamoniens auoyent ordonné par

» edict public, Que les bānis qui s'enfouiroient,
» d'Athenes, pourroyent estre pris au corps en
» quelque lieu qu'ilz s'enfouissent, & q̄ ceulx qui
» y mettroyēt empeschement, seroyent declarez
» rebelles & ennemis des Lacedæmoniens : car
» au contraire de cest edict, les Thebains en fei-
» rent un autre fort semblable & cōuenable aux
» glorieux faict̄s de Bacchus & de Hercules leurs
» ancestres, par lequel estoit porté, Que toute
» maison & toute uille fust ouuerte par tout le
» païs de la Bœoce aux Atheniens qui y uou-
» droyēt uenir, & que celuy qui ne secourroit un
» banny d'Athenes contre celuy qui le uoudroit
» emmener par force, payeroit l'amēde de six cēts
» escus : & si l'y auoit aucuns qui portassent ar-
» mes uers Athenes par le païs de la Bœoce, que
» les Thebains ne feissent pas semblant d'en rien
» uoir ne riē ouir. Si ne fut point une simulation
» de dire qu'ilz ordonnassent de paroles choses si
» humaines & si bien seantes à un peuple Grec,
» & puis que les effects ne respondissent pas aux
» edicts & proclamations. Car Thrasybulus &
» ses consors qui occuperent le chasteau de Phy-
» le, partirent de Thebes, dont ilz eurent argent
» & armes, & leur donnerent les Thebains le
» moyen de commencer & de conduire leur en-
» treprise si secrettement, qu'elle ne fut point
» descouuerte. Voila donques les causes, pour les-
» quelles Lysander prit si fort à cucur la querelle
» cōtre les Thebains, & estāt sa cholere fort uio-

lente, mesmement à cause de la melācholie qui alloit de iour en iour croissant en luy pour raison de sa uieillesse, il feit tant enuers les Ephores qu'il leur persuada d'y enuoyer garnison, & luy mesme en prenant la charge, se meit incontinent en chemin avec ses gens: mais depuis on y enuoya encore le Roy Pausanias avec une armee, lequel deuoit faire un grand circuit, & entrer dedans le païs de la Bœoce par la montagne de Citharō; & Lyfander le deuoit aller rencontrer par le païs de la Phocide, avec une bonne trouppes de gens de guerre qu'il auoit. Si prit la uille des Orchomeniens, laquelle se rendit uoluntairement à luy aussi tost qu'il fut arriué deuant, & de là sen alla à celle de Lebadie, qu'il pillā: & de là escriuit au Roy Pausanias, qu'au partir de Platees, il prist son chemin droit uers la uille d'Aliarte, & que luy le lendemain au poinct du iour se rendroit ioignant leurs murailles. Ces lettres furent surprises par quelques coureurs des Thebains qui rencontrerent le messager qui les portoit: parquoy les Thebains aduertis de leur entreprise, laisserent leur uille à garder aux Atheniens qui leur estoient uenus au secours, & eux la nuict enuiron le premier sonne se partirent de Thebes, & cheminerent toute la nuict en si bonne diligence, qu'ilz arriuerēt le matin à Aliarte un peu deuant Lyfander, & meirent une partie de leurs gens dedans la uille. Quant à Lyfander, il auoit

proposé du commencement de tenir ses gens dessus une motte qui est pres de la uille, & là attendre la uenue de Pausanias: mais depuis, quād il ueit que le iour se passoit & qu'il ne uenoit point, il ne peut plus auoir patience, & prenant ses armes apres auoir presché les alliez qu'il auoit avec luy, feit marcher ses gens en bataille plus longue que large le long du grand chemin qui alloit uers la uille. Ce pendant les Thebains qui estoient demourez hors la uille, laissant Aliarte à main gauche, s'allerent ruer sur la cueuë de l'armee des ennemis à l'endroit de la fonteine, qui s'appelle Cissusa: là ou les fables des poëtes comptent que les nourrices de Bacchus le lauerent quand il sortit du uentre de sa mere, pource que l'eau qui y sourd, combien qu'elle soit fort claire & doulce à boire, a neantmoins ne sçay quoy de couleur de uin: & les iauelots de Candie, que lon appelle, sont tout à l'entour non gueres loing: ce que les Aliartiens alleguent pour prouuer que Radamanthus a autrefois demouré en ce quartier là, & s'y monstre encore iusques auiourd'hui sa sepulture, qu'ilz appellent Alea: & y a assez pres de là aussi le monument d'Alcmena, qui fut, ainsi qu'ilz disent, inhumee en ce lieu là, ayant esté mariee avec Radamanthus depuis la mort d'Amphytrion. Mais les Thebains, qui estoient dedans la uille avec les Aliartiens, ne se bougerent iusques à ce qu'ilz ueirent Lyfander avec les pre-

miers de sa troupe tout aupres de leurs murailles : car alors ilz feirent soudainement ouvrir les portes, & se ruans sur luy le tuerent luy mesme avec son deuin & quelque peu d'autres, pource que la pluspart se retira au fort de leur bataille: toutefois les Thebains ne les lascherēt point, ains les poursuyurent si uiuement & de si pres, qu'ilz les meirent tous en route, & leur feirent à tous prendre la fuitte à trauers les montagnes, apres en auoir occis trois mille sur le champ : aussi y en demoura il trois cents des Thebains, qui poursuyurent les ennemis trop asprement iusques en lieux aspres & forts pour eulx. C'estoyent presque tous ceulx que lon sospeçonnoit à Thebes de fauoriser soubz main au party des Lacedæmoniens, & pour le desir qu'ilz eurent d'oster ceste opinion à leurs citoyens, se hazarderent sans propos, tellement qu'ilz se perdirent en ceste poursuite. Pausanias eut nouuelle de ceste desfaitte sur le chemin de Plataës à Thespies, & tira oultre, marchant tousiours en bataille iusques à Aliarte, là ou arriua aussi en mesme temps Thrasylulus, amenant de Thebes le secours des Atheniens. Et comme Pausanias fust en propos d'enuoyer demander aux ennemis licence de pouuoir enleuer leurs morts pour les inhumer, les plus aagez des Spartiates qui estoyent en son armee, le trouuans fort mauuais, s'en courroucerent premierement entre eulx, puis s'en allerent au

Roy mesme, luy protester qu'il faisoit deshonneur à Sparte, de uouloir enleuer le corps de Lyfander par le congé & la mercy des ennemis, & qu'il falloit l'aller combattre à uiue force d'armes, & l'inhumer honorablement apres qu'ilz auroyent uaincu les ennemis, ou bien si la fortune uouloit qu'ilz y fussent desfaits eulx mesmes, qu'encore leur seroit il plus honorable de demourer gisans sur la campagne aupres de leur Capitaine, que de demander congé pour enleuer son corps. Mais nonobstant toutes ces remonstrances des uieillards, le Roy Pausanias uoyant que c'estoit chose bien mal aisee de desfaire les Thebains en bataille lors qu'ilz uenoient d'estre uictorieux, & dauantage que le corps de Lyfander gisoit tout ioignant les murailles d'Aliarte, tellement qu'il seroit bien difficile, & non moins dangereux de l'enleuer, encore qu'ilz eussent gaigné la bataille, il enuoya un herault aux ennemis. Et ayant fait trefues pour quelques iours, emmena son armee arriere, & emporta le corps de Lyfander, lequel ilz inhumerent aussi tost qu'ilz furent hors des confins de la Bœoce dedans le territoire des Panopeiens, là ou est encores aujourd'hui sa sepulture sur le chemin, par ou lon ua de la uille de Delphes à celle de Chæronee. Là ou estant le camp de Pausanias logé, lon dit qu'il y eut un Phocien, lequel faisant le discours de la bataille à un autre qui ne sy estoit pas trouué,

dit que les ennemis les estoient uenus charger ainsi que Lysander auoit ia passé l'Oplites, de quoy l'autre s'esmerueillant, il y eut un Spartiate amy de Lysander qui luy demanda, ayant ouy tout leur propos, que c'estoit qu'il appelloit Oplites, & qu'il n'auoit point ouy nommer ce mot la. Comment, luy respondit adonc le Phocien, si est-ce que les ennemis ont là abbatu les premiers de noz gens qui sont demourez sur le champ: car le ruisseau qui passe au long des murailles de la uille s'appelle Oplites. Ce que le Spartiate ayant entédu, il se prit aussi tost à plover chaudement, en disant, Or est il donques impossible à l'homme d'euter sa destinee: pource que Lysander auoit autrefois eu un oracle, dont la substance estoit telle:

33 Je te conseille aller tousiours fuyant,
 33 O Lysander, Oplites le bruyant,
 33 Et le Dragon filz de la terre mere,
 33 Qui finement t'assaudra par derriere.

Toutefois il y en a qui estiment que ce ruisseau de Oplites n'est pas celuy qui passe le long des murailles de Aliarte, ains est le torrét qui court pres la uille de Coronee, & ua tumber en la riuere de Phliarus au long de la uille: & disent que anciennement on l'appelloit Hoplia, mais maintenant on l'appelle Isomantus. Celuy qui tua Lysander fut un Aliartien nommé Neochorus, lequel portoit sur son escu un Dragon peinct: ce que l'oracle uouloit signifier, ainsi

que lon coniecture. Lon dit auffi que du temps de la guerre Peloponesiaque, les Thebains eurent un oracle du temple d'Apollo Ismenien, lequel oracle leur prophetisa la bataille qu'ilz gaagnerent pres le chasteau de Delium, & ceste cy de Aliarte, qui fut trente ans depuis. La reneur de l'oracle fut telle :

- ” Toy qui uiendras guetter les louueaux fins,
- ” Garde toy bien des extremes confins,
- ” Et de la motte Orchalide, ou sans cesse
- ” Gist le Regnard qui iamais ne la laisse.

Il appelle les extremes confins, le territoire qui est à l'entour de Delium, pource que là confine la Bœoce avec le país de l'Attique : & la motte Orchalide, celle qui se nomme auiourdhuy Alopeque, comme qui diroit la regnardiere, laquelle est du costé que la uille d'Aliarte regarde la montagne de Helicon. Ayant donques Lysander ainsi esté occis, les Spartiates sur l'heure en furent si desplaisans, qu'ilz en uolurent faire un proces criminel, comme d'un crime capital, à leur Roy Pausanias, lequel n'en oza attendre l'issue du iugement, ains s'enfouit en la uille de Tegce, là ou il acheua le reste de ses iours en la franchise & sauuegarde du temple de Minerue. Car la pauureté de Lysander qui uint à estre descouuerte à sa mort, rendit sa uertu plus claire & plus illustre qu'elle n'estoit en son uiuant, quand on ueit que de tant d'or & d'argent qui estoit passé par ses mains, tant d'au-

thorité qu'il auoit eüe, de tant de uilles & de citez qui luy auoyent fait la cour, & brief d'une si grande & si puissante royaulté, par maniere de dire, qu'il auoit eüe entre mains, iamais il n'en auoit aggrandy ny augmenté sa maison d'une seule maille, ainsi comme l'escrit Theopompus, auquel on doit adiouster plus de foy quand il louë, que quand il blasme, pource qu'il prent plus de plaisir à mesdire ordinairement, qu'il ne fait pas à louer. Quelque temps apres, ainsi qu'escrit Ephorus, il aduint que les Spartiates eurent quelque differët avec leurs alliez, pour raison duquel il fallut uisiter les papyrus que Lyfander auoit en sa maison. Agesilaus y alla, & trouua entre les autres papyrus, la harenque qu'il auoit preparee pour persuader aux Spartiates de changer leur gouuernement, & leur remonstrer qu'il falloit oster aux Eurytionides & aux Agiades, le priuilege qu'ilz auoyët, que les Roys de Sparte ne pouuoient estre eleuz que de ces deux familles la, & remettre ce priuilege en commun, de sorte qu'il fust loisible d'elire Roys de Sparte ceulx qui seroyent les plus gens de bien de toute la uille. Agesilaus fut entre deux de monstrier ceste harenque en public, pour faire uoir aux Spartiates quel citoyen auoit esté Lyfander en son cueur: mais Lacratidas homme sage & prudent, qui lors estoit president des Ephores, l'en engarda, disant qu'il ne falloit point deterrer Lyfander, ains

plus tost enterrer avec luy sa harengue qui estoit escripte d'un si grand artifice & si finement pour persuader. Toutefois si luy feirent ilz plusieurs grands honneurs encore apres sa mort, & entre autres, ilz condamnerent en grosse amende deux citoyens, qui auoyent fiancé ses deux filles du uiuant de leur pere, & puis les refuzerent quand ilz ueirent qu'à sa mort il se trouua ainsi pauvre, pourautant qu'ilz auoyent recherché son alliance, pensans qu'il fust bien riche, & puis n'en auoyent point uoulu quand par sa pauureté ilz auoyent cogneu qu'il estoit homme de bien & entier. Ainsi peult on uoir qu'il y auoit à Sparte peine establie contre ceulx qui ne se marioyent point, ou qui se marioyēt trop tard, ou qui se marioyent mal, & à ceste peine estoient subiects ceulx qui au lieu de chercher l'alliance de gens de bien, ou de leurs parents, cherchoyent à se marier richement. Voila ce que nous auions à escrire des faicts & meurs de Lyfander.



SYLLA.

LVCIVS Cornelius Sylla estoit bien de race de Patriciens, qui sont à Rome les nobles & gentilshommes, & y eut un de ses ancestres nommé Rufinus, qui paruint à la dignité Consulaire, lequel toutefois a esté plus renommé pour l'infamie dont il fut noté, que pour honneur auquel il soit parvenu, à cause qu'il se trouua auoir en sa maison plus de dix marcs en uaiselle d'argent, chose qui estoit en ce temps la defendue par ordonnance expresse, & pour ceste raison fut priué de l'honneur de Sénateur, & perdit le priuilege d'entrer au Senat: depuis laquelle ignominie tous ses descendans demourerent tousiours bas. Et Sylla mesme eut bien peu de biens de son pere, tellement qu'en sa premiere ieunesse il logea en maison d'autrui à bien petit louage, ainsi que depuis il luy fut reproché quand on le ueit plus riche que lon
ne pen-

ne pensoit qu'il eust merit . Car comme il se
uantast & glorifiast   son retour de la guerre
d'Afrique, il y eut un personnage de bien &
d'honneur qui luy dit : Et comment seroit il
possible que tu fusses homme de bien, ayant si
bien dequoy comme tu as, ueu que ton pere ne
t'a rien laiss  ? Car combien qu'il n'y eust desia
plus es meurs des hommes Romains celle an-
ciene roideur de preudhommie, & celle purit 
qui y souloit estre, & qu'ilz eussent un peu de-
clin , & receu en leurs cueurs la conuoitise des
delices & de la superfluit  : ce neantmoins en-
core mettoient ilz en pareil degr  de reproche
ceulx qui ne se maintenoient pas en la pauvre-
t  de leurs peres, que ceulx qui consumoyent
& mettoient   mal la richesse que leurs parents
leur auoyent laiss e. Mais depuis encore quand
il eut toutes choses en sa main, lors qu'il faisoit
mourir tant de gens, il y eut un homme n  de
serfs affranchis, qui pour auoir recel  & sauu 
un de ceulx qui estoient bannis par affiches, e-
stant tout prest   estre precipit  du hault de la
roche Tarpeiene, luy reprocha qu'ilz auoyent
longuement uescu & log  ensemble dedans
une m me maison, luy payant uingt escus de
louage pour le hault de la maison, & Sylla tren-
te pour le louage du bas : tellement qu'entre
leurs deux fortunes il n'y auoit pour lors que
dix escus   dire. Voila ce que lon treuue par e-
script quant   la premiere condition de ses bi s :

au demourant quant à la forme de son corps, le reste se uoit assez par ses images & statues qui sont demourees : mais quant à ses yeux qui estoient ardents & estincellans à merueilles, la couleur de son uisage les rendoit encore plus effroyables à uoir : car il estoit fort coupperosé & semé de taches blanches par endroits, dont on dit que le nom de Sylla luy fut imposé à raison de sa couleur, & y eut un des gaudisseurs de Athenes, qui luy en donna un traict de mocquerie par ce uer :

Sylla est une meure asperse de farine.

Si n'est point impertinent d'aller par telz signes & indices extérieurs recherchant le naturel de ce personnage, lequel on dit auoir esté de sa nature si enclin à gaudir & mocquer, qu'estant encore fort ieune & incogneu, il ne bougeoit ordinairement d'auec des farceurs, bouffons & basteleurs, à yurongner & gourmander en toute dissolution : & depuis encore apres qu'il fut uenu au dessus de toutes choses, il assembloit tous les iours les plus effrontez gaudisseurs, plaisans, & toute telle maniere de gens qui font profession de faire rire, auec lesquelz il beuuoit & mangeoit ordinairement, & estriuoit auec eulx à qui rencontreroit de meilleurs brocquards, & qui se gaudiroit le mieulx : en quoy il ne faisoit pas seulement hors de temps & de saison chose malscante à son aage, mais aussi oultre ce qu'il deshonoroit la dignité de son

a C'est pource que syl en Latin signifie l'ochre, qui deuient rouge quand elle est mise au feu, & pourtant Syllaceus color en Viètroue signifie couleur de pourpre.

magistrat, encore laissoit il aller en nonchaloir plusieurs affaires d'importance, qui meritoient que lon en eust grand soing: car depuis qu'il festoit une fois mis à table, il ne luy falloit plus parler d'affaires de consequence: & combien que hors de là il fust homme actif, diligent & fevere, il deuenoit soudainement tout autre depuis qu'il festoit une fois ietté en telle compagnie pour boire & faire bonne chere: de sorte qu'il se rendoit oultre mesure priué, & par trop familier à ne sçay quelz farceurs, plaisans, balladins & danseurs, qui en faisoient alors tout ce qu'ilz uouloyent. De ceste dissolution proceda, à mon aduis, le uice de la luxure, auquel il estoit subiect, se laissant facilement aller aux uoluptez & à l'amour, si bien que quand il fut uieil encore ne sen pouuoit il garder. Car estant encore en ses ieunes ans il deuint amoureux d'un ioueur de farces nommé Metrobius, & cela luy alla croissant avec l'aage: car ayant commencé le premier à aimer une courtisane, femme riche, nommee Nicopolis, à la fin par continuation de la hanter, & par la grace que luy donnoit enuers elle la fleur de sa ieunesse & beauté, elle mesme deuint amoureuse de luy, de maniere, que uenant à mourir elle l'institua son heritier. Aussi fut il heritier de sa belle mere, qui l'aima comme si c'eust esté son propre filz, & se trouua moyenement riche apres auoir recueilly ces deux successions. Depuis ayant esté eleu

Questeur au premier Consulat de Marius, il s'embarqua quand & luy pour aller faire la guerre au Roy Iugurtha, là ou arriué qu'il fut au camp, il se monstra homme de ualeur en toutes autres choses, & mesmemét ayant sceu bien user d'une occasion qui se presenta à luy, il gaigna l'amitié de Bocchus Roy des Numidiens : car il recueillit & traitta humainement ses ambassadeurs eschappez des mains d'une troupe de brigands Numidiens, & leur ayant fait de beaux presens, les feit reconuoyer avec bonne & seure garde. Or quant à ce Roy Bocchus, il y auoit ia long temps qu'il haïssoit, & qui plus est, craignoit son gendre Iugurtha, & lors apres qu'il auoit esté desfaict en bataille, & qu'il estoit allé ietter entre ses bras, il machinoit de luy faire un tour de trahison, pour lequel effect il enuoya querir secrettement Sylla, aimant mieulx que la prise de Iugurtha se feist par luy que par soy. Si en communiqua Sylla avec Marius, duquel ayant eu quelque petit nombre de gens de guerre pour l'accompagner, il falla mettre en un tresgrand danger, en commettant sa personne à la foy d'un Roy barbare pour en prendre un autre, attendu mesmement que ce luy en qui il se fioit, uisoit de si grande desloyauté enuers ses plus proches allicz: toute fois Bocchus ayant les deux en sa puissance, & s'estant luy mesme rengé à ce poinct de necessité, qu'il estoit force qu'il trahist ou l'un ou l'autre, apres

auoir longuement disputé en luy mesme, lequel il feroit plus tost, à la fin executa le desseing de sa premiere trahison, & deliura Iugurtha entre les mains de Sylla. Il est bien uray, que celuy qui triompha de ceste prise fut Marius, mais l'enuie que lon luy portoit, faisoit que lon attribuoit la gloire du faict à Sylla: ce qui secrettement faschoit fort Marius, mesmement que Sylla, qui de sa nature estoit haultain, & qui lors premier commenceoit à uenir d'une uie basse, obscure & incogneue en quelque lumiere entre ses citoyens, & à goustier que c'est de l'honneur, en deuint si ambitieux & si conuoiteux de gloire, qu'il en feit grauer l'histoire en un anneau qu'il porta tousiours depuis, & s'en seruit de cachet. L'engraueure estoit le Roy Bocchus qui liuroit, & Sylla qui receuoit Iugurtha prisonnier. Ces choses desplaisoyét fort à Marius: mais toute fois estimant que Sylla n'estoit pas encore tant enuié que luy, il se seruit de luy à la guerre: car en son second Consulat il le feit l'un de ses lieutenans, & en son troisieme il eut charge sous luy de mille homes de pied, & feit beaucoup de bons & utiles exploits par luy: car estant son lieutenant, il prit un Capitaine des Gaulois Tectosages qui se nommoit Copillus, & estant Chef de mille hommes, il feit tant enuers les Marfes, qui est une grande, puissante & peuplee nation en Italie, qu'il leur persuada de demourer bons amis, allies & confe-

derez des Romains , pour lesquelz actes il aperceut que Marius estoit fasché contre luy, pource qu'il ne luy donnoit plus de cōmissions honorables, ny matiere de faire rien de bon, ains au contraire, empeschoit le plus qu'il pouuoit son accroissement. Au moyen dequoy il se rengea du costé de Catulus qui estoit compagnon de Marius au Consulat. Cestuy Catulus estoit bien homme de bien, mais un peu froid au faict des armes, ce qui estoit cause qu'il committoit à Sylla tous les plus grands & principaux affaires de sa charge: en quoy faisant il luy donna matiere d'augmenter non seulement sa reputation, mais aussi son credit & sa puissance: car il conquist & subiugua par force d'armes la pluspart des nations barbares qui habitent dedans les monts des Alpes, & y ayant faulte de uiures au camp, il en prit la commission, & en fait uenir si grande quantité, que ceulx de Catulus en ayans plus qu'il ne leur en falloit, en departoyent à ceulx de Marius, ce que luy mesme escrit auoir fort despleu à Marius. Voila la premiere source de leur inimitié, laquelle ayant commencé par un si frivole & si leger fondement, proceda en auant par guerres ciuiles, effusion de sang, & partialitez & dissensions irremediables, iusques à ce, que finablement elle se termina en une uiolente tyrannie & confusion de tout l'estat & empire Romain: ce qui monstre & tesmoigne que le poëte Euripides estoit

homme sage, & bien entendant les maux qui aduient aux choses publiques, quand il conseille & commande aux gouuerneurs, de foudrir l'ambition comme une trespestilente & mortelle furie à ceulx qui s'accointent d'elle. Au demourant Sylla estimant que la reputation qu'il auoit desormais acquise par les armes, estoit suffisante pour luy ouurir le chemin aux estats & honneurs de la uille de Rome, il ne fut pas plus tost retourné de la guerre, qu'il se meit incontinent à sonder la uolunté du peuple, se faisant escrire entre ceulx qui demandoient la Præture urbaine, c'est à dire, l'office du Iuge ordinaire qui faisoit droit à ceulx de la uille, & en fut refusé par les uoix du peuple, dont luy mesme en attribue la cause au menu populaire, disant que la commune scauoit bien l'amitié qu'il auoit avec le Roy Bocchus, & que à ceste cause les menues gens s'attendants, que s'il estoit Ædile auant que Præteur, il leur feroit uoir de grandes & magnifiques chasses, & des combats de bestes sauages de la Libye, eleurent d'autres Præteurs, & le debouterent de sa poursuite, en esperance de le contraindre par ce moyen d'estre premierement Ædile. Toutefois il semble qu'il ne confesse pas la cause ueritable de ce rebut la, comme son faict mesme l'en argue & condamne: car l'annee ensuyuant il fut cleu Præteur, moyenant ce qu'il gaigna partie du peuple par caresses, & partie par argent: à l'occasion de-

quoy estant uenu à grosses paroles à l'encontre de Cæsar, iusques à le menacer en cholere qu'il useroit de l'autorité & puissance à l'encontre de luy que son office luy donnoit: Cæsar en riant luy respondit, Tu as raison de l'appeller ton office: car il est uoirement tien, puis que tu l'as achepté. Mais apres que le temps de sa Præture fut expiré, il fut enuoyé en la Cappadocie, ayant pour couuerture de son uoyage la commission de remettre Ariobarzanes en son estat: mais la cause ueritable estoit pour reprimer un peu le Roy Mithridates, lequel s'entremettoit de trop de choses, & alloit embrassant un accroissement de nouvelle seigneurie de non moindre estendue que celle qu'il auoit auparauant: uray est qu'il ne mena pas grand nombre de gens de guerre de l'Italie, mais il fut affectueusement seruy & secouru par les alliez & confederez du peuple Romain sur les lieux, à l'aide desquelz il desfeit une grosse troupe de Cappadociens, & depuis encore une autre plus grosse d'Armeniens qui uenoyent au secours, tellement qu'il dechassa Gordius de la Cappadocie, & y remeit Ariobarzanes: apres lequel exploit ainsi comme il estoit de seiour au long de la riuiera d'Euphrates, il uint deuers luy un Parthe nommé Orobazus, ambassadeur du Roy des Parthes Arsaces. Or ces deux natiōs, la Romaine & la Parthiene, iamais au parauant n'auoyent eu communication de chose quelcōque

ensemble : & est cela un des poincts , entre les autres , qui monstre la grande fortune qu'auoit Sylla , que les Parthes le soyent adressez à luy premier pour auoir amitié & contracter alliance par son moyé avec les Romains. Lon dit qu'à la receptiō de cest ambassadeur il feit apprester trois chaires , l'une pour Ariobarzanes , l'autre pour l'ambassadeur Orobazus , & la troisieme pour soy, qu'il feit mettre au milieu des deux autres , sur laquelle seant il dōna audience à l'ambassadeur : ce qui fut cause q̃ le Roy de Parthe feit depuis mourir Orobaz⁹. Si y en a qui louēt cest acte de Sylla , de ce qu'il teint ainsi haultement sa grauité enuers des Barbares: les autres le blasment cōme acte d'ambitiō faict impertinément hors de propos & de saison. Et lit on qu'un deuin Chaldæien, qui se trouua à ceste receptiō en la suite d'Orobazus , ayant soigneusement contéplé le uisage de Sylla, & obserué diligemment tous les mouuemēs , tant de son esprit, que de son corps, pour iuger, non par aduis de païs, mais suyuant les regles de son art , quelle deuoit estre sa nature , le tout bien considéré , dit qu'il estoit force forcee que ce personnage la fust un iour tresgrand , & qu'il s'esmerueilloit comme deslors mesme il pouuoit supporter qu'il ne fust le premier du monde . Quand il fut de retour à Rome il y eut un Censorinus qui l'appella en iustice , comme concussionnaire , le chargeant d'auoir pris & emporté quand & luy

grosse somme d'argent d'un royaume allié & amy des Romains, cōtre la defense expresse des ordonnances: toutefois il ne pousuyuit pas son accusation, ains s'en deporta. Ce pendant l'ini-mitié commencee entre luy & Marius se r'alluma par une occasion nouuelle de l'ambition du Roy Bocchus, lequel en partie pour s'insinuer de plus en plus en la bonne grace du peuple Romain, & en partie aussi pour gratifier à Sylla, donna & dedia au temple de Iupiter Capitolin des images de uictoire qui portoyent des trophées, & aupres d'elles l'image de Iugurtha que luy deliuroit entre les mains de Sylla, le tout de fin or. Dequoy Marius fut si fort indigné, qu'il attenta de les oster par force: mais il y en eut d'autres qui prirent à defendre la cause de Sylla, tellement que pour la querelle de ces deux personages, la uille estoit toute preste de rumber en grande combustion, n'eust esté que la guerre des allicz de l'Italie, qui de long temps se couuoit & fumoit, s'enflamma tout à un coup contre la uille de Rome: ce qui reprima un peu pour l'heure la sedition. En ceste guerre qui fut de tresgrande cōsequence, comme celle ou il y eut de fort diuers accidets, & qui appor-ta beaucoup de maulx aux Romains, & les meit en de tresgrieus dangers, Marius ne peut on-ques faire rien de grand: par ou il appert que la uertu militaire a besoing de la uigueur, force & roideur du corps: & Sylla au contraire y ayant

fait plusieurs bons & utiles exploits, acquit reputation de grand homme de guerre & de bon Capitaine entre ses citoyens, mais de tresgrand & de tresheureux entre les ennemis mesmes: toutefois il ne fait pas comme auoit fait Timotheus Athenien filz de Conon, lequel comme ses enuieux & maluueillans attribuaissent ses beaux faicts à la faueur de fortune, & peignissent en des tableaux la fortune, qui luy apportoit les uilles toutes prises & enuelopees de retz pendant qu'il dormoit, il le prit à mal & s'en courroucea cōtre ceulx qui le faisoient, disant qu'ilz luy ostoyent la gloire qui luy appartenoit: à l'occasiō dequoy un iour qu'il estoit retourné de la guerre, ou il luy estoit biē succédé, apres auoir réduit compte au peuple, & recité publiquemēt les choses par luy faittes en son uoyage, il dit, Seigneurs Atheniens, la fortune n'y a point de part en tout ce que ie uous ay compté. Les Dieux furēt indignez de ceste folle ambition de Timothe⁹, de maniere qu'il ne fait onques puis chose qui uallust, ains luy tournerent toutes choses à cōtrepoil, iusques à tāt qu'il ueint à estre si fort haï du peuple, qu'il fut à la fin chassé & banny d'Athenes. Mais Sylla, au contraire, n'enduroit pas seulement en patience le dire de ceulx qui le preschoyent heureux & singulièrement fauorizé de la fortune, ains augmentant ceste opiniō, & s'en glorifiant comme d'une grace speciale des Dieux, attribuoit toute la gloire de

ses faictz à la fortune, soit qu'il le feist par une maniere de uaine gloire, ou que ueritablement il eust ceste fantasie, que les Dieux le guidoyēt en tous ses affaires : car il a escrit luy mesme en ses commentaires, que des entreprises qu'il sembloit auoir bien consultees, celles qu'il hazardoit chaudement selon l'occasion qui se presentoit contre ce qu'il auoit parauant arresté & resolu en son conseil, c'estoyent celles qui luy succedoyent le mieulx. Dauantage quand il dit qu'il estoit mieulx né à la fortune qu'à la guerre, il semble qu'il recognoissoit tenir ses prosperitez plus tost de la fortune que de sa ualeur. brief il semble qu'en tout & par tout il se soubmettoit entierement & aduouoit de pendre totalement de la fortune, attendu mesme-ment qu'il attribue à une singuliere faueur des Dieux la bonne union & concorde qu'il maintint avec Metellus son beau pere, qui estoit homme en autorité & en dignité pareil à luy: car là ou lon s'attendoit qu'il luy deust faire beaucoup d'empeschement, il le trouua tresdoux & gracieux en son endroit en tout ce qu'ilz curēt à desmesler ensemble à raison de la societé de leur office. Qui plus est, en ses commentaires qu'il dedia à Lucullus, il luy conseille & l'admoneste de ne tenir rien si certain que ce que les Dieux luy auroient reuelé ou commandé la nuit en songe. Il escrit aussi que lors qu'il fut enuoyé avec armee à la guerre des

alliez, il se feit aupres de Lauerne soudainemēt une grande fente & ouuerture de terre, de laquelle il sourdit incontinent un grand feu & une flamme claire qui ialit uers le ciel: surquoy les deuins enquis respondirent que cela signi-
fioit qu'il y auroit un hōme de bien, & beau de uisage par excellēce, qui prenant l'autorité sou-
ueraine en sa main, appaiseroit tous les trou-
bles & tumultes qui estoient lors en la uille de Rome, & dit que c'estoit luy que les Dieux en-
tendoyent, par ce qu'il auoit entre autres cho-
ses ce poinct la de singuliere beauté, que ses che-
veux estoient blonds comme fin or, & qu'il n'a-
uoit point de honte de se nommer homme de
bien, apres auoir fait tant de belles & de grādes
choses. Mais à tant auons nous assez parlé de
la fiance qu'il auoit en la faueur des Dieux. Au
demourant il semble auoir esté fort inegal en
ses meurs, & fort dissemblable à soy mesme: car
fil estoit beaucoup en un endroit, il donnoit
encore plus en un autre. Il auançoit les uns sans
propos, & rebutoit les autres sans raison. Il s'hu-
milioit enuers ceulx dont il auoit affaire, & se
faisoit adorer par ceulx qui auoyent affaire de
luy, de maniere que lon n'eust sceu dire s'il e-
stoit de nature plus arrogant desdaigneur, ou
plus uil flateur. Car quant à l'inegalité, dont il
usoit es punitions de ceulx qui l'auoyent offen-
sé, faisant quelque fois pour les moindres cau-
ses du monde gehenner les hommes, & puis au

rebours endurât patiemment des plus griefues
forfaictures du monde, & pardonnant aucu-
nefois legerement des offenses irreparables &
irremediables, & puis punissant avec meurtres,
effusion de sang, & confiscatiō de biens de tres-
petites & treslegeres fautes. On pourroit ac-
corder cela en ceste maniere, en disant que de
sa nature il estoit hōme uindicatif, & qui tenoit
fort son cueur : mais qu'il addoulcissoit quel-
quesfois celle amertume de sa nature par la rai-
son, selon qu'il luy estoit expediēt & utile pour
ses affaires: car en ceste guerre des alliez ses sou-
dards luy occirent à coups de pierres & de ba-
stons un de ses lieutenans nommē Albinus, hō-
me de qualité, comme celuy qui auoit esté
Præteur : il passa ce grand crime soubz silence,
sans en faire aucune punition, & le tourna en
uanterie, allant par tout disant, que ses gens en
estoyent plus obeïssans & plus diligens aux
couruees de la guerre, tellemēt qu'il leur faisoit
reparer & amēder leurs fautes par actes de prou-
esse: & si ne se soucia point de ceulx qui l'en re-
prenoyent : ains ayant ia proietté & designé en
son entendement de ruiner Marius, & de se fai-
re elire Capitaine pour aller faire la guerre au
Roy Mithridates, à cause que celle des alliez e-
stoit desia conduitte à fin, il caressoit & flattoit
à ces fins les gens de guerre qu'il auoit soubz sa
charge. Si fut à son retour de ceste guerre à Ro-
me eleu Consul avec Q. Pompeius estant desia

âgé de cinquante ans, & espousa une femme de grâde & illustre maison, Cecilia, fille de Metellus qui lors estoit le grâd Pōtife, pour lequel mariage le commun populaire alla chātant par la uille des chansons faittes contre luy, & plusieurs des principaux hommes de la uille luy en porterent enuie, n'estimans pas digne d'une telle Dame, celuy qu'ilz auoyent estimé digne du Consulat, ainsi que dit Titus Liuius. Si n'espousa il pas celle la seule : car il en auoit ia eu une premiere estant encore fort ieune, qui s'appelloit Ilia, & luy feit une fille, apres laquelle il espousa Ælia, & puis une autre troisieme nommee Cœlia, laquelle il repudia, pource qu'elle ne faisoit point d'enfans : mais ce fut honorablement, en disant beaucoup de bien d'elle, & avec plusieurs beaux dōs & riches presens qu'il luy dōna, toutefois peu de iours apres il espousa Metella, ce qui feit penser qu'il auoit repudié Cœlia à faulses enseignes. Comment que ce soit, il honora & aima tousiours Metella, tellement que depuis le peuple de Rome desirant que les bannis de la faction de Marius fussent rappelez, & en estât escōduit & refusé par Syl-la, appella en public à haulte uoix Metella, la priant de leur aider à obtenir leur requeste. Et semble que quād il eut pris la uille d'Athenes, il la traitta un peu durement & cruellemēt, pour autant que quelques uns se gaudissans & moquans de dessus les murailles auoyent donné

quelques attaintes & quelques traicts de moquerie à Metella. Mais cela fut depuis : & pour lors faisant son compte , que le Consulat estoit peu de chose à cōparaison de ce qu'il esperoit à l'aduenir, il brusloit de desir d'aller faire la guerre à Mithridates, à quoy il auoit pour contraire, Marius qui y pretédoit aussi par une ambition & une forcenee conuoitise de gloire , qui sont des passions , lesquelles ne uieillissent iamais, comme lon peut uoir par cest exemple, attendu qu'il estoit ia homme pesant , malaisé de sa personne, rompu du trauail des guerres , dont il ne faisoit que sortir, & cassé de la uieillesse : & neâtmoins aspiroit encore à auoir charge d'aller faire des guerres si loingtaines oultre mer , pour à quoy paruenir, ce pendant que Sylla s'en alla un tour iusques au camp pour donner ordre à quelques choses qui luy restoyent à faire, luy demourant en la uille forgea celle pestilēte & mortelle seditiō, qui feit seule plus de maulx à la uille de Rome, que ne feirent onques tous ses ennemis ensemble . Ce que les Dieux mesmes auoyent denōcé par plusieurs signes & presages : car le feu se prit de luy mesme aux hāpes des enseignes, que lon eut beaucoup d'affaire à esteindre : & y eut trois corbeaux, qui apportèrent leurs petits deuant tout le monde enmy le chemin, & les māgerent, puis en reporterent les reliques dedans leurs nids : & comme les souris eussent rongé quelques ioyaux d'or , qui estoient

estoyent en un temple , les secretains avec une ratouere en prirent une qui estoit pleine, & feit cinq petits fouriceaux dedans la ratouere mesme, dont elle en mangea les trois : qui plus est, un iour que le ciel estoit clair & serein, sans nuee quelconque , lon ouit le son d'une trompette si aiguë, que tout le monde en fut presque hors de soy , pour la frayeur d'ouir un si grand bruit. Surquoy les sçauans deuins de la Thoscane enquis, respondirent que ce tant estrange signe denonceoit la mutation du monde, & le passage en un autre aage , pource qu'ilz tiennent qu'il y en doit auoir huit tous differëts les uns des autres en meurs & en façons de uiure, à chascun desquelz, ce disent ilz, Dieu a prefix certain terme de duree : mais que tous uienent à finir leur cours dedans l'espace de la reuolution du grad an , & que quand l'un est acheué & l'autre prest à commencer, il se fait ainsi quelque merueilleux & estrange signe en la terre ou au ciel, de maniere que ceulx qui ont estudié en ceste sciëce la, cognoissent incōtinēt clairement, qu'il est né des hommes tous differents des precedés en leurs uies & en leurs meurs, & qui sont plus ou moins agreables aux Dieux , que ceulx qui estoient auparauant : car ilz disent qu'entre les autres grandes mutations qui se font à ces passages la d'un aage en un autre , la science de deui-ner les choses qui sont à aduenir croist en reputation, & rencontre en ses predictions, quand il

plaist à Dieu enuoyer de plus expres & plus certains signes, pour pouuoir cognoistre & predire les choses futures : & au contraire en un autre aage elle uient en mespris & dechet de reputation, pource qu'elle est temeraire, & fault à rencôrrer en la pluspart de ses pronosticatiōs, à cause qu'elle n'a q̃ des moyēs obscurs & ro⁹ effacez instrumēs pour cognoistre ce qui doit aduenir. Voila les fables qu'en alloyent racôptans les plus sçauans deuins de la Thoscane, & ceulx qui sembloient y entendre quelque chose par dessus les autres. Mais ainsi cōme le Senat communiquoit de ces presages avec les deuins, estât assemblé dedās le temple de la Deesse Bellone, il y eut une Passe qui uola dedans à la ueuē de tout le monde, portant en son bec une Cigale qu'elle mespartit en deux, dont elle laissa une partie dedans le temple, & emporta l'autre dehors: surquoy les deuins & interpreteurs de tels presages, dirent qu'ilz se doubtoient d'une sedition & dissension entre les laboureurs qui ont des terres, & le menu populaire de la uille: par ce que ce menu peuple la ne fait que crier ordinairement, non plus que la Cigale, & les laboureurs se tiennent sur leurs heritages aux champs. Marius donc s'accointa de l'un des Tribuns du peuple nommé Sulpicius, lequel ne cedoit à homme uiuant en toutes les plus extremes meschancetez & malheuretez que lon sçauroit dire, de sorte qu'il ne fault point

demande, pire que qui il estoit, mais plustost en quoy il estoit luy mesme le pire, pource qu'il auoit en soy cruaulté, auarice & temerité ensemble, & toutes si extremes, qu'il ne se soucioit point de faire à la uue de tous les choses les plus honteuses & les plus meschantes du monde, pourueu qu'elles luy tournassent à profir, attendu qu'il auoit dressé sur la place une table, là ou il receuoit publiquement les deniers de la uente du droit de bourgeoisie Romaine qu'il uendoit à des serfs affranchiz, & à des estrangers qui la uouloyent achepter, pour lesquelz effectz il entretenoit trois mille satellites, & une troupe de ieunes hommes de l'estat des Cheualiers Romains, qu'il auoit tousiours à l'entour de sa personne tous prests à executer ce qu'il leur comādoit, & les appelloit le Contre-Senat: & ayāt fait passer par les uoix du peuple une ordonnance, que nul Sénateur ne peust emprunter ne deuoir plus de deux cents escus, luy mesme quād il uint à mourir laissa trois cēts mille escus de debtes. Cest homme donques estat cōme une beste furieuse laschee par Marius emmy le peuple, rēuerla toutes choses sans dessus dessoubz à force d'armes & par uoye de faict: car il feit passer plusieurs mauuaises ordōnances par les uoix du peuple, & entre autres celle, par laquelle il donnoit à Marius la commission d'aller faire la guerre au Roy Mithridates, pour lesq̄lles uiolēces les Consulz decer-

nerent cessation de la iustice, & surceance de tous affaires publiques. Et un iour ainsi comme ils preschoyent le peuple là dessus, en assemblee de uille, sur la place deuant le temple de Castor & de Pollux, il mena contre eulx la troupe de ses satellites, ou il tua plusieurs personnes, & entre autres le propre filz du Cōsul Pompeius, & eut le pere mesme, tout Consul qu'il estoit, beaucoup d'affaire à se sauuer de uistesse: & Sylla fut poursuyuy iusques dedans la maison de Marius, là ou il fut cōtraint de promettre qu'au fortir de là, il iroit publiquement reuoquer la cessation des affaires publiques qu'il auoit commandee: au moyen dequoy ayant priué Pompeius de son Consulat, il n'en priua pas Sylla, ains seulement luy osta la charge d'aller faire la guerre au Roy Mithridates, qu'il transféra en la personne de Marius, & enuoya sur le champ des Capitaines en la uille de Nola pour prendre l'armee qui y estoit & la mener à Marius: mais Sylla gaigna premier le deuât, & s'enfouit au camp, là ou il feit entendre aux soudards la uerité du faict: laquelle entēdue, les soudards mutinez assommerent à coups de pierres les Capitaines de Marius: & Marius de l'autre costé feit aussi mourir à Rome les amis de Sylla, & saccagea leurs maisons & leurs biens: si ne uoyoit on plus autre chose que gens fuyans, les uns du camp à Rome, le autres de Rome au camp. Le Senat n'estoit pas à soy, ny ne se gou-

uernoit plus à sa uoulunté, ains falloit qu'il obèist aux mandemens de Marius & de Sulpi-
cius, lesquelz aduertis comme Sylla s'en uenoit
droit à Rome, enuoyerēt au deuant de luy deux
des Præteurs, Brutus & Seruilius, pour luy fai-
re defense de par le Senat qu'il n'eust à passer
oultre. Ces deux Præteurs parlerent un peu
audacieusement à Sylla, dequoy les soudards se
mutinerent de sorte qu'ilz furent entre deux de
les tuer sur le champ, mais au moins leur rom-
pirent ils les haches & les faisceaux de uerges
que lon portoit deuant eulx, leur osterent leurs
robbes de pourpre, dont ilz estoient uestus
comme magistrats, & les renuoyerent ainsi uil-
lainement oultragez & uituperez. Si fut aisé à
iuger en les uoyant seulement avec une triste
taciturnité, despouillez de toutes marques &
enseignes de la dignité Prætoriale, qu'ilz n'ap-
portoient autres nouuelles que les pires qu'el-
les eussent sceu estre, & qu'il n'y auoit plus or-
dre d'appaiser ceste sedition qui hormais estoit
irremediable. Parquoy Marius & ses adherēs se
meirēt à faire leurs prouisions pour la force, &
ce pendant Sylla avec son compagnon Pōpeius
se partit de la uille de Nola, menant quand &
luy six legions toutes complettes, qui ne de-
mandoyent autre chose que de marcher à gran-
des iournees droit à Rome: mais luy en estoit
en doubte discourant en soy mesme le grand
danger qu'il y auoit, iusques à ce que son deuin

Posthumius, ayant considéré les signes & presages des sacrifices que Sylla feit sur ceste deliberation, luy rendit les deux mains, & luy dit qu'il le feist lier & garder iusques au iour de la bataille, parce qu'il estoit cõtent de souffrir peine de mort, s'il ne uenoit bien tost à son honneur au dessus de toutes les entreprises. Et dit on aussi, que la nuit s'apparut à Sylla mesme en songe la Deesse Bellone, que les Romains ont en grande reuerence, l'ayans appris des Cappadociens: ie ne sçay si c'est la Lune ou Minerue, ou bien Enyo la Deesse des batailles. Il luy fut aduis qu'elle s'approcha de luy, & luy meit en main la fouldre, luy commandant qu'il en fouldroyast ses ennemis, en les luy nommât les uns apres les autres par leurs propres nōs, & qu'eux frappez de celle fouldre tumboyent deuant luy & perissoient incontinent, de sorte que lon ne sçauoit qu'ilz deuenoyent. Ceste uision l'encouragea encore dauantage, & l'ayaut le matin communiquee à son compagnon, il achemina son armee droit à Rome. Quand il fut à Picines, il luy uint d'autres ambassadeurs au deuant qui le prièrent au nom du Senat, qu'il ne uoulust point ainsi de primsault en fureur approcher de la uille, & que toutes choses deuës & raisonnables luy seroyent ottroyees par le Senat. Sylla, leur demande ouye, feit response, qu'il se logeroit là, & commanda sur l'heure à ses Maistres de camp qu'ilz departissent les quartiers

comme lon auoit accoustumé de faire . Les ambassadeurs se confians en cela, s'en retournerent à Rome : mais ilz n'eurent pas plustost le doz tourné qu'il enuoya deuant Lucius Basillus & Caius Mummius pour saisir l'une des portes de la uille , & les murailles qui sont du costé du mont Esquilin , & luy en toute diligence marcha aussi tost apres eulx . Basillus entra dedans la uille, & se saisit de la porte à force: mais le cōmun peuple desarmé monta incontinent sur les couuertures des maisons, & à coups de tuyles & de pierres l'arresta , & le garda non seulement de penetrer plus auant au dedans, ains le r'embarra iusques aux murailles de la uille . En ces entrefaittes Sylla en personne arriua , lequel uoyant à l'œil comme les choses alloient, cria à ses gens qu'ilz meissent le feu dedans les maisons, & luy mesme prenant une torche allumee en sa main , leur monstra le premier comment il falloit faire, ordonnant à ses archers & gens de traict, qu'ilz tirassent leurs lances & autres instruments à feu contremōt aux haults estages des maisons: en quoy il se laissa bié transporter à la cholere sans propos par une passion cholerique & desir de uengeance , n'ayant deuant les yeux autre consideration que de se uenger de ses ennemis, sans faire aucun compte de ses amis, de ses parents, ny de ses alliez, & sans estre aucunement touché de misericorde, estant son courroux si ardemment enflammé,

qu'il ne mettoit aucune difference entre ceulx qui l'auoyent offensé, & ceux qui ne luy auoyēt rien fait. Par tel moyen fut Marius repoulsé au dedās de la uille iusques au temple de la Terre, là ou il feit proclamer à son de trompe & à cry public, qu'il donneroît liberté aux esclaués qui s'en iroyent rendre à luy : mais là dessus suruindrent ses ennemis, qui le presserent si fort qu'il fut contraint de s'enfouir hors de la uille. Adôc Sylla assemblant le Senat, le feit, comme ennemy de la chose publique, condamner à mourir luy & quelques autres, entre lesquelz fut le Tribun du peuple Sulpicius, qui fut trahy & decelé par un sien esclaué, auquel Sylla donna liberté selon la promesse qu'il en auoit faitte par edit public : mais puis apres quand il fut libre, il le feit precipiter du hault en bas d'un rocher : & non content de cela, feit encore promettre à cry public grosse somme d'argēt à qui occiroit Marius, qui fut ingrattement & inhumainemēt faict à luy, attendu q̄ peu de iours au parauant, Marius l'ayant eu dedās sa maison entre ses mains, l'en auoit laissé sortir à sauueté : cōbien que s'il ne l'eust uoulu lascher alors, ains le laisser occire à M. Sulpicius, il eust eu souuerainement & sans contredit, toutes choses en sa puissance : & neantmoins il luy pardonna : mais Sylla peu de iours apres se trouuant auoir mesme prise sur luy, ne luy rēdit pas la pareille, ce qui couuertement despleut au Senat : mais

le peuple luy monstra tout ouuertement, & par effect, le maltalent qu'il en auoit : car il rebuta un Nonius qui estoit son nepueu, & un Seruius qui sous la confiance qu'ilz auoyent en son port & faueur, s'estoyent presentez à demander quelques offices: & oultre ceste honte du refus, encore eleut il par despit de luy aux offices qu'ilz pretendoyent, d'autres, de l'honneur & auancement desquelz on sçauoit bien que Syl-la seroit le plus marry: toutefois il dissimula cela, faisant semblant d'en estre bien ioyeux, en disant que par son moyen le peuple Romain iouissoit de pleine & entiere liberté, pouuant faire tout ce qui luy plaisoit. Et pour appaiser un peu la malueillance que le peuple luy portoit, il teint la main à faire elire Consul Lucius Cinna, qui estoit de faction contraire à la siene, l'ayant premierement obligé par sermens & par maledictions, si autrement il faisoit, qu'il fauoriserait à ses affaires & à son party. Si monta Cinna au Capitole, & là tenant une pierre en sa main promet & iura par serment, qu'il garderoit loyaument foy & amitié à Sylla, priant aux Dieux que là ou il ne le feroit, il fust dechassé hors de Rome, ne plus ne moins qu'il ietteroit la pierre qu'il tenoit hors de sa main, & en disant cela il la getta en terre deuant plusieurs personnes: mais nonobstant toutes ces execrations la, il ne fut pas plus tost entré en possession du Consulat, qu'il commença à uouloir inconti-

nent remuer & changer tout : car entre autres choses il uouloit faire faire le proces à Sylla, & luy suscita pour accusateur *Verginius* l'un des Tribuns du peuple : mais Sylla le laissa là avec ses iuges, & s'en partit pour aller faire la guerre au Roy *Mithridates*. Si dit on qu'environ ce temps là, que Sylla s'embarqua & se partit de l'Italie, il aduint à *Mithridates*, qui lors faisoit sa residence en la uille de *Pergamum*, plusieurs presages & aduertissemens des Dieux, comme entre les autres, que les *Pergameniens* pour l'honorer ayans fait faire une image de *Victoire* portant en sa main un chapeau de triumphe que lon descendoit avec des engins, à l'instant qu'elle fut toute preste à luy mettre le chapeau sur la teste, l'image se brisa, & tumba la couronne emmy le theatre toute rompue en pieces, tellement que toute l'assistance du peuple en eut grande frayeur, & *Mithridates* mesme en entra en une grande deffiance de sa fortune, combien que pour lors ses affaires luy succedassent mieulx qu'il n'eust ozé parauant esperer : car il auoit osté aux Romains l'Asie, & la *Bithynie* & *Cappadocie* aux propres Roys qu'il en auoit dechassez, & pour lors estoit de seiour en la uille de *Pergamum* à departir entre ses amis des richesses, principaultez & grandes seigneuries. Et quant à ses enfans, l'aîné estoit au royaume de *Pont* & du *Bosphore*, ou il gouuernoit ses terres patri-

moniales qu'il auoit eües par succession de pere en filz de ses predecesseurs, iusques aux deserts qui sont dela les marets Mæotides, sans que personne luy donnast aucun empeschement: & l'autre, Ariarathes, avec une grosse armee estoit apres à conquerir la Thrace & la Macedoine: semblablement aussi ses Capitaines & lieutenans avec grosse puissance faisoient plusieurs grandes & belles conquestes en diuers lieux, entre lesquelz Archelaus estant seigneur & maistre de toute la mer, pour le grand nombre de uaisseaux qu'il auoit, alloit conquerant les isles Cyclades, & toutes celles qui sont au dela du chef de Malea, mesmement celle d'Eubœe entre les autres, & commenceant à la uille d'Athenes, auoit fait soubleuer & rebeller toutes les nations de la Grece, iusques en la Theffalie, excepté qu'il receut quelque perte pres la uille de Charonee, là ou Brutius Sura l'un des lieutenans de Sentius gouuerneur de la Macedoine, homme de bon sens & de grande hardiesse, luy alla au deuant & l'arresta tout court, ainsi qu'il couroit tout le país de la Bœoe, ne plus ne moins que un impetueux torré: car il luy fit teste pres la uille de Charonee & le desfeit en trois rencôtres, de maniere qu'il le repoulsa & le contraignit de se renger de rechef à la marine. Mais ainsi qu'il estoit à le poursuivre, Lucius Lucullus luy alla faire commandement de ceder à Sylla qui uenoit, & luy laisser

conduire & administrer celle guerre contre Mithridates, selon la charge & commission qui luy en auoit esté baillee : à l'occasion dequoy il sortit hors du païs de la Bœoece, & s'en retourna deuers son Capitaine Sentius, combien que ses affaires fussent mieulx acheminez qu'il ne eust sceu desirer, & que toute la Grece fust en grand branle & grande uolunté de se retourner, pour la reputation de sa preudhommie & bonté : toutefois ce que nous en auons dit, sont les plus beaux faicts qu'il feit en cest endroit la. Mais Sylla à son arriuee recouura incontinent toutes les autres uilles de la Grece, qui enuoyèrent deuers luy & l'appellerent aussi tost qu'elles furent aduerties de sa uenue, exceptee celle d'Arhenes qui estoit contrainte par le tyran Aristion de seruir aux affaires du Roy Mithridates. Si y alla incontinent avec toute sa puissance, & assiegea le port de Piræe tout à l'entour, le faisant battre avec toutes sortes d'engins de baterie, & assaillir de tous costez, combien que s'il eust eu patience d'attendre un peu de temps, il eust peu auoir par famine la haulte uille sans se mettre en aucun danger, attendu qu'elle estoit ia reduite à une extreme disette & nécessité de uiures: mais la haste qu'il auoit de s'en retourner à Rome, pour la crainte des nouuelletez qu'il en entendoit par chacun iour, le contraignoit de precipiter ainsi ceste guerre avec grands dangers, plusieurs combats & des-

penſe infinie, attendu que oultre le reſte de ſon equippage, il auoit uingt mille que mulles que mulets trauaillans par chacun iour pour fournir à ſes engins de baterie. Et quand l'autre bois luy commença à faillir, à cauſe qu'il ſe gaſtoit ſouuent de ſes engins apres qu'ilz eſtoient tous faiçts, les uns ſe briſans d'eulx meſmes pour leur peſanteur, les autres eſtans conſumez par le feu que les ennemis y iettoient continuellement, il mit à la fin les mains aux bois ſacrez, & feit couper les arbres de l'Academie, qui en eſtoit mieulx fournie, que nul autre parc de plaiſance, qui fuſt es fauxbourgs de la uille: auſſi feit il tailler ceulx du parc de Lyceum: & pource qu'il luy falloir un grand argent à l'entretienement de ceſte guerre, il toucha auſſi aux plus ſainçts temples de la Grece, ſe faiſant apporter tât de celuy d'Epidaurre, que de celuy d'Olympe, les plus riches & plus precieus ioyaux qui y fuſſent. Il eſcriuit auſſi au conſeil des Amphictyons, lequel ſe tenoit en la uille de Delphes, qu'il ualoit mieulx que lon luy portaſt les deniers comptans qui eſtoient au temple d'Apollo, pource qu'il les garderoit plus ſeulement qu'ilz n'eſtoient, & ſi d'aduenture il eſtoit contrainçt de ſ'en ſeruir, qu'il en rendroit puis apres tout autant: & pour ceſt effect y enuoya Caphis Phocien l'un de ſes familiers & amis, luy commandant qu'il feiſt pçzer tout ce qu'il prendroit. Caphis ſ'en

alla à Delphes : mais quand il y fut , il eut peur de toucher aux choses sacrees , & en presence du conseil des Amphictyons plora à chaudes larmes de ce qu'il estoit contrainct de faire un tel acte contre sa uoulunté . Et comme quelques uns des assistans dissent, qu'ilz entendoÿent du dedans du temple le son de la Cithre d'Apollo , soit qu'il creust certainement qu'il fust uray, ou bien qu'il uoulust imprimer à Sylla ceste superstitieuse crainte , il le luy escriuit : & Sylla en se mocquant luy manda , qu'il s'esmerueilloit comment il ne s'aduisoit pas que chanter & iouer de la Cithre estoyent signes de ioye, & non pas de courroux, & pourtant qu'il ne fignist point pour cela de passer oultre, en prenant ce qu'il luy auoit ordonné , pource que Apollo le luy donnoit . Or quant aux autres ioyaux du tēple d'Apollo, le commun peuple ne sceut point qu'ilz luy fussent enuoyez : mais le tonneau d'argent qui seul estoit demouré de reste des offrandes des Roys , les Amphictyons furent contrains de le faire rompre en pieces , pource qu'il estoit si grand & si pesant que les bestes de uoiture ne l'eussent sceu porter tout entier . Cest acte leur feit ramener en memoire les autres anciens Capitaines Romains , comme Flaminius , Manius Acilius, Paulus Æmylius , desquelz l'un ayant chassé le Roy Antiochus de la Grece, les autres desfait des Roys de Macedoine , non seulement n'auoyent iamais

touché à l'or ny à l'argent des temples de la Grece, ains au contraire y auoyent enuoyé des offrandes, & les auoyent tous euz en grand honneur & reuerence. Mais ceulx la aussi estoient Capitaines legitiment eleuz & enuoyez à telles charges, qui auoyent leurs soudards bien disciplinez & accoustumez à s'employer promptement pour faire les commandemens de leurs superieurs sans rien repliquer à l'encontre, & estoient bien quant à eulx en grandeur de courage & en magnanimité Roys: mais en despense pour leurs personnes, simples & estroicts, sans faire frais, sinon necessaires, mesurez & limitez à la raison, estimans que c'estoit chose plus honteuse de flatter leurs soudards, que de craindre les ennemis: & au contraire les Capitaines du temps de Sylla uoulans auoir le premier lieu en leur chose publique par force, nō pas par uertu, & ayans plus affaire d'armes les uns contre les autres, que contre les estrangers ennemis, estoient contraincts de carresser & flatter ceulx à qui ilz deuoyent commander, en acheptant les peines de leurs soudards par les grandes despenses qu'ilz faisoient à les tenir bien aises & les cōtenter: en quoy faisant ilz ne se donnerent de garde qu'ilz rendirēt leur païs serf, & se feirent eulx mesmes esclaves des plus meschans hommes du monde, en cherchant par tout moyen de commander à ceulx qui ualoyent mieulx que eulx. Cela fut ce qui

chassa Marius, & apres le feit retourner contre Sylla. Cela feit que Cinna tua Octavius, & Fimbria occit semblablement Flaccus, ausquelz maulx Sylla fut un des premiers & principaulx qui donnerent les commencemens, en despendant sans mesure, & donnant largement aux gens de guerre pour plus gaigner la bienueillance de ceulx qu'il auoit sous luy, & attirer à soy ceulx qui estoient sous les autres: au moyen dequoy tant pour induire les estrangers à trahison, comme pour fournir à la dissolution des siens, il auoit besoin de grand argent, mesme en ce siege ou il estoit: car il auoit une si grande & si uehement eunie de prendre la uille d'Athenes, qu'il estoit impossible de la luy faire passer, fust ou par une uaine ambition de combattre contre l'ancienne reputation de celle uille, dont elle ne retenoit plus rien qu'une ombre seulement, ou pour un courroux des broquards & traicts de mocquerie que le tyran Aristion iettoit à tout propos de dessus les murailles contre luy & contre Metella, pour luy faire plus grand despit. Ce tyran estoit un homme qui auoit l'ame composee de cruauté & de toute dissolution, ayant recueilly toutes les imperfections & les pires qualitez du Roy Mithridates, qui toutes ensemble estoient coulees en luy: au moyen dequoy ceste pauvre cité, qui iusques alors auoit eschappé tant de guerres, tant de tyrannies, & tant de seditions
ciuiles,

ciuiles, fut par luy, comme par une maladie incurable, conduite à l'extremité: car le minot de bled y ualoit cent escus, & estoient les personnes contraintes par la famine de manger l'herbe de l'espargoutte, qui croissoit à l'entour du chasteau, & faisoient bouillir de uieux souliers & de uieilles burettes à huyle pour en tirer quelque faueur qu'ilz mangeoyent, pendant que luy ne faisoit autre chose tout le long du iour que boire & yurongner, baller, mommer, & dire mots de gaudifferie & de farcerie contre les ennemis, souffrant ce pendant que la sainte lampe de Minerue s'esteignist à faulte d'huyle: & quand la religieuse d'icelle luy enuoya demander un quart de boisseau de bled, il luy en enuoya un de poyure: & comme les Conseillers de la uille, les presbtres & gens de religion fussent allez au chasteau deuers luy, le supplier à ioinctes mains qu'il uoulust auoir pitié de la uille, & faire quelque composition avec Sylla, il les feit chasser & escarter à coups de traict. A la fin bien tard, encore fut ce à grande peine, il enuoya deuers Sylla deux ou trois de ceulx qui luy faisoient compagnie à yurongner, lesquelz ne demanderent quand ilz furent là, aucune composition salutaire, ains se meirent à haultlouer & magnifier les faicts de Theseus, de Eumolpus, & des Atheniens contre les Medois. Parquoy Sylla leur respondir,

„ Mes beaux harengueurs, retournez uous en a-

» uec toute uostre retorique: car les Romains
» ne m'ont point enuoyé icy pour apprendre ny
» pour estudier, ains pour desfaire & dompter
» ceulx qui se sont rebellez contre eulx. En ces
entrefaittes, il y eut des espies en la uille qui
ouyrent des uieillards deuifans ensemble au
quartier qui s'appelle Ceramique, & blasmans
le tyran de ce qu'il ne faisoit autrement garder
l'endroit de la muraille qui respond à l'endroit
de Heptachalchon, qui estoit la seule aduenue
par ou les ennemis pouuoient plus facilement
monter sur la muraille: si s'en allerent soudain
rapporter à Sylla, ce qu'ilz auoyent ouy dire à
ces uieillards. Sylla ne le meit pas en noncha-
loir, ains se transporta sur le lieu mesme la nuict
pour le recognoistre, & ayant ueu qu'il estoit
uoirement prenable, meit incontinent la main
à l'œuure: & escrit luy mesme en ses commen-
taires, que le premier qui monta sur la muraille
fut Marcus Teius, lequel trouuant un soudard
qui luy uoulut faire teste, luy donna de son e-
spee un si grand coup de toute sa force dessus
son armer, qu'il rompit son espee en pieces, &
neantmoins pour se uoir desarmé de l'espee ne
recula point arriere, ains demoura ferme &
teint ce lieu la tant que par iceluy la uille fut
prise, suyuant ce que les uieillards auoyent en-
tre eulx deuifé. Si feit Sylla abbatre tout le pan
de muraille qu'il y a entre la porte du Piræe &
la porte sainte, & ayant bien fait nettoyer &

applanit la breche, y entra enuiron la minuict en tresceffroyable arroy sonnant grand nombre de clairons, de cornets & de trompettes, & y entra quand & luy toute son armee en bataille, criant, A sac, à sac: &, Tue, tue: pource qu'il leur auoit abandonné la uille à piller & à mettre tout au fil de l'espee: à ceste cause se ietterent les soldards parmy les rues les espees traittes aux poings, qui feirent un meurtre incroyable, de sorte que iusques aujourdhuy on ne specifie point le nombre des personnes qui y furent tuez: ains pour monstrier la grandeur du meurtre qui y fut fait, on monstre le lieu iusques ou coula le sang: car oultre ceulx qui furent tuez par tout le reste de la uille, le sang de ceulx qui furent occis sur la grande place seulement baigna tout le quartier du Ceramique iusques à l'endroit que lon appelle Dipylon: & y en a qui disent dauantage, qu'il regorgea par les portes iusques dedans le faulxbourg. Mais sil y eut grande multitude de peuple ainsi tué, encore dit on qu'il y en eut dauantage, ou autant pour le moins, de ceulx qui se desfeirent eulx mesmes pour la compassion & pour le regret qu'ilz eurent de uoir leur pais en si pireux estat, cuidans bien pour tout certain qu'il fust arriué à son extermination derniere. Ceste opiniõ fur cause que les plus gens de bien de la uille desespererent de se pouuoir sauuer, & craignirent de demourer en uie, pourautant qu'ilz pèserent

qu'ilz ne trouueroyent humanité quelconque ny moderation de cruaulté en Sylla. Toutefois en partie par les prieres de Midias & de Calliphon, bannis d'Athenes, qui le supplierent à genoux, & se prosternerent en terre à ses piedz, & en partie aussi à la requeste des Senateurs Romains qui estoient en son camp, qui le prierent de pardonner au corps de la uille : ioinct aussi qu'il auoit desia suffisamment assouuy son appetit de uengeance, apres auoir dit quelques propos à la louange des anciens Atheniens, il conclut à la fin qu'il donnoit le grand nombre au petit, & les uiuans aux trespassez. Luy mesme escrit en ses commentaires qu'il prit la uille d'Athenes le propre iour des Calédes de Mars, qui uient à se rencontrer avec le premier iour du mois que nous appellons Anthesterion, auquel de fortune il se fait à Athenes plusieurs choses en memoire du deluge, & de celle ruine uniuerselle du monde, qui fut iadis par inundation des pluyes, comme estant aduenue en ce mois la. Ayant donques la uille ainsi esté prise, le tyran Aristion s'enfouit au chasteau, là ou il fut assiegé par Curion, que Sylla y laissa expressement pour cest effect, & apres auoir tenu encore longuement, il se rendit à la fin de luy mesme contraint par faulte d'eau, & ne se fut pas plustost rendu, que tout incontinent par manifeste ordonnance diuine, le temps comme miraculeusement se changea: car le mesme iour, &

au mesme instant que Curio le mena hors du chasteau, estât le ciel fort serein, il s'amassa tout soudain des nuees, dont il tumba si grand rauge de pluyes, que tout le chasteau fut plein d'eau. Peu de iours apres eut aussi Sylla le port de Piræe, là ou il brussa la plus grande partie des edifices, entre lesquelz fut l'arcenal & l'armurerie qu'auoit fait bastir ancienement Philo, estant un bastiment & une fabrique esmerueillable. Ce pendant Taxilles l'un des lieutenans du Roy Mithridates uenant de la Thrace & de la Macedoine avec cent mille combatans à pied, dix mille cheuaux, & quatre uingts & dix chariots de guerre armez de faux, mandoit à Archelaus qu'il s'approchast de luy, pource qu'il estoit encore à l'ancre au port de Munichia, ne uoulant pas abandonner la marine, ny aussi uenir au combat avec les Romains, pource qu'il cherchoit plustost à tirer ceste guerre en longueur, & oster à ses ennemis les moyens de recouurer uiures. Ce que Sylla cognoissant beaucoup mieulx que luy, se partit du pais de l'Attique, qui estoit maigre, & qui en pleine paix ne l'eust sceu nourrir, & s'en alla en celuy de la Bœoce: en quoy le commun estimoit qu'il feist erreur de laisser l'Attique, qui est pais aspre & malaisé pour gens de cheual, & s'en aller en la Bœoce, pais de campagnes plaines & descouuertes, attendu qu'il sçauoit bien que la force principale des Barbares consistoit en leur che-

ualerie, & en leurs chariots armez : mais pour
euitier la famine & faulte de uiures, comme
nous auons dit, il estoit contraint de chercher
la bataille. Dauantage encore auoit il une au-
tre cause qui le pressoit & le tenoit en crainte,
c'estoit Horrensus homme courageux & opi-
niastre, qui luy amenoit un renfort de gens de
la Theffalie, & les Barbares l'attendoient au
passage du destroit des Thermopyles. ce furent
les causes qui feirent prendre à Sylla le chemin
de la Bœoce. Mais ce pendant Caphis, qui e-
stoit de nostre pais, abusant les Barbares, con-
duisit Hortensius par un autre chemin du mont
de Parnassus, & le rendit au dessoubs de la uille
de Thitora, laquelle n'estoit pas encore alors si
grosse uille comme elle est maintenant, ains e-
stoit seulement un chasteau assis sur une poin-
cte de rocher couppé tout à l'entour, là ou an-
cienement se retirerent à sauueté les Phociens
fuyans la uenue du Roy Xerxes. Là se logea
Hortensius, ou il sousteint & repoulsa les enne-
mis tant que le iour dura : & la nuict uenue de-
scendit par chemins aspres & malaisez iusques
à la uille de Patronide, là ou il se ioignit à Sylla,
qui luy uint au deuant avec toute sa puissance.
Quand donques ilz furent iointz ensemble, ilz
se camperent dessus une motte qui est tout au
milieu de la plaine d'Elatee : le fond de la terre
y estoit bon, au moyen dequoy y auoit force
arbres, & si sourdoit de l'eau au pied : la motte

s'appelle Philobœotus, de laquelle Sylla louë
merueilleusement l'assiette & la nature. Quand
ilz furent campez, ilz ne semblerent qu'une poi-
gnée de gens aux ennemis: car aussi n'estoyent
ilz pas plus de mille cinq cents hommes de che-
ual, & moins de quinze mille hommes de pied.
Parquoy les autres Capitaines malgré Arche-
laus tirèrent leurs troupes aux champs, & rem-
plirent toute la plaine d'alenuiron de cheuaux,
de chariots, de boucliers & d'escus, de sorte que
l'air se fendoit pour la uiolence du bruit & des
cris de tant de nations diuerses, qui tout à un
coup se reengeoyent en bataille: qui plus est la
superbe magnificence de leur equippage n'es-
toit pas du tout superflue ny inutile, ains ser-
uoit grandement à effroyer les regardans, pour-
ce que la lueur de leurs harnois richement ac-
coustrez & estoffez d'or & d'argent, & les cou-
leurs de leurs cottes & sayes d'armes à la Me-
doise & à la Scythique, meslees parmy la
splendeur de l'acier fourby, & du cuyure relui-
fant, rendoyent à mesure qu'ilz alloient & ue-
noient comme un esclair & une apparence de
feu, qui faisoit frayeur à la uoir seulement: de
maniere que les Romains n'ozoyent pas seule-
ment sortir hors des trenchées de leur camp, &
ne leur pouuoit Sylla faire tant de remonstran-
ces qu'il leur ostant ce grand effroy, au moyen
dequoy ne les uoulant pas aussi forcer de sortir
en ceste frayeur, estoit cōtrainct de ne bouger,

& d'endurer, quoy qu'il luy en feist grand mal, de uoir les Barbares se rire & se mocquer superbement & oultrageusement de ses gens & de luy : toutefois à la fin ce fut ce qui luy seruit le plus, à cause que ses ennemis l'ayans en mespris, ne se teindrent point sur leurs gardes, ains se laisserent aller à tout desordre, encore qu'autrement ilz ne fussent gueres obeïssans à leurs Capitaines, pource qu'il y auoit trop de Chefs qui s'entremettoient de commâder, au moyen dequoy il en demouroit peu dedans le camp, & tout le reste de la multitude alleché du gaing qu'ilz faisoient à aller piller & saccager uilles, fescartoit plusieurs iournees loing du camp: car lon dit qu'ilz ruinerent alors la uille des Panopeiens, qu'ilz saccagerent celle des Lebadiens, & pillerent le temple sans que pas un de leurs Capitaines leur eust baillé congé ne commandement de ce faire. Ce pendant Sylla qui uoyoit deuant ses yeux ruiner & destruire tant de uilles, le portoit fort impatiemment, & en estoit bien desplaisant: mais il ne laissoit pas pour cela chommer ses gens, ains les contraignoit de trauailler à destourner le cours de la riuere de Cephissus, & à cauer de grandes trenchées sans dōner à personne congé de reposer, ains au contraire, chastiant asprement ceulx qui alloient laschement en besongne, à celle fin, que se faschans de la peine qu'ilz prenoient apres tāt d'ouurages, ilz aimassent miculx essayer

le hazard de la bataille, cōme il en aduint : car le troisieme iour qu'ilz eurent commencé à besongner, ainsi comme Sylla passoit au long d'eulx, ilz se prirent à crier, qu'il les menast contre les ennemis. A quoy il leur fait responce que ces cris la n'estoyent pas de gens qui eussent enuie de combattre, mais plustost qui se faschoyent de trauailler: toutesfois sil est uray que uous ayez si bonne uoulunté de combattre, ie ueux, dit il, que uous alliez tout de ce pas avec uoz armes en ce lieu la : en leur montrant l'endroit, auquel iadis auoit esté le chasteau des Parapotamiens, qui lors, la uille ayant esté destruite, n'estoit plus rien que une croupe de mōtagne pierreuse, coupee tout à l'entour, & distāte du mont de Edylion d'autant que la riuiera d'Asfus est large, qui passe entre deux, & qui au pied mesme de la montagne s'en ua tumber en celle de Cephisus, & toutes deux ensemble ayās le cours fort roide rendent ladicte croupe tres forte d'assiette pour y loger un cāp: & pourtant Sylla uoyant les soudards aux boucliers de cuyure du camp des ennemis, qui prenoyent leur chemin pour s'y aller loger, les uouloit preuenir, & se saisir le premier du logis, comme il fait moyennat la bōne diligence & la grande affection des soudards : parquoy Archelaus estant rebouté de là, tourna son chemin deuers la uille de Chæronee. Adonc quelques Chæroniens, qui estoyent au camp de Sylla, le supplierent

qu'il ne uoulust point abandonner leur uille à l'ennemy, Sylla leur desirant gratifier en cela, y enuoya l'un de ses Coulonnels Gabinus avec une legion, & quand & quand donna aussi congé d'y aller aux Charoniens qui feirent tout ce qui leur fut possible pour arriuer en leurs maisons premier que Gabinus, mais ilz ne sceurent onques, tant il se monstra homme de bien, & plus affectionné à les sauuer qu'ilz n'estoyent eulx mesmes: toutefois Iubas ne nomme pas le Coulonnell qui y fut enuoyé, Gabinus, mais Hircius. Ainsi eschappa nostre uille de ce danger, dont elle approcha de si pres. Cependant il uenoit du temple de Lebadie & de la caue de Throphonius de bonnes nouuelles aux Romains, & des oracles & propheties qui leur promettoient la uictoire, desquelles propheties ceulx du pais en racomptent dauantage: mais Sylla mesme au dixieme liure de ses commentaires escrit, que Quintus Titius homme de qualité & de nom être ceux qui traffiquoyent es pais de la Grece, s'en uint deuers luy apres qu'il eut gaigné la bataille de Charonee, luy annoncer que Trophonius luy faisoit sçauoir, qu'il auroit dedans peu de temps une seconde bataille au mesme lieu, dont il emporteroit encore la uictoire. Apres celuy la un autre homme de guerre nommé Saluenius, luy rapporta aussi quelle deuoit estre l'issue de ses affaires en Italie, disant le sçauoir par reuelation diuine, &

f'accordoyent ces deux en la maniere de la re-
uelation : car ilz disoyent auoir ueu un Dieu
tout semblable en maiesté, beaulté & grâdeur,
à l'image de Iupiter Olympien . Sylla donques
ayât passé la riuere de Assus falla logger au pied
du mont d'Edylium, aupres d'Archelaus, lequel
auoit assis & fortifié son camp entre les deux
monts de Acontium & de Edylium ioignant la
uille des Assiens . Le lieu auquel il se campa se
nomme encore iusques au iourdhuy Archelaus
de son nom . Vn iour apres que Sylla eut chan-
gé de logis, il laissa Murena en son camp avec
une legiõ & deux cohortes pour amuser & fas-
cher tousiours les ennemis qui estoÿent en trou-
ble, & luy ce pendant feit un sacrifice le long
de la riuere de Cephisus, lequel sacrifice a-
cheué, il s'achemina deuers la uille de Cha-
ronee pour prendre les forces qui y estoient,
& aussi pour aller recognoistre le mont que
lon appelle Thourion que les ennemis auoyent
occupé. C'est une croupe de montagne rude &
aspre de tous costez aboutissant en poincte,
ne plus ne moins qu'une pöme de pin, à l'occa-
sion dequoy nous l'appellons Orthopagum: au
pied duquel passe un ruisseau que lon nom-
me Morion, & y a aussi un temple d'Apollo
surnommé le Thurié : & dit on que ce surnom
de Thurien luy a esté imposé & donné du nom
de Thuro, qui fut mere de Charon fondateur
de la uille de Charonee, comme lon dit: les au-

tres tienent que la uache qui fut donnee pour guide à Cadmus, se presenta à luy en ce lieu là, qui en a depuis retenu le nom, pour autant que les Phœniciens appellent une uache, Thor. Quand donques Sylla fut assez pres de Chéronnee, le Coulonnel qu'il y auoit enuoyé en garnison pour la defendre, luy uint au deuant avec ses gens bié armez, portât un chapeau de laurier, & Sylla apres auoir recueilly & salué les foudards, les prescha de faire leur deuoir de bien combattre: & cōme il estoit apres uindrent à luy deux citoyens de Chéronnee, l'un nommé Homoloichus, & l'autre Anaxidamus, qui luy promeirent de chasser les ennemis, qui auoyent saisy le mont de Thurium, pourueu qu'il leur baillast quelque petit nombre de gés de guerre, pource qu'il y auoit un petit sentier, dont les Barbares ne se doubtoient point, cōmenceât à un lieu qui se nomme Petrochus, ioignât le tēple des Muses, par ou lon pouuoit aller à la cyme de ce mont de Thurium, & que suyans ce sentier la ilz se trouueroyent au dessus des Barbares, & les assommeroyent facilement à coups de pierres, ou bien les contraindroient de descendre malgré eulx en la campagne. Sylla estant asseuré par le tesmoignage de Gabinius que c'estoyent deux hardis & uaillans hommes, ausquelz on se pouoit seurement fier, leur bailla gens & leur commanda d'excuter leur entreprise, & ce pendant luy dressa son

armee en bataille dessus la plaine departant sa cheualerie sur les ailes , & se meit à la poincte droite, baillât la gauche à Murena: & Galba & Hortensius ses lieutenâs estoient à la cueuë avec quelques bandes d'arriere garde qu'ilz tenoyent au guet sur les coustaux, pour engarder que les ennemis ne les peussent enuelopper par derriere, pource q̃ lon apperceuoit de loing que les ennemis iettoient force cheualerie & force gës de pied armez à la legere sur les ailes, à fin q̃ les poinctes de leur bataille fussent plus aisees à se courber & estendre pour enceindre les Romains par derriere. Mais sur ces entrefaites les deux Chæroneiës, ausquelz Sylla auoit donné Hircius pour Capitaine , ayans fait le tour du mont de Thurium , sans que les ennemis s'en apperceussent, uindrent à se mōstrer tout soudain au coupeau de la montagne , qui effroyerent tellemēt les Barbares, qu'ilz se meirent incontinent en fuitte , & s'entretuerent eux mesmes les uns les autres pour la plus part: car ilz ne sousteindrent point , ains en s'enfuyant contre bas tumboyent bien souuent sur les poinctes de leurs propres parthisanes & iauelines, & s'entrepoulsans les uns les autres, se precipitoient du hault en bas de la montagne , ayans les ennemis à leur dos, qui les chassoyent d'amont, & les frappoyent par derriere, là ou ilz estoient descouverts , de sorte qu'il y en demoura de morts bien enuiron trois mille à l'entour

de ce mont de Thurion: & quant à ceulx qui se
cuidèrent sauuer de uistesse, Murena qui estoit
desia en bataille en rencontra les uns fuyans,
aufquelz il couppa le chemin & les desfeit: les
autres prirent le chemin de leur camp, & alle-
rent à la foule donner droit dedās le bataillō de
leurs gēs de pied, dont ilz meirent la plus gran-
de partie en desarroy, & feirent un grand de-
stourbier à leurs Capitaines auant qu'ilz peuf-
sent se remettre en ordonnance: qui fut l'une
des principales causes de leur desfaitte. Car Syl-
la les alla charger en ce trouble, ayant passé en
diligence ce qu'il y auoit de distance entre les
deux armées: en quoy faisant il osta toute l'effi-
cace aux chariots armez de faulx, lesquelz pre-
nēt leur plus grāde force de la longueur de leur
course qui donne l'impetuosité, roideur & uio-
lence à leur chasse, là ou quād ilz ont la carriere
trop courte pour s'eslancer, leur coup en est las-
che & n'a point de force, ne plus ne moins q̄ les
coups de traict quand ilz ne sont pas bien en-
foncez, comme il en prit alors aux Barbares: car
leurs premiers chariots desplacerent si lasche-
ment, & donnerent si mollement, que les Ro-
mains les réuoyoyent & repoulsoyēt facilemēt
avec grādes risees & batemens de mains, en di-
sant, Aux autres: ainsi que lon fait ordinairement
à Rome aux ieu de la course des cheuaulx. Ce-
la fait, les batailles des gens de pied commence-
rent à chocquer les Barbares avec leurs picques

baiffées, en se ferrant les uns contre les autres à ce qu'on ne les peust ouurir, & les Romains avec leurs iauelots qu'ilz lancerent d'arriuee, & puis tout soudain desguainerent leurs espees, dont ilz destournoyēt les picques des ennemis pour plus tost les pouuoir ioindre de pres au corps en la cholere ou ilz estoyēt, à cause qu'ilz uoyoyent au front de la bataille des Barbares quinze mille esclauces q̄ les lieutenāns de Mithridates par edict public auoyēt affranchiz, & departis par bandes entre les autres gens de pied: à l'occasion dequoy il y eut un Centenier Romain qui rencontra lors plaisamment quand il dit, qu'il n'auoit iamais au parauant ueu, que les serfs eussent loy de faire & dire comme les personnes libres, sinon aux iours des festes de Saturne : toutefois ceulx la contre le naturel des serfs eurent bien la hardiesse d'attendre le choc, & ne les pouuoient les gens de pied Romains si promptement fendre, ny rompre, ny faire reculer, pource qu'ilz se tenoyent fort serrez les uns contre les autres, & que leurs files estoient aussi fort longues, iusques à ce que les Romains qui estoient derriere les premiers reings, leur tirerēt tant de coups de pierres avec des fōdes, & tāt de coups de dards & de traicts, qu'à la fin ilz les contraignirent de tourner le dos, & les meirent tous en rouverte. Et comme Archelaus commenceast à estendre la poincte droite de son armee pour cuider enueller

les Romains par derriere, Hortensius feit incontinent courir les bandes qu'il auoit avec luy pour le charger par les flancs: ce que Archelaus ayât apperceu, feit auffi tost tourner uisage aux gens de cheual qu'il auoit autour de luy, qui estoient plus de deux mille, de sorte que Hortensius ayant ceste grosse troupe de cheualerie sur ses bras, fut contrainct de se retirer petit à petit uers la montagne, se sentant esloigné de la bataille des siens, & environné des ennemis. Ce qu'entendant Sylla, qui estoit en la poincte droite de sa bataille, & n'auoit point encore combatu, tira incontinent celle part pour le secourir: mais Archelaus cōiecturant par le poulcier q̄ les cheuaux enleuoient, ce que c'estoit, laissa là Hortensius, & se tourna tout court & en diligence uers la poincte droite des ennemis, dont estoit party Sylla, esperant la surprendre desprouueue de Chef qui y commandast. De l'autre costé Taxilles feit auffi marcher quand & quand ses boucliers de cuyure contre Murena, de sorte que se leuant un grand bruit de deux costez, & les montagnes retentissantes à l'enuiron, Sylla s'arresta tout coy, ne sachant uers quelle part il deuoit plus tost tirer: à la fin ayant pris resolution de s'en retourner au lieu dōt il estoit party, il enuoya Hortensius avec quatre enseignes au secours de Murena, & luy avec la cinquieme tira en diligence uers la poincte droite de son armee, laquelle estoit

Estoit desia attachee au cōbat de per à per à l'en-
contre d'Archelaus: au moyen dequoy, quand
Sylla y fut arriué de réfort, ilz forcerent aisee-
ment leurs ennemis, & rōpuz qu'ilz les eurent,
les chasserent fuyans à ual de rouverte iusques à
la riuiere, & iusques à la mōtagne de Acōrium.
Toutefois Sylla n'oublia pas Murena, ains se
meit en chemin pour s'en aller le secourir, &
trouuāt qu'ilz auoyent aussi biē uaincu de leur
costé, il se meit à chasser les fuyans avec eulx. Si
fut là fait un grād meurtre des Barbares emmy
la cāpagne, & y en eut beaucoup qui en cuidāt
gagner leur camp furent tous mis en pieces, tel-
lement que de toute celle multitude infinie de
combatans qu'ilz auoyent, il n'en eschappa que
dix mille seulement, lesquelz se sauuerent de ui-
stesse en la uille de Chalcide: & au cōtraire, Syl-
la escrit qu'il ne trouua à dire que quatorze de
ses souldards seulemēt, encore en reuint il deux
le soir mesme. Parquoy aux trophées qu'il feic
dresser pour marque de ceste uictoire, il y feic
escrire en teste, Mars, Victoire & Venus, com-
me uoulant dire, qu'il auoit uaincu en ceste
guerre autant par heur, que par force ny par
engin, ou science de l'art militaire. Ce tro-
phée fut dressé pour la bataille qu'il gagna en
plaine campagne à l'endroit ou Archelaus com-
mencea à fouir, iusques au ruisseau de Molus:
mais il y en a un autre à la cyme du mont de
Thurium, là ou les Barbares furent surpris par

derriere, ou il est escrit en lettres Grecques, que la prouesse d'Omoloichus & d'Anaxidamus fut cause de faire gagner celle uictoire. Sylla pour la resionissance de ceste grande bataille gaignee, feit iouer des ieux de musique en la uille de Thebes, ou il feit dresser un eschaffault pour les ioueurs aupres de la fontaine d'Oedippus, & en furent iuges quelques personnages Grecs qu'il feit uenir des autres uilles, pource qu'il haïssoit mortellement les Thebains, de maniere qu'il leur osta la moitié de leurs terres, qu'il consacra à Apollo Pythien, & à Iupiter Olympien, ordonnant que du reuenu d'icelles, on rendist & payast l'argent qu'il auoit pris & enleué hors de leurs temples. Apres cela estant aduertty que Flaccus l'un de ses contraires, ayant esté eleu Consul à Rome, trauersoit la mer Ionique soubz couleur de uenir faire la guerre au Roy Mithridates, mais à la uerité pour la luy faire à luy mesme, il prit son chemin deuers la Theffalie pour luy aller au deuant: mais quand il fut en la uille de Melitea, il luy uint nouuelles de tous costez qu'il estoit arriué une nouvelle armee du Roy, non moindre que la premiere, laquelle couroit de rechef, pilloit & gastoit tous les païs qu'il auoit laissez derriere: car Dorylaus l'un des lieutenâs de Mithridates estoit arriué à Chalcide avec une grosse flotte de uaisseaux, sur lesquelz il auoit amené bié quatre uingts mille cōbatâs, les meil-

leurs, mieulx aguerris, & mieulx en poinct qui
fussent en toute la puissance du Roy Mithrida-
tes : & de là estoit passé en la Bœoce, là ou il a-
uoit occupé tout le païs, & taschoit d'attirer
Sylla à la bataille, quelques raisons qu'Arche-
laus luy alleguast au contraire pour l'en cuider
diuertir : car mesme il feit courir un bruit, que
tant de milliers de combatans ne pouuoient a-
uoir esté desfaicts en la premiere bataille sans
quelque trahison. Mais Sylla retournant tout
court, feit bien cognoistre à ce Dorylaus, auant
qu'il passast gueres de iours, qu'Archelaus estoit
homme sage, qui cognoissoit tresbien la ualeur
& la uertu des Romains, tellement que Dory-
laus en ayant un peu essayé, seulement en quel-
ques legeres escarmouches, qu'il feit cōtre Syl-
la à l'entour de Tilphossion en la Thessalie, fut
luy mesme le premier qui maintient qu'il ne
falloit pas hazarder la bataille, ains plustost ti-
rer ceste guerre en longueur, & miner les Ro-
mains par la despense. Ce neantmoins la com-
modité de la grande & large plaine qui est
à l'entour d'Orchomene ou ilz estoient cam-
pez, donna courage à Archelaus, à cause qu'elle
luy sembla fort à propos à donner bataille
pour celuy qui estoit le plus fort de cheualerie
car de toutes les plaines qui sont dedans le
païs de la Bœoce la plus grāde & la plus ouuer-
te est celle d'aupres de la uille d'Orchomene,
pource qu'elle est tout raze sans arbre quelcon-

que, & s'estend iusques aux maretz, esquelz se descharge le fleuve de Melas, lequel a sa source assez pres de la uille d'Orchomene, & seul de rous les fleuves de la Grece est nauigable des le lieu mesme dont il sourd: & si a une autre singularité, c'est qu'il croist & desborde es plus grands iours d'Ésté, cōme le Nil, & produit les mesmes plantes & les mesmes arbres que luy, excepté qu'ilz ne portent point de fruit, ny ne uienent pas si grands comme ceux de l'Ægypte. Son cours n'est pas long, pource que la plus grande partie de son eau se perd incontinent en des lacs & maretz couuers de brossailles, & n'en y a qu'une bien petite partie qui se ua rendre dedās la riuiera de Cephisus à l'endroit propre, ou naissent les cannes dont on fait les bonnes flustes. Quand donques ilz furent campez les uns pres des autres, Archelaus se teint coy sans rien entreprendre: mais Sylla se meit incontinent à faire tirer de grādes trenchees de costé & d'autre pour clorre le chemin à ses ennemis, de pouuoir sortir en la campagne spacieuse & ferme, ou ils eussent peu esté tant qu'ilz eussent uoulu leur gēdarmerie, & poulser les Romains dedans les maretz: ce que les Barbares ne pouuans supporter, si tost que leurs Capitaines leur eurent lasché la bride, ilz descocherent en si grande fureur, que non seulement ilz escarterent ceulx qui besongnoient aux trenchees de Sylla, mais aussi effroyerēt la plus part de ceulx

qui estoient en bataille pour les defendre, lesquels se meirent aussi à fouir. Quoy uoyāt Syl-
la, descendit incontinent de dessus son cheual à
terre, & faississant une enseigne, se ietta à trauers
les fuyans iusques à ce qu'il trouua les enne-
mis, en criant, Soudards Romains, mon hon-
neur me commande de mourir icy, & pourtant
quand on uous demandera, là ou uous auez a-
bandonné uostre Capitaine, souuenez uous de
respondre que ce a esté à Orchomene. Ilz eu-
rent si grande honte de ces paroles, qu'elles leur
feirent tourner uisage, avec ce qu'il luy suruint
encore deux cohortes de renfort de la poincte
droitte de la bataille, lesquelles soubz sa cōduitte
chargerent les ennemis si asprement, qu'ilz
les tournerent tous en fuitte: quoy faict il reti-
ra ses gens, & apres les auoir fait disner, recom-
mencea de rechef à faire enclore de trenchees
le camp des ennemis, lesquels sortirēt aussi une
autre fois en biē meilleur ordre que la premie-
re, là ou Diogenes filz de la femme d'Arche-
laus, combatant uaillamment à la ueuē de tout
le mōde, en la poincte droicte de leur bataille,
fut porté mort par terre, & les archers estans
pressez de si pres par les Romains qu'ilz ne se
pouuoient pas aider de leurs arcs, prenoient
leurs fleches à pleines mains, & en frappoyent
leurs ennemis au lieu d'espees, pour les cuider
faire reculer, iusques à ce que finablemēt ilz fu-
rēt tous rébarrez iusques dedans leur cāp, ou ilz

passèrent la nuit en grande destresse, tant pour la perte de ceulx qui estoient morts, que pour le grand nombre des blecez : le lendemain Sylla remenant encore ses gens vers le camp des ennemis, alla tousiours continuant ses trenchées : & estans sortis quelques gens à l'escarmouche, il les chargea si rudement, que de prim-fault il les tourna en fuite : cela meit tel effroy en tout le camp, qu'il n'y eut plus personne qui y oüst arrester, de maniere que Sylla suyuant sa victoire y entra pesle mesle quand & les fuyans, & le prit tout entierement. Si furent incōtinent les marets tous teinctz de sang, & le lac plein de corps morts : tellement que iusques aujourdhuy on treuve encore en ce quartier la plusieurs arcs barbaresques, des morriens & des pieces de cuiraces, des espees enfondrees dedans le boubier du marets, encore qu'il y ait bien pres de deux cents ans que celle bataille fut donnee. Voila comment passerent alors les affaires pres des uilles de Charonee & d'Orchomene. Au reste pendant que ces choses passoyent en la Grece, Cinna & Carbo traittoyent à Rome inhumainement & cruellement les plus gens de bien & plus notables personnages qui y fussent, à l'occasion dequoy, plusieurs fuyans leur tyrannie, se retiroient au camp de Sylla, ne plus ne moins qu'en un port de salut, tellement qu'en peu de temps il eut à l'entour de luy une apparence de Senat Romain. Metella mesme

sa femme s'estant à grande peine desrobbee avec ses enfans, luy uint apporter les nouuelles, cōme sa maison en la uille & ses possessions aux champs auoyēt esté toutes arses & bruslees par ses maluueillans, le suppliāt de uouloir aller secourir ceulx qui estoient encore demourez à Rome. Sylla ces nouuelles ouyes se trouua en grande perplexité: car d'un costé il luy faisoit biē mal de uoir son païs ainsi miserablement affligé: & d'autre costé il ne sçauoit comment il s'en pourroit aller, laissant une telle entreprise qu'estoit la guerre contre un si puissant Roy que Mithridates, imperfecte: mais ainsi qu'il estoit en ce pensément, uint deuers luy un marchād nommé Archelaus, natif de la uille de Delium, qui luy apporta secrettemēt quelques paroles de la part d'Archelaus l'autre lieutenant de Mithridates: ce qui luy fut si agreable, que luy mesme prochassa qu'ilz s'entreueussent pour parlementer avec Archelaus: & de faict s'entreueirent le long de la marine pres la uille de Delium, là ou il y a un temple d'Apollo. Si commença Archelaus à entrer en propos, mettant en auant, que Sylla se contentast de laisser l'entreprise d'Asie & du royaume de Pont, & qu'il s'en retournast à la guerre ciuile de Rome, pour laq̃lle le Roy luy fourniroit tāt d'argent, tant de uaisseaux & de gens, cōme il uouldroit. Sylla prenant adonc la parole, luy dit, qu'il luy conseilloit d'abandonner le seruice de Mi-

thridates & de se faire Roy luy mesme, luy of-
frant de le faire declarer amy & allié du peuple
Romain, pourueu qu'il luy liurast entre ses
mains toute la flotte des uaisseaux qu'il auoit.
Archelaus monstra auoir en abominatiõ d'ouir
parler de trahison : & adonc Sylla suyuant son
30 propos luy repliqua, Comment? Archelaus, toy
30 qui es un Cappadocien seruiteur d'un Roy bar-
30 bare, ou pour le plus son amy, as le cueur si bon
30 que pour tant de biens que ie t'offre, tu ne uou-
30 drois faire un acte lasche ny meschât, & neant-
30 moins tu as bié la hardiesse de me parler de tra-
30 hison à moy qui suis lieutenant du peuple Ro-
30 main, & Sylla, comme si tu n'estois point celuy
30 qui en la bataille de Charonee te sauuas de ui-
30 stesse, avec bien peu de gens, de six uingts mille
30 combatans que tu auois en un camp auparauiãt,
30 & qui te cachas deux iours dedans le marets
30 d'Orchomene, laissant les cãpagnes de la Bœo-
30 ce si ionchees & couuertes de corps morts, que
30 lon n'y pouuoit passer. Depuis ceste replique
Archelaus changea bien de langage, & se pro-
sternant deuant Sylla, le supplia bien humble-
ment de uouloir terminer ceste guerre, & faire
paix avec Mithridates : à quoy Sylla respondit
qu'il en estoit bié contêt, & fut la paix accordee
entre eulx, soubz cõdition, q̃ Mithridates se de-
partiroit de l'Asie mineur, qu'il laisseroit la Pa-
phlagonie, qu'il rendroit la Bithynie à Nicome-
des, & la Cappadocie à Ariobarzanes, & paye-

roit aux Romains^a deux mille talents, & leur bailleroit soixante & dix galeres, avec tout leur equippage: à l'encontre dequoy Sylla luy asseureroyt aussi & confirmeroyt le demourât de son estat, & le feroit declarer amy & allié du peuple Romain. Ces articles passez & accordez entre eulx, Sylla reprit son chemin par la Thessalie, & par la Macedoine uers le país de l'Helléspont, menant quand & luy Archelaus, auquel il feit beaucoup d'honneur: car comme il fust tumbé en une grosse & perilleuse maladie en la uille de Larisse, il sy arresta & eut soing de le faire penser & guarir, ne plus ne moins que si c'eust esté l'un de ses principaux Capitaines ou de ses compagnons. Ce qui fut cause de faire calumnier la bataille de Charonee, cōme n'ayant pas esté loyaument combatue ny nettement gaignee, ioinct encore que Sylla rendit à Mithridates tous ses autres seruiteurs & amis qu'il tenoit prisonniers, excepté le tyran Aristion, qu'il feit empoisonner, pourautant qu'il estoit aduersaire d'Archelaus, & principalement pour les terres qu'il donna à ce Cappadocien: car il luy en dōna dix mille arpents dedans l'isle d'Eubœe, & aussi qu'il luy bailla tousiours le tiltre d'amy & allié du peuple Romain: toutefois quant à cela, Sylla luy mesme s'en iustifie en ses commentaires. Ce pendant arriuerent deuers Sylla les ambassadeurs de Mithridates, lesquelz dirent que leur maistre acceptoit & ratifioit

a Douze
cēts mille
escus.

bien tous les autres articles du traitté, excepté qu'il prioit que lon ne luy ostant point le païs de la Paphlagonie, & quant aux galeres, qu'il ne uouloit point parler de les promettre seulement: à quoy Sylla leur respondit promptement en
30 courroux, Cōment? Mithridates donques, com-
30 me uous dittes, ueut retenir la Paphlagonie, &
30 refuse de bailler les uaisseaux que ie luy ay de-
30 mandez, là ou ie m'attendoye qu'il me remer-
30 cieroit bien humblemēt à genoux, si ie luy lais-
30 soye seulement la main droite, avec laquelle il
30 a fait mourir tant de citoyens Romains. I'ay
30 bonne esperance de luy faire bien parler autre
30 langage, si tost que ie seray passé en Asie: main-
30 tenāt qu'il est de seiour en la uille de Pergame,
30 il parle bien à son aise de ceste guerre qu'il n'a
30 pas ueuë. Les ambassadeurs effroyez de ses pa-
roles, ne repliquerent rien à l'encontre: mais
Archelaus prit la parole, & le pria d'amollir son
courroux en plorant, & luy touchāt en la main:
si feit tant qu'à la fin il obtient q̄ Sylla l'enuoye
roit deuers Mithridates, l'asseurant qu'il luy fe-
roit accorder la paix sous toutes les conditiōs
qu'il demandoit, ou fil ne luy pouuoit persua-
der, qu'il se tueroit soy mesme de sa propre
main. Sur ceste promesse Sylla le despescha, &
ce pendant entra avec son armee dedans la Me-
dique, & apres en auoir couru & pillé une gran-
de partie, s'en retourna en la Macedoine, là ou
Archelaus le reuint trouuer pres la uille de Phi-

lippes, luy apportant nouuelles que tout iroit bien : mais que le Roy Mithridates le prioit, comment que ce fust, qu'il parlast à luy. Et ce qui le faisoit ainsi chaudement rechercher de parler avec luy, estoit principalement Fimbria, lequel ayant occis Flaccus l'un des Capitaines de la faction contraire à Sylla, & ayant desfait quelques lieutenans de Mithridates, s'en alloit le trouuer luy mesme pour le combattre : ce que Mithridates craignant choisit plus tost de se faire amy de Sylla. Si s'entreueirent au pais de la Troade en la uille de Dardane, y ayant Mithridates une flotte de deux cents uoiles tous uaisseaux à rames, & par terre uingt mille hommes de pied, & six mille cheuaux, avec force chariots armez de faulx : là ou Sylla n'auoit que quatre enseignes de gens de pied, & deux cents cheuaux seulement. Mithridates alla au deuant de luy, & luy tendit la main : mais Sylla luy demanda premier s'il acceptoit la paix sous les conditions que Archelaus auoit accordees. Mithridates ne luy respondit rien : parquoy Sylla suyuant son propos, luy dit :

- » Si est-ce à faire à ceulx qui requierent quelque
- » chose, de parler les premiers, & suffit aux uain-
- » cueurs de se taire & escouter leur requeste seulement. Alors commença Mithridates à uouloir iustifier sa cause, reiettant partie de l'occasion de ceste guerre sur la uoulunté des Dieux qui l'auoyent ainsi ordonné, & partie sur les

Romains mesmes . Adonc Sylla prenant la parole luy repliqua , qu'il auoit bien de long temps ouy dire, que Mithridates estoit un prince treseloquent , mais que lors il le cognoissoit par experience , uen qu'en des actes si malheureux & si meschans , il n'auoit point eu faulte d'honeste langage pour les pallier & desguiser : mais au contraire, il luy deduisit aigrement , & fait confesser les inhumanitez par luy commises : & apres luy demanda de rechef s'il ratifioit ce que Archelaus auoit fait . Il respondit , que ouy : & alors Sylla le salua, l'embrassa & le baisa : puis faisant approcher les Roys Nicomedes & Ariobarzanes, les reconcilia & remeit en grace auec luy . La fin fut , que Mithridates apres auoir deliuré à Sylla soixante & dix galeres , & cinq cents hommes de traict , s'en retourna par mer en son royaume de Pont . Mais Sylla entendit que ses gens estoient mal contents de cest appointment qu'il auoit fait auec Mithridates , pource qu'ilz ne pouuoient supporter de uoir ce Roy la , qui estoit le plus grand , le plus aspre & le plus cruel ennemy qu'ilz eussent, comme celuy qui en un seul iour auoit fait tuer cent cinquante mille citoyens Romains, qui estoient par toute l'Asie , s'en aller sain & sauf auec les richesses & les despouilles de celle prouince , laquelle il auoit pillée & taillee à son aise l'espace de quatre ans durant : à quoy il respondit pour sa descharge , qu'il n'e-

estoit pas assez puissant pour faire la guerre à Mithridates & à Fimbria, si une fois ilz se fussent conioincts ensemble contre luy. Au partir de là il alla contre Fimbria, lequel estoit campé pres la uille de Thyatira. si se logea au plus pres de luy, & pendant qu'il faisoit enfermer son logis d'une trenchee, les soudards de Fimbria sortans de leur camp tous en saye sans armes uenoyent saluer ceulx de Sylla, & leur aidoyent bien affectueusement à faire leur trenchee: parquoy Fimbria uoyant celle mutation de uolunté en ses gens, & redoubtant Sylla comme celuy duquel il n'attédoit grace ne mercy quelconque, se tua luy mesme dedans son camp. Et adonc Sylla condamna le païs total de l'Asie mineur à payer la somme de^a uingt mille talents en commun, & en particulier encore ruina il les maisons priuees par l'insolence & la longue residéce des gens de guerre qu'il y meit en garnison: car il ordonna que chascue hoste bailleroit par chacun iour à celuy qui seroit logé chez luy, enuiron la ualeur de cinquante trois solz & quatre en argent, & si seroit tenu de luy apprestier à soupper à luy & à ses amis, autant qu'il luy plairoit en appeller & conuier à soupper avec luy, & que chascue Capitaine auroit par iour cinquante drachmes d'argent, qui ualent enuiron cinq escus, & auroit une robe de chambre pour la maison, & une autre quand il uoudroit aller à l'esbat par la uille. Ce-

a Ce sont
enuiron
douze mil
liōs d'escu

la fait & ordonné, il se partit de la uille d'Ephese avec toute sa flotte, & en trois iours arriva au port de Piræe, là ou il fut receu en la confrairie des mysteres, & reteint pour soy la librairie d'Apellicon Teïen, en laquelle estoit la pluspart des œuvres d'Aristote & de Theophraste, qui n'estoyent pas gueres encore cogneus, ny uenus es mains des hommes: & dit on que ayant ceste librairie esté portee à Rome, le grammarien Tirannion trouua les moyés d'en soustraire une grande partie, & qu'Andronicus le Rodien ayant par ses mains recouuré les originaux, les mit en lumiere, & escriuit les sommaires que nous auons maintenant: car les anciens philosophes Peripatetiques ont bien esté d'eulx mesmes gens de bon esprit & sçauans, mais ilz n'ont gueres eu de liures d'Aristote, ny de Theophraste, & ce peu qu'ilz en ont eu, encore ne les ont ilz pas entierement ny parfaitement ueuz, pource que la succession de Neleus Scepsien, à qui Theophraste laissa tous ses liures par testament, uint à tumber entre les mains de gens grossiers & ignorans, qui ne s'en sceurent pas faire honneur. Au demourant, ainsi comme Sylla estoit de seiour à Athenes, il luy uint aux iambes une douleur endormie avec une pesanteur, ce que Strabon dit estre, par maniere de dire, un beguoyement de la goutte, c'est à dire, un apprentissage de la goutte qui commence à se former: à l'occasion

dequoy il se feit porter par mer, au lieu que lon nomme Adipsum, ou il y a des baings naturelz d'eaux chauldes, dedans lesquelz il se baigna, passant son temps ce pendant, & s'esbatant tout le long du iour à ouir des Musiciens, ioueurs de farces, & toute telle maniere de gens. Et un iour ainsi qu'il se promenoit sur le bord de la mer, il y eut des pescheurs qui luy presenterent de fort beaux poissons: il prit plaisir à leur present, & leur demanda dont ilz estoient: ilz luy firent responce qu'ilz estoient de la uille d'Ales.

Comment, dit il, y a il donques encore quelcun uiuant de ceulx d'Ales? ce qu'il disoit, pour au- tant qu'apres la bataille d'Orchomene, en poursuuant ses ennemis il auoit pris & destruiect trois uilles de la Bœoce tout en mesme temps, Anthedon, Larymne & Ales. Les pau- ures pescheurs furent si effroyez de ceste paro- le qu'ilz demourerent muets, & ne sceurent que dire, dont il se prit à rire, & leur dit qu'ilz s'en allassent en bonne heure sans auoir peur, pource qu'ilz estoient uenus avec des interces- seurs qui n'estoyent point petits, & qui ualoyēt bien que lon en feist compte. Depuis ces pa- roles ouyes, les Aleiens reprirent cueur & har- dieffe de se r'assembler en leur uille. Et Sylla passant à trauers la Thessalie & la Macedoine, descendit uers la coste de la mer, se preparant pour passer de la uille de Dyrrachium en celle de Brundusium avec douze cēts uoiles. La uille

d'Apollonie est aupres de celle de Dyrrachium, & ioignant icelle y a un parc sacré aux Nymphes, là ou dedans une uerte uallee & belle prairie sourdent par cy par là des bouillons de feu, qui fluent continuellement : & dit on que là fut pris un Satyre dormant tout tel que les peintres & les imagers le figurent. si fut mené à Sylla, & interrogué par toutes sortes de truchemens, qui il estoit, mais il ne respondit rien que lon peust entendre, ains seulement ierta une uoix aspre meslee du hennissement d'un cheual & du buglement d'un bouc: dequoy Sylla s'esmerueillant, l'eut en horreur, & le feit offer de deuant luy comme chose monstrueuse. Au reste quād il fut prest à embarquer ses gens pour passer la mer, il eut crainte que si tost qu'ilz auroient un pied en Italie, ilz ne se debdassent incontinent, s'en retournant chacun en sa uille : mais ilz iurerent & promeirent d'eulx mesmes premierement qu'ilz demoureroient & se tiendroyent ensemble, & qu'ilz ne feroient de leur uoulunté aucun mal en Italie : & oultre cela, uoyans qu'il auoit affaire de beaucoup d'argent, luy en offrirent du leur, & en contribuerent chacun selon le moyen qu'il auoit, & selon sa puissance : toutefois Sylla ne le uolut point prendre, ains les remercia tous de leur bonne uoulunté : & apres les auoir preschez & enhortez de bié faire, passa contre quinze Chefz d'armees de ses ennemis, qui

qui auoyent quatre cents cinquante enseignes de gens de pied en armes, ainsi que luy mesme l'escriit en ses commentaires. Mais les Dieux luy promettoyent par plusieurs euidentz signes heureule fortune en ses affaires : car en un sacrifice qu'il feist, aussi tost qu'il eut trauersé la mer, aupres de Tarente, le foye de l'hostie se trouua tout formé en maniere d'une couronne ou chapeau de laurier, duquel dependoyent deux banderolles. Et peu auant son passage en la Champagne pres du mont Epheon, en plein iour apparurent deux grands boucs, faisans tout ne plus ne moins que font deux hommes qui combatent : toutefois ce n'estoit pas chose uraye, ains une uision apparente seulement, laquelle se leuant de la terre petit à petit s'espan dit ça & là en l'air, & à la fin s'esuanouit comme des nuages qui disparoissent : & peu de temps apres en ce mesme lieu, le ieune Marius & le Consul Norbanus, qui amenoyent contre luy deux puissantes armées, furent par luy desfaits auant qu'il eust rengé ses troupes en bataille, ny ordonné à chacun l'endroit ou il deuroit combattre, employant seulement l'affection de bien faire que ses gens monstroyent auoir, & l'ardeur de leur courage. Puis suyuant sa uictoire, il contraignit le Consul de s'enfermer dedans la uille de Capouë, apres luy auoir tué six mille de ses gens. Cest exploit d'armes, ainsi qu'il dit luy mesme, fut cause que ses gens ne se

desbenderent, ny ne se retirerent point chacun en sa maison, ains se mainteindrent ensemble, & ne feirent point de compte des ennemis, encore qu'ilz fussent plusieurs contre un: & dit dauantage, qu'en la uille de Siluium il y eut un esclau d'un citoyen nommé Pontius, lequel estant espris de fureur prophetique & diuine, s'adressa à luy, disant qu'il luy annonçoit de la part de la Deesse Bellone, qu'il demoureroit le plus fort, & emporteroit la uictoire de ceste guerre: mais que s'il ne se hastoit, le Capitole s'en alloit bruslé, comme il aduint au mesme iour qu'il luy auoit predict, qui fut le sixieme iour du mois que lon appelloit alors *Quintilis*, & que nous appellons maintenant *Iuillet*. Qui plus est, *Lucullus*, un des Capitaines du party de *Sylla*, se trouuant pres la uille de *Fidentia*, avec seize enseignes seulement, à l'encontre de cinquante des ennemis, se confioit bien assez en la bonne uolunté de ses gens, mais pource qu'ilz estoient la pluspart tous nuds & desarmez, il craignoit de hazarder la bataille: & ainsi comme il estoit en ce pensement à deliberer ce qu'il en deuoit faire, il se leua un petit uent du costé d'une belle prairie, qui leur souffla grande quantité de fleurs, lesquelles il sema sur les souldards. Ces fleurs sarrestoyent d'elles mesmes, ainsi qu'elles tumboyent, aux uns sur leurs boucliers, aux autres sur leurs morrions sans cheoir à terre: tellement qu'il sembloit de loing aux

ennemis que ce fussent chappeaux de fleurs, qu'ilz eussent sur leurs testes. Cela rendit les soudards encore mieulx affectionnez qu'ilz n'estoyent, & en ceste uolunté si deliberee allerent charger leurs ennemis, qu'ilz desfeirent, & en occirent sur le champ bien dixhuit mille, & si prirent encore leur camp. Ce Lucullus estoit frere de l'autre Lucullus, qui depuis defeat les Roys Mithridates & Tigranes: toutefois Sylla uoyant encore ses ennemis espandus tout à l'entour de luy, avec plusieurs grosses & puissantes armées, pensa qu'il luy falloit user de ruze avec la force: si fit solliciter & semondre Scipion l'un des Consulz, de faire appointement avec luy: ce que Scipion ne refusa point, & sur cela se fit plusieurs allees & uenues, plusieurs assembles & plusieurs entreueüs & parlemens ensemble, pource que Sylla tiroit la conclusion en longueur le plus qu'il pouuoit, trouuât tousiours quelque occasion de dilayer, pour ce pendant prattiquer & corrompre les soudards de Scipion par le moyen des siens, qui estoient tous faits & duits à telles ruzes & tromperies, aussi bien que leur Capitaine: car entrans dedans leur camp & se messans parmy eulx, ilz en gaignoyent les uns promptement par argent comptant, les autres par promesses, les autres par caresses, flatteries & belles remonstrances qu'ilz leur faisoient. Finablement apres que ceste pratique eut duré quelque tēps,

Sylla s'approcha de leur camp avec uingt enseignes seulement : adonc ses gens saluerent ceux de Scipion , & eux les resaluans se tournerent & rendirent à luy, si que Scipion demoura tout seul en sa tente, ou il fut pris, mais on le laissa puis apres en aller. Ainsi Sylla avec ses uingt enseignes, ne plus ne moins que les oiseleurs avec leurs oileaux mignons, en ayant attiré en ses filez quarante des ennemis, les emmena tous ensemble dedans son camp. Ce fut alors que Carbon dit qu'il auoit à combattre un regnard & un lion tout ensemble en Sylla, mais que le regnard luy faisoit plus de mal & plus de dommage que le lion. Depuis cela le ieune Marius ayant en un camp quatre uingts & cinq enseignes pres la uille de Signium presenta la bataille à Sylla, lequel auoit bien bõne enuie de combattre, mesmement ce iour la, pource qu'il auoit eu la nuict une telle uision en dormant : Il luy fut aduis qu'il ueit Marius le pere qui estoit decedé ia long temps y auoit, admonestant son filz qu'il se gardast tresbien du iour du lendemain qui luy deuoit apporter un tresgrand malheur : à l'occasion dequoy Sylla desiroit singulierement uenir à la bataille ce iour la, & à ceste fin feit uenir Dolabella, qui estoit logé assez loing de luy: mais les ennemis se mettoient entre deux, & luy bouchoyent le passage pour le garder de se joindre à Sylla : & les gens de Sylla au contraire combatoyent pour luy ou-

urir le chemin, avec si grand trauail qu'ilz en estoyent tous las & recreuz: ioinct aussi qu'il suruint une grosse pluye, ainsi qu'ilz trauailloyent à faire le chemin, qui les rompit & lassa encore plus que la besongne qu'ilz auoyent faite: parquoy les particuliers Capitaines des bandes s'en allerent le remonstrer à Sylla, & le prier de uouloir differer la bataille à un autre iour, luy montrans les soudards recreuz du trauail, couchez sur leurs targes & boucliers en terre, pour se reposer: quoy uoyant, il leur accorda, combien que ce fust mal uoluntiers. Mais comme il eut donné le signe de loger, & que lon commenceoit desia à fermer le camp de la closture de paliz & d'une trenchee à l'entour, uoicy arriuer Marius à cheual, marchant brauement deuant toute sa troupe, en esperance de trouuer & surprendre ses ennemis en desordre, & par ce moyen les rompre & desfaire facilement: mais au contraire la fortune adonc accomplit à Sylla la reuelation qu'il auoit eüe en dormant: car ses gens entrerent en cholere, & abandonnans l'œuure de la trenchee, ou ilz besongnoyent, ficherent leurs iauelots dessus le bord, & s'en coururent les espees traittes aux poings avec grands cris charger les ennemis, lesquelz ne sousteindrent pas leur fureur longuement, ains se tournerent bien tost en fuitte, ou il en fut faict un tresgrand meurtre. Le Capitaine Marius tourna sa fuitte

deuers la uille de Præneste, dont il trouua les portes fermées : mais on luy deualla de dessus la muraille une chorde, de laquelle il se ceignit & fut ainsi guindé à mont : toutefois les autres, entre lesquels Fenestella en est un, disent que Marius ne ueit pas seulement la bataille, pource qu'estant aggraué de trauail & de faulte de dormir, il se coucha dessous quelque arbre à l'ombre, pour se reposer un petit, apres auoir desia baillé le signe & le mot de la bataille, & s'endormit si ferré, qu'à peine se peut il esueiller pour le bruit de la rouverte & fuite de ses gens. Sylla escrit luy mesme qu'il ne perdit en ceste bataille que uingt & trois de ses hommes, & qu'il en tua uingt mille des ennemis, & en prit huit mille prisonniers, & si eut semblable prosperité par tout ailleurs en ses lieutenans, Pompeius, Crassus, Metellus, Seruilius, lesquels sans rien perdre, ou bien peu, desfirent plusieurs grosses & puissantes armées des ennemis, de maniere que Carbo le principal Chef de la faction aduersaire, & qui plus la maintenoit en pied, s'enfouit une nuict de son camp, & s'en alla oultre mer en Afrique. Le dernier affaire qu'il eut, fut contre Telesinus Samnite, lequel estant comme un champion de lucte frais & reposé qui s'attache à un ia las & trauaillé d'auoir plusieurs fois combatu, faillit à le renuerfer & abbatre par terre sur les portes mesmes de Rome : car ayant ra-

massé bon nombre de combatans avec un Lamponius Lucanien, il tiroit en toute diligence uers la uille de Præneste pour deliurer le ieune Marius qui y estoit assiegé: mais entendant que Sylla à grandes iournees uenoit d'un costé pour le rencontrer par deuant, & Pompeius d'un autre costé par derriere: & uoyant que le chemin luy estoit clos de pouuoir aller ny en auant ny en arriere, il prit une resolution hazardeuse, comme grand homme de guerre qu'il estoit, & qui s'estoit trouué en plusieurs bons affaires, de tirer droit à Rome: si se partit une nuit avec toute sa puissance pour y aller, & s'en fallut bien peu qu'il n'y entrast de primsault, car elle estoit sans garde & sans defense quelconque, mais il s'arresta à enuiron demie lieuë de la porte Colline, se glorifiant & se promettant toutes grandes choses pour auoir abuzé tant & de si grands Capitaines. Le lendemain au matin sortirent de la uille à l'escarmouche quelques ieunes gentilshommes des meilleures maisons, dont il en occit plusieurs, & entre autres, Appius Claudius ieune homme de fort noble maison & homme de bien: à l'occasion dequoy y eut, comme lon peult penser un grand trouble & grand effroy dedans la uille, mesmement des femmes qui crioient & couroyent ça & là, cuidans desia estre toutes prises: mais sur ces entrefaites arriua le premier Balbus, que Sylla enuoya deuant à bride abbatue avec sept cents

cheuaux, & n'arrestant sinon qu'autant qu'il falloit pour donner halene aux cheuaux & les refreschir un peu seulement, il les feit rebri-der incontinent, & alla charger les ennemis pour les arrester. Tantost apres comparut aussi Sylla, qui commanda aux premiers arriuez de ses gens qu'ilz desicunassent habilement, & tout incontinent les rengea en bataille, combien que Dolabella & Torquatus luy remon-straissent, & le priaissent de ne uouloir exposer ses gens las & recreuz du chemin qu'ilz auoyent fait, à cest extreme peril ou il alloit de tout, attendu mesmement qu'ilz n'auoyent pas à faire à Carbo ny à Marius, ains aux Samnites & aux Lucains, qui estoient deux nations fort belliqueuses, & celles qui haïssoient plus asprement les Romains. Ce nonobstant il les renuoya, & commanda aux trompettes qu'ils sonnassent le son de la bataille qu'il estoit desia presque quatre heures du soir, & fut la meslee aussi aspre & plus que nulle autre qui eust esté en toute celle guerre. La poincte droite ou estoit Crassus y eut de beaucoup le meilleur, mais la gauche y fut fort pressée & fort endommagée. Ce qu'entendant Sylla & y cuidant aller au secours, monté sur un cheual blanc fort courageux & fort uiste, les ennemis le recogneurent, & y en eut deux qui estendirent les bras pour luy lancer leur iauelines, sans que luy les apperceust : mais son escuyer donna un

coup de fouet au cheual, qui le feit passer oultre
si à poinct que les fers des iauelines luy passerēt
rez à rez de la cueuë, & se planterent en terre.
Lon dit qu'il auoit une petite image d'Apollo
d'or qu'il auoit apportee de la uille de Delphes,
laquelle il souloit tousiours porter en son sein à
la guerre: il la prit lors en sa main & la baïsa, en
disant: O Apollo Pythien, as tu si haultement e-
leué Cornelius Sylla, le biē fortuné iusques icy
par tant de glorieuses uictaires, pour le renuer-
ser maintenant en terre tout à un coup, si hon-
teusement, aux portes mesmes de son païs avec
ses citoyens? En inuoquant ainsi Apollo à son
aide, Sylla se ietta parmy ses gens, en priant les
uns, & menaçant les autres, iusques à mettre les
mains sur aucuns pour les arrester: mais nonob-
stant cela, toute celle poincte gauche de son ar-
mee fut rompue & mise en fuite par les enne-
mis, & luy mesme parmy la foule des fuyās fut
contrainct de regagner son camp de uistesse,
ayāt perdu plusieurs de ses familiers & amis, &
y eut aussi plusieurs de la uille qui estans sortis
pour uoir le combat seulement, y moururent,
& furent foulez aux piedz par les hōmes & par
les cheuaux, de maniere q̄ lon pensoit desia que
ce fust fait de la uille. Et s'en fallut biē peu, que
ceulx qui tenoyēt Marius assiegé ne leuassent
leur siege, pource que plusieurs fuyans de celle
roupte, dōnerent iusques là, qui dirent à Lucre-
tius Offella, lequel auoit la superintendence de

ce siege, qu'il deslogeast le plus tost qu'il pour-
roit de là , pource que Sylla estoit mort, & la
uille de Rome prise par les ennemis. Mais estât
ia fort auant en la nuict, il arriua au camp de
Sylla quelques gës que Crassus y enuoyoit, qui
demandoyent à soupper pour luy & pour ses
gens, pource que ayant chassé les ennemis, qu'il
auoit rompus, iusques à la uille d'Antemna , ou
ilz festoyent retirez, il festoit aussi campé là: ce
qu'entendant Sylla , & estant aussi aduertý
comme la plus part des ennemis auoit esté des-
faicte en la bataille, s'en alla luymesme le len-
demain matin à Antemna , là ou trois mille
hommes des ennemis enuoyerent deuers luy,
pour sçauoir s'il les uoudroit receuoir à mercy,
& qu'ilz se rendroyent à luy, ausquelz il feit
response qu'il leur donneroit la uie, si premier
que de s'en uenir deuers luy, ilz faisoient quel-
que dommage à leurs compagnons. Parquoy
ces trois mille se fians en ceste promesse, se
ruerent sur les autres, de sorte, que pour la
pluspart ilz s'entretuerent eulx mesmes les uns
les autres. Et neantmoins Sylla ayant fait as-
sembler ce qui en estoit demouré, tant de ces
trois mille la que des autres, iusques au nôbre
de six mille hommes, dedans le parc des lices
ou lon fait courir les cheuaux, teint le Senat
dedás le temple de la Deesse Bellone, là ou pé-
dant qu'il faisoit sa harégue, il auoit ordonné gës
pour desfaire & mettre en pieces ces six mil-

le hommes. Si furent les cris que ietterent tant d'hommes que lon tuoit ainſi en peu de lieu, fort grands, comme lon peult penſer: tellement que les Senateurs ſeans en conſeil les oyoyent facilement, & ſeſbahifſoyent que ce pouuoit eſtre: mais luy continuant touſiours le propos qu'il leur auoit commencé d'un uiſage conſtant, ſans muer de couleur, leur dit qu'ilz entendiffent ſeulement à ce qu'il leur diſoit, ſans ſe ſoucier de ce qui ſe faiſoit dehors, pource que c'eſtoient quelques meſchans que lon puniſſoit par ſon commâdement. Cela eſtoit aſſez pour faire toucher au doigt au plus groſſier qui fuſt dedans Rome, qu'ilz n'auoyent que changé ſeulement de tyran, & qu'ilz n'eſtoient point hors de tyrânie. Mais Marius ayant touſiours eſté des ſon commencement ſeuere & auſtere de nature, ne ſe changea point pour puissance qu'il cuſt, & ne ſeit que tendre & roidir dauantage ſon auſterité naturelle: là ou Sylla ayant du commencement uzé modereement & ciuilement de ſa fortune, & ayant donné opinion de ſoy, que ſil uenoit à auoir l'autorité ſouueraine de prince, il fauoriſeroit bien la nobleſſe, mais neantmoins aimeroit auſſi l'utilité du peuple: & dauantage ayant eſté en ſa ieuneſſe homme de plaifir, aimant à rire, tendre à pitié, iuſques à plorer facilement, & puis à la fin eſtant deuenu ainſi cruel, ſeit non ſans cauſe, calumnier & comdamner les grands accroiffe-

mens de puissance & d'honneurs, d'estre cause que les meurs des hommes ne demeurent pas telles qu'elles estoient du commencement, ains se vont changeant, & rendent les uns folz, les autres uains, & les autres cruelz & inhumains: toutefois si cela fut un changement de nature produit par la mutatiō de fortune, ou biē plus-tost une descouuerture de malignité cachee, qui uint à se descouurir quand elle eut moyen & licence de le faire, ce seroit à un autre sort de traitté à le decider. Tāt y a, que Sylla se ietta au sang, & emplit la uille de Rome de meurtres sans fin & sans nombre: car il y en eut plusieurs tuez pour inimitiez particulieres, qui n'auoyēt iamais eu rien à desmesler avec Sylla, lequel permettoit à ses amis & à ceulx qu'il auoit autour de luy, de commettre de telz excès, iusques à ce qu'il y eut un ieune homme nommé Caius Metellus, qui prit la hardiesse de luy demander en plein Senat, quand seroit la fin de tant de maulx, & quand ilz arriueroyēt à tel but qu'ilz se peussent asseurer de ne uoir désormais plus les miseres qu'ilz uoyoyent tous les iours:

20 car nous ne uoulons pas te prier de pardon-
 20 ner à ceulx que tu as deliberé de faire mou-
 20 rir, mais bien de oster de doubte ceulx que tu as
 20 resolu de sauuer. A quoy Sylla respondit, qu'il
 n'estoit pas encore bien resolu de ceux qu'il de-
 20 uoit sauuer. Metellus luy repliqua, Declare au
 20 moins ceulx que tu ueux faire mourir. Sylla

respondit, que si feroit il . Toutefois aucuns disent que ce ne fut pas Metellus , mais Aufidius, l'un de ses flatteurs , qui luy dit ceste derniere parole. Parquoy Sylla incontinent sans en parler ny communiquer à pas un des magistrats , publia par affiches les noms de quatreuingts qu'il uouloit faire mourir : dequoy chascun estant malcontent , il en publia un iour apres autres deux cents & uingt , & cōsequemment le troisieme iour encore autant . Surquoy faisant une harengue au peuple , il dit publiquement , qu'il auoit proscriit ceulx dont il s'estoit peu souuenir : mais qu'il proscriroit puis apres à la iournee ceulx qui luy uiendroyent en souuenance. Celuy qui sauuoit en sa maison un proscriit , pour loyer de ceste humanité, estoit luy mesme proscriit & condamné à mourir , sans excepter ceulx qui auroient recueilly leurs freres , leurs filz , leurs peres , ou leurs meres : & le pris de l' homicide qui tuoit un des proscripts , estoit deux talents, qui sont douze cents escus: quoy q̄ ce fust un esclau qui eust tué son maistre, ou un filz qui eust tué son pere: & ce qui fut trouué encore plus iniuste que tout, c'est qu'il nota d'infamie les enfans , & les enfans des enfans de ceulx qu'il auoit proscripts , & confiscatous leurs biens . Ce qui ne se faisoit pas seulement à Rome , mais aussi en toutes les uilles de l'Italie, & n'y auoit temple de quelque Dieu que ce fust, ny autel domestique , ou franchise

d'hospitalité, ny maison paternelle qui ne fust
souillée de sang, & contaminée de meurtre : car
les maris estoient tuez entre les bras de leurs
femmes, & les enfans au giron de leurs meres:
encore n'estoit ce rien de ceulx que lon tuoit
par haine & inimitié priuée, aupres de ceux que
lon meurtrissoit pour auoir leurs biens: & pou-
uoient bien dire ceulx qui les tuoyent, Son
beau grãd logis fait mourir cestuy cy : son beau
iardin, celuy la : un autre, ses baings naturelz:
côme entre les autres Quintus Aurelius, hom-
me qui ne s'estoit iamais entremis ny meslé de
rien, & qui ne pensoit que ces maulx luy deus-
sent toucher en rien de plus pres, que d'auoir
pitié de ceulx qu'il uoyoit ainsi miserablement
tuez, s'en alla un iour sur la place, là ou en lisant
le rolle des noms de ceulx qui estoient pros-
crits par affiches, il y trouua le sien entre les autres,
& s'escria tout hault, O malheureux que ie suis !
helas ! ma maison d'Alba me fait mourir. Il n'al-
la pas guere loing de là qu'il rencontra un qui
le tua. Ce pendant le ieune Marius uoyant
bien qu'il ne pouuoit eschapper qu'il ne fust
pris, se desfeit luy mesme. Et Sylla se trans-
portât à Preneste fait du cōmencement le pro-
ces à ceulx de la uille, un à un, gardant quelque
forme de iustice à les faire punir : mais depuis,
comme fil n'eust pas eu loisir de tant y uac-
quer, il les fait assembler tous en un lieu, ius-
ques au nôbre de douze mille hōmes, qu'il fait

passer tous au fil de l'espee, exceptant seulement son hoste, auquel il dit qu'il faisoit grace de luy sauuer la uie: mais l'hoste luy respondit magnanimement, qu'il ne seroit iamais tenu de sa uie à celuy qui auroit ainsi tué & meurtry tous ceux de son pais, & se iettant parmy ses citoyës, se fit uoluntairement occire quand & eulx. Lon trouua aussi fort estrange l'acte de Lucius Catilina, lequel auparauant que ceste guerre ciuile fust terminee auoit occis son propre frere, & lors il pria Sylla qu'il le meist au nombre des proscripts, cōme s'il eust esté encore uiuant. ce qu'il feit: & pour luy rendre graces de ce plaisir, alla sur l'heure mesme occire un Marcus Marius, qui estoit de la partie & factiō contraire, & luy en apporta la teste publiquement deuant tout le monde, au milieu de la place ou il estoit assis, & cela fait s'en alla lauer ses mains souillees de sang, dedans le benoistier du tēple d'Apollo qui estoit pres de là. Mais oultre tant de meurtres encore y auoit il d'autres choses qui desplaisoyent fort au monde: car il se declara luy mesme Dictateur, lequel magistrat n'auoit esté il y auoit bien six uingts ans à Rome, & se fit decerner abolition generale de tout le passé, & pour l'aduenir licence de faire mourir qui bon luy sembleroit, confisquer biens, repeupler uilles, en fōder de nouuelles, ou en sacager & destruire d'anciēnes, oster royaumes & les dōner à qui il luy plairoit. Qui pus est, il uen-

dit publiquement à l'encan les biens qu'il auoit
 confisque^z, si fierement & si superbement seant
 en son tribunal, qu'il faisoit plus de mal aux
 assistans de les uoir estrou^uer à ceulx à qui il les
 adiugeoit, que de les oster à ceulx qu'il con-
 fisquoit, donnant aucunes fois tout un païs, ou
 tout le reuenu de quelques uilles à des femmes
 pour leur beauté, ou à des farceurs, plaisans, me-
 nestriers, ou à de melchans esclau^{es} affranchiz,
 & à aucuns des femmes ailleurs mariees, qu'il
 ostoit à leurs legitimes maris par force pour les
 leur faire espouser malgré elles. Car uoulant,
 comment que ce fust, l'allier de Pompeius Ma-
 gnus, il luy commanda de repudier la femme
 qu'il auoit espousee, & osta à Magnus Glabrio
 Æmylia fille d'Æmylius Scaurus, & de Metella
 sa femme, & la luy feit espouser toute grosse
 qu'elle estoit de son premier mary: mais elle
 mourut en trauail d'enfant au logis de Pom-
 peius: & cōme Lucretius Ofella, celuy qui auoit
 conduit le ieune Marius à l'extremité, poursuy-
 uist & demanda l'office du Cōsulat, Sylla pre-
 mieremēt luy feit defense qu'il ne le demādast:
 toutefois nonobstant sa defense, il s'en alla un
 iour sur la place avec grande suite de gens qui
 fauorisoyent à sa poursuite. Sylla y enuoya un
 Centenier des satellites qu'il auoit autour de
 sa personne, qui le tua deuant tout le monde,
 pendant que luy estoit assis en son tribunal au
 temple de Castor & de Pollux, regardant d'en-
 hault

hault faire ce meurtre . Le peuple qui se trouua à l'entour, saisit incontinent le meurtrier , & le mena deuant Sylla : lequel commanda à ceulx qui le luy presentoyét en tumulte, qu'ilz se teussent, & qu'ilz laissassent aller le Cétenier, pour ce que c'estoit par son commandement qu'il l'auoit fait. Au demourât, quant à son triumphe, il fut bien superbe & magnifique à uoir pour la nouveaulté, richesse & sumptuosité des despouilles royales, qui furent portees à la monstre: mais encore fut il bié plus embelly & plus digne de uoir pour les bannis, qui estoient les plus nobles & les plus puissans personnages de toute la uille, qui suyuirent son chariot triumphal, estans couronnez de chapeaux de fleurs, appellans Sylla leur pere & leur sauueur, à cause que par son moyen ilz retournoient en leur païs, & recouuroient leurs biens, leurs femmes & leurs enfans. A la fin de ce triumphe il feit une harégue en pleine assemblée du peuple Romain, en laquelle rendant compte & raison des choses par luy faites suyuant la coustume, il ne recita pas moins soigneusement ses bonnes aduentures & prosperitez, que ses uaillances & prouesses : & finablement dit, qu'il uouloit que pour la faueur que luy auoit fait fortune, on le surnommast Felix, c'est à dire, heureux ou bien fortuné, & luy mesme quand il escriuoit aux Grecs ou qu'il traittoit d'affaires avec eulx, se surnommoit Epaphroditus, com-

me qui diroit, aimé & fauorisé de Venus. Ses trophées mesmes qui sont encore en nostre pais, ont ceste superscription, Lucius Cornelius Sylla Epaphroditus. Et comme sa femme Metella luy eust fait deux enfans iumeaux, filz & fille, il nomma le filz Faustus, qui signifie heureux, & la fille Fausta, pource que les Romains appellēt Faustū, ce qui succede prosperement & par grād heur. Brief il se fioit de tāt plus en son heur & en sa bonne fortune qu'en ses faicts, que combien qu'il eust tant tué & fait mourir de gens, & qu'il eust fait un si grand changement & une si grāde innouatiō en la chose publique, ce neantmoins encore se deposa il luy-mesme uoluntairement de son estat de Dictateur, & remeit entre les mains du peuple l'authorité d'elire les Consuls, sans qu'il entreuint à l'election, hantant comme personne priee parmi les autres citoyens en la place, & exposant sa personne à qui luy eust voulu demander compte & raison du passé. Si y eut un sien ennemy, homme audacieux & temeraire, nommé Marcus Lepidus, qui fut eleu Consul contre sa uolunté, non ia pour affection que le peuple portast à ce Lepidus, mais pour gratifier à Pompeius qui le portoit & luy fauorisoit: parquoy Sylla uoyant Pompeius qui s'en retournoit de l'election en sa maison, bien ioyeux d'auoir emporté la uictoire de celle brigade, il l'appella & luy dit: Vrayemēt tu as biē cause de te resiouir,

ieune filz mon amy , car tu as fait un beau chef
d'œuure, ayant fait elire Consul Lepidus le plus
estourdy fol qui soit en toute ceste uille , plus
tost que Catulus le plus homme de bien qui y
soit: mais ie t'aduerty bié d'une chose, c'est qu'il
ne te fault pas dormir maintenant : car tu as ar-
mé & fortifié un ennemy qui te fera à roy mes-
me la guerre . Ceste parole de Sylla fut une ue-
ritable prophetie : car Lepidus incontinent feit
tant d'insolences , que bien tost il fut aux prises
auec Pompeius. Au surplus Sylla donnant &
côsecrant à Hercules la dixme de tous ses biés,
feit de sumptueux festins au peuple Romain ,
desquelz les preparatifz furent si grands & si
excessifz, que lon iettoit par chascun iour gran-
de quantité de uiâdes dedás la riuere, & y beu-
uoit on du uin de quarante ans & plus . Pendât
lesquelz festins, qui durerét par plusieurs iours,
Metella sa femme deceda de maladie , durant
laquelle les presbtres & deuins l'aduertirent,
qu'il ne falloit pas qu'il s'approchast d'elle , ne
que sa maison fust pollue du dueil d'un trespas-
sé: au moyen dequoy Sylla feit diuorce auec
elle malade , & la feit transporter qu'elle estoit
encore uiuante en une autre maison . Ainsi ob-
serua il bien soigneusement ceste ordonnance
des deuins par une superstition : mais il trans-
gressa la loy qu'il auoit luy mesme faite , tou-
chant le reglement des funerailles , n'espargnât
despense quelconque en celles de Metella: aussi

feit il celle qu'il auoit semblablement faite luy
mesme, touchant la reformation des banquets,
reconfortant son dueil par festins ordinaires
pleins de toutes delices & de toute dissolution.
Quelques mois apres il se feit des ieux d'e-
scrime à oultrance, & n'estans point encore les
places distinguees au theatre, ains seans les hom-
mes pelse mesle parmy les femmes, il se trou-
ua ioignant Sylla une Dame assise, belle de ui-
sage, & de grande maison : car elle estoit fille
de Messala, & sœur de Hortensius l'orateur,
nōmee Valeria, laquelle auoit de nagueres fait
diuorce auec son mary : ceste Dame en passant
au long de Sylla par derriere, s'appuya un peu
de la main sur son espaulle, & luy osta un poil de
dessus sa robbe, puis passa oultre & fallà seoir
en sa place. Sylla s'esmerueillā de ceste priuau-
té, & la regarda: adonc elle luy dit, Ce n'est rié,
Seigneur, sinon que ie desire aussi bien que
les autres, me sentir un peu de ta felicité. Ceste
parole ne despleut point à Sylla, ains au cōtrai-
re il dōna à cognoistre qu'elle l'auoit chatouil-
lé: car il luy enuoya incontinent demander son
nom, & s'enquit de quelles gens elle estoit, &
comment elle auoit uescu, & depuis cela ilz
s'entreietterent force œillades, & tournerent à
tout propos le uisage l'un uers l'autre, & s'entr'-
enuoyerent des ris l'un à l'autre, tant qu'à la fin
ilz uindrent aux promesses & conuentions de
mariage, pour lequel Valeria à l'aduenture ne

merite point de reprehensio:mais encore qu'elle fust la plus honeste, la plus sage, & la plus uertueuse du monde, si est-ce que l'occasion qui eueut Sylla à l'espouser, ne fut ny belle ny bonne, pource qu'il fut incontinent espris par un regard & un parler affecté, comme si c'eust esté quelque ieune garson:& ce sont ordinairement les plus laides & les plus honteuses passions de l'ame, qui se mouuent de telles choses: tourefois encore qu'il eust ceste ieune Dame en sa maison, si ne laissoit il pas de tenir continuellement chez soy des menestrieres & basteleuses, & d'auoir tousiours en sa compagnie des farceurs, plaisans, chantres & musiciens, avec lesquels il beuuoit & yurongnoit sur de petis liets bas tout le lōg du iour:car ceux qui lors auoyēt plus de credit à l'entour de luy estoient un Roscius ioueur de farces, un Sorex maistre bouffō, & un Metrobius chantre, duquel il fut tousiours, tant qu'il uescut, amoureux, & ne le dissimuloit pas, encore qu'il fust hors d'aage d'estre aimé. Ceste uie dissoluë fut cause de luy augmenter sa maladie, dont la cause primitiue fut legere du commencement:car il fut long temps sans s'appercevoir qu'il auoit une apostume dedans le corps, laquelle par succession de temps uint à corrompre sa chair, de sorte qu'elle la tourna toute en poulx, tellement que comme qu'il y eust plusieurs personnes apres à l'espouiller nuit & iour, ce n'estoit encore rien de

ce que lon ostoit au pris de ce qui reuenoit, & n'y auoit uestement, linge, baing, lauatoire, ny uiande mesme, qui ne fust incontinent remplie du flux de ceste ordure & uillanie, tant il en sortoit : car il entroit plusieurs fois le iour dedans le baing pour se lauer & nettoyer : mais tout cela ne seruoit de rien : car la mutation de sa chair en ceste pourriture le gaignoit incontinent de uistesse, & n'y auoit moyen de nettoyer qui peust suffire à si grande quantité. Lon dit que iadis entre les plus anciens hommes dont il soit memoire, Acast⁹ filz de Pelias mourut de ceste maladie de poux, & long temps depuis le poëte Alcman, & Pherecydes le Theologien, aussi fait Callisthenes Olynthien estant detenu en prison, & Mutius homme sçauant es loix, & fil fault faire mention de ceulx qui sont renommez, encore que ce ne soit pour nulle cause bonne, lon treuue qu'un serf fugitif nommé Eunus, celuy qui suscita le premier la guerre des serfs en la Sicile, ayât esté pris & mené à Rome, mourut aussi de ceste mesme maladie. Au demourant, Sylla non seulement preueit sa mort, mais aussi en escriuit aucunement : car il acheua d'escrire le vingt & deuxieme liure de ses commentaires deux iours auant qu'il trespastast, auquel liure il dit, que les deuins de Chaldee luy auoyét predict qu'il falloit, apres auoir honorablement uescu, qu'il decedast en la fleur de ses prosperitez : & dit encore que son filz, lequel e-

Estoit decedé un peu auant Metella sa femme, s'apparut à luy en dormât uestu d'une meschante robbe, & que s'approchant de luy il le pria de ne se trauailler plus, & qu'il s'en allast avec luy deuers Metella sa mere, pour desormais uiure avec elle en paix & en repos: toutefois pour sa maladie il ne laissa pas de s'entremettre encore des affaires publiques: car dix iours auant son trespas, il pacifia une sedition qui s'estoit emeue entre les habitans de la uille de Poussol, & leur establit des statuts & ordonnances, suyuant lesquelles ilz auroient de là en auant à uiure & à se gouuerner: & le iour de deuant qu'il trespassast, estant aduertty que Granus qui deuoit de l'argent à la chose publique, differoit de payer, attendant sa mort, il l'enuoya querir & le feit uenir en sa chambre, là ou si tost qu'il fut uenu il le feit enuironner par ses ministres, & leur commanda de l'estrangler deuant luy: mais à force de crier apres luy & de se tourmenter, il feit creuer l'apostume qu'il auoit dedans le corps, & rendit grande quantité de sang: au moyen dequoy luy estant toute force faillie, il passa la nuict en grande agonie, & puis mourut laissant deux petits enfans de Metella: car Valeria depuis sa mort accoucha d'une fille, qui fut appelée Posthuma, pource que les Romains appellent Posthumes, les enfans qui naissent apres la mort de leurs peres. Si tost qu'il fut decedé, plusieurs se retirent deuers le Consul Le-

pidus, & se banderent avec luy pour empescher
que son corps ne fust honorablement inhumé,
comme lon auoit accoustumé de faire aux per-
sonnes de sa qualité: mais Pōpeius, encore qu'il
fust mal content de luy, à cause que par son te-
stament il ne luy auoit rien laissé, comme il a-
uoit fait à tous ses autres amis, en feit deporter
les uns par amour & par prieres, & les autres
par menaces, & accompagna le corps iusques
dedans Rome, donnant au conuoy de ses fune-
railles & seureté & honneur tout ensemble: &
dit on que les Dames Romaines entre autres
choses y contribuerent si grande quantité de
senteurs & de drogues odorantes à faire per-
fums, que oultre celles qui furent portees en
deux cents & dix māes, on en forma une fort
grande image à la semblance de Sylla mesme, &
une autre d'un massier portant les haches de-
uant luy toutes faittes d'encens fort exquis &
de cinamome. Quand uint le iour prefix aux fu-
nerailles on se doubtoit le matin qu'il deust
plouuoir, à cause que le ciel se tenoit tout cou-
uert, tellemēt qu'ilz n'enleuerēt point le corps
pour le porter au feu qu'il ne fust bien enuiron
sur les trois heures apres midy: & lors il se
leua soudain une bouffee de uent impetueux
qui enflamma incontinent tout le bucher, de
forte que le corps fut en peu d'heure tout con-
sumé auāt que la pluye cōmencest: & sur la fin
que le bucher s'en alloit declinant, & le feu

assopissant, il tumba une fort grosse pluye qui dura toute la nuict, de maniere qu'il sembla que la bonne fortune l'accompagnant iusques au bout, aida encore apres sa mort à ses obseques. Sa sepulture est sur le champ de Mars, & dit on que luymesme feit l'inscription de l'Epitaphe qui est dessus escript, dont la substance est en somme, que iamais homme ne le passa ny à faire bien à ses amis, ny à faire mal à ses ennemis.

LA COMPARAISON DE SYLLA AVEC LYSANDER.



R maintenant que nous auons exposé au lōg la uie du Romain aussi, uenons à les comparer ensemble. Ilz ont donques cela commun entre eulx, que tous deux se sont faits grands, ayans pris en eulx mesmes le commencement de leur croissance : mais cela est propre & particulier à Lysander, que tous les offices & degrez de dignité qu'il a euz en sa chose publique, ce a esté du gré & du consentement de ses citoyens estans de sain iugement : car il ne les a forcez à rien, ny n'a usuré aucune puissance extraordinaire sur eulx contre les loix : là ou, comme dit le commun prouerbe,

- 30 Ou discord regne & partialité,
- 30 Le plus meschant a lieu d'autorité.

Comme pour lors à Rome le peuple estant corrompu, & l'estat du gouuernement depraué & gasté, il sy leuoit auiourdhuy un tyran, & demain un autre : au moyen dequoy il ne se fault point esmerueiller si Sylla usurpa la domination, là ou de telles gens comme un Glaucia & un Saturninus chassoyét de la uille, & faisoient bannir de telz personnages comme Metellus, & là ou en pleine assemblee de uille on tuoit sur la place les filz des Consuls, là ou lon auoit la force des armes par or & par argent, dont on acheptoit les soudards, & ou lon faisoit passer les edicts & ordonnances nouuelles avec le feu & l'espee, dont on forceoit les contredisans. Toutefois ie ne dis pas cela pour reprendre celuy qui parmy tant de difficultez a trouué moyen de se faire le plus grád, mais pour monstrier que ie n'estime pas le plus homme de bien celuy qui a esté le premier en une uille si fort deprauée, & que celuy qui fut enuoyé de Sparte, alors qu'elle estoit la mieulx policee & mieulx ordonnée, aux plus grands affaires, & aux plus honorables charges, estoit reputé le meilleur des meilleurs, & le premier des premiers : dont il aduint que l'un rendoit souuent son autorité à ses citoyens qui la luy auoyent baillée, lesquelz la luy rebaiillerent par plusieurs fois, pource que l'honneur de la uertu luy demouroit tousiours, qui le rendoit le premier : là ou l'autre ayant une fois seulement esté eleu

Chef d'une armee , demoura dix ans entiers continuellement en armes, se faisant luy mesme par force tantost Consul, tantost Viceconsul, & tantost Dictateur, mais tousiours demourant tyran. Il est bien uray que Lyfander attenta de remuer & changer l'estat du gouuernement de son pais, mais ce fut plus doucement & plus legitimement que Sylla : car il le uoulut faire avec remonstrance de la raison, non point avec les armes au poing, & si ne uouloit pas changer toutes choses à un coup comme l'autre, ains uouloit seulement corriger l'election des Roys : ce qui selon nature sans point de doubte sembloit estre iuste, que celuy qui entre les bons seroit le meilleur, fust eleu Roy en celle cité qui tenoit la principaulté sur toute la Grece, non point pour sa noblesse, mais seulement pour sa uertu. Car tout ainsi que le bon ueneur ne cherche pas ce qui est né d'un bon chien, mais le chien mesme qui soit bon, ny semblablement le sage homme d'armes, ce qui est né d'un cheual, mais le cheual mesme : aussi celuy qui sentremet d'establis un gouuernement politique, cōmet une lourde faulte, s'il s'amuse à chercher de qui deura naistre son prince, & non pas quel il sera, attendu que les Spartiates mesmes ont priué aucuns de leurs Roys de la couronne & royauté, pource qu'ilz n'estoyent point royaux, ains hommes inutiles & personnes de neant. Le uice, encore qu'il soit en un subiect

ou il y a noblesse de sang, est tousiours infame: & la uertu est honoree pour l'amour de soy-mesme, & non pour estre ioincte à la noblesse. Quant aux torts & iniustices qu'ilz ont tous deux commises, l'un les a commises pour ses amis, & l'autre iusques à offenser ses amis: car il est certain que Lyfander fait beaucoup de uiolences pour gratifier à ses familiers, & que la pluspart des hommes qu'il fait mourir fut pour establir la tyrannique domination d'aucuns de ses amis: là ou Sylla tafcha par enuie à oster son armee à Pompeius, & à Dolabella la superintendence de la marine que luy mesme luy auoit baillee, & fait occire publiquement deuant ses propres yeux Lucretius Ofella, qui pour recompése de plusieurs grâds seruices qu'il auoit faits, demandoit l'honneur du Consulat: en quoy faisant il donna grande frayeur à tout le monde, de faire ainfi tuer ses propres amis. Dauantage leurs deporremens, quant à l'auarice & à la uolupté, monstrent que l'intention de l'un estoit celle d'un bon prince, & celle de l'autre d'un tyran: car on ne treuve point que Lyfander en si grande puissance & si grande autorité comme il eut, ait iamais fait acte d'intemperance, ny de dissolution, ains a tousiours euité, autant que fait onques homme, le reproche de ce commun prouerbe,

” Lions chez eulx, & regnards au dehors.
Tant il a tousiours mené une uie ueritablemēt

Laconique, & estroittement reformee en tout & par tout: là ou Sylla ne fut iamais moderé en ses concupiscences, ny par pauvreté lors qu'il estoit ieune, ny par l'aage apres qu'il fut deuenu uicil: ains en faisant des ordonnances à ses citoyens touchant l'honesteté des mariages, & touchant la continence, luy ce pendant ne faisoit que uacquer à l'amour & commettre adulteres, ainsi que l'escriit Salustius, dont il aduint qu'il appauurit & espuisâ tant la uille de Rome d'or & d'argent, qu'il uendit à deniers comptans affranchissement entier & pleine exemption à des uilles allies & confederees, encore que tous les iours il ne feist autre chose, que cōfiscuer & soubhafter les plus riches maisons & plus argenteuses qui fussent en la uille: mais cela ne montoit encore rien aupres de ce qu'il respandoit tous les iours, & qu'il iettoit à ses plaisans & à ses flatteurs. Car quelle espargne ny quelle mesure deuons nous estimer qu'il gardast es dons qu'il faisoit à part en ses banquetts priuez? ueu que le iour en public, estant tout le peuple Romain à l'entour de luy à le uoir uendre les biens qu'il auoit confisquees, il fait estrousser pour biē petit pris une fort grande cheuance à l'un de ses familiers & amis: & comme quelque autre y eust mis par dessus luy une grosse enchere, & le crieur l'eust crieé à haulte uoix, il s'en courroucea, disant, Mes amis, lon me fait icy un grand tort, de ne me permet-

» tre point que ie uende mon butin à ma uoulun-
» ré, & d'en disposer comme ie uoudray : là ou
Lyfander au contraire enuoya au public de
Sparte avec l'autre argent, les presens mesmes
que lon luy auoit particulièrement donnez :
combien que ie ne louë pas ce qu'il feist en cest
endroit : car à l'aduenture feist il plus de dom-
mage à Sparte, en y introduisant l'or & l'ar-
gent, que Sylla ne feist à Rome, en l'en espuis-
sant & appauurissant : mais ie l'allegue pour
prouuer seulement & monstrier qu'il n'estoit a-
uaricieux aucunement. Ilz ont bien tous deux
fait chacun enuers sa uille, ce que lon ne treuve
point qu'autres qu'eulx ayent onques fait : car
Sylla estant homme superflu, desordonné &
dissolu, rendit ses citoyens reformez & reglez :
& Lyfander, au contraire, emplit sa uille de ui-
ces, dont il n'estoit point entaché. Ainsi peche-
rent ilz tous deux, l'un en ne gardât pas ce qu'il
commandoit par ses loix, & l'autre en rendant
ses citoyens pires que soy : car il enseigna aux
Spartiates à conuoiter les choses que luy mes-
me auoit appris à mespriser. Voyla quant aux
affaires de paix, & aux choses ciuiles. Au de-
mourant quant aux exploits de guerre & aux
faicts d'armes, il n'y a point de comparaison de
Lyfander à Sylla, ny en nombre de uictoires,
ny en hazard de batailles : car Lyfander ne gai-
gna seulement que deux batailles nauales : ie
luy adioustera encore la prise d'Athenes, qui

ne fut pas, à considérer la chose en soy, un grand exploit de guerre, mais bien fut ce, à considérer la reputation qu'il en acquit, un acte tresglo-rieux. Et quant aux choses qui luy aduindrent en la Bœoce, ioignât la uille d'Aliarte, on pourroit dire à l'aduenture, qu'il y eut du malheur, mais aussi me semble il, qu'il y eut bien de sa faulte, de n'auoir pas attendu le gros renfort qui luy uenoit de l'armee du Roy, qui arriua de Platées incontinent apres sa desfaitte, & par un courroux & une uaine ambition, il alla auant le temps donner de la teste contre une muraille, tellement que des hommes telz quelz, faisans une saillie sur luy, le desfeirent sans propos. Car ce ne fut point comme Cleombrotus qui mourut en la iournee de Leuctres, en faisant teste aux ennemis qui pressoyent fort ses gens, ny comme Cyrus, ou comme Epaminondas, qui pour arrester ses gens qui branloyent, & pour leur donner la uictoire asseuree, receut un coup mortel : car tous ceulx la moururent ainsi que doibt mourir un magnanime Roy, & un uail-lant Capitaine: là ou Lysander s'alla temerairement perdre luy mesme sans honneur, comme un simple aduenturier, ou auantcoureur, tes-moignant que les anciens Spartiates faisoient sagement de foudrir à combattre des murailles, pource que le plus hōme de bien & le plus uail-lant du monde y peult estre tué, non seulement par le soudard premier uenu, mais aussi par

une femme, ou par un enfant, ainsi que lon dit, que le preux Achilles fut mis à mort par Paris dedans les portes mesmes de Troye. Au contraire, il ne seroit pas aisé de nombrer seulement les uictoires que Sylla gaigna en batailles reengees, & les milliers d'ennemis qu'il occit, oultre ce qu'il prit par deux fois la uille de Rome mesme, & le port d'Athenes, non par famine, comme fait Lyfander, mais par force, apres auoir par plusieurs grosses batailles chassé Archelaus hors de la terre ferme, & rengé à la marine : & si fait à considerer contre quelz Capitaines ilz ont tous deux eu affaire : car il m'est aduis que ce n'estoit qu'un esbat & un ieu, par maniere de dire, à Lyfander, de combattre un Antiochus pilote d'Alcibiades, ou de surprendre & abuser un Philocles harengueur du peuple Athenien,

» Duquel la langue en peu d'honneur pref-
 » chante,

» Estoit trop plus que l'espee trenchante :

& que Mithridates, à mon aduis, n'eust pas daigné accomparer à l'un de ses palefreniers, ny Marius à l'un de ses sergens ou massiers : là ou, pour ne nommer point particulièrement tous les autres Princes, Seigneurs, Consulz, Præteurs, Capitaines & Gouverneurs, que Sylla eut à combattre, qui estoit le Capitaine Romain, qui fust plus à redoubter que Marius ? quel Roy y auoit il au monde plus puissant que Mithridates ?

Mithridates ? & des Chefs de guerre Italiens, y en eut il onques de plus belliqueux que Lamponius & Telesinus, desquelz Sylla en chassa l'un, en dompta l'autre, & tua les deux derniers? Mais qui plus est encore que tout ce que nous auons dit, à mon aduis, Lyfander feit tous ces beaux faicts à l'aide de tout son païs: là ou, à l'opposite, Sylla feit les siens estant banny du sien par ses ennemis: & au mesme temps que lon luy chassoit sa femme, qu'on luy demolissoit sa maison, qu'on luy tuoit ses amis à Rome, luy faisoit ce pendant la guerre à milliers innombrables de combatans en la Bœoce, & exposoit sa personne aux hazards de la guerre, dont il demoura en fin uictorieux au bien & à l'honneur de son païs: ne pour alliance particuliere que le Roy Mithridates luy feist offrir, & secours de gens & d'argêt pour aller guerroyer ses ennemis, iamais il ne fleschit, ny ne s'amollic enuers luy, ains qui plus est, ne luy daigna pas parler ny toucher en la main seulemēt, que premier il ne luy eust luymesme dit & promis de sa propre bouche, qu'il quitteroit & laisseroit l'Asie, qu'il liureroit ses galeres, & rendroit les royaumes de la Bithynie & de la Cappadocie à leurs Roys naturels: ce qui me semble auoir esté le plus bel acte que feit onques Sylla, & qui procedoit de plus grande magnanimité, d'auoir ainsi postposé son particulier au public, ne plus ne moins que les chiens de gētil cueur,

qui iamais ne laissent leur prise, ny iamais ne desmordēt, que leur aduersaire ne soit abbatu, & puis apres s'en estre allé poursuyure la uengeāce de ses particulieres iniures. Encore apres tout me semble il, q̄ lon peut iuger quelle difference il y auoit entre leurs deux natures, par ce qu'ilz feirent à l'endroit de la uille d'Athenes: car Sylla l'ayant prise apres qu'elle luy eut fait la guerre forte & ferme pour l'accroissement de la seigneurie du Roy Mithridates, encore la laissa il libre, franche & uiuante à ses loix: & au contraire, Lyfander la uoyant despouillee d'un si bel empire & si grande principaulté qu'elle souloit auoir, n'en eut point de pitié, ains la priua de la liberté du gouuernement populaire, auquel elle auoit de tout tēps au parauāt uescu, & y establit de tres cruels & tres iniques tyrās: pourtant m'est il aduis, que nous ne nous esloignerons pas fort de la uerité, quand nous en ferons ce iugement, que Sylla feit bien de plus grandes choses, mais que Lyfander commeit moins de fautes: & quand nous adiugerons à l'un l'honneur de continence & de temperance, & à l'autre de uaillance & de suffisance au faict des armes.

